

**Шаҳло ҲОШИМОВА**

**АРОСАТДАГИ  
ОДАМЛАР**

Тошкент  
«Akademnashr»  
2018

**УЎК: 821.512.133-3**

**КБК: 84(5Ў)7**

**Ҳ 71**

**Ҳ 71**

**Ҳошимова, Шаҳло.**

Аросатдаги одамлар [Матн] / Ш. Ҳошимова. – Тошкент: Akademnashr, 2018. – 288 б.

ISBN 978-9943-5455-9-5

УЎК: 821.512.133-3

КБК: 84(5Ў)7

*Ушибу китобда Шаҳло Ҳошимова қаламига мансуб қисса ва ҳикоялар жамланган. Уларда инсонлар ўртасидаги ўзаро муносабатларга, жамият ва шахс алоқаларига, кишилар, авлодлар тақдирига куттилмаган нуқталардан назар ташланган. Кенг китобхонлар оммасига мўлжалланган.*

ISBN 978-9943-5455-9-5

© Шаҳло Ҳошимова  
«Аросатдаги одамлар»  
© «Akademnashr», 2018

## Қадрдонлар

### Ҳикоя

Еттида соат қўнғироғи жиринглади.

Толиб одати бўйича қўнғироқдан бурун уйғонган, сал нарида бир меъёрда чиқиллаётган соат милларининг оҳиста сурилиб боришини кузатиб, хаёл суриб ётарди. Нариги хонада эса уй бекаси ҳам минг йиллик одати бўйича тонг-саҳардан туриб олиб, кундалик юмушлари билан фимирлаб юрар эди. Соат миллари, ниҳоят, 7:00 га занг урди. Шу чоққача оҳистагина «чиқ-чиқ»лаб турган соат бирдан уйғониб, безовта жаранглаб кетди...

Толиб бу хонадонга дастлаб отаси билан кириб келган эди. Уларни етмишга яқинлашиб қолган, сочи калта қирқилган, бир вақтлар тўлагина бўлгани сабаб юз териси салқиб қолган ўрис кампир ўзбекча лаҳжада чиройли муловозаматлар билан қарши олди. Эллик йиллик ёстиқдоши дунёдан ўтиб, ёлғизланиб қолган, боз устига, оёқ оғрифидан қийналиб юрган кампир маъқул бир ижарагир истаб эълон берганди.

Баланд бўйли, қотмадан келган, кўзлари каттакатта, нигоҳи майин ва ўйчан, тортинчоқлиги шундоқ-қина кўриниб турган ўн етти ёшлардаги талаба йигитча уй бекасига бир кўринишдаёқ ёқиб қолди. Қизиги, кампир Толибнинг отасига ҳам маъқул келди. Ҳолбуки, ота-бола бунгача бир неча хонадонда бўлишган, ҳеч бири отага ёқмаган, лекин нимаси ёқмагани ҳа-

қида ўғлига изоҳ бермай, уни шаҳар бўйлаб эргаштириб юравериб, охири келиб турган жойлари эди бу ер. Эшикдан киришлари билан кампир уларни ўзбекча салом-алик билан қарши олди. Аммо, Толибнинг отаси рус тилида яхши гапирап экан, у ҳам кампирнинг ҳурмати учун бир-икки рус тилида гапирган эди, кампир унга: «Ўзбекча гапираверинг, сизлар икки киши-сизлар», – деди. Толибнинг отаси кампирнинг фаросатидан чеҳраси очилди.

Бека ўзини Софья Александровна деб таништириди. Толибга эса: «Болам, сен мени оддийгина Соня хола деб чақиравер», – деди. Катталар юзма-юз ўтиришиб ҳол-аҳвол сўрашишгач, ота мақсадга кўчиб, ўғли шу ёшига қадар кўз олдидан бир қадам нари кетмагани, шу боис уни катта шаҳарда ёлғиз қолдириб кетолмаётгани, бирорта ишончли қўлга топширмоқчи бўлгани, агарда бека уни маъқул кўриб жўяли маслаҳатлари билан ўз тарбиясига олса, харажатидан қочмаслигини айтди. Соня хола Толибни меҳрли нигоҳлари билан бир қур эркалаб қўяркан, «Ҳўп, йигитчанинг ўзидан сўрайлик-чи, ўзи нима дейди бу таклифга», – деда кулимсиради.

Толиб отасига қараб, майин кулимсираб елка қисди.

– Э, у нима дерди? – деди ота қўйл силтаб. – Унга қолса, уч-тўртта ўзига ўхшаганлар билан топишиб, «Талабалар ётоғида ўз билганича яшайман», – дейдидда. Ҳали ёш, бирон-бир бемаънининг таъсирига тушиб қолмасин деб қўрқаман...

Мана шу гап-сўзлардан кейин ҳам орадан ўн икки йил ўтиб кетибди. Бу орада Толиб кампир билан неча марта аразлашиб ҳам олди. Алоҳида яшаб ҳам кўрди. Аммо ҳар сафар Толиб Соня холадан кечирим сўпар, Соня хола ичидагина сақламас, муҳими, йигитнинг табиатан юраги тоза, содда ва ҳалол эканини билар,

шунинг учун уни қийнаб юрмай дарҳол кечириб юборади. Уларнинг ғижиллашиб туришларининг сабаби асосан битта эди: кампир уни ўз ўғлидай кўриб, бошқа оналар сингари тергаб турарди. Толиб ҳам худди бошқа ўғиллар каби онаси чизиб берган чизик бўйлаб юришдан зерикар, ўз билганича яшашга ҳаракат қилиб кўрар, Соня хола бундан хавотирга тушиб қолар, боёғиши қоқилиб-нетиб юрмасин деб уни ўз измига солишга тушиб кетар, натижада икки ўртада низо келиб чиқарди. Кампирнинг кўнгли сезган эканми, Толиб бир адашди, адашганда ҳам...

Институтнинг учинчи босқичида Наргиза исмли бир қизни севиб қолди. Табиийки, Соня хола буни дарров пайқади. Толибга қизни кўрмоқчи эканини айтди. Толиб Наргизани холаникига олиб келди. Кўришишди. Соня хола қиз ҳақида очиқ-ойдин фикр билдирамади, аммо унинг уйта келиб туришига ҳам монелик қилмади. Толиб Соня хола билан сирлашар, Наргиза ҳақида гапириб берар, Соня хола эса жимгина эшитарди-да, кейин қизлар билан қандай муомалада бўлиш ҳақида йўл-йўриқлар беришга тушиб кетарди.

Кутилмаганда Соня хола тўнини тескари кийиб олди. Наргизанинг уйта келишини тақиқлаб қўйди. Толиб таажжубда: нима жин урди кампирни?

– Соня хола, нима бўлди, ўзи, ростини айтинг, – деди Толиб.

Кампир аввалига қўл силтаб қўя қолди.

– Ростини айтаверинг, хафа бўлмайман... – Толиб унинг қархисида ўтириб, кўзларига синовчан тикилди.

– Сизларда гумон имондан айиради деган гап бор, тўғрими? Шунинг учунам айтишдан қўрқиб турибман, Толибчик.

– Айтаверинг, тўғри қабул қиласман, Соня хола.

Шундан кейингина кампир ёрилди:

– Чўнтағимдан пул йўқоляпти. Наргизинг олди деёлмайман, лекин ундан бошқа ким бўлиши мумкин? Яқин орада уйимга ҳеч ким кирмади...

Бу жиддий айблов эди. Толиб аввалига ранжиди. Лекин кампирни ёлғон гапиришга нима мажбур қилиши мумкин? Аввалига индамай қўя қолди. Наргиза билан кўча-кўйда учрашиб юрди. Бир куни нонушта пайтида:

– Қизинг билан кўришиб турибсанми? – деб қолди Соня хола қандайдир норози оҳангда.

– Ҳа, бўш вақтимизда, – деди Толиб ажабланиб. – Нимайди?

– Ўзим... Шундай... – Кампир шундай деди-да, ундан кўзини олиб қочди.

Толиб кампирнинг бу луқмасидан ёниб кетиб ҳушёр тортиди.

– Соня хола, нима демоқчи эдингиз?..

– Йўқ, ҳеч нарса...

– Бошладингизми, айтинг-да энди, – деди Толиб қизишиб. – Яна нима қипти бечора қиз?!

Толибнинг заҳарли кесатифидан кампирники ҳам тутди.

– Бечора эмиш! Сен ўйлайсанки, Соня холам уни ёқтирамай қолгани учун ҳадеб куткилаяпти деб. Йўқ, унақа эмас. Мен сени ўйлайман, алданиб қолма дейман. Қизларни билмайсан. Бурнингдан ип ўтказиб, билган йўриғига юргизмасин дейман. Аввалгиси гумон эди, ўз кўзим билан кўрмай гапирган эдим. Энди бўлса...

– Гапиринг. Энди ўз кўзингиз билан кўчада ўғирлик қилиб юрганини кўрдингизми?! Нимани кўрдингиз?!

Кампир бир муддат Толиб қизни чин дилдан севишини ҳис қилиб табиий бу жараён қаршисида ожизлигидан караҳт, гапини нимадан бошлишни билмай

унга тикилиб қолди. Толиб эса Соня холанинг гапни бошлашга бошлаб, жим қараб турганидан баттар жаҳли чиқди.

– Ўша сен бечора деган қизни кеча хиёбонда кўрдим.

– Хиёбонда? Ҳўш, нима қипти?

– Шериги ҳам бор эди, лекин у сен эмас эдинг...

Толиб бир муддат бу нима деганингиз, нимага шама қилмоқдасиз дегандек дами ичига тушиб кетди. Кампирга диққат билан тикилди. Назарида, у кўзини олиб қочгандай бўлди.

– Соня хола, мақсадингиз нима, ўзи?! Ёки кўзингизга мен ландавурга ўхшаб кўриняпманми!? – деди тутоқиб. – Аввалига кўрмай-нетмай ўгрига чиқардингиз, кўнглингизга қараб индамадим. Уйимга келмасин дедингиз, шартингизга рози бўлдим... Мана, келмай қўйди. Шунда ҳам тухмат қилишда давом этмоқдасиз.

– Тухмат эмас.

– Тухмат! Сизнинг бу уйдирмангизга ишонмайман... Ҳеч қачон сиз истагандек бўлмайди. Яна шу ҳам эсингиздан чиқмасин, у сизга ёқиши шарт эмас. Менга ёқса бас. Бақти-соати келса, у билан оила қураман!

– Яхши кўр, уйлан. Мен қарши эмасман. Лекин унга эмас.

– Менга ундан бошқаси керак эмас.

– Мен отангта сўз берганман. Ўз кўзим билан кўрганим учун жим қараб туролмайман. Виждоним қандай йўл қўйисин? Отангта ёзиб юбораман.

Кампир ҳар сафар енгила бошласа ўртага отасини тиқишириарди. Шу билан баъзида Толиб кампирга бўйсунишга мажбур бўларди. Аммо бу сафар Толиб бир лаҳза нима дейишини билмай туриб қолди-да, кейин ўрнидан даст туриб, эшикка йўл олди. Остонада тўхтаб, ортига ўтирилди.

– Ёзинг! Наргизнинг ўгри эканини ҳам ёзинг. Лекин айтиб қўяй: ҳеч ким мени бу йўлдан қайтаролмайди, – деди алланечук совуқ бир оҳангда. Унинг кўз қараашлари ҳам шу тобда қандайдир бегона, у билган Толибжонники эмас эди...

Жаҳл билан кўч-кўронини елкалаб ўша куниёқ То-либ тўғри талабалар ётогига бориб жойлашди. Аввалига бу иши ўзига маъқул тушди. «Аллақачон шундай қилишим керак эди», – деб юрди. «Яхши-да, ҳеч ким тергамайди, қаерга боряпсан, қаердан келяпсан, нега эрта кетяпсан, нега кеч келяпсан... бирон кимсанинг иши йўқ. Келганимга тўрт йил бўптики, ҳалиям ёш боладай кўради. Нафас олдиргани қўймайди. Унисиям майли-ку, шахсий ҳаётингта аралаша бошлашса, кишига оғир ботар экан-да. Ўзи ёмон кампир эмас-ку, бадгумонлиги ошиб тушди. Қизиқ, Наргизнинг нимаси ёқмай қолди унга?! Топган гаплари куракда турмайди. Наргиз келиб-келиб шу нафақаҳур кампирнинг киссасини ковладидими?! Масалан, мен икки дунёдаям ишонмайман бу гапга. Хиёбонда биттаси билан кўрдим дегани эса гирт тухмат. Ўн қадам наридаги одамни зўрга танийди-ю... Ҳа, бошқа қизни кўрган у!. Наргиз бўлиши мумкин эмас. Акс ҳолда, сезган бўлардим...»

Янги шароитда Наргиза билан хоҳлаганча кўришиб, эмин-эркин гаплашиб юраркан, кампирнинг шубҳалари бот-бот ёдига тушар, кўнглига хиралик соларди. Баъзида эса ўз-ўзидан унинг йўл-йўриқларини ҳам эслаб қоларди. «Агар одамни яқиндан билишни истасанг унинг майда-чуйда хатти-ҳаракатларига зимдан разм солиб юр, ана шунда унинг кимлигини билиб оласан», – дерди Соня хола кўравериб кўзи пишиб кетган одамларга хос ишонч билан. Толиб бўлса бунақа насиҳатларни тезда ҳазм қила олмас, индамай эшитарди-да, «Бечора кампир ёмон одамларни кўп

кўрган, шекилли, атрофдагиларга ишонмай қўйган» деган фикрга келарди...

Кейинги пайтларда эса... Толиб ўзи сезмаган ҳолда Соня холанинг бир пайтлар ўргатган йўл-йўриқлари-га кўра Наргизани зимдан кузатишга, гап-сўзлари, қилиқлари магзини чақишига ҳаракат қиласидиган бўлди. Шунда у кампирни бекорга ранжитганини ҳис эта бошлади... Баъзи полотнолар борки, уларни олисдан кўрган маъқул. Яқинлашсанг, бор жозибаси йўқолиб, шунчаки чапланган бўёқлардан бошқа нарса эмаслиги маълум бўлиб қолади. Толиб ҳам, аслида, шундай ҳодисага дуч келган, аммо буни тан олгиси келмас, аниқроғи, «Балки, янглишаётган бўлсам керак, анови мияси суюлган кампирнинг таъсирига тушиб қолаётгандирман» деган илинжда ўзини алдаб юришга чирана бошлаганди. Сабаби, у Наргизани жуда яхши кўрар, ҳаётини усиз тасаввур қила олмасди. Наргиза эса буни англаб, илгари сир тутган айрим қилиқларни тап тортмай бемалол намоён қила бошлаган, Толиб бўлса ич-ичидан зил кетса-да, «Бу ҳаммаси вақтинчалик, эрта бир кун ақли қуялиб, ўзига келиб қолар» деган кўр-кўронга юпанч ва ишонч билан ўзини алдаб келаётганди. Гап шундаки, Соня хола аввалбошда пайқаб, уни огоҳлантирган нарса – майда ўғрилик қиз учун аллаҷон кўниkmaga айланган одат экан. У қўлига ушлаган нарсадан ажралишни истамас ва бир йўлини қилиб ўзиникига айлантиради. Аслида, баъзи ўғирлаган нарсалари унга кераксиз эди. Толибининг назарида, ўғирлик Наргизанинг кўнгил эрмаги эди.

Бир куни бозордан қайтишганида қизнинг харидлари орасидан пуштиранг лаб бўёғи чиқиб қолди. Толиб ажабланди. Кўз олдида Наргиза сотувчи билан нархига келишолмай, жаҳл билан уни жойига қайтиб қўйганди. Сўраса, кулди, «Э, кўрдингиз-ку, жаҳлим-

ни чиқарди, бунақа қурумсоқнинг жазоси шу», – деди бамайлихотир. У эса ҳар сафар Наргизанинг бу қилиғига дуч келганида юрагида бир оғриқни ҳис қилар, «Қандай қилсам уни бу йўлдан қайтара оламан?» – деда ўйларди.

Янги йил арафаси эди. Бир куни Наргиз Толибга: «Юринг, хонада ўртоғим йўқ. У дарсдан кейин қўшшимча дарс олади. Бирга тушлик қиласиз», – деда ўз хонасига таклиф қилди. Улар бирга тушлик қилиб бўлишлари билан Наргизнинг ҳамхонаси Лола кириб келди. Толиб уни кўриши билан қизларни ортиқ безовта қилмаслик учун дарҳол уларнинг хонасини тарк этди. Ўзи эса бу ердан чиқиб, тўғри марказий кутубхонага бориб кейинги имтиҳонга тайёргарлик кўрди.

Кечга томон хонасига қайтди. Илҳом исмли ҳамхонаси эшикдан кириши билан: «Нима бўлди? Қўл телефонинг ишламаяпти», – деди. У кутубхонада қуввати тугаганини, қувватлагич ёнида бўлмаганини айтди.

– Сени ётоқхона участковойи икки-уч марта излаб келди. Қўл телефонинг ишламаяпти. «Тинчликми?» – десам, участковой ҳеч нарса демади. «Хонага кириб келиши билан излаганимни етказинг. Кеч қайтса ҳам олдимга ўтсин. Қутаман», – деди, холос.

Толиб Илҳомнинг бу хабаридан ҳайратланиб, озгина қувват олишга ултурган телефонини чўнтағига солиб, тўғри участковой хонасига кириб борди. Ҳақиқатдан, кеч бўлишига қарамай, участковой хонасида экан. У эшикдан кириб ўзини танитиши билан участковой уни ўтиришга таклиф қилди. Толиб жойлашиб олгач, олдига қандайдир қоғозни қўйиб: «Қизнинг гапларини тасдиқлайдиган бўлсангиз имзо чекинг», – деди. Шу билан бирга, Наргизни хонасида бирга тушлик қилишганлари рост-ёлғонлигини суриштирди. У ҳам қиздан хавотирланиб: «Бирон нарса бўлдими?» – деда саволга

савол билан жавоб берди. Участкавой: «Аввал аризани ўқиб чиқинг, кейин гаплашамиз», – деди.

Аризада ёзилишича, Наргиз билан Толиб хонасида тушлик қилгани ва нимадир бўлиб, анчадан буён сумкасида жамғариб юрган пулинни Толиб олдида яна бир марта санаб сумкасига жойлагани, тушлик қилиб бўлишлари билан бу орада хонага ҳамхонаси Лола кириб келгани, у эса Толибни кузатиш мақсадида қисқа вақтга хонадан чиққанида жамғармаси йўқолгани, хонага Лоладан бошқа ҳеч ким бўлмагани; гумони ҳамхонасидан экани; илгарилари ҳам унинг бу ҳунарини бир неча бор пайқаган бўлишига қарамай, ўртоқлиги боис унинг бу қилигини ҳаммадан сир туттанини, аммо аҳмоқ қиз бу сафар ҳаддидан ошиб кеттанини батафсил ёзган эди.

Толиб аризани ўқиб, ичида Наргизга бир ишониб, бир ишонмай Лолани кўз олдига келтирди, уни яхши танимас, фақат Наргиз орқали бир-икки салом-алик қилганди, умуман, унинг иштироқида содир бўлган бу воқеага бирон нарса дейишга ақли етмай участкавойга қаради. «Аризада кўрсатилган вақтда бирга тушлик қилганимиз рост. Бу орада хонага Лоланинг кириб келгани ҳам рост. Аммо Наргизнинг жамғармасидан хабарим йўқ, балки у ҳақиқатдан хонасида ўтирганимда пулинни олиб санагандир. Ўша пайтда кутубхонага шошаётганим учун аҳамият бермагандирман, бироқ, ишонинг, қизлар орасидаги муносабатнинг қандайлигидан хабарсизман, қолаверса, Лолани бир-икки марта Наргиз орқали кўрганман, холос». «Ҳм, шундайми? – деди участкавой. Бироздан сўнг кўпни кўрган кўзлари билан Толибга тикилиб туриб деди: – Бораверинг».

Толиб участкавой хонасидан чиқар экан, бир неча кун илгари Наргизнинг қандайдир кўйлак олиш ния-

тида эканлиги учун пул сўраганини эслади. «Ҳолбуки, жамғарип юрган пули бор экан. Хўш, нега ўшандан мендан пул сўради?» – дея, қалби қандайдир ноҳушликни сезиб, сим-сим оғриди. Шу заҳоти Наргизга телефон қилиб талабалар бозорчаси ёнида кутишини, ҳозироқ гаплашиб олмаса бўлмаслигини айтди. Қиз эса эртага вақти бўлганида ўзи қўнғироқ қилишини айтиб, қўл телефонини бутунлай ўчириб ташлади.

Толиб хонасига келар экан, бувисининг «Кишига билиб-билмай туҳмат қилиш мусулмончиликда кечириб бўлмайдиган гуноҳ» деган ўгитини эслаб, бир Лолани, бир Наргизни кўз олдига келтириб, ўз аҳволидан ўзи норози кайфиятда хонасига кириб келди.

Ярим кечагача нима қилса тўғри бўлишини ўйлаб ухлай олмади. Эртасига Наргизнинг юзига тик қараб яқингинада ундан пул сўраганини, шу боис унинг жамғармаси борлигига ишонмаслигини айтади. «Қани, шу гап-сўзлардан кейин қиз унга қандай жавоб бераркин? Ҳаммасидан ҳам унга алам қилаётган томони унинг ёрдами билан бирорга туҳмат қилаётгани рост бўлиб чиқса!..» У нимадир қилиб Наргизни бу йўлдан қайтаради. Мабодо у бас қилмайдиган бўлса... билганинг барчасини участкавойга маълум қилишини юрагига тутиб, алламаҳалда уйқуга кетди.

Кеч ухлагани боис ҳамхонасининг ўқишига кетганини ҳам сезмабди. Кимdir эшикни қаттиқ тақиллататоётганидан уйғониб кетди. Бориб эшикни очса, эшик олдида ётоқхона қоровули турарди. У пастда бир киши кутиб турганлигини айтиб ортига қайтиб кетди. Толиб соат саккизга яқинлашаётганини кўриб, дарсга ҳам кечикаётгани боис тезда кийиниб пастга тушди.

Ётоқхона эшиги олдидаги ўриндиқда баşшанг кийинган бир киши Лола билан уни кутиб ўтирган экан. Толиб эшикдан чиқиши билан ҳалиги киши Толиб то-

мон бир-икки қадам ташлаб, қўйл бериб кўришгач уни эшикнинг бошқа томонига қараб Лоладан бироз олис-роққа етаклаб борди. Ўзини Лоланинг отаси дея танишитириб, бир хўрсиниб, уни уйқусидан безовта қилгани учун узр сўради. Толибнинг кўзларига тикилиб нимадир излагандек бўлиб, ниҳоят, гап бошлади:

– Одам ўз боласини вояга етказиш мобайнида маълум маънода унинг нималарга қодирлигини ҳеч кимга айтмаса-да, қалбан билади. Агарда ҳозир мен билган қизимнинг кимчиликларидан биронтаси очилганида юрагим оғримасди.

Ўгрилик қилиш – руҳий касалликнинг бир тури. Аминманки, бу касаллик билан бирон-бир ақли-ҳуши жойида бўлган ота-онанинг боласи оғрийдиган бўлса, улар ҳаммадан сир сақлашса ҳам, биринчи ўринда, ўзлари бундан огоҳ бўлишади... яна билмадим. Гоҳида ота-она боласини ҳаддан ортиқ яхши кўрганида, худди одам ўз камчилигини кўрмаганидек, бу ҳолатни ўзи боласида ҳам такрорлаши мумкин... Туппа-тузук, ўзига тўқ оиласаларда ҳам баъзида болалар ўғри бўлиб вояга етишиши мумкин. Балки, сиз гаплашиб юрган қиз ҳақдир. Лекин ўтинаман, хафа бўлманг, иккисининг орасида нима воқеа содир бўлган, билмадим-у, лекин қизимнинг хатти-ҳаракатларидан унинг пулни олганига шубҳам бор...

Ёмон хабарни эшитишим билан йўлга тушдим. Қиз бола нарса... Агарда, Лола айтганидек, ҳақиқатдан ўртоғи туҳмат қилаётган бўлса ҳам, уни тўлашга розиман. Сабаби, бир андишасиз қиз билан судма-суд юриб, қизимнинг шаъни булғанмасин дейман... Начора, халқимиз бекордан-бекорга айтмаган: «Ёмонга этагинг тегса, кесиб қоч», – дея... Бу гапларимни кўнглингизга оғир олмант, укажон, кўнгил сизники, бу қурғурни тушуниш жуда қийин.

Лоланинг отаси бу гаплари билан Толибни хафа қилмасликка уринарди. Аммо қаршисидаги бу одамнинг анча-мунча нарсага ақли етадиган, кенг фикрлайдиган бир киши эканлигини фаҳмлаб турар, қолаверса, Наргизнинг феъли унга аён, камига, бу машмашага ўзининг ҳам аралашиб қолганидан газаби қайнотига қарамай, охиригача чидаш лозим деган қарорга келганди.

— Кечаки бор гапни қўнғироқ қилиб айтганди Лола. Ёнида пули бўла туриб, ўжар қиз оқибатини ўйламай, қамалиб кетса ҳам, бир тийин бермаслигини эшитиб, кечаси билан йўл юриб тонг-саҳар етиб келдим. Вазиятни тушунтириб зўрга қарорини ўзгартирдим. Иш судгача бориб қиз билан сўришсак енгиб чиқармиз ҳам, аммо, ҳали айтганимдай, эшитган қулоққа яхши әмас. Қолаверса, бу ишнинг оқибати ҳам анча шовшувга сабаб бўлади. Келишимдан мақсад – участкавойдан ўртогининг аризасини қайтартириб олиш. Пулинни тўлаб, ёпиглиқ қозонни ёпиглигича қолдириш. Ёрдам бер, ука, яхши кўрган қизингга айт, участкавойдаги аризасини қайтариб олсин.

Толиб бир хаёли: «Лола тўғри гапирмоқда. Участкавой ишни судга оширса ошира қолсин. Бу аҳволда қозонни ёпиглиқ қолдиргунимизча ҳақиқатни юзага чиқарганимиз маъқул», – демоқчи бўлди-ю, аммо: «Наргиз ноҳақ бўлиб чиқса-чи», – дея ўйлаб:

— Бу гапни участкавойга ўзингиз айтаверинг. У ҳам одам-ку, вазиятни тушунади... Гувоҳ сифатида бу ишнинг судгача бориши менга ҳам уят, – деди кўнглидаги гумонни яна бир бора тасдиқлаб.

Улар бир қарорга келишиб, участкавой хонасига кириб боришли. Бу вақтда участкавой эндигина келиб, эшигини очаётган экан. Олдинма- кетин ичкарига киришгач, участкавой Лоланинг отасининг гапларини диққат билан тинглади. Отаси гапираётганида Лола

пиқ-пиқ йиғлашга тушди, аммо у гапини тугатиши билан Лола отасининг бу гап-сўзларининг биронтасини маъқулламади. Аксинча, «Мени бу юзсиз, иккиюзламачи, ҳеч нарсадан қайтмайдиган ёлғончидан ҳимоя қиласман дея ер билан яксон қилмоқдасиз», – деди йифи аралаш. Участковой ота-болага аҳамият бермай Наргизнинг қўл телефонига бир неча бор қўнғироқ қиласди. Телефон ўчиқ. Шунда яқинда ишга келган ёрдамчи йигитларидан бирини чақириб, Наргизни ернинг тагидан бўлса ҳам топиб келишни буюрди.

Толиб кечагина Наргизни қоралаб аризасини қайтариб олмаса, гувоҳ сифатида рўй-рост борини гапириб бермоқчи бўлганини, энди эса: «Наргизнинг қинфир иши очилиб қолса, нима бўлади?» – дея хавотирга тушиб, ўзини ҳам тушумай қовоғини уйди.

Улар участковой хонасида Наргизни кутиб ярим соатча ўтиришди. Бу орада бир киши хонага кириб келиб ён қўшниси яқинда машина сотиб олгани, қанча ҳайҳайлалганига қарамай, эшиги ёнида тўхташини неча бора гапирса ҳам, ҳар куни бу одатини қўймаётганини айтиб, бунинг учун участковойдан чора кўришини талаб қилиб ариза ёзди. Ниҳоят, бу одам чиқиб кетиши билан ҳайратланганча ҳалиги участковой жўнатган йигит билан Наргиз кириб келди.

Наргиз участковойнинг ёнидан келиб Толибга қарама-қарши ўтирди, унга қиё боқмай, нима гап дегандек қошлиарини чимириб участковойга қаради. Участковой эса гапиринг дегандек Лоланинг отасига юзланди. Лоланинг отаси Наргизни кўриб негадир миқ этмай чўнтағидан қанчадир пул чиқариб унинг олдига қўйди. Наргиз бу нимаси дегандек яна участковойга қаради. Шундан кейингина участковой тилга кириб Наргизга: «Олинг, бу сизнинг йўқотган пулларингиз, санаб кўринг, тўғрими!?” – деди.

Наргиз пулни олиб санай бошлади. Ҳеч ким миқ этмас, хонада қоғоз пулларнинг шиқирлаши эшитиларди, холос. У пулни сумкаласига солар экан, участкавойга қараб: «Тўғри», – деди.

Участкавой Наргизнинг олдига аризасини қўйиб:

– Йиртиб ташланг. Муаммоингиз ҳал қилинди. Умид қиласманки, бошқа бундай муаммолар билан бизнинг даргоҳимизга келмайсиз, – деди киноя билан.

Бу орада Лола аламидан яна пиқ-пиқ йифлай бошлади. Отаси эса чуқур бир-икки хўрсинди. Наргиз аризани йиртиб ташлаши билан:

– Бўшсиз, – деди ўша оҳангда участкавой.

Наргиз шундан кейингина Толибга қараб: «Юринг, кетдик», – дегандек кўз ташлади. Бу орада Лоланинг отаси билан участкавой бир вақтда сигарет чека бошлаганди. Нимадир бўлиб Толибнинг кўзи участкавойга тушди. Назарида, у Толибга шундай нафрат тўла кўзлари билан тамакининг тутунини ичига чуқур-чуқур тортиб қараб турардики, бу қараши билан «Бор ортидан, аҳмоқ, сен шундан бошқасига ярамайсан» деган маънени уқти. Айни дамда, ўзининг Наргиз билан бирга эканини биринчи марта ҳис қилиб, индамай унинг ортидан елкасини қисганча эргашди. Аммо шу заҳоти бувисининг «Бирорга тухмат қилган мусулмонни Худойим у дунёю бу дунё кечирмайди» деган сўзлари юрагини куйдирди.

Кўчага чиқишаркан, иккиси ёлғиз қолишгач, Толиб қизга рўпара бўлиб тўхтади.

– Бу нима қилганинг?! Икки кун илгари пулинг йўқ эди-ку! – деди зардаси қайнаб Толиб.

Наргиз эса пинагини ҳам бузмай, ингичка қошлирини чимириб:

– Лоланинг отаси бойвачча фермер. Бунақангич бойвачалардан шунаقا усул билан пул ундиরмаса,

бошқа йўли йўқ. Қолаверса, ҳеч ким бунинг уйдирма эканлигини пайқамади-ку, – деди.

– Э, менга қара, – деди Толиб тутоқиб. – Улар ҳам масини пайқашди. Фақатгина қизларининг шаънини ўйлаб текшир-текшир қилишмади. Аммо бу муҳим эмас, муҳими бирорга қўрқмай туҳмат қилганинг. Туҳмат – гуноҳ. Ҳеч нарсадан қўрқмасанг ҳам, Худодан қўрқ!

– Бойваччанинг қизини жазоладим. Хоҳлаган нарсасини сотиб олади, хоҳлаган кийимини кияди. Ўзини ҳаммадан баланд олиб, гердайиб юради. Қўшимча дарс олишга ҳам пули бор... Ана энди ҳам бошини тик тутиб юрсин-чи! Ҳаммага айтаман, таниш ўртоқларимнинг ҳаммаси эшигади. Уятдан менга деса ўлиб кетмайдими, – деди.

Толиб қиздан бунақа сурбетликни кутмаганди. У бир нарсани – қиз кундан-кунга, унинг қаршиликларига қарамай, чоҳга судраб кетаётганини ҳис қилиб турган жойида тахтадек қотиб қолди.

Аслида, шу ернинг ўзида ҳаммасини узиш керак эди. Аммо у қиздан кўнгил узолмай охирги зарбага учради...

Институтдан талабалар шаҳарчасига автобусда қайтаётганди. Ойна ёнидаги ўриндиқда ўтириб кўчадан кўз узмай хаёл суриб кетаётган Толиб бирдан ҳушёр тортди. Ўрнидан сапчиб туриб, йўловчиларни туртиб-суртиб олд эшикка қараб юрди.

– Илтимос, шу ерда тушириб кетинг, – деди ҳовлиқиб.

Ҳайдовчи йигит «мумкин эмас» дегандай бош иргади. Кейин кулимсираб, бекат томон ишора қилди.

– Яқин қолди.

Толиб ортга қараб югуриб бораркан, бирдан қадами сустлашди. Йўқ, адашмабди. Наргиза... унинг Наргиза-

си, худди Соня хола айтгандек, у биланмас, бегона бир йигит билан хилват бир ерда гаплашиб турибди. Балки, анови йигит хиралик қилаётгандир, йўлини тўсиб, алдаб-авраётгандир... Агар шундай бўлса, ҳозироқ унинг оғиз-бурнини қонга бўяйди. Толиб бунақа олифталарни энди қўриб турибдими?.. Бирпас сабр қилиб кузатсин-чи, балки, вазият бошқачадир. Шунчаки таниши, курсдоши, ҳатто акасиям бўлиши мумкин-ку. Дарҳол ёмон хаёлга боравермаслик керак.

Толиб дарахтларни панараб секин уларга яқинлашди. Улар бўлса... бемалол қўлтиқлашиб, анҳор бўйига тушишди-да, сув ёқалаб кетишли. Соядай эргашган Толиб энди ҳаммасини тушунди: анови йигит шунчаки таниши эмас, курсдоши, табиийки, акаси ҳам эмас, балки... Бир хаёлда шартта уларнинг йўлини тўсиб чиқмоқчи, «Ҳа, йўл бўлсин, билсак бўладими?» – деб тихирлик қилмоқчи, жанжал қўзгаб, анови бола билан тўйиб муштлашмоқчи ҳам бўлди. Аммо охирги вақтларда Наргизанинг феълидан дили оғрийверганидан ўзига ўзи: «Қиз бунга арзимайди», – дея қайта-қайта такрорлаб, шаҳдидан тушди.

Шундан кейин ҳам негадир шартта ортига қайрилиб кетолмади. Охиригача кўрмоқчи, нимагадир ишонч ҳосил қилмоқчи бўлдими, орада масофа сақлаб эргашиб бораверди. Мана, кутгани (у шуни кутганмиди?!) содир бўлди. Йигит бир ерда тўхтаб, (назокат билан) қизнинг белидан қучди-да, бағрига босди. Лабларидан... Сал нарида муз ҳайкалга айланган Толибни пайқашмади ҳам...

Толиб учун ҳаётнинг ранги йўқолди. Ҳеч ерда қўним тополмас, ўртоқлари орасида қўққисдан ёлғизликни истаб қолар, ёлғизликда эса ҳаво етишмаётгандек нафаси сиқилар, ўзини ўзи тушунмас, бу дунёга қўй силкиган девонага айланганди.

Бир куни у боши айланиб каттагина мебель салонига кириб қолди. Харидорлар йўқ ҳисоби эди. Нима мақсадда бу ерга кирганини ўзи ҳам англамаган ҳолда бир ўриндиққа чўкиб, рўпарасидаги пештахтада териб қўйилган телевизорларга тикилди. Бу орада ёш бир йигит, афтидан, сотувчи бўлса керак, унинг ёнига келиб: «Ёрдам керак эмасми?» – деб сўради. Толиб боши билан йўқ ишорасини қилди. Йигит бироз ҳайрон бўлиб серрайиб турди-да, елкасини қисиб қўйиб ортига қайтди.

Салон жуда шинам, ранг-баранг, қаттиқ-юмшоқ мебеллар дид билан териб қўйилган. Толибнинг эътиборини улардан кўра турли русумлардаги телевизорларда намойиш этилаётган хорижий бир мультфильм тортди...

Бепоён дала. Дехқон жўяқ тортиб, сабзи уруғини сепиб чиқди-да, дала ўртасига қўриқчи ясаб ўрнатди. Куз келиб, кунлар совигач, дехқон сабзиларини йиғишириб олди, қўриқчи эса ҳувиллаган далада сўп-пайиб қолаверди. Қаттиқ шамол туриб, қўриқчига жон кирди. У шип-шийдам далани қўриқлайвериб зерикида Худога: «Нега мени бемақсад яратдинг?» – дея нола қилди. Шу вақт кенг далада бир қуёнча пайдо бўлди. У ёқ-бу ёққа сакраб юриб дехқон қолдириб кетган сабзиларни териб ея бошлади.

Қўриқчи қуённи четдан кузатаркан, унинг қийиқ кўзлари, узун киприкларига маҳлиё бўлиб, ўзича: «Тавба, шунақа ҳам чиройли жонзор бўлиш мумкин экан-да», – дея ҳайратга тушиб, уни севиб қолди. Кейин нима қилиб бўлса-да қуённи даладан кетказмаслик йўлини қидира бошлади.

Қуён эса қўриқчининг аҳволидан бехабар, сабзи тошип илинжида диконглаб юарди. Қўриқчи атрофда қолган-қутган сабзиларни териб-тергилаб қуённинг

олдига келтириб уя бошлади. Қорни қаппайган қуёнча ўйноқлаб уйига жўнади.

Эртаси куни у яна далада пайдо бўлди. Қўриқчи қувониб кетиб, унинг атрофида парвона бўла бошлади. Қуён эса ҳамон бепарво, қўриқчи уни яхши кўриб қолганини хаёлига ҳам келтирмасди. Ошиқ қўриқчи қўшни далаларга ҳам ўтиб кетиб, елиб-югуриб сабзи топиб кела бошлади.

Аста-секин қўшни далаларда ҳам емиш тугади. Қуённинг ҳам қораси ўчди. Қўриқчи бўлса ҳамон дала ўртасида дилдираганча унинг йўлларига кўз тиккани-тиккан эди. Бу орада қорли-қировли, изфирин кунлар бошланиб, қўриқчининг сўнгти умид толалари ҳам узилди. Шунда у Худога шунақсанги нолаю фифон қилдики, еру кўйк ларзага келди. Қаттиқ бўрон кўтарилди ва... қўриқчининг бор-йўқ энгил-бошини юлиб-юлқи-лаб ҳар томонга сочиб юборди...

Толиб узоги билан беш-олти дақиқа давом этган фильмдан қаттиқ таъсирланди. Қўриқчига ачинди, қуёндан эса... йўқ, ранжимади ундан ҳам. «Бунақа бефаҳм, нодонлар ранжишингга арзимайди», – дея пи-чирлади-да, ўрнидан енгил қўзғалиб, ташқарига чиқди. Эшик олдида бирпас иккиланиб туриб қолди: энди қаерга борсин? Дарҳол бир тўхтамга келди. Бўлди, шундай қиласди!..

Соня хола дераза ёнида тикиш қилиб ўтирган экан. Толиб оstonада кўриниши билан тикишини дераза пештахтасига қўйиб, ўрнидан турди.

– Кел, Толибчик.

– Ассалому алайкум, Соня хола, – деди Толиб бироз хижолатнамо алфозда эшикдан ичкарига кирсамми-кирмасамми дея иккиланиб оstonада турганича.

– Салом. Кир, нега бегонага ўхшаб оstonада турибсан?

Толиб кўришгани қўл узатди. Қўли ҳавода қолди. Кампир уни бағрига босиб, манглайидан ўпди. Кейин қаловланиб ичкарига бошлади.

Йўл бўйи ҳадигу хавотирда келган йигитнинг юзи-га қон югуриб, дили ёришди. Ўпкаси тўлиб, кўзига ёш келди...

Соня хола ҳаммасини ижикилаб суриштириб ўтирамади. Ҳаммаси унга олдиндан маълум эди.

– Сени тушунаман, Толибчик. Ёшликда бунақа адашишлар бўлади, – деди кампир очигига кўчиб. – Факат юрагингга яқин олиб юрма. Арзимайди. Яхши қизлар жуда ҳам кўп.

– Э, бўлди, ҳеч қанақаси керак эмас, – деди Толиб қўл силтаб.

– Унақа дема, ҳали ҳаммаси олдинда. Бекордан-бекорга эскилар айтишмаган: «Севгининг кўзи кўр», – дея. Мана, сен ҳам унинг таъмини татиб кўрдинг...

Кампир анча насиҳат қилиб, кўнглини кўтаришга уринди. Толиб, шу тобда юрагига қил сифмаслигига қарамай, бошини қуи солиб уни эшитди-ю, аммо озурда кўнгли кампирнинг гапларидан ҳам юпанч топмай, «Ҳеч ким аҳволимни тушунмайди», – деб ўйлади.

– Ёшим етмишга етиб, бир нарсани тушундимки, – деб қолди Соня хола бир куни ўзидан-ўзи, – юрак бошқа нарсани талааб қиласар экан, ақл бошқа нарсани. Мен ҳаётда юрагимга бўйсуниб яшаб хато қилдим. Эрим Борис ичкиликка ружу қўйганида «Биттагина айби – ичиши» деб уни кечириб келдим. Ўзимни ўзим алдаган эканман. Аслида, юрагимга тупуриб, қайта оила қурсам бўлар экан. Ҳозир болаларим ва уларнинг болалари – набираларим атрофимда парвона бўлармиди...

Кампир бекорга бундай демаётганди. У ҳардамхаёл бўлиб юрган Толибнинг Наргиза билан қайта топишиб қолишидан хавотирда эди. Хавотири ўринсиз эди. То-

либ ҳар қанча севмасин, соғинмасин, сув бўйида гувоҳи бўлган ўша мудҳиши манзарани ҳали унумтаганди. Ҳар гал юраги исён кўтарганида унга ўшани эслатиб сув сепар, совутар эди...

Орадан йиллар ўтиб бу хонадонга отаси етовида кириб келган фўргина йигитчя – Толибдан асар ҳам қолмади. Отасидек баланд бўйли, елкадор, қарашла-ри жиддий, гарчи сухбатдошини сабр билан жимгина тингласа-да, ҳадеганда унинг таъсирига берилмайдиган, қатъиятли бир йигитта айланди. Институтни аллақачонлар тугаллаб, бир неча йил ишлаб қўйишга ҳам ултурган эди. Энди унинг учун Соня хола илгариgidек ижарачи уй бекаси эмас, энг яқин ҳамдарди, жонкуяр маслаҳатчиси, меҳрибон онасидай бўлиб қолганди. Кампир ундан ижара пули олмай қўйган, Толиб бўлса уйнинг барча тўловларини ўзи тўлар, керакли жойларини таъмирлар, хуллас, оила эркаги хонадонда нималар қилиши керак бўлса, ҳаммасини амалга оширади.

Бу йиллар орасида Соня холанинг ёши саксондан ошиб, қариллик асарими, инжиқлиги янаем ортди. Толиб эса, аксинча, энди аввалгидек жаҳл қилмас, кампирга нисбатан бағрикент, у нима деса, сизники маъқул дегандай кулимсираб қўяр, гоҳ-гоҳида кўз олдиди қариб қуриб бораётганидан ачиниб: «Э, онам-а, ўзимнинг онагинам-а», – деганча бағрига босиб, эркалаб қўярди. Уларнинг она-боладек бўлиб қолишганига қўшни аёл Тоня бувининг ҳаваси келиб, баъзида эри Альфред амакига: «Қариганимизда бизга ҳам Толибга ўхшаган суюнч керак бўлади, балки, биз ҳам мусофир талабалардан бирини олиб тарбиялармиз», – дея маслаҳат солиб қоларди. Альфред амаки эса: «Тоня, безовта бўлма! Сен қарисант ҳам, мен қаримайман, ҳамиша сени кафтимда кўтариб юравераман», – дер-

ди-ю, лекин ўзи ҳам ич-ичидан Толибдек бир йигитча ёнида бўлишини жуда-жуда хоҳларди...

\* \* \*

Толиб бир асабий жаранглаб, сўнг яна тинчиб, осуда чиқиллашга ўтган соат милларига кўз тикканча хона сукунатига қулоқ солиб ётаркан, тонгдаги бу одати, бир зайлдаги осуда жараён қачон бошлангани, қачондан бўён давом этаётганини эслашга уринди. Сабаби, илгарилари Соня хола аzonдан телевизорни ванғиллатиб қўйиб, дунё янгиликларини эшитганча уй юмушлари билан куймаланиб юради. Кейинги вақтларда янгиликларда тез-тез қайсиdir мамлакатда бошланган ёки давом этаётган урушлар ҳақида кўпроқ гапирадиган бўлиб қолишиди. Бу хабарлар кампирга оғир ботар ва ҳар сафар санам олдида чўқина бошлиши билан, «Наҳотки, уруш бошлаётган одамлар Худодан қўрқишишмаса?» – дея ўзига ўзи савол берадиган бўлиб қолган эди. Охири бундай совуқ хабарлардан безиб, янгиликларни кўрмай, эшитмай қўйди. Ҳатто куннинг бошқа вақтларида Толиб билан бирга телевизор кўриб ўтирганларида ҳам бирон нохуш янгилик берилиб қолса, у йигитдан кечирим сўраганча телевизорни ўчирап ёки бошқа каналга оларди.

– Биласанми, – деди у бир куни болалиги кечган уруш йилларини эслаб. – Икки укам билан атрофимизда мина портлаб ётган ўликлар орасида бир неча кун яшаганмиз. Мен тўққизда, Лёша тўртда, кичик укам Коля бор-йўғи уч ёшда эди. Ўшанда самолётлар роса бир ҳафта давомида қишлоғимиз устида гувиллаб учиб бомба ташлади. Уйимизга бомба тушганида биз ҳовлида ўйнаб ўтирган эдик. Онам билан бувим эса ичкарида эди. Отам урушда, биз уч норасида эса эга-

сиз қолдик. Укаларимнинг очликдан, қўрқувдан ола-кула бўлиб кетган кўзлари ҳали-ҳамон кўз ўнгимдан кетмайди. Яхши одамлар бизни топиб, поездга чиқа-риб юборишиди. Тошкентга келиб қолганмиз ўшанда...

Соня хола бир зум жимиб қолди. Қулт этиб ютинди. Нафасини ростлаб олиб, давом этди:

– Ҳозирги ёшлар тасаввур ҳам қилолмайди. Ўша лаънати уруш сабаб, эҳ-ҳе, қанча одам ғарбдан шарқ-қа кўчирилди ва жон сақлаб қолди. Энг ёмони, одамлар ўша кунларни унутишиди, бу яхшимас... Биз чиққан узундан-узун эшелон совуқдан дилдираган, очликдан силласи қуриган турли миллат болалари, қариялар, ярадорлар билан тўлиб-тошган эди. Вагонда фақат ўтириб кетиш мумкин, ётишга жой йўқ. Ёнимизда ярадор бир аскар ҳам бор эди. Илгари яралангандা ҳам Тошкентда бўлган бу аскар йўл-йўлакай бизни овутиб келди. «Тошкент – нон шаҳри, ҳали кўрасизлар, ҳаммаси яхши бўп кетади, тўйиб-тўйиб нон ейсизлар!» – деб эртакнамо воқеаларни гапириб берарди. У сут, қатиқ, асал ҳақида, узум, олма, ўрик, қовун-тарвузлар ҳақида гапирганида... ҳалигача яхши эслайман, вагон тўла бола – ҳаммамиз оғзимиз ланг очилиб, жон қулоғимиз билан тинглаганмиз, бемажол танамиз қайта жонлангандай бўлган... Қейин ўз кўзимиз билан кўрдик ҳам. Эртак деб билганимиз ростга айланди. Бағрикенг ўзбек ўшанда миллионлаб болани ўз бағрига олди. Бир йўла шунча болани «Болалар уйи»га жойлаб бўлмасди. Вокзалда бизни минг-минглаб тошкентликлар кутиб олишди. Шу ернинг ўзида кўпчилигимиз шаҳар бўйлаб тарқалиб кетдик. Икки укамни қўлидан маҳкам тутиб, атрофга ётсираб қараб, рўйхатдан ўтиш учун навбатда тургандим. Қорамагиздан келган, озгин, бўйи баланд, рўмолини маҳкам танғиб олган бир кампир олдимга келиб, ўзини Эшон ойим дея таништирди.

Ўзбекчани билмайман. Аммо ўшанда унинг: «Булар укаларингми?» – деб сўраганини тушундим. Бош иргадим. Эшон ойим чўнтагидан уч бўлак қанд чиқариб бизга узатди. Кейин қўлимииздан тутганча рўйхат қилаётган кишининг олдига бошлаб бориб, нималардир деди. Бизни тезда рўйхатдан ўтказишиб, қандайдир қоғозни Эшон ойимнинг қўлига тутқазиши. Сўнгра унинг етоварида эски шаҳардаги бир ҳовлига кириб бордик. Эшон ойим бу ерда ёлғиз қизи – элликларга кирган, оила қўрмай ўтаётган Мактуба опа билан яшар экан.

Эшикдан кириши билан Эшон ойим қизига баланд ва хушчақчақ оҳангда бир нарсалар деди. Қизи ҳам хурсанд бўлиб кетиб, бизни битта-битта қучиб ўпди. Кўзда ёш билан бошларимизни силади. Кейинчалик унинг айтиб беришича, Эшон ойим унга: «Мана менинг набираларим, бу сенинг қизинг, булар эса ўғилларинг. Энди ўлсам ҳам армоним йўқ. Тобутимни кўтарадиган йигитларим бор», – деган экан. Сабаби, ўшанда Ўзбекистонда бирон-бир эркак қолмаган, ҳамма эркаклар урушга кетган, борлари ҳам майиб-мажруҳ бўлиб қайтган ва оғир ишга ярамайдиган қариялар эди.

Мактуба опам онасига ўхшаб кетар, новча, иккита қилиб ўрилган узун, тим қора соchlарига оқ оралай бошлаган эди. У катта-катта шаҳло кўзлари билан бизга бошдан-оёқ қараб чиқди-да, онасига қараб нимадир деди. Йиллар ўтиб опамнинг айтишича, «Майлими болаларимни бир чўмилтирсам?» – деган экан ўшанда...

\*\*\*

Толиб ўрнидан турди. Кираверишда эшик ёнидаги биринчи хона уники бўлиб, ундан кейин ҳожатхона, ванна, меҳмонхонага келар, меҳмонхонадан эса ошхона ва ойнаванд балконга чиқиларди.

Соня хола қишин-ёзин равонда эди. Эни уч, бўйи етти метрли балконда турли-туман хонаки гуллар бирин-кетин очилиб ётар, ёруғ ва ҳавоси енгил, қолаверса, бу ерга уйнинг орқа томонидан ўтадиган марказий кўча шовқинлари эшитилмасди. Шинам балконда кампирнинг дивани, бир четда тикиш машинаси ва чоғроққина китоб жавони, унинг ёнида эса кичкинагина ёзув столи турарди. Балкондан меҳмонхонага ўтиларди. Бу ерда иккита ёнма-ён оромкурси, битта диван, унинг рўпарасида эса телевизор қўйилган эди. Хонага каттакон Хива гилами тўшалган бўлиб, бу ердан деразаси кўчага қараган ошхонага ўтиларди. Депраза ёнида овқатланадиган стол ва иккита бир-бирига рўпара қўйилган курси бўлиб, барча ошхона тақиртуқурлари ҳам шу ерда эди.

Толиб ювиниб ошхонага кирганида Соня хола одатдагидай нонушта тайёрлаб қўйганди.

– Тонянинг эри ўтган куни юрак хуружига чалинган эди, – деди у Толибнинг олдидаги пиёлага чой қуяркан. – Тез ёрдам чақирдик, дарҳол касалхонага опкетишиб, операция қилишди. Врачларнинг айтишича, вақтида етказиб борибмиз. Ҳозир соғлиги анча яхши, аммо Тонянинг аҳволи ўзингга маълум, югар-юрга ярамайди. Онасига ҳам егулик олиб бориб туриши көрак. Шуни сендан кеча илтимос қилувди, нима дейсан?

Толиб стулга орқа бериб ўтирас экан, стол тагида ўзига мўлтираб қараб турган мушукка кўз ташлаб қўйиб:

– Ҳозир аҳволи яхшими, ишқилиб? – деди.

– Ҳа, хавф ортда қолган эмиш. Яхши томонга ўзгариш бор, – дея гапирганча Соня хола музлаткичдан сут олиб ўзи ва Толибнинг идишларига қуйди. Бу орада мушук миёвлаганча Соня холанинг оёқларига суйкала бошлади.

– Ҳозир, жиндай сабр қил, жонивор, – деди Соня хола мушукни оёфи билан сал нари суриб.

Толиб қия очиқ дераза пардасидан тинимсиз физиллаб ўтиб-қайтаётган машиналарга ўйчан термилиб ўтираркан, ўтган иили Альфред амакининг етмиш беш йиллигини қандай нишонлашганини эслади. Қеинин Соня холани тинчитиш мақсадида:

– Биласиз-ку, Тоня хола, Альфред амакилар хизматига ҳамиша тайёрман, – деди, одати бўйича дераза пардасини каттароқ очиб қўяр экан.

– Ҳа, яхши. Надя бувидан хавотир олмасак ҳам бўлади, борингга шукр, – деди Соня хола мамнун бир қиёфада.

Толиб бўлса унга қулимсираб қараб қўйди-да, атанин пардани яна каттароқ очиш учун торта бошлади. Соня хола ҳамишагидек Толибнинг қўлига бир урдидা, пардани орқасига тортиб кўча кўринмайдиган қилиб бекитиб қўйди.

– Тушунмайман, ўн икки йилдан бери пардани мен ёпаман, сен очасан, – деди зарда билан.

– Менам ўн икки йилдан бери сизга тушунтираман, тушунмайсиз: менга кўчани томоша қилиш ёқади, Соня хола, – деди Толиб ранжиган қиёфада.

– Бир куни шу пардани бутунлай олиб ташлайман, – деди Соня хола ҳам ёлғондакам қовоқ уйиб.

– Э, қачон келаркан ўша кун? – деди Толиб хўрсаниб. – Юрагим сиқилиб кетяпти.

– Кечқурун қачон қайтасан? – деди Соня хола пардага ортиқ эътибор бермай.

– Бугун навбатчи эмасман, агар керак бўлиб қолсам, қўл телефонимга қўнгироқ қилинг, – деди ўрнидан тураркан.

Соня хола: «Яхши, вазиятта қараб иш тутаман», – деди-да, столни йифиширишга тушаркан, оёfigа суй-

калган мушуги Марсикка кўзи тушди. «Э, сен ҳали нонушта қилмадинг-ку», – дея уни қўлига кўтариб олди.

Бир пайтлар Соня хола уни кўчадан топиб келганди. Мана, ўн йилдирки Марсик шу хонадоннинг учинчи аъзоси. Шунча йил ўтиб ҳам унинг бир ёввойи одатини йўқотиб бўлмади: уйда бегона одам пайдо бўлиши билан ҳожатхона ёки ваннанинг тагига кириб беркиниб олади. Уни меҳмонга таништиришга уриниш бефойда, минг чақиринг, токи унга бегона кўринган одам чиқиб кетмагунча беркинган жойида дир-дир титраб ўтираверади. Ким билсин, ўша бир пайтлар кўчада юрак олдириб қўйгандир... Соня хола унга яхши тарбия берган: ҳеч қачон столга сакраб чиқмайди, ўзига алоҳида ажратилган жойда овқатланади. «Кўрдингми, Марсик мен чизган чизиқдан чиқмайди, – дейди кампир Толибга ярим ҳазил қилиб, – сендан тартиблироқ...»

Толиб кийимини алмаштириб, юқори қаватда яшайдиган қўшниси Тоня бувиникига чиқди. Тоня буви уни кутиб ўтирган экан, эшикда кўриниши билан чехраси ёришиб ўрнидан турди.

– Яхши бўлди келганинг. Қўлинг тегмаса, нима қиласлар эканман, кимга илтимос қиласканман деб безовталаниб тургандим...

Бу хонадон ҳам Толибга қадрдон бўлиб қолган. Эрхотин иккиси ҳам уни яхши кўришади. У Тоня бувининг касалманд экани, ўпкасининг ярми олиб ташлангани ҳақида Соня холасидан эшитган ва уникига кўчиб келган кунининг эртасига Соня хола тайёрлаган тансик бир таомни кўтариб чиққанида кўзлари ичичига ботган, ранги синиқсан Тоня бувини тўшакда ҳолсиз ётган ҳолда кўрган эди.

Кампир Толибни кўриб, тўшакда ётганига қарамай, ўзини эплашга урингани, кулишга тиришгани йигит-

да унга нисбатан қандайдир хайрихоҳлик, ҳурмат уйғотганди. Эри Альфред амаки бўлса хотинига бегараз ҳазил қилган, «Қара, Тоня, сени қандай чиройли йигит излаб келди», – дея Толибни кулимсираб қарши олганди.

Эр-хотин иккаласи ҳам тарихчи, биргаликда илмий иш олиб боришган, Ўрта Осиё тарихини жуда яхши ўрганишган ва жавонлари тарихга тааллуқли илмий, бадиий китобларга тўлиб кетган эди. Улар Толибнинг самарқандлик эканини билишгач, бир-бирларига қараб, Темур дунёга ҳукмронлик қилган вақтида жамики ўқимишли зиёлиларни Самарқандга тўплагани камдек, чиройли аёлларни ҳам олиб келгани, шунинг учун ҳам ҳозир уларнинг қаршисида шунақсанги чиройли йигит турганини бир-бирларига тушунтира кетишишганди. Бу суҳбатни ўшанда Толиб анграйиб туриб эшиттганди. Сабаби, у ўзбек халқи тарихида Амир Темур қандай рол ўйнаганини яхши билса-да, аммо ўзи ҳақидаги бунақсанги суҳбатни биринчى эшитиши эди. Бора-бора Толиб бу икки илм фидойисини жуда яхши кўриб қолди. Қолаверса, ўзининг журналистикада ўқигани, тарихга яқинлиги учун уларнинг суҳбатларини жон қулоги билан тинглар, қариб, мункиллаб бораётган бу қарияларга таянч бўлишга интиларди...

Толиб, гарчи ишга шошилаётган бўлса ҳам, Тоня бувининг кўнгли учун ичкарига кириб, диванга ўтириди.

– Кутимаганда амакинг ўсал бўлиб қолди, шукр, ҳозир бироз тузук, – деди, Тоня буви унинг рўпарасидаги ўриндиққа чўкар экан. Бир-бирларига бир муддат унсиз тикилиб туришди. Толиб камгап ва тортинчоқ бўлгани учунми, бунақсанги вазиятлардан қутулиб чиқишини билмас, бирорвнинг кўнглини кўтариш мақсадида қилинадиган ёлғон муомалага эса уқуви ҳам,

тобу тоқати ҳам йўқ әди. Шунинг учун оддийгина қилиб:

— Мана, кўрасиз, Альфред амаки ўз оёғи билан кириб келади, — деди қўзига ёш олаётган Тоня бувини тинчлантириб. Орага оғир сукунат чўқди. — Ишга кетаётган әдим, — деди Толиб чайналиб.

Тоня буви уни ишга шошиляпти дея ўйлаб ўзига ярашмаган чаққонлик билан ўрнидан сакраб турганча ошхонадан онаси учун тайёрлаб қўйган егуликни кўтариб чиқди. Кейин унинг ортидан остонаяда унсиз, аммо миннатдор нигоҳлари билан кузатиб қолди.

Толиб Альфред амакининг ётиб қолганидан, Тоня бувининг ранг-рўйи бир ҳолдалигидан безовталаниб кўчага чиқаркан, «Ҳозирча улар бир-бирига суюнади. Бордию бири ўлиб-нетиб қолса-чи?!» деган ўйлар билан бораарди. Бекатда одам тирбандлигини кўриб Надя бувиникига пиёда боришни маъқул кўрди...

Надя буви ҳам бир пайтлар уч яшар Тоняни етаклаб худди Соня хола сингари Тошкентта келиб қолган. Орадан кўп ўтмай унинг баҳти чопиб, урушда бир оёғини қолдириб келган ўзбекка турмушга чиққанди.

Соня холанинг айтишича, чол-кампир жуда аҳил яшашган. Афсуски, фарзанд кўришмаган. Тоня эса уларнинг яккаю ёлғиз овунчофи бўлиб, чол ўлаётганида унга: «Ҳар қандай вазиятда ҳам онангни ёлғиз қолдирма», — дея васият қилиб кетган экан.

Тоня буви ҳам чолни ота деб атаган ва ҳамиша уни чуқур эҳтиром билан хотирларди. Надя буви чоли ўлганидан сўнг таркидунё қилган девонага ўхшаб қолган, таъби тортса, ким биландир сухбатлашар, таъби тортмаса, ҳеч кимни яқинига йўлатмайдиган одат чиқарганди. Айниқса, охирги вақтларда куёви Альфред амакини негадир кўрарга кўзи йўқ әди. Толиб бунинг сабабини билмас ва қариялар орасидаги баъзи бир

гап-сўзларга унчалик аҳамият беравермас, ҳаммаси-ни бир хилда яхши кўрар ва шуни сезардики, улар ҳам Толибни худди шундай яхши кўришарди. Хусусан, Надя буви Толибга бошқача кўз билан қаарарди. Толибни илк бор кўрганида:

– Раҳматли чолим ҳам келишган одам эди. Балки, болаларимиз бўлганида сенга ўхшаб хушбичим, чи-ройли йигитлар бўлишармиди, – деган эди. Шунинг учун Надя буви инжиқлик қилиб Тоня бувига эшигини очмай қўйса, кампирлар ўзларича маслаҳат қилишиб унинг олдига Толибни жўнатишарди.

Надя буви жуда қариб қолган, юзлари тиришиб кетган, кўзларини ажиндан зўрга очар, аммо гавдаси-ни тик тутар, ҳамиша ясама тишларини қўйиб юрган-лиги учунми, талаффузи аниқ, овози ҳам жарангдор эди.

Надя буви Толибга эшигини очар, уни столга ўтқа-зиб, олдига тансиқ егуликларни қўяр, хотирасининг пучмоқларида мудраб ётган эри ҳақидаги хотираларни уйғотиб, гапириб бериб ўтиради.

Надя бувининг ёши аллақачон юздан ошиб кетган, эси ҳам кирди-чиқди бўлиб қолган. Баъзида бир кун олдин гапириб берган ҳикоясини эртасига ҳам так-рорлайверадиган одати бор эди. Сабрсизлик қилаёт-ганингни пайқаб қолса, зардаси қайнаб, уйидан қувиб соларди. Толиб кампирнинг феълини билгани боис эшик олдидаёқ иши кўплигини баҳона қилиб хайрла-шишга ҳаракат қилар, баъзи-баъзидагина, шунда ҳам дам олиш кунлари унинг илтижоли қистовларига йўқ деёлмай, ичкарига киар ва сабр билан ҳасратли ҳи-кояларини эшлишга мажбур бўларди.

Қариялар Надя бувининг янгидан-янги инжиқлик-лари, кексаларга хос ҳийла-найранглари олдида нима қиласларини билмай, боши берк кўчага кириб қоли-

шар, шундай вақтда улар Толиб ёрдамида вазиятни енгиллаштиришарди. Кампир Толибни кўрганида юмшар, худди қалб сирини ошкор қилаётгандек йигитчанинг қўнғир соchlарини ўйнашни яхши кўрарди. Толиб ҳам кампирни ҳар қандай шароитда ҳам ранжитмасликка, нима биландир қўнглини қўтаришга интиларди. Аммо Надя бувининг феъли тез айниб, бўлар-бўлмасга зардаси қайнар, натижада ҳеч бир сабабсиз Толибга ҳам ҳатто эшикни очмай қўярди.

Шунда Толиб тутақиб кетар, «Энди мен у ерга қадамимни босмайман, тентак кампир эшигини ҳам очмади», – дея бақириб берар, шунда Соня хола ҳам: «Ҳали юздан ошганингда ўзингам қанақа тентакка айланиб қолганингни, миянг қандай айниб қолишини кўраман», – дерди бўш келмай.

Толиб йўл-йўлакай кўз олдида қариб, мункиллаб бораётган бу тўртала қарияни ўйлаб бораркан, «Taқдир дегани шу экан-да, Надя буви эри билан болали бўлишни қанчалик истамасин, уларни Худо фарзанддан қисган. Бу ёқда Альфред амаки ва Тоня буви-чи, қолаверса, ўзининг Соня холаси ҳам бефарзанд», – дерди ўзича ачиниб. Соня холанинг айтишича, эри Борис ичкиликка берилган. Кампир эса унга аччиқ қилиб, яъни майиб-мажруҳ болали бўлганидан бефарзанд ўтишни маъқул кўрган. Яна айтишича, вақтида ажралиб, бошқа оила қуришни ҳам хаёлидан ўтказган-у, бироқ Борисини кўзи қиймаган. Уни ёлғиз ташлаб кетса, аҳволи нима кечади деб оғирликни ўзига олган.

Толиб оиласи беш фарзанднинг тўнгичи эди. Уларнинг қишлоғида ҳар бир оила серфарзанд бўлишга интилади. Гарчи ота-оналарнинг топиш-тутиши ўзига яраша бўлса-да, улар учун яшашнинг моҳияти ўзларидан покиза насл қолдириш ва уларни одобли, ахлоқли қилиб вояга етказишдан иборат. Болалар

бир-бирларининг кийим-кечакларини кийишиб, ишга яроқлилари ота-оналарига кўмаклашишади. Бефарзанд оилалар ҳам йўқ эмас-у, аммо онда-сонда учрайди. Толибларнинг уйи рўпарасида эски бир ҳовли бўлиб, унда бефарзанд чол-кампир яшашарди. Олдин чол, икки йилдан сўнг кампир дунёдан ўтди. Ҳовли кимсасизликдан нураб тўкила бошлади. Қишлоқ оқсоқоллари маслаҳатлашиб, камбағал бир оиланинг ўғлини шу ҳовлига жойлаб қўйишиди.

Ёш оила бу ерда чамаси икки йилча туришган бўлишса-да, фарзанд кўришмади. Шунда улар ҳам бу ҳовлини ташлаб қаергадир кўучиб кетишиди. Ҳовлини аввалига ўт-алаф босди, бора-бора деворлар ёғин-сочин остида бутунлай нураб тўкилди. Одамлар: «Бу уйга қарғиш теккан», – дея ирим қилиб ҳовлига тегмадилар... Ҳовли бора-бора тупроқтепага айланди...

Шу хаёллар билан Надя бувининг уйига етиб келган Толиб: «Бу қишлоқ одамлари ўйлаб топган шунчаки бир ирим», – дея ўз-ўзича минғирлаб қўйди. У эшик қўнгириғини босиб, бироз кутди. Ичкаридан қадам товуши эштилди. Надя буви эшикни қия очиб, Толибнинг юзига қарамай унинг қўлидан овқат солинган идишни оларкан:

– Нега Тоня келмади, касал эмасми? Ё эри рухсат бермадими? Ҳа-ҳа, тушундим, улар менинг ўлишимни кутавериб чарчашди, – деганча темир эшикни қарсиллатиб ёпди.

Толиб энди ортига қайтаётган эди, эшик яна очилиб, кампир нималардир деб саннай бошлади. Толиб турган жойида тўхтаб, қулогқ солди. Кампир ундан: «Келгуси якшанбада келишга вақтинг бўладими-йўқми?» – дея сўраётган эди. Толиб: «Бўпти, келаман», – деди-да, йўлга тушди. Ортидан эшикнинг қарсиллаб ёпилгани эштилди.

Толиб хонасига кириши билан бир чеккада ниманидир ёзиб ўтирган ҳамкасби Содиқ бошини компьютердан кўтармай бош муҳаррир уни икки-уч йўқлага-нини айтди.

— Тинчликмикан?

— Э, бирор топширифи бўлса керак-да. Котибаси дам-бадам қўнгироқ қип ётиди, — деди Содиқ ишидан бош кўтармай.

— Ҳа, кечикиб юрибсиз, Қодиров, — деди бош муҳаррир Толиб эшикда қўриниши билан, кейин жавобини кутмай муддаога ўтди. — Хўп, сизга шошилинч топшириқ бор. Шаҳардаги охирги ҳафтадаги автоҳалокатлар тўғрисида икки қоғозлик мақола тайёрлай-сиз. Қечга столимда бўлсин...

Толиб бўпти дегандай бош иргаб қўйиб, ортига қайтди.

Таҳририятда эрталабдан иш қайнайди. Ҳамма ўз юмуши билан банд, бирор бирорвга эътибор бермайди. Бошлиқдан тортиб кичик ходимгача вақтини қизга-нади.

Тушдан сўнг, газета босмага топширилгач, иш биророз енгиллашади. Ходимлар хиёл эркин нафас олишиб, бир-бирлари билан ўтириб чой ичишади, шахмат ўй-нашади.

Толибнинг бу ерда иш бошлаганига тўрт йил бўлди. Унинг бу газетага ишга келиши қизиқ бўлган. Айрим курсдошлари каби таниш-билиш қидириш, орага одам қўйиб қўнгироқ қилдириш хаёлига ҳам келмай, тўппа-тўғри кириб бораверган.

Ўшанда қабулхонада ёши элликлардан ошган, тепакал, оқ-сариқдан келган тўлагина бир киши эшикка тикилганча ўйланиб ўтирган экан. Толиб эшикни

ярим очиб, рухсат сўради. Ҳалиги киши бирдан тетикланиб:

– Киринг, йигитчА! – деди кўтаринки оҳангда.

– Мен бошлиққа кирмоқчи эдим...

– Бош муҳаррирга демоқчисиз-да, – деди ҳалиги киши қулимсираф.

Толиб қизариниб бош иргади.

– Улар йўқ эдилар-ку. Бугун бўлмас эканлар. Ўти-ринг, ўтиринг, қани. Ҳўш, гапиринг-чи, нима иш билан келдингиз?

Толиб бир чеккадаги стулга омонат чўкиб, бир қурхонани кўздан кечирди. Қабулхона кенг ва ёруғ. Столда бир йўла уч телефон бўлиб, аллақандай қофозлар қалашиб ётарди.

Ҳалиги киши пиёласига чой қуийб олди-да, кейин стулига ястаниб, уни ошкора синчковлик билан кузата бошлади. Толиб ёшлиқ қилиб кўрсатилган жойга ўтиришга ўтириб олди-ю, лекин ичидА «Бошлиқ келмаса, нега бу ерда ўтирибман?» деган хаёлга борди. Бунинг устига, манови одамнинг қаттиққина нигоҳидан ўнгай-сизлана бошлади. У бекорчиликдан зерикиб ўтирган эканми, текин қулоқ топилганидан гапга тушиб кетди. Аслида, бу касбдан узоқ эканини, бу ерга эса шахсий бир иш билан келиб турганини, бошлиқ яқин ошнаси эканини, бир оғиз илтимос билан уни ишга киргиза олиши мумкинлигини, аммо ўзи журналистика касбни ёқтиирмаслигини гап орасида қистириб ўтди. Охирги гапи Толибга – не-не хаёллар билан келиб турган бошловчи журналистга оғир ботди.

– Сиз нега ёқтирмайсиз, билмадим-у, лекин журналист жамият учун керакли шахс, – деди ранжиганини яширмай.

– Сизга ҳавасим келяпти, – деди сухбатдоши унинг оғизидан гапини илиб кетиб. – Ёшсиз, қараашларингиз

тоза. Аммо қачонгача? Ҳали кўрасиз, ҳаммаси кўз ўнгингизда бутунлай ўзгариб кетади. Мақолалар ёзасиз, нима учун: шон-шуҳрат ёки оддийтина қалам ҳақи учун. Агар ўшанда ўзингизга ўзингиз тўғри баҳо бера олсангиз менинг ҳақ әканимга ишонасиз. Шуни билиб қўйингки, дўстим, жамиятда ҳеч қачон, ҳа-ҳа, ҳеч қачон, ҳаттоқи ривожланган давлатларда ҳам демократия йўқ. Бу гояни ўйлаб топган одам агар ҳозир тирик бўлганида ўзи ҳам менинг фикримни тасдиқлаган бўларди. Чунки миллионлаб одамни бир тузумда ушлаб туришнинг ўзи демократияни инкор этади. Энди журналистга келадиган бўлсақ, у кимнинг аравасига ўтираса ўшанинг қўшигини айтади. Шундай экан, уларнинг ҳамиша йўқ нарсалар ҳақида фикр юритиши сиёсатни тушунадиган ҳар қандай кишининг ғашига тегади. Энди ўйлаб кўринг, журналистнинг жамиятда қандай ўрни бор? Қолаверса, бугунги кунда одамлар керакли ахборотни радио, телевидение, интернет тармоғидан олмоқда. Бадиий асар ўрнини эса кино эгаллаган. Хўш, газетанинг кимга кераги бор? Бугун кимлар ўқиляпти газетани? Нима кераги бор шунча сарф-харражатнинг?..

Толиб ҳар бир сўзини ички бир оғриқ ва катта бир тажриба эгаси сифатида гапираётган бу одамни яхши тушуниб турган бўлса-да, унинг қайси ўринлардадир ноҳақ әканини, аламзадалик билан фикр юритаётганини англаб турар, ич-ичидан бир эътиroz тошиб келлар, бироқ ички бу эътирозини сўз билан ифодалаб беришга қурби етмасди. Охири чидай олмади, ёшлиги, қизиққонлиги боисми:

- Нима бўлганда ҳам ҳали ҳаммаси сиз айтгандек эмас, – дея гап бошлади бўғриққан овозда.
- Китобнинг ҳам, газета, журналнинг ҳам ўз ўрни бор. Шундай экан, журналистлар севги, виждон, меҳр,

нафрат каби жавобсиз саволлар атрофида сафсата сотовермай, одамларга манфаати тегадиган оғриқли мавзуларда бош қотиришса, адашмасам, газета ўз мавқеини ҳам, ўқувчисини ҳам йўқотмайди. Масалан, мана шу нашрни олайлик, муҳаррир қаерга қарамоқда? Нима учун мансабга ўтириб олиб фақат ўзининг тинчини ўйлайди?! Жамият ҳавосини янгилаш, одамлар турмушини енгиллатиш мақсадида қонунчилик палатаси янгидан-янги қонунларни ишлаб чиқмоқда, ўша қонунларни ҳуқуқшунослик институти талабалири ёдламаса, қолган ҳеч ким эътибор бераётгани йўқ. Журналистлар эстрада юлдузлари билан актисалар гардеробидаги кийим-кечаги, ётоқхонаю пардозхонасидаги ашёларини титкилайвермай, ўша оқсаётган, эътибордан четда қолаётган қонунлар билан ишласин... Демократия тушунчасига келсак, қонун олдида ҳамманинг бирлиги ва ҳамма қонун даражасида яшаб турган жамиятини ривожлантириш учун ўз фикрини билдириши лозим. Бир тизимда миллионлаб аҳолини ушлаб туриш бошқа нарса, аммо бир тузумда яшаб жамиятнинг ривожи учун ўз фикрини билдира олиш ва ҳар бир шахс ўз ҳақ-ҳуқуқини талаб қила билиши эса мутлақо бошқа нарса. Ҳалқ қайнаб турган булоққа ўхшайди. Бу булоқнинг қайнashi учун фикрлар бир хил эмас, ҳар хил бўлиши керак. Жамият устунлари бўлган раҳбарлар эса ана ўша фикрларни тинглай билиши лозим. Кишини тинглаш ва унинг ҳақлигини тан олиш ҳам бир илм.

Толиб шу даражада қизишиб кетдики, бу эшикка нима мақсадда келиб турганлитини ҳам унутиб қўйди. Суҳбатдоши эса энди бутунлай бошқа қиёфада – ҳайрату ҳавас ва меҳрли бир табассум билан унга тикилиб қолган эди. Кейин унинг исмини сўраб олди-да, жилмайди.

– Оббо, Толибжон-эй! Қизиқ-ку, сиз ҳали ўзингиз ёқтирилдиган газетадан иш сўраб келдингизми?

– Мен газетани эмас, унинг обрўсини тўкаётган ходимларни ёқтирилмайман.

– Жўмладан, бош муҳаррирни ҳам...

Толиб энди индамади. Сирли суҳбатдош ўрнидан туриб, унинг олдига келди-да, елкасига оҳиста қоқиб деди:

– Оқил чиндин ўзгани демас, аммо барча чинни демак ҳам оқил иши эмас... Қимнинг гапи? Ҳа, балли, ҳазрат Навоий... Хўп, эртага эрталаб сизни худди шу ерда кутаман. Бошлиқ олдига биргаликда кирамиз. Келишдикими?..

Ўшандада эртаси куни бу ерга келган Толиб ҳалиги кишини учратмаган, қадди-қомати келишган котиба қиз унинг исми-шариfinи сўраб олиб, дарҳол ариза ёздирган, ишга қабул қилинганини айтиб, иқтисодиёт бўлими мудирини чақирилтирган, «Марҳамат, янги ходимингиз, танишиб олинглар», – деган, хуллас, ҳаммаси худди тушдагидек оппа-осон ҳал бўлганди.

Ишга кириши енгил кўчгани билан, ишлаб кетиши осон бўлмади. Қалтабақай, қорачадан келган, тепакал мудир биринчи учрашувданоқ Толибда нохуш таассурот қолдирди. Қиёфаси тунд, муомаласи қўпол мудирнинг беписанд қочирилмларига кўниколмай анчагача ториқиб юрди. Бўлим мудири пенсия ёшига етиб қолган, янги, замонавий фикрлардан ижирғана-диган, аммо ёзиш техникасини пухта ўзлаштиргани, газета қолипига мослашиб олгани боис бирорвга сўзи ни ҳам, столини ҳам осонликча бериб қўймайдиган бир кимса бўлиб чиқди. Шунинг учун ҳам раҳбар билан муносабати яхши бўлмаса-да, бўлимни якка ўзи бошқариб келарди. Ўрнига муносиб ходим топилса, бошлиқ уни жилдириб юборишидан чўчиб янги кел-

ган ходимни, айниқса, ёш, тажрибасиз бўлса, чўқи-  
лайвериб, турткилайвериб кўзини очирмас, кеткиз-  
май тинчимасди.

Толиб ишни шижиоат билан бошлади. Аммо тажри-  
басизлиги сабаб мудир унинг деярли ҳамма режалари-  
ни йўққа чиқара бошлади. Толиб тушкунликка тушди.  
Бу орада қабулхонада ўша биринчи кун учратган ҳа-  
лиги сирли киши бош муҳаррирнинг ўзи бўлиб чиқиб,  
ғалати аҳволга тушиб қолди. Гарчи у ҳеч нарса дема-  
са-да, дуч келиб қолганида: «Ишланг, йигитча, ўзин-  
гизни кўрсатинг. Бунинг учун барча имкониятни яра-  
тиб бераман», – дея луқма ташлар, Толиб эса ўшанда  
гапиришга гапириб қўйиб, бирон нарсани қойил қила  
олмаганидан мулзам тортиб, қизариб кетар эди.

Бўлим мудири пиҳини ёрган, ўттиз йилдан бери  
бир йўналишда ишлаб келаётгани учун шаҳардаги  
ҳар бир иқтисодий ахборот марказини ипидан-игна-  
сигача билар ва бу ерлар унинг «ҳудуди»га айланган,  
ишга янги келган ходим эса янги ахборот манбайнини  
топиши лозим эди. Толиб ана шундай муаммо олдида  
гангиб қолганди. Бу ҳам етмагандай, қабулхона коти-  
баси билан ҳам ораси бузилди.

Гап шундаки, ёши ўттизларга бориб қолган бўл-  
са-да, ниҳоятда хушқомат, ранги тиниқ, соғлом, ҳар  
қандай кишининг эътиборини тортадиган даражада  
чиройли котиба қиз бош муҳаррир билан бошқача мув-  
носабатда экан. Қизиги шундаки, буни у ҳеч кимдан  
яширмас, аксинча, шундай обрўли, нуфузли раҳбарни  
ром қила олганидан ошкора фахрланиб, ўзини мув-  
винлар, бўлим бошлиқлари даражасида эмин-эркин  
тутар, ҳаммага гапини ўтказар, хуллас, оддий бир ко-  
тиба таҳририят эркатойига айланган эди. Буни ҳамма  
билар, бурчак-бурчакда унинг фийбатини қилишар,  
бироқ ҳеч ким журъат қилиб бир нарса деёлмас, у би-

лан муносабатлари бузилиб қолишини исташмас әди. Сабаби, котибага ёқмай қолган ходим, ҳеч шубҳасиз, бошлиқнинг ҳам газабига учраши тайин әди. Хуллас, шу қиз бир куни Толибни азза-базза чақириб, қўлига аллақандай қофоз тутқазди-да:

– Шуни фалон ташкилотта, фалончи кишига етқазасиз, – деди.

– Тушунмадим, – деди Толиб ажабланиб, – бу буйруқми?

– Ҳа, буйруқ, – деди котиба, – тез етқазинг!

– Қечирасиз, бунинг иложи йўқ! – Толибнинг ўжарлиги тутиб қоғозни қизнинг қўлига қайта тутқазди.

– Иложи йўқ?

– Ҳа, бошқа, бундан зарурроқ топширик билан бандман.

– Шунаقا денг?

– Шунаقا!

– Бўпти, ҳисобга олиб қўямиз! Бораверинг!

Толибга унинг, айниқса, кейинги «Бораверинг!» деган буйруғи оғир ботди.

– Сиз қайси даргоҳда ўтирганингизни унутманг!..  
Бу ер редакция, бу ерда шантажга ўрин йўқ.

Бундай беттачопарликка кўникмаган «эркатой» ранги-қути ўчиб, жойида ўтириб қолди...

Аксига олиб, ўша сухбатдан кейин хонасига кириб келиши билан телефон жиринглади. Содиқ гўшакни кўтарди-да, дарҳол у томонда айтилган гапдан юзи қайфули тус олиб Толибга узатди. Толиб: «Лаббай...» – деди-да, бирданига стулга чўкди. «Қачон? – деди овози титраб. – Бўпти, ҳозир йўлга чиқаман...» Кейин ҳамхонаси Содиққа қаради. Содиқ бу шумхабарни эшитиб турганлиги учун елка қисиб: «Бир куни биз ҳам борадиган жойимиз, аммо отант ҳали элликка ҳам кирмаган эдиёв», – деди.

Нима қилиш керак? Бош муҳаррир ишда йўқ. Ортиқча бош қотириб ўтирмай, муовиндан рухсат олдида, қишлоғига жўнади. Шошилинчда бўлим мудирини ҳам огоҳлантириш эсига келмади...

Ишга қайтганида ҳамма унга ҳамдардлик билдиран бўлса, котиба билан бўлим бошлиғи таъзия билдириш асноси уни масъулиятсизликда айблашди. Бу иккисининг туйқусдан берган ёқимсиз танбеҳи нишонга бориб тегса ҳам, Толиб уларга жавоб қайтаришни лозим топмади. Отасининг қўйқисдан вафот этгани уни гангитиб қўйган эди. Онаси уй бекаси, укаларининг аҳволи ҳали айтгулик эмас. Энди у отаси ўрнида онасига ёрдам бериши ва укалари ўз ўрнини топиб кетгунича моддий кўмаклашиши керак. Аммо ўзи ҳам ҳали ҳаётини бир изга солиб ололгани йўқ. Бу ёқда, таҳририятда эса охирги вақтларда бесаранжомлик бошланганди.

Бош муҳаррир пенсия ёшидаги ходимларни бўшатиб, уларнинг ўрнига ёшларни ишга таклиф қилишга тушди, газета услубини ўзгартириб, янги-янги гоялар киргиза бошлади.

Натижада кекса ходимлар орасида норозиликлар юзага келиб, жамоада майда-майда гуруҳлар пайдо бўлди. Улар хилват хоналарда тўпланиб олишиб вазиятни муҳокама қилишар, бу ердаги гап-сўзлар яширин қолмас, раҳбарнинг қулогига етар, раҳбар эса дарғазаб бўлиб, тўхтовсиз йигилишлар ўтказар, орқаворатдаги гап-сўзлардан келиб чиқиб жазо тариқасида кимларнингдир иш соатини камайтириб ташлар, иш соати камайган ходимлар эса ундан қусур қидирапар, ҳар бир қадамини таҳлил қилишга тушарди.

Толиб ва ундан бир йил илгари битириб келган, бошқа бўлимда ишласа-да, бир хонада ўтирадиган ҳамкасби Содик бу каби ноҳуш висир-висирларга

эътибор беришмас, ўз ишларини оби-тобида адо этишиб, ишдан бўш вақтларида иккиси ҳам бошлаб қўйгани қандайдир китобларини қўлларига олишар ёки ўқилган китоблар юзасидан фикр алмашишарди. Аслида, иккисини ҳам бу даргоҳга адабиётга, ёзувчиликка бўлган ҳавасмандлик етаклаб келган эди.

Толиб: «Инсон ўз моҳиятини, ўзлигини қалбининг энг тубига яшириб юради. Ёзувчининг маҳорати ана шу қалб эшикларини бирин-кетин очиб, унинг тубида турган асл инсонни ўқувчига кўрсатиб беришдан иборат», – деса, Содиқ: «Ёзувчи оддийликка интилиши керак, – дерди. – Шундай баён қилиш керакки, ўша оддийликда фиж-фиж маъно мужассам бўлсин...»

Шахсий муаммоларми, нафас олдирмай қўйган газетачилик муҳитими, йигитларни осмондан ерга тушриб қўйди анча. Тилга чиқаришмаса-да, аммо ичичларидан ёзувчилик уларнинг иши эмаслигини тан ола бошлашди. Гап шундаки, Содиқ табиатан эҳтиёткор йигит бўлишига қарамай, бир йил илгари укаси иккиси бизнесга қўл уришган, банкдан қарз олишган эди. Ишлари юришмагани камдек, вақт ўтгани сари банк фоизи ошиб бормоқда эди. Укаси ҳали институт талабаси, қолаверса, Содиқ: «Банкдан қарз олайлик», – деганида унга қарши бўлган, эндиликда: «Ўзинг пиширган ошни айланиб ҳам, ўргилиб ҳам ичавер», – деб ўзини четта олган. Шу боисдан моддий аҳволи ёмонлашган Содиқ ишхона низоларига аралашиб ишсиз қолишни истамасди. Толибнинг аҳволи эса ундан ҳам баттар, бир тарафда унинг ҳимоясига кўз тикиб қолган қариялар, иккинчи томонда эса отасининг ўлимни сабаб қишлоғни ҳам ўйлаши, онасига кўмаклашиши лозим эди. Баъзида хонада иккиси қолганида Содиқ Толибга: «Бу қари тулкиларга зинҳор аралашиб қолмаслик керак, улар сувдан қуруқ чиқиб кетишади,

биз қоламиз ҳамманинг кўзига ёмон кўриниб, агарда ишдан ҳайдалиб кетмасак», – дерди.

Толиб эса кулиб:

– Бунчалик қўрқмасанг, бошга тушганни кўз кўради, нима, бошқа жойда иш йўқми? Ишдан ҳайдагани билан, қўллимиздаги дипломни ва миямиздаги билимни тортиб олишмайди-ку, – деб бепарволик билан жавоб берса-да, аммо юрагидан зил кетарди.

– Сени билмадим-у, менинг ҳар бир дақиқам пул. Сабаби, банк ҳеч қачон: «Содиқжон ёшлиқ қилиб адашиди, қўй, шу бечоранинг қарзидан кеча қолайлик», – демайди. Аксинча, умримнинг ҳар бир сониясини пулга чақиб: «Қанийди, шу бола бир кунга кечиктирсаю биз фоиз қўшсак», – деб ўтиришади. Шундай экан, бир чақага арзимайдиган барча гояларга тупурдим. Ҳамманинг фикрини финг демай маъқуллаб ўрнимни сақлаб қолишим керак. Чунки бу ердан кетиб, бошқа ташкилотта ўрнашгунимча вақт ўтади. Бу вақт орасида эса банк мени икки ямлаб ютиб юборади!..

Содиқ шундай дердию ҳар сафар ўрнидан туриб кетиб, сигаретага ёпишарди...

Толиб чекмас, қолаверса, хонада чекиш мумкин эмас эди. Содиқ эса ходимлар уй-уйларига тарқаши билан дераза ойнасини катта очиб қўярди-да (бу ердан шаҳар кафтдагидек кўриниб туарди), столга ўтириб олиб ташқарига қараб ўйга чўмганча чека бошларди. Баъзида Толиб ишини тугата олмай, ёзув-чизувларини давом эттириб ўтиrsa, Содиқ уни унутиб, ўзи билан ўзи гаплаша кетарди.

– Ҳаётда ҳамма нарса бориб пулга тақалишини бир йилгина илгари билганимда банкнинг эшигига яқин йўламасдим. Э, биринчидан, шунақсанги bemазa касбни танламасдим. Ҳамиша қуруқ сафсата сотасан-у, чўн-тагингда ҳемири йўқ...

– Содиқжон, тинчликми?

– Ҳали кетмовдингми? – дея хижолатли илжаярди Содик.

– Э, оғайни, сен бу феълинг билан газетачи әмас, дўхтири бўлганингда ҳам шу аҳволга тушган бўлардинг. Муаммоларинг кўпайиб кетган бўлса, касбингнинг бунга алоқаси йўқ. Ўрнингдан тур-да, уйингта жўна!..

– дея ҳазиллашарди Толиб ўртоғини тушкунликдан қутқариш учун.

У муҳаррир эрталаб айтган мақолани ёзиб тугатганида ҳамма уйига жўнаган, вақт алламаҳал бўлиб қолганди. Мақолани раҳбарнинг хонасига олиб кирганида котиба қиз ҳам кетиб қолган, бошлиқ билан унинг хонаси ўртасидаги эшик эса ланг очиқ турарди.

Хонада аччиқ қаҳва ҳиди анқир, бош муҳаррир митти финжонни қўлда туттанча очиқ деразага тикилиб ўтирас, рўпарасидаги телевизор дунё янгиликларидан жаврамоқда эди. У Толибга ортиқча эътибор қилимай, столга ташлаб кетаверинг дегандай ишора қилди. Толиб қўлидаги қофозларни столга ташлаб, таҳририятдан чиқди.

Кузнинг совуқ шамоли юзига урилиб, миясида чувалашиб ётган оғир хаёллар бироз тарқалди. Хиёбондан ўтиб автобус бекати томон борар экан, шамол ҳали уйиб, ҳали тўзгитаётган барг-хазонларга тикилиб юраги маҳзун тортди...

Умринг ўтишини қара. Қечагина ғам-ташвиши йўқ, хаёли осмонларда эди. Отаси вафот эттакч, бирданига ҳушёр тортди, аниқроғи, улғайиб, катталар сағифа қўшилиб қолганини ҳис этди. Ўшанда отасининг кўмиш маросимида онасининг сочи оқариб кетганлигини кўриб: «Қачон оқара бошлаган экан бу соchlар?» – дея маъюс хаёлларга толди. Назарида, бу соchlар отаси ўлган куни бирдан оқариб кетгандек эди.

Отаси ўта қаттиққүл, ҳис-туйғуларга берилтирмайдиган киши бўлиб, Толиб унинг қаршисида ёш гўдакка ўхшаб қоларди. Аммо охирги вақтларда отаси у билан очилиб гаплашадиган, худди ўртоқлар сингари ҳазил-ҳузул қиласидиган одат чиқарганди. Афсус, бундай дамлар қисқа экан. Шундай салобатли одам энди йўқ, тупроққа топшириб келди. Ўлим ҳақ.

Шу хаёлларда бораётган Толиб метрога тушиш мақсадида йўлини қисқароқ қилиш учун хиёбон ўртасидан кесиб ўта бошлади. Бехосдан одам кам юрадиган йўлаклардан бирида, ўриндиқда унга орқа қилиб ўтирган Гулини кўриб худди ток ургандек юришдан таққа тўхтади. Икки кўзи ундан беш қадамча нарида, бармоқлари билан ўриндиқ четини ўйнаб ўтирган Гулида. Шу вақт Толиб тўсатдан йўлак ўртасида тўхтаганидан, ортидан келаётган йўловчи уни айланиб ёнидан ўта туриб шундай кўз ташладики, у бундан уялиб, шарт ортига қайрилиб жўнавормоқчи бўлиб икки қадам олдинга юрди. Аммо йўлакнинг икки четидаги тифиз экилган дараҳтлардан бирининг панасига ўзини олиб: «Қизларга ишонч йўқ», – дея ўзига ўзи пичирлаб, Гулининг ким билан учрашишини аниқлаш мақсадида кута бошлади.

Толиб бу қиз билан охирги вақтларда учраша бошлаган, кўнглида унга ишонишига қарамай, юраги гур силлаб уриб, дараҳт панасидан ундан кўзини узмасди. Гули эса кимдир уни кузатаётганини сезгандек ортига, айнан Толиб турган томонга икки марта диққат билан қаради. Толиб қиз уни кўрмаётганига ишончи комиллиги учун: «Бемаҳалда ким билан учрашиши мумкин, яна келиб-келиб хиёбоннинг одам кам юрадиган жойида-я», – дерди ўзига ўзи. Шу вақт метронинг чиқадиган томонидан бир йигит тўғри Гули томонга кела бошлади. Қиз ўрнидан туриб унга қарши юрди.

Фира-шира қоронгилик тушган. Ҳамма ишдан қайтмоқда. Улар учрашиб, бир-бирларини қучоқлашишди ва кутилмаганда Толиб томонга қараб юришди. У эса эҳтиёткорликни ҳам унтиб кўзини йигитдан узмасди. Улар ундан бир қадам наридан ўтишаётганида Толиб йигит Гулининг укаси эканлигини таниб: «Фирт жиннилик! Мияга қанақанги бўлмағур фикрлар келмайди, бекордан-бекорга айтишмайди гумон имондан айирали деб, нима бўлса ҳам кўриб қолмасин», – дея дарахтга ёпишган кўйи унини чиқармай опа-укаларнинг ортидан тикилганча қолди.

Толиб шу он Гулинин Наргиз билан таққослади. Наргизнинг кўзлари ҳамиша қулиб тураг, юзи иссиқ, бирпаста одамнинг ичига кириб кетар, кўзларининг қувноқлиги кишининг эътиборини тортарди бирдан. Гули эса Наргизга нисбатан чиройли бўлишига қарамай, юзининг ниҳоятда жиддийлиги, кулса ҳам, ҳеч қачон кўзлари қулмаслиги ва қарашларидаги қандайдир сирли оғриқ кишини ҳар бир гапини ўйлаб гапиришга ундарди. Айнан шу кўзлар Толибни биринчи учрашувдаёқ ўзига ром этган эди.

Гули Содик билан бирга олийгоҳда ўқиган ва Толиб билан у орқали танишганди. У қизнинг эътиборини ўзига жалб этиш мақсадида ҳар куни турли сабабларни баҳона қилиб у ишлаётган редакцияга кириб борарди. Бироқ бу хатти-ҳаракатларининг асл замирини қиз англаб турса-да, бефарқ, унга эътиборсиз эди. Толиб қизнинг қалбида кимдир бор деган бир ҳадикда одатига кўра у ишлаётган редакцияга кириб борди. Гули хонасида йўқ экан. Эшиги эса қия очиқ турарди. Хонада ҳеч ким кўринмасди. Гулининг ёзув столидаги қалин эски дафтар Толибнинг эътиборини тортди. У дафтарнинг биринчи варагига кўз ташлаши билан бу қизнинг кундалиги эканлигини дарҳол

пайқади. У дафтарни костюмининг ич чўнтағига солиб бу ерга нима мақсадда келганини ҳам унутиб ортига қайтди. Кўчага чиқиб, одам кам қаҳвахоналардан бирига кириб кундаликни ўқиди.

Кундалик жуда самимий ёзилганди.

«Онам мактабда ўзбек тили ва адабиётидан ўқитувчи эди. Ўзининг айтишича, бобомнинг раъйига қараб отам билан оила қурган. Аввалига бир-бирларига қўнгиллари тўғри келиб яхши яшай бошлишган. Отам онам билан оила қурганидан сўнг ота-онасидан қолган уй-жойдан ташқари барча сармоясини тикиб ортимиздан оқадиган анҳор бўйидан ўрдак фирма қурган. Асрлар давомида оққан сув олдинига камайган, бора-бора суви қуриб отамнинг мингдан зиёд ўрдаклари битлаб, иши чаппасидан кетган. Аламига ичкиликка берилган. Олдинига у ер-бу ерда устачилик қилиб, топган-тутганининг бир қисмини оиласига сарфласа, қолганига ичган. Бора-бора ичкиликка ружу қўйиб, қарзга ҳам ича бошлаган.

Ақлимни танибманки, отам ичмаган бирон кун йўқ. Онам мен ва укамни олиб тез-тез қўшни қишлоқда яшаётган бувамникига кетиб, шу ерда ойлаб яшаб қолардик. Ичкилик жонига тегиб отам ялиниб-ёлвориб, бошқа ичмасликка минг бир қасам ичиб бизни уйга олиб қайтарди. Аммо орадан озгина вақт ўтиб у яна ичишни бошларди. Бувам ўлиб, отамнинг қиззлик уйига тоғам эгалик қилди. Тоғамнинг хотини эса бувам тирик вақтларида ҳам бизнинг бу кўчманчи одатимизни ошкора хушламас, бироқ бувамнинг феълидан чўчиб, миқ этиб оғиз очолмасди. Унинг ўлиши билан асл ба-шараси очилди. Укам иккимиз бирон айб иш қиладиган бўлсак, кериб-чўзиб, бўрттириб қўни-қўшниларга гапириб, юракларимизни қон қилар, мабодо ошхонадаги чинни идишлардан биронтаси синса, қайнона-

қайнотасини эслаб йиғлашдан ҳам тоймасди. Хуллас, бу хонадондаги ҳамма нарса омонат, онам эса, ўзининг айтишича, «чиққан қиз чиғириқдан ташқари» эди. Тогам хотинининг бу қилиқларини кўриб кўрмасликка, эшитиб эшитмасликка оларди. Онам бечора икки болани етаклаб борадиган жойи йўқ, эртадан-кечгача мактабда ишларди. Уйда бўлаётган бу машмашаларга фақатгина чуқур-чуқур нафас олиб қўярди, холос. Тогамнинг хотини борган сари ўзини тута олмай, ҳаддиндан ошиб, укам иккимизни турткилаб, ҳовли этагига ўтиб олиб, жўрттага онамга эшиттириб: «Шўртумшуқ оналарингнинг феълига оталаринг чидаёлмай алкаш бўлиб кетди», – дея ҳақоратлашни одат қилди. Онам эса тогамнинг жимлигидан, хотинининг таъналари ва хўрлайверишлидан ранги оқариб қотиб қоларди. Бу вақтга келиб отамни ичкилик адой тамом қилган, ароққа муқкасидан кетиб, бизни бутунлай унуганди.

«Бас, етар. Бу ҳовлини елкамнинг чуқури кўрсин», – дея кунлардан бир куни укам иккимизни етаклаб уйга қайтди. Уйда бўшаган ароқ, пиво идишлари ҳар жойда сочилиб ётар, қўланса ҳиддан эшикдан кирган одамнинг кўнгли айнирди.

Кўча эшик ланг очиқ. Отам уйда йўқ экан, учаламиз уйни супуриб-сибирдик. Ҳовлининг бир четида қачонлардир қурилган, эндиликда қавровсиз ётган томчага ҳовлида турган иккита сим каравотни киргизиб, уч кишига мўлжаллаб кечаси тунашга жой қилдик. Мақсад, отам ичиб олиб мастлигига уйдан бизни қувадиган бўлса, тунаш учун жой бўлсин.

Шом арафасида отам уйга барзангидек киши билан икки шиша ароқни қўлтиқлаб кириб келди. Ҳалиги киши бизни кўриб тил-забонини йўқотди. Отам эса бизни кўриб кўзида қувонч билан йўқлигимизда нима содир бўлганини гапира бошлади. Дўкон әгалага-

ри ортиқ қарз беришдан бош тортишгани учун онам билан расман ажрашиб, уйимизни бу одамга ўтказиб беришни ваъда қилган. Оқибатда бу киши отамни ҳоммийлигига олган.

– Тушун, ўртоқ, бу бечораларнинг ҳам борадиган жойи йўқ. Қайнотам ҳам, қайнонам ҳам яхши одамлар эди. Мана, хотиним ўшаларга ўхшайди. Аммо хотинимнинг укаси худбин. Ўз мақсади йўлида ҳеч нарсадан тоймайдиган аblaҳ. Хотиним укаси учун жонини бериши мумкин, аммо укаси қишида ёқсан қорни хотинимга раво кўрмайди. Кўрдиларингми, олманинг тагига олма тушади дегани бекор гап, баъзида бемаза уруғ ҳам униб чиқади. Алкаш оталаридан қоладиган биргина шу уй. Агарда хотиним ажралишни истамаса, харажатларингни қайтариб беради, – деди гапининг охирида отам илтижоли нигоҳ билан ҳалиги кишига қараб.

Онам билан ҳалиги нотаниш киши бир-бирларига бир сония тикилиб қолишиди. Сўнг нотаниш киши чирт этиб ерга тупурди-да, отамга қаради. Отам эса бу орада кир қўйллари билан битта шишани очиб қултиллатиб кўтараётганди. Ҳалиги киши унинг қўлидаги шишани шарт юлиб олди. Кутимаганда отам унинг жағига бир мушт солди. Ана шундан кейин нотаниш киши кўз олдимизда отамни шунақангиди дўгпосладики, унга қўшиб онамни, бизни алкашваччалар дея ҳақоратлаб сўкиб оғзидан кўпиги сочилиб ҳовлидан чиқиб кетди.

Отам ичаверганидан ўз қадр-қимматини йўқотгани камдек ўзи билан қўшиб бизни ҳам ер билан яксон қилганди. Энг аламли жойи шундаки, одамлар бизни ошкора муҳокама қилишар, ўзларини биздан бир поғона юқорироқ қўйишар, онамнинг илмли аёл эканлигини билишса-да, кўзларига илишмас, ўқиб гўр бўл-

дингми деган бир пичинг билан қарашарди. Одамларнинг бу фисқ-фасодларини онам ичига ютар ва бизга отам яхши одам бўлгани, аммо уни ароқ хароб қилгани, нима бўлса ҳам келажакда етук инсон бўлиб, отам ер қилган шаънини оқлашимиз кераклигини қайта-қайта уқтирарди.

Қишлоғимиз ўртасидан узун асфальт йўл ўтган. Икки томонида қатор юздан зиёд уйлар, қишлоқнинг адодида катта, гумбазли масжид. Жума кунлари масжид ичи намозхонларга торлик қилиб, ҳаттоки куннинг иссиқ вақтларида ҳовлисида ҳам жума намози ўқиларди. Уйимиз масжидга яқин ерда жойлашган. Болалигимдан бир нарсани билардим: намоз ўқиган одам ҳеч қачон ичмайди. Ана шунинг учун намоз ўқиш учун зарур сураларни ёдлаб, эртаю кеч Худодан отамнинг намоз ўқишини, ичкиликни ташлашини илтижо қиласдим. Аммо отам бирон марта намоз ўқимади, бирон марта ичкиликни ташлаш ҳақида ўйлаб ҳам кўрмади. Бора-бора мени Худо эшитмаслигидан, илтижоларим самарасизлигидан, ер юзида мендек кўнгли вайрон қизнинг борлигини ҳатто у ҳам кўрмаслигидан хафа бўлдим. Оқибатда унга илтижо қилишни ҳам бас қиласдим.

Қишлоқнинг боши, охири ҳамда ўртасида кичик-кичик дўконлар бўлиб, бу дўконларда қарзга ароқ сотиларди. Бир қишлоқда учта дўкон; ўз- ўзидан улар ўртасида рақобат бўларди. Дўкон әгалари отамнинг қарзини онам тўлашини билишарди, ичкиликдан бошқа нарсани ўйламайдиган отам уларга ҳар томонлама қўл келганди. Улар отамни бир-бирларидан қизғонишар ва қуийиб берган ароқларини зиёдаси билан қарз дафтарларига ёзиб қўйишар, онам маошини олган куни ундан қарзини талаб қилишарди. Онам бечора маошининг ярмини отамнинг қарzlарига тўлар, қолга-

нига эса бизни едириб-ичирад, ўзи ўқитувчи бўлишига қарамай, жуда оддий кийинарди. Мактабда бошқа ўқитувчилар орасида елкаси қисилган ва ранги синиқ эди. Жуда камбағал яшардик. Болалигимда отамнинг ичишидан уялардим. Қимнинг қизисан дея сўраб қолишса, отамнинг исмими ҳурмат билан тилга олардим. Танишмаса, масжид ёнидаги уй дейишим билан фалончи алкашнинг қизимисан дейишарди. Шу топда ер билан яксон бўлиб, одамларнинг ёвузлигидан дилим оғрирди, барчасига отам сабабчи эканлигидан унга нисбатан нафратим қўзиб онамни унинг қарзларини тўламасликка ундан жанжал кўтаардим, йиглардим; бора-бора укам ҳам менга қўшилди. Бир куни онам иккимизни етаклаб биздан олтмиш километр олисдаги Самарқанд шаҳрида жойлашган инглиз тилига ихти-сослашган маҳсус лицейга олиб келди.

Билмадим... Ўшанда онам шунча куч-қудратни қаердан олган; ҳозир ўтириб, унинг ҳақиқий матонатли аёл эканлитини ўйлайман, укам иккимиз ундан ўла-ўлгунимизча миннатдормиз, уни болалари учун ўзини қурбон қилган дунёдаги ҳақиқий она тимсоли дея тан оламан.

Лицейни тугаллаб, ўша йилиёқ халқаро журналистика талabalари сафига келиб қўшилдим ва бўш вақтларимда нон пиширадиган заводда ишлай бошладим. Кейинги йили укам ҳам ортимдан инглиз филологиясига ўқишига кирди, шу билан бирга, ёнимда ишлай бошлади. Темир йўл вокзалига яқин бир хонали уйни ижарага олишимиз билан онам иккимиз ҳам ўқиб-ишиганимиз боис тез-тез келиб-кетиб турар, деярли қишлоққа бормасдик. Қишлоғимизни соғинсак-да, болалик таассуротларимиз, отамнинг маст ҳолда қилган хатти-ҳаракатлари кўз олдимизга келиши билан ўзимизни ёмон ҳис қилардик. Биронтамиз

у ҳақда гап бошлашимиз билан ҳаммамизнинг кўзла-  
римиз ғам-ғуссага тўларди. Шу боисми, ўзимизча у  
ҳақда индамай қайгуардик. Курсимиздан Илёс исм-  
ли бир йигиттга кўнгил қўйдим. Уни қизларнинг ҳаваси  
келадиган даражада кўркам деб бўлмасди-ю, лекин  
у бўлар-бўлмас бачканга қилиқлар билан кўпчиликни  
эътиборини ўзига қаратмас, ҳар хил бўлмағур ифво-  
лардан ўзини четта тортадиган сипо йигит эди. Икки  
йилдан ошиқроқ учрашиб юрдим. У ҳақда укам билан  
онам ҳам хабардор эди. Ўзим эса шундай йигитнинг  
эътиборига тушганимдан осмонларда учиб, у ўл деса  
ўлишга тайёр турган бир вақтимда бирдан у ўзини  
мендан олиб қоча бошлади. Аввалига нима хато қил-  
дим экан дея ўз ёғимда ўзим қоврилсам-да, бироқ,  
кўнгилсиз нимадир содир бўлаётганини ҳис қилиб ту-  
ришимга қарамай, эътиборсиз кўрсатишга интилдим.  
Аммо юрагимни куйдираётган дард ва алам кўзимдан  
яққол кўриниб турар, атрофимдаги йигит-қизлар мағ-  
рур қарашларим остидаги оғриқни индамай кузати-  
шарди.

Бир куни дарс жараёнида ортимда ўтирган икки  
қиз Илёс мени жуда ҳам яхши кўриши, бироқ ота-  
онаси орқаворатдан суриштиришиб отамнинг алкаш-  
лиги ва жуда камбағал оиланинг қизи эканлигимни  
аниқлашгани, бой, тагли-тугли, келгусида уни ҳар  
томонлама қўллаб-қувватлайдиган бир кишининг қи-  
зига унаштиришгани, унинг бу жараённи тўхтатиши-  
га қурби етмагани ҳақида курсдошларга гапирганини  
бир-бирларига шивирлашишарди. Аммо, бутун танам  
қулоққа айлангандек, уларнинг барча шивир-шивир-  
ларини аниқ ва тиниқ эшитдим. Шу он амин бўлдим-  
ки, Илёс иккимиз ўртамиздаги муносабатта дарз кет-  
ганидан курсимизда мендан бошқа ҳамма хабардор.  
Энг оғир ботгани – отамнинг алкашлиги ортимдан соя-

дек эргашиб шу ерга ҳам келгани. Яна ҳам оғирроғи, Илёснинг ўзини ўртамиизда ҳеч нарса бўлмагандек тутиши; «Икки кишининг бир вақтда қалбида пайдо бўлган туйғу гапирилмайди, муҳокама қилинмайди, ваъдалар берилмайди, қасамлар ичилмайди, аммо қарор қалбдан отилиб чиқади. Биз эса унга бўйсунамиз, холос», – деб ўйлагандим... Начора. Танаси бошқа дард билмас деганлари шу бўлса керак-да.

Томофимдан бир қултум сув ўтмас, талабалар орасида шарпага ўхшаб қолдим. Илёс эса қорасини кўрсатмас, кўзларим гирён, ҳамма жойдан уни излардим. Тўй куни аниқ бўлди. Эл қатори қўлимга тўйга таклифнома келиб тушганида жинни бўлиб қоламан деб ўйлагандим. Йўқ. Фурурим бунга йўл бермади. Ичимда бир нарса: «Қандай яшайман бу ёғига?» – дея қалтқалт титрашига қарамай, бошимни тик тутиб, ҳеч кимга юрагимни ёрмадим. Сохта хатти-ҳаракатларими ни узоқ давом эттира олмадим.

Бир куни эрталаб укамнинг ўқишига кетишини пойлаб ётдим. Уйдан чиқиб кетиши билан онамга нега отамни шунча хўрлашлари эвазига ҳам ташлаб кетмаганини, ниҳоят, тушунгандек бўлдим: отамни алкаш бўлса ҳам, Илёс сингари хоин эмасди. Йиғлаб-йиғлаб мактуб ёзиб, бир ҳафта илгари кутилмаганда уйимизда пайдо бўлган каламушга қарши ўзим олиб келган суюқ дорини стаканга солдим-да, бир кўтаришда ютиб юбордим.

Қўл телефонимдаги соатга қараб нимадир юз беринини кута бошладим. Соат милларидан кўзимни олмай бутун ҳаётимни кўз олдимдан ўтказдим. «Ҳаёт, сени тушунмадим», – дея атрофи очиқ балконга чиқдим, катта, серқатнов кўчадан физиллаб, шовқин солиб ўтаётган машиналарни, осмонда паға-паға сузиг юрган кулранг булувларни кузата туриб нега ўз жо-

нимга ўзим қасд қилаётганимни кўкка тикилиб гапира бошладим.

Гумбирлаб чақмоқ чақди. Юзимга муздек майдамайда ёмғир томчилари урила бошлади. Бирданига шундай ёшгина ўлиб кетаётганим, ўлимимдан онамнинг ақлдан озишини кўз олдимга келтириб, хўрлигим келиб, ўпкам тўлиб йифлай бошладим. Илёснинг бундай қурбонликка арзимаслигини, унинг тирик мурда эканлигини, ўз туйгуларини тушунмаган бошқаларни ҳам тушунмаслигини, бундай одамлар ҳақ ва ноҳақнинг фарқига бормаслигини... ҳаётнинг асл маъносига тушунмаслигини... афсуски, бу сингари одамлар фақатгина ялтираб сафимизни тўлдириб яшашини, ана шундай одамга кўнгил қўйганимни, миямга келган гапларнинг барчасини булутларга гапира-гапира ичимни бўшатишга уриниб, телбаларча ўкириб йифладим.

Ёмғир кучайди. Булутлар осмонни бутунлай эгаллаб олди. Сочларим жиққа ҳўл бўлиб, нинадек санчилаётган ёмғир томчилари остида ўлимни қарши олиш мақсадида балконда қимирламай, бир машиналарга, бир кўкка тикилиб туравердим. Шу вақт:

– Бирон жойинг оғрияптими? – деди кимдир ортимда.

Ўзим билан ўзим овора бўлиб эшик очилиб, уйга укам кирганини ҳам эшитмабман. Уни кўришим билан нима дейишимни билмай унга тикилганча анқайиб қолдим. У жиддий нимадир содир бўлганлигини бир кўз ташлашдаёқ пайқаганига қарамай, бироз тошдек қотиб турди-да, сўнг худди ёш болани: «Ҳаммаси яхши бўлади», – дея тинчлантираётгандек секин қўйлимдан ушлаб ичкарига етаклади. Хонага киришим билан столда турган онамга ёзган хатни кўриб қилмисимдан уялиб кетдим.

– Шамоллаб қоласан. Ҳозир сочиқ олиб келаман, артингач, иссиқ чой ичамиз, – деганча укам ванна томонга кетди.

У хонадан чиқиши билан вақтдан фойдаланиб хатни фижимлаб балкондан кўчага иргитдим. Қўлида сочиқ билан:

– Баъзида одам кўнглига ҳам қулоқ солиши керак дейишлари бекор гап эмас экан. Эрталаб кўзларинг-нинг нотинчлигидан безовталаниб чиқиб кетган эдим. Ўқишига боришига бордим-у, дарсда ўтира олмадим. Гўё мени чақираётгандай, «Нега мени шу аҳволда ташлаб кетдинг?» – дёйтгандек бўлавердинг. Шарт ўрнимдан туриб уйга қараб жўнадим, – дея у яна хонага қайтди.

Мен эса хона ўртасида нима қиласримни билмай қаққайиб унга қараб турардим.

– Сенга нима бўлди?.. Айт, – деди укам қўлида сочиқ билан жавдираганча.

Бир сония унга ақлан таназзулга учраганимни тан олиб тикилиб қолдим. Шу вақт, ичакларим отилиб кетаётгандек, худди каламушлар сингари чийиллаб ҳушшимдан кетдим.

Қўзимни очганимда тез ёрдам машинасида касалхонага олиб кетишаётганди. Укам эса тепамда ўтириб, қўлларимни ушлаб: «Илтимос, ўлиб қолмасин, нимадир қилинглар», – дея шифокорларга илтижо қиласр, шифокорлардан бири: «Тинчлан! Ҳозир шифохонага етамиз», – дерди.

Яна ҳушимдан кетдим. Шундан кейин орадан икки кун ўтиб касалхонада кўзимни очдим. Палатада ҳеч ким йўқ. Ёнимдаги диванда ичаверганидан ранги ҳам бир ҳол бўлиб қолган отам оёқ кийимини ҳам ечмай ухлаб ётибди.

Қўлим, оёғим, бўйнимдаги катта қон томирларга нина санчилган. Рўпарамдаги биргина деразадан

тушиб турган қуёш нуридан хона ёп-ёргө. Палатага онам кирди. Унинг кўзлари киртайиб қолганди. Онам эшикдан кириши билан кўзимни очганимни кўриб мени қучганча: «Худойим, борлигингга шукр», – дея йиғлашга тушди. Унинг шовқинидан отам ҳам уйғонди. У бечора охирги вақтларда ичмаса туролмайдиган бўлиб қолганига қарамай, касал ётган вақтларимда ичмаган, шекилли, қўллари қалтираб, атрофимда нима қиласини билмай сарсиларди. Билишимча, шифокорлар «Айниган бирон нарса еб заҳарланган» деган холоса келишган, ота-онам эса: «Бўлиши мумкин», – деб уларни тасдиқлашган. Ёниғлиқ қозон ёниғлигича қолганидан ичимда ўзимча хурсанд бўлдим. Аммо ётган жойимда: «Фақат укамга нима дерканман?» – деб ўйлардим. Кечга бориб укам ҳам келди. Лекин у ташвишли бир неча бор кўз ташлаган бўлишига қарамай, миқ этмади. Кўнглимни кўтариш мақсадида ўз ишларидан гапириб ўтири. Фақат кетаётганда юзимдан ўпиб: «Кучлилар ҳамиша голиб келади», – дея пичирлаб ғалати кулимсираб қўйди. Унинг бу гапи миямга ўрнашиб қолди. Айни дамда қандай қилиб кучли бўлишим мумкин? Биронга: «Илтимос, тезроқ менга уйлан, зора, шу йўл билан қалбимни эгаллаган Илёсдан қутулсан... Агар мени шу азобдан қутқарсанг, ўла-ўлгунча сенга садоқатли хотин бўламан», – дейёлмасам. Алкашнинг қизи дея отам билан бирор қуда-андачилик қилишни истамаса. Кўчада кўринган йигитга: «Кел, мен билан гаплаш, «севаман» деб алда, ахир, ўзим розиман алданишга, фақат сенинг хаёлинг билан яшаб, одамлар орасида ёлғизликни ҳис қилмасам бас», – дейёлмасам.

Касалхонадан чиқишим билан анчадан буён Англиядаги ўқиётган ўртоғим орқали таниш бўлиб қолган Готтфрид исмли швед йигити билан инглиз тилида

интернетда ёзиша бошладим. Унга бошимдан ўтганларнинг ҳаммасини ёздим. Готтфрид мендан ўн ёш катта. Расм чизар, суратларини сотолмай овораи сарсон эди, севги борасида ҳам менга ўхшаб унинг ҳам ҳеч иши юришмаганди. Биз шу тарзда бир йилча ёзишиб, баъзида Skypeда гаплашиб турдик. Қунлардан бирида у тўртта суратини америкалик олибсотарга кутганидан ҳам қимматроққа сотганини, бу пуллари эвазига Тошкентга келиб мен билан учрашмоқчи эканлигини айтди. Охириги вақтларда бир-биrimизга боғланиб қолгандик. Унинг бу ташрифидан бошим осмонга етди. Готтфрид бир ойдан зиёд Тошкентда меҳмон бўлиб, гоҳида расм чизди, гоҳида эса шаҳар бўйлаб биргаликда саёҳат қилдик. Ўқишим битган, эндинина радиода иш бошлаганман. Дам олиш кунларидан бирида кутилмаганда ижарада яшайдиган уйимга огоҳлантирмай кириб келиб, турмушга чиқишимни таклиф қилди. Дарҳол рози бўлдим. Бу хабарни эшишиб Готтфриднинг ота-онаси ҳам етиб келишди. Отонам бу қароримдан фалати бўлиб қолишди-ю, ҳеч нарса дейишмади.

Тўй ўтиб, Швецияга учдик. Готтфрид Стокгольм шаҳрида бувисидан қолган уйда ота-онасидан алоҳида яшаркан. Бу шаҳарда биринчи учраган муаммоим швед тилини мутлақо билмаслигим бўлди. Швед халқининг инглиз тилини яхши билиши менга қўйл келди-ю, бироқ соҳам бўйича иш тополмадим. Шунинг учун театрга юк ташувчи бўлиб ишга жойлашдим. Оила қуришимиз билан Готтфрид топиш-тутишининг ишончли эмаслиги, қўлида сармояси ҳам йўқлиги боис: «Ҳозирча оиламиизда болага ўрин йўқ», – деди. Унинг қарори қанчалик мени таажжублантирганига қарамай, бу ҳолат вақтинчалик эканлиги учун унинг бу таклифига рози бўлдим.

Тонг отиши билан ишга кетаман. Готтфрид эса ке-чаю кундуз расм чизиш, тайёр бўлганларини сотиши билан овора. Уйга ҳар хил одамлар тез-тез келиб суратларни кўришар, у айтган нархдан анча паст ба-ҳолашар, бундан Готтфрид тутақиб кетиб улар билан тортишар, шовқин солар, сабаби, улар қўйган нарх ҳатто суратга сарфланган бўёқ харажатини ҳам қопламасди. Бу тарзда келиб-кетувчи олибсотарлар Готтфридни хафа қиласар, унда ўз исходига ишончсизлик туғдирар, оқибатда бундай дамларда у баджаҳл, тирноқ орасидан кир қидирадиган, харажатларимизни қайта-қайта ҳисоб-китоб қиласидиган ўта хасис бир одамга айланиб қоларди. Олдинига ишидаги бу омадсизликларни ичига ютиб, ҳафталаб лом-мим демас, бир уйда, бир тўшакда ётиб-туришимизга қарамай, гўё мен йўқдек эдим. Бу жараён оғир эди. Аммо орадан бир йиллар ўтиб бор аламини менга сочадиган, бундан ҳам кўнгли тинчимай, ичадиган одат чиқарди. Жаҳлини чиқармаслик учун юрак ютиб бир сўз демасдим. Агарда бирон-бир сурати сотилиб қолса, бор пулинини бошимдан сочар, кайфияти кўтарилиб, яна чизишга тушарди. Бундай дамлар қисқа бўлар, бироқ шу вақтдан фойдаланиб унга отам билан онамнинг ҳаёти такрорланаётганини кўра-била туриб қандай бир хатони такрорлаш мумкин эканини, одам ўзини ҳамиша назорат қилиши кераклигини, аксинча, кун келиб яқинлар ҳам безиб кетишини ўқтирадим. У эса кечирим сўпар, бошқа ичмасликка худди отам сингари минг-минг қасам ичар, бироқ озгина фурсат ўтиб яна ўша аҳвол такрорланаарди. Гўё ёмон туш кўрмоқ-даману уйғонишни истардим. Ўзимдаги бу ҳолатни Готтфридга айтдим. У эса бўёқлари турадиган столга етаклаб бориб барча бўёқлари рангларини мендан бирма-бир сўради. Мана шу бўёқлар ҳаётнинг ран-

гини ташкил қиласы. Қимгаки табиатдаги бу бүёқлар қаноатлантирумаса, у шу бүёқлардан фойдаланиб ўзи ҳам бүёқ яратиш мүмкін. «Излан, күнглингга маъқул келадиган бирон-бир иш билан шуғуллан. Қунларимизни фақат қора бүёқларга бўяма. Бошқа бүёқларга ҳам эътибор бер. Аксинча, оқибати яхшилик билан тугамайди», – дерди у.

Ўшанда унинг кўзларига тикилиб: «Бир кун йигирма тўрт соатдан иборат бўлса, унинг ҳар дақиқасида бир хил хавотир – ҳозир музлаткичдан шишани олиб маст бўлгунча ичадио миясида сақланиб ётган майда икир-чикирларни то ухлаб қолгунча алжираиди деган хавотир билан яшайдиган одам қандай бошқа бўёқлар ҳақида ўйлай олиши мүмкін?» – демоққа оғиз жуфтладим-у, лекин Готтфриднинг худбинлиги бирорни әшитишга, тушунишга имкон бермаслигини билганим боис уни тингладим, холос. У эса дардини дастурхон қиласы.

– Эшигимдан кириб келган олибсотарларга меҳнат ҳаққим билан бўёқларим пулини беринглар, бас, бу ўз тасаввуримдаги оламни қофозга туширишимга имкон беради дейман. Йўқ. Улар жуда ҳам ёвуз одамлар. Номим чиқмаган рассомлигим, пулга муҳтоҗлигим уларга қўл келади. Ана шунинг учун суратларимни сувтекинга қўлга киритишни исташади. Сабаби, кун келиб бу суратларнинг нархи ошади. Пули кўп одамлар эса унгача худди банкда сармоясини ушлагандек суратларимни қофозга ўраб, уйларининг бир бурчагида сақлашади. Улар қўлларида картанинг нимага қодирлигини билишади. Фақат вақти-соати келишини кутадилар, холос. Аммо шу суратларни чизган инсоннинг қашшоқлиги ҳеч кимни қизиқтирмайди... Мана, кўряпсанми, улар қандай пул топишади? Бу олибсостарлар бир куни мени ҳароб қилишади, мени тирик-

лайин гүрга тиқишидаи, – деди у юраги куйиб, аламини ичкиликдан олганча.

Баъзида унга қараб туриб иккимиз ҳам қанчалик уринмайлик, ҳаётимизни фақат қора бўёқларда акс эттирмоқдамиз дея ўйлардим.

Шаҳарда ёмон грипп тарқалиб, кўчада йўловчилар ниқоб билан юришарди. Якшанба куни ўзимни ёмон ҳис қилишимга қарамай, тонг отиши билан ишга кетдим. Тушдан сўнг иссигим кўтарила бошлагани учун бошлиғимдан жавоб олиб уйга қайтдим. Эшикдан киришим билан рўпарадаги хонада чизиб ўтирган Готтфрид паст қаватдаги бир хонали уйни ижарага олгани, керакли нарсаларимни кўчириб қўйгани ва тузалиб қолишим билан яна ўзи ҳамма нарсани қайтариб олиб келишини айтиб йўл бошлади. Мадорим қуриб, ҳамма жойим қақшаб оғриётгани, қолаверса, иссигим борган сари кўтарилаётганлиги боис, унинг бу қилиғидан жаҳлим чиққанига қарамай, унга оғиз очишга қурбим етмай индамай ортидан эргашдим. Олдинма-кетин пастдаги ижара уйга кирдик.

Уй бир хонали, озода, хонада ортиқча мебеллар йўқ. Дераза ёнига бир кишилик диван қўйилган. Эшикдан киришим билан ўзимни мана шу диванга ташладим. Готтфрид эса гриппга қарши сотиб олган дори-дармонларини тушунтираётган бир вақтда: «Сенга ҳозир касалим юқиб қолади. Йўқол бу ердан», – дедим заҳар сочиб. У эса касал юқишидан ҳам кўзимдаги нафратданми ёки қўполлигимдан дами ичига тушиб кетди. Бир сония хона ўртасида тик турди-да, сўнг худди ўзига ўзи гапиргандек: «Тўғри айтасан», – дедиу мени ёлғиз қолдириб уйга қайтиб кетди.

Бир ҳафта иссигим кўтарилиб, тўшакда қимирламай ётдим. Ҳар иссигим кўтарилганида алаҳсиардим. Шунда хонада кичкинагина оппоқ соқолли чол кўзим-

га кўринар, у тепамда ўтириб олиб, баъзида иссифими ни ўлчар, баъзида эса мактабда, олийгоҳда танишиб ўртоқлашган қизларимнинг келгуси ҳаёти ҳақида тоза ўзбек адабий тилида ҳикоя қилиб берарди. Мен ундан кўпроқ Дилдора исмли қиз ўртоғимни суриштирдим. У эса мени эшитмаётгандек бошқа қизлар ҳақида гапирав, кўзимга Дилдора кўринарди.

Дилдора билан бир мактабда ўқигандик. Унинг ота-онаси беш ёшлигида автоҳалокатда ўлгани боис холаси боқиб олганди. Талабалик йилларим ҳаваси келганидан: «Ота-она бола учун ярим давлат деб бекорга айтишмайди», – дерди ҳар сафар мени кўрганида. Сўнг у қўшни қишлоғимиздан бир йигитга турмушга чиқди. Йигит бироз ҳардамхаёлроқ, фалатироқ эди. Шунинг учун бу хабардан шунчалар ҳайратланниб Дилдорани бу йўлдан қайтаришга уриндим. У эса: «Мен бир етимча бўлсан, холам бечора ўзининг тўртта боласига қўшиб боқиб ўтиргани камдек, яна эрга бериши учун сеп ҳам қилиши керак. Энди ўйлаб кўр, сепи йўқ етимчани ким ҳам хотин қиласиди? Қолаверса, у мени яхши кўриб қолди», – деди. Шунда Дилдорага диққат билан қарадим. У чиройли қиз эди-ю, аммо кийимлари жуда ночор эди, оқибатда бу чирой киши диққатини тортмасди. Ота-онаси ҳаёт бўлганида, уст-боши ҳам тузук бўлармиди. Ваҳолонки, жинни бир йигитнинг биргина қарашидан: «Мени яхши кўриб қолди», – дея ҳайратланмасди деб ўйладим. Готтфридга турмушга чиққанимдан бир йиллар ўтиб уйга меҳмонга бордим. Дилдора боласи билан кечаси ухлаганида эри эшикни қулфлаб, уйга ўт қўйибди. Бу вақтда қишлоқ одамларининг кўпчилиги уйқуда бўлган, уй лангиллаб ёна бошлаганидагина қўшнилардан бири хабар топган-у, бироқ уларни қутқара олишмаган. Ўшанда бу воқеадан ларзага келиб,

«Одам ўз тақдирини ўзи яратади, хато фикрламаслиги учун ота-онадан ягона мерос боланинг миясини ҳар томонлама ривожлантириш керак экан» деган қатъий хулосага келдим. Сабаби, ўртогум заифлиги боис ўз тақдири учун курашмади. Оқим қайси томонга оқизса, ўша томонга қараб оқди. Оқибатда ҳаёт унга шафкат қилмади.

Дилдорани охирги бора тўйим арафасида кўргандим. Ўйимизга келганида умуман бегона миллат йигити билан оила қураётганимни кўриб: «У ҳам Худонинг бир бандаси. Бизнинг ёшимизда севиш-севишилл истаги табиий. Балки, бу истакларимизга йиллар таъсир қиласи, аммо одамнинг ҳақиқий одам тафтига интилиши, сохта одамлардан ўзини олиб қочиши ўзгармаса керак», – деганди. Гапи юрагимга оғир ботиб: «Нимага шама қилмоқда бу қиз?» – дея унга диққат билан қарадим. Назаримда, Дилдора эрига ўхшаб ғалатироқ бўлиб қолганди. Айни дамда фақат у ҳақда ўйлардим. Чол эса иссифим кўтарилаётганидан манглайимга қўлини қўйиб қандайдир эски бир қўшиқни хиргойи қила бошлади. Қутилмаганда хонага Дилдора кирди. Чол унга парво қилмай: «Иссифинг борган сари кўтарилемоқда. Готтфридга қўнгироқ қил», – деди хиргойисини тўхтатиб. Дилдора рўпарамга келиб, аҳволимга жим тикилиб турди-да, сўнг аллақандай гина билан: «Одамнинг биргина илиқ сўзига, тафтига қанчалар одам зорлигини ҳис қилдингми?!» – деди. Унинг бу гапи ҳаммасидан ошиб тушди. Шундоқ ҳам дунёнинг бир бурчагига, қон-қариндошимдан олисда, бир одамни қора қилиб келсан, у эса энг оғир дамларимда мендан меҳрини дариф тутса дея аламимдан ёрилиб кетай деб тургандим.

«Готтфриднинг хатоси ўзига қаттиқ ишониши, ҳозирги аҳволингни тушунмаслиги, бундай одамлар зў-

равонлиқдан бошқа нарсани билишмайди», – деди у чолға сирли бир нигоҳ ташлаб. Ортиқ ўзимни ушлаб туролмай, овозим борича бўкириб йигладим. Чол билан Дилдора олдинига овозимдан чўчиб, сўнг хонадан фойиб бўлишди. Шарпа бўлса ҳам, улар ёнимдалигида вазиятим енгилроқ туюлганди. Фойиб бўлишлари билан аҳволимга баттар хўрлигим келиб йигладим, иссиғим кўтарилиб, алаҳсирай бошладим. Шу тарзда бир ҳафта ўтиб аста-секин ўзимга келдим. Аммо соғайишим билан Готтфрид тез-тез қўнғироқ қилиб, керакли нарсаларни олиб келганига ва бир неча бора шифокор ҳолимдан хабар олганига қарамай, юрагимда қандайдир ваҳима уйғонди, ўзимни бу ерда омонат ҳис қила бошладим. Икки ҳафта деганда бутунлай оёққа турдим. Бир куни эрталаб Готфред мендан сўраб-суриштирмай нарсаларимни уйга таший бошлади. Жим қовоғимни солиб унинг хатти-ҳаракатини четдан кузатиб турганимни кўриб:

– Нега томошабин бўлиб турибсан, ёрдам берсангчи, – деди.

– Соғ бўлсан, биргамиз, оғрисам, алоҳида-алоҳида. Оғир дамларда бир-биrimизга ярамасак, бирга яшашимизнинг нима кераги бор? – дедим кесатиқли бир оҳангда.

– Бу нима деганинг, ахир, биз бир оиламиз-ку, – деди гапимдан таъсирланиб, эшик олдида таққа тўхтаганча.

– Нима, сенингча, биз бир оиламизми?.. Етар ўзимни сенга қурбон қилганим. Ўз қадримга ўзим етмасам сен, барибир, ҳеч нарсага тушунмас экансан... Қетаман Тошкентга. Соҳам бўйича ишга кираман. Бегона юртларда ўзимни алдаб, эрим бор деб овутиб юргунча эрсиз яшаганим маъқулроқ, – дедим қатъий оҳангда.

Готтфрид, худди кутилмаганда бирор танаасига нина тиқиб олгандек, бу қароримдан қўрқиб кетганидан жим кўзимга тикилиб қолди.

— Сендан бунақангни сотқинликни кутмагандим, — деди бироздан сўнг бегуноҳ фариштадек тикилганча.

Унинг бу қарашидан тулақиб кетдим. Ҳамиша пулга муҳтоҷлигим, олган маошим уйнинг тўловларидан ортмаслиги, шароитимиз оғирлигини била туриб унинг бирон жойда ишламаслиги, камига, бутун ҳаётимни заҳарлаб келаётган ичкиликни кўрагра кўзим йўқлигини била туриб ичиши ва ҳаётимиздаги ҳар қадамда учрайдиган, қалбимни оғритадиган барча икир-чикирларини гапириб ташладим.

У эса олдинига кўзларини лўқ қилиб әшитди. Сўнгра тўйга кетган харажатларни тўласам хоҳлаган вақтимда уйга қайтишими мумкинлигини айтди.

— Нима?! — дедим-у, бу гапдан оғзим очилиб, ҳозиргина тулақиб турганимга қарамай, бирон нарса деб эътиroz билдиrolмай, нафасим ичимга тушиб кетди. Готтфрид нотўғри гапирганлитини дарҳол англаб ўзи ни оқлаш мақсадида:

— Тўғри-да, ётти ёт бегоналарни бир кунда сени деб неча йиллар йифган пулларни тилини ўрганганингда ҳам бунчалик алам қилмасди. Театрда юк ташимай, кўнглингга мос бирон-бир ишни топардинг... Пул тошиш қанчалар қийин, топганингдан кейин ҳам уни бир мақсад билан ишлатиш керак-ку. Қамбағал одамга бирорвларни едириб-ичиришнинг нима кераги бор эди?.. Агарда ўшанда гапимга кириб швед тилини ўрганганингда ҳозир бошқачароқ тушунчага эга бўлар эдинг...

— Ичкиликка сарфлайдиган пулларинг, нима, осон йўл билан топиладими? — дея қичқирдим.

Готтфрид турган жойида қизариб кетди ва:

– Ҳали шунақами? Йўқол. Бор, кет юртингга. Бор ўша алкаш отантнинг олдига, – дея нарсаларимни эшик олдида қолдириб чиқиб кетди.

Ўша қундан бошлаб индамай ишга бориб-келиб юрдим. Готтфрид ҳар куни ишдан қайтар чоғим уйимиз олдидаги майдонча четидаги ўриндиқлардан бирида мени кутиб ўтирас, бироқ кўриши билан бошини бошқа томонга буриб оларди. Мен ҳам гўё уни кўрмагандек ўтиб кетардим. Орадан чамаси бир ойлар ўтиб у кўринмай қолди. Олдинига, юрагим безовта бўлишига қарамай, бирон-бир ҳийла ўйлаб топган бўлса керак деб юрдим. Аммо унинг қораси кўринмасди. Бир куни ишдан қайтиб уникига кириб бордим. Эшикдан киришим билан не кўз билан кўрайки, хона ўртасида натурачи қиз қип-ялангоч ўтирас, ширақайф Готтфрид эса уни чизиш билан овора. Эшикни очиб ичкарига киришим билан иккисини ҳам нигоҳи менга қадалди.

– Қолган-қутган кийим-кечагимни олишга келдим,  
– дедим ноўрин кириб келганлигимдан ўзим ноқулай бир аҳволда.

Дабдурустдан остоңада пайдо бўлганимдан Готтфриднинг юзида майин табассум пайдо бўлди-ю, бироқ гапимни эшитиб бирдан тундлашди.

– Гавдангни тик тутишга ҳаракат қил, нима, буримисан? – дея натурачи қизга дағдаға қилиб бақира бошлади. Қизга Готтфриднинг дағдағаси оғир ботишига қарамай, қиз мен томонга самимий майин табассум қилиб, гавдасини тик тутди ва Готтфридга қараб қоғовини уйди. Назаримда, аслида, бу ерга бошқа мақсадда келганим кўриниб турганига қарамай, қўлимга илинган нарсани олиб ижарага олинган уйга қайтдим. Нима қиласаримни билмасдим. Орадан озроқ вақт ўтиб Готтфриднинг болалар майдончасида ўтирганлигини олисдан кўрдим. Назаримда, у менинг ишдан қайти-

шимни кутаётгандек туюлди. Бир хаёлим олдига бориб, очиқча дилдан сухбатлашгим келди-ю, лекин айбини тан олмай ўзини оқлайверишини билганим боис шаштимдан қайтдим. Шу воқеадан икки кун ўтиб почтамда Готтфриднинг ажралиш мақсадида нотариусга мурожаат қилганлиги ҳақидағи хатини олдим. Барча хатти-ҳаракатлари замирида мени севиши, йўқотиб қўйишдан қўрқиши оқибатида индамай изтироб чекиши ётишини кўнглим сезиб турарди. Ана шунинг учун вазиятни ўзгартириш мақсадида бир қадам ташласам, балки, ҳаммаси бошқача кечарди. Бироқ ўшандада миямда «Одам ўз қадрига етиши керак» деган фикр тинчлик бермасди.

Расмий ажрашиб бўлганимиздан кейин Готтфрид ҳар куни менга узундан-узоқ куни билан қилган ишларини ва келгусидаги режаларини ёзадиган одат чиқарди. Олдинига ажралишга ажралиб, сўнг хат ёзиши айни дамда ортиқча эди. Бемақсад театрда юк ташиб юришими ва турмушимдаги зарба оқибатида кунларимнинг зерикарли, юракни сиқадиган бир тарзда ўтиши ўз-ўзидан Тошкентга қайтишга ундаdi. Дардим оғир. Уни бўлишадиган бирдан-бир одамим эса укам эди. У мени аэропортда кутиб олди, иккимиз тўғри ижарада уйга кириб келдик. Аввалига аҳволим ёмонлигини кўриб, бироз кайфиятимни кўтариш мақсадида у-бу яхши янгиликлардан гапирди. Уйга кириб келишимиз билан: «Сенга ҳақиқий ўзбекча ош пишириб бераман», – дея ишга киришиб кетди. Ошхонада унинг ош пиширишини кузатиб ўтириб Швецияда ўтган уч йил умримнинг барча икир-чикирларини рўй-рост гапириб бердим. Укам жимгина тинглади-ю:

– Тошкентга қайтиб тўғри қилибсан. Сени қаердан топишни билади. Қолаверса, оилани расмий бир парча қофоз билан сақлаб бўлмаслигига унинг ҳам ақли

етади. Начора. Бақт ҳамма нарсани ўз ўрнига қўяди,  
— деди мени тинчлантиришга уриниб.

Ишга кирдим. Аввалига интернетдаги почтамга, қўл телефонимга тинимсиз қаардим, зора, Готтфриддан хабар бўлиб қолса дея. Аммо у ичиб маст бўлган онлари қўнгироқ қилилар ва миясига келган бир чақага арзимайдиган майда жанжалларимизни эслаб филдан тую ясад ҳақорат қилишга тушарди. Унинг бу машмашаси бора-бора шунчалар жонимга тегдики, ўз-ўзидан қалбимда унга жой қолмади. Бироқ бир чандиқ қолганини ҳис қилдим. Шу билан бирга, бу ҳаётнинг бирон-бир формуласи ёки аниқ бир ҳисоб-китоби йўқ, инсон қалби эса жуда ҳам чалкаш эканлигини тан олдим».

Шу ерда Гули кундалигини якунлаганди.

Толиб кундаликни ўқиб бўлдию юрагида бир нарса тўнкарилиб кетиб, Гулига нисбатан чуқур ҳурматни ҳис қилди. Ўша куни кундаликни яна жойида қолдириш учун бир неча бора уриниб иложини қила олмади. Бироқ эртаси кунига Гулининг тушликка таклиф қилиш мақсадида келса, худди кечагидек унинг хонасининг эшиги қия очиқ, ичкарида эса ҳеч ким кўринмасди. Толиб вақтдан фойдаланиб кундаликни дарҳол жойига қўйиб, гўё ҳеч нарса бўлмагандек тезда ортига қайтди. Бироздан кейин эса Гулининг қўл телефонига қўнгироқ қилиб, тушликка таклиф этди. Учрашиш олдидан агарда Гули кундалик ҳақида бирон нарса сўраб-суриштириб қолса, қандай жавоб беришни ўйлаб хавотирга тушди. Ўқиганлигини тан олиши ҳам яхши эмас, кеча ишхонасига борганимни бирордан эшитган бўлса, хабарим йўқ дейипши эса қизни шубҳага солиши аниқ. Аммо кундаликнинг бир кунга йўқолиб қолгани Гулининг эътиборини тортмаслиги мумкин эмас. «Хўш, вазиятдан қандай чиқсан бўлади» деган ўй билан Толиб Гули билан учрашди. Гули олдинига

тушлик вақтида ҳеч нарса бўлмагандек ундан-бундан гапириб ўтириди. Толиб қиз кундалиги йўқолиб қолганини сезмаслиги мумкин эмас ёки кеча уни излаб ишхонасига борганимдан хабари йўқ, агар ҳақиқатан шундай бўлса, шубҳадан холиман дея бир неча бор қизга синовчан нигоҳ ташлади. Лекин Гули синини бузмади. Фақат улар овқатланиб бўлиб ўринларидан туришаётганида қиз унга бир неча бора сирли қулимсираб, бироннинг хати, шахсий кундалиги, телефоны, интернет почтасига қизиқувчи одамлар ҳақида у-бу гапни қистириб ўтди. Толиб қизнинг айёрлиги ва гапни узоқдан бошлаганидан ҳушёр тортди. Бироқ Гули қишлоғига кетмоқчи бўлиб йўл сумкаси билан ишхонасига келгани ва сумкасини ўриндиқда қолдириб, ўзи компьютерда нимадир ёза бошлагани, кўз олдига бирга ишлайдиган ходимларидан бири келиб бегона сумка эканлигини кўра-била туриб аввалига: «Кимники?» – дегани, савонни бериш билан бир пайтда сумкани очиб, ичидагиларга қизиққанини гапирганида уни шу тоифадаги одамлар билан тенглаштираётганлиги оғир ботиб, ортиқ кундаликни ўқиганини сир тутишга сабри чидамади. Қисқа ва лўнда қилиб кундаликни ўқиганини, бундай қилишига асосий сабаб қизни яхши кўриб қолганини, агарда рози бўлса, оила қуриш ниятида эканлигини гапириб, кечирим сўради. Гули аввалига, Толибнинг назарида, бирдан оқариб кетди. Сўнг бироз қизарди-да, «Тушлитимиз тугади», – деди чехрасида қувонч ярқ этиб.

\*\*\*

Толиб уйга кириб келганида алламаҳал бўлиб қолган эса-да, Соня хола уйда йўқ эди. «Альфред амаки касалхонадалиги учун Тоня бувининг олдига чиққан

бўлса керак», – дея музлаткичдан ўзига қўйилган егуликни олиб илитди ва апил-тапил овқатланди.

Бир хаёли, кампирдан дарак бўлмагач, Тоня бувиникига бормоқчи бўлди, сўнгра баъзида кампирлар, бирон қизиқ кино кўрибми, сухбатга киришиб кетибми, узоқ-узоқ ўтириб қолишларини эслади. Эрталаб кампир билан, бирон ёрдам керак бўлса, қўл телефонига қўнфироқ қилишга келишганлиги учун қўл телефонига қаради. Йўқ, ҳеч қандай қўнфироқ бўлмаган. Ҳаммаси жойида бўлса керак дея хонасига кириб, тўшагига чўзилди-да, уйқуга кетди...

Эртаси куни Толиб ишга отланаётуб: «Наҳотки, Соня холам ухлаб қолган бўлса?» – дея айвонга мўралади. «Ие, келмабди-ку, кечаси Тоня бувиникида тунаб қолдимикан» деган фикрда эшикдан чиқди. Шу вақт икки нотаниш кишининг учинчи қаватга кўтарилиб кетаётганини кўриб: «Булар ким бўлди экан?» – дея ичиди ўйлади ва бир хаёли Тоня бувиникига кириб ўтмоқчи бўлди. Соатига қараб, фикри ўзгарди. Яххиси, ишга борганида қўнфироқ қиласди.

Ишига бориб, қайта-қайта қўнфироқ қиласа-да, жавоб бўлмади. Тоня бувининг ҳам телефонини кўтаришмади. Толиб энди бутунлай тинчини йўқотди. Пешиндан кейин бўлим бошлиғидан рухсат сўраб, уйга вақтлироқ қайтди.

Уйда ҳеч ким йўқ, эрталаб ошхона столида чала ичган чойи ҳам шундайлигича турарди. Толиб, худди томогига нимадир келиб тиқилгандек, ҳовлиқиб тепа қаватда яшайдиган Тоня бувиникига кўтарилди.

Эшик ланг очиқлигидан ҳайратланиб ичкарига мўралади. Уй одамга тўлиб кетган, аёллар бошида қора рўмол, устиларида ҳам қорамтири кийим. Эркаклар ҳам мотамга мос кийинишган. Толиб уларнинг баъзиларини таниса, баъзиларини биринчи кўриб туриши

эди. У ўз иш билан овора бўлиб ёнида юз берган во-  
қеадан бехабар қолганидан ўсал бўлди.

Ҳамма жим, юзларида қайфу билан чуқур ўйга бот-  
ганча сукут сақлаб ўтиришибди. Онда-сонда кимлар-  
дир ўзаро пичирлашиб қўяди.

Икки кун олдин операция бўлган Альфред амаки  
ҳам шу ерда, уйнинг тўрида, дераза ёнидаги диванда  
ўтирас, аммо Тоня буви билан Толибнинг уй бекаси  
кўринмасди. Толиб бош иргаб саломлашганча ичка-  
рига юрди. Юраги кимдир қазо қилганини сезиб ту-  
рарди. Аммо ким?! Альфред амаки Толибни кўрдию  
ўпкаси тўлиб, кўзларидан ёш қуишилб, бош иргади.  
Ҳаммаси тушунарли, демак, Тоня буви!.. Лекин Соня  
хола қаерда, нега у кўринмаяпти?.. У бир амаллаб  
одамлар орасидан ўтди-да, Альфред амакининг ёнига  
бориб ўтириб олди. Чолга қаттиқ қайфуриш мумкин  
эмас, Толиб нима қиласини билмас, кўз олдида отаси-  
нинг ўлим маросими гавдаланаарди.

Ўшанда Толиб жуда хотиржам, онасининг йифла-  
шига ҳам бефарқ, ўзимни дадил тутишим керак дея  
ўйлаган эди. Мусулмонлар одатига кўра қабрга мар-  
ҳумнинг яқинларидан бир тушиб, майитни лаҳадга  
қўяди. Толиб катта йигит бўлиб қолганлиги боис ама-  
килари уни туширишди. Ўшанда отасининг муздек  
танасини қабрга қўяр экан, юрагидан бир нарса чирт  
этуб узилгандай, қабрда отаси билан бирга ўзининг  
болалигини қолдириб чиққандек, қалби ҳувиллаб қол-  
ганди. Толиб учун отаси ишонч, суюнч, ғайритабий  
бир куч эди. Орадан вақт ўтиб ана шу ҳис-туйғуни  
бошқачароқ бир шаклда аввал Соня хола, кейин эса  
мана шу эр-хотинлар әгаллаганди. Толиб чолга таскин  
бериш мақсадида уни маҳкам бағрига босди. Альфред  
амаки елкаси силкиниб бироз унсиз йиглади. Бу ора-  
да хонага Соня хола кирди. Толибга кўзи тушиб, кел-

дингми дегандай бир қараш қилганча нариги хонага ўтиб кетди.

Одамлар Тоня буви хусусида секин-секин, пичирлаб гаплашишарди. Толиб ўтирган жойида Соня хола кириб кетган хонага марҳумнинг ётқизиб қўйилганлигини, у кеча дунёдан ўтганлигини, насронийлар одатига кўра эртага, яъни учинчи кун дафн этишларини атрофдаги ўрисча-ўзбекча шивир-шивирлардан тушуниб олди.

Издижом орасида Надя буви ҳам кўринмасди... Балки, ичкарида қизининг тобути ёнида ўтиргандир...

Толиб отасининг ўлимидан сўнг ҳаёт деган тушунчани қисман анлагандек бўлса, ҳозирги ҳолатда Альфред амакининг ёнида тилсиз-забонсиз ўтирас, нима деб таскин-тасалли беришни билмас, фақат одамларнинг хатти-ҳаракатини кузатиб, нима қиларини билмай ўтиради. Яхшиямки, унинг бу ҳолатини хонадан қайтиб чиққан Соня хола пайқади. У Толибнинг олдига келиб:

– Юр, Тоня бувинг билан видолашиб чиқ, – деди.

Толиб Тоня бувининг бағрикенглиги, хотиржамлигини яхши кўярди. У Соня холага ўхшаб ҳеч қачон асабийлашмас, сабрли, энг муҳими, ҳар қандай вазиятда ҳам кишини тушунишга ҳаракат қилас, ўзидан айб ўтса, ёши улуғлигига қарамай, кечирим сўрашдан тортинмайдиган жуда юмшоқ кампир эди. Толиб Соня холадан аразлаши, унга қаттиқ-қуруқ гаплар айтиб юбориши ҳам мумкин эди-ю, лекин Тоня буви билан ҳатто овозини хиёл кўтариб ҳам гаплаша олмасди. Унинг назарида, кампир ҳақиқий зиёли аёл эди.

Толиб Соня холага эргашиб ичкари уйга кирди. Бу хона илгари китоб ва ҳар хил мебеллар билан тўла эди. Эндиликда у бўшатилган, ўртада эса атрофи гуллар билан безатилган тобут турар, тобутда эса осуда

уйқуга кетгандек Тоня буви ётарди. Толиб кампирнинг таниш, беозоргина юзига кўзи тушиши билан ўпкаси тўлиб, кўзига ёш келди. Соня хола йиглайвериб, кўз ёшлари қуриб қолгандек эди. У Толибни тобутта яқинроқ келишга чорлаб, ўзи тобут ёнига бориб чўккаладида, «Майли, йигла, йиглайвер, бироз юрагингни бўшатиб ол», – деди унга. Худди шу гапни кутиб тургандек, Толибнинг кўзларига шашқатор ёш қуийлиб келди. Бундан Соня холанинг кўнгли бўшашиб кетиб, Толибни қучганча изиллаб йиглашга тушди. Хонага кирибчиқиб турган ҳар хил миллатга мансуб чол-кампирлар унинг елкасига қоқиб юпатиб қўйишарди. Шу вақт Альфред амаки пайдо бўлди. У Толибни хонадан олиб чиқди-да, ҳалигина ўзи ўтирган диванга олиб бориб ўтқизди. Бу орада Соня хола унга сув ичирди. Толиб бироз ўзига келгач отасининг маросимида қўпчилик такрорлаган «Ўлим ҳақ, бир кун биз ҳам ўша ерга борамиз» деган жумлани қайта-қайта хаёлидан ўтказди.

Хонада одам камаймасди. Бири кетиб, бири келар, афтидан, уларнинг аксари чол-кампирнинг шогирдлари, институтда бирга ишлаган ҳамкаслари эди. Толиб Альфред амакининг ёнида узоқ ўтириди. Хаёлига дам сайин Надя буви келар, «У қаерда экан, қизининг вафотидан хабар топдимикан?» – деб ўйларди. Бир маҳал Соня хола Альфред амакига қандайдир дорилар келтириб берди-да, Толибга қараб:

– Сен энди уйга бора қол, бу ерда қиладиган бошқа ишининг йўқ, – деди.

Толиб эртаси кунига ишга кетди. У Тоня бувининг дафн маросимида қатнашмоқчи эди. Соня хола унамади.

– Қўй, вақти келиб мени кўмсанг ҳам етади. Шу совуқ ўлимнинг башарасини қайта-қайта кўравермагин, – деди.

Толиб кампирнинг бу гапидан ҳушёр тортди. Эрта бир кун кампирга бирон нарса бўлса, миллионлар яшаётган бу гавжум шаҳарда ёлғизланиб қолишини ҳис қилиб, ичида нимадир чирт этиб узилганини пайқади...

Эртаси куни Толиб газетада навбатчи эди. У Содикқа вазиятни тушунтириди. Содиқ дўстининг қарияларидан яхши хабардор эди. Афсус чекди. Кейин гап бошлади:

– Э, оғайни, сен роса баҳтли йигитсан-да, кундузи чироқ ёқиб ҳам бунақа одамларни топа олмайсан. Отанг жуда ақлли, одам танийдиган киши эканларда. Сен фўр болани мана шунақа ишончли одамларга бекорга ишониб топшириб кетмаган-да. Бўлмаса, ҳозир менга ўхшаб Тошкент бўйлаб ижарама-ижара тентираб юрадинг. Биласанми, Бешёғочда бир поляк чолникида тўрт йил яшаганман. Айёр чол уйимни сенга қолдирман дея нотариусдан васият қофози қилиб берганди. Ёш эмасманми, унинг гапига лаққа тушиб, уй меники дея, нима айтса, қилиб юраверибман. Ҳаммасидан алам қиладиган жойи бу ҳақда ҳаммага гапириб қўйганимда. Отам олдинига ишонмади. «Сен хаёл-парастдан бошқа, нима, Тошкентда одам қуриб қолибдими?» – деди. Сўнгра васиятнома нусхасини кўриб: «Омадинг бор экан», – дея бечора менга ўхшаб у киши ҳам чиппа-чин ишонди. Чолни уйга меҳмонга чақирап, далада нима пишиб етилса, лўкиллаб кўтариб келарди, хуллас, у оиламиз аъзосига айланди.

Тўртинчи йили чол ўлиб қолди. Кутимаганда Варшавадан бир поляк йигит келиб, нотариус билан биргаликда васият қофозини кўрсатди. «Мана сенларга», – дея ўзимдаги васият нусхасини кўрсатдим. Чол охирги дамда менга берган васиятини бузиб, Варшавада яшаётган жиянига уйни қолдирган, менга эса лом-мим

демаган экан. Ўша куниёқ жияни ортимга бир тепиб уйдан ҳайдади. Бироз вақт ўтиб уйни сотиб, Варшавага кетди.

Отамнинг олдида ўзимни оқлаш мақсадида: «Ким ўйлабди ўладиган ва у дунёга кетишга тайёргарлик кўраётган одамнинг қалбига шундай қабиҳликни сингдиришга қодирлигини?» – дедим. Отам эса худди мени бугун биринчи марта кўриб тургандек: «У дунёни тинч қўй, падарлаънат. Сен олдин шу дунёни эплаб ол. Бекордан-бекорга чол фикрини ўзгартиргмаган. Қилган меҳнатларингни таъна қилгансан, ҳеч кими йўқ дея хўрлагансан, таъмагир. Мана, хатти-ҳаракатингга яраша жазо олдинг. Ҳар сафар ўйлардим-а: «Бу падарлаънатининг нимаси бу чолга ёқиб қолибди?» – дея. Ўшанда отамнинг лақиллаб қолаверганимдан қуйганидан сўкканини бир кўрганингда эди, қария ақлдан озибди деб ўйлардинг. Лекин, нима бўйланда ҳам, писмиқ чол отам иккимизни ҳам шунақангидан ўтқизиб кетдики, бу ҳақда бирорвга айтишга одам уялади. Шунинг учун то бу воқеани отам эсидан чиқаргунича унинг таъналарига, авра-астаримни чиқариб сўкишларига миқ этмай чидадим. Ундан кейин Қорақамишда бир ўзбек кампир билан яшадим. Икки хонали уйда кампир менга ошхонадан жой берди. Бу ҳам камдек, кампир ўта хасис, ўтирсам ҳам, турсам ҳам, гидинглаб асабимга тегади. Ундан ҳам оғирроғи, уйига келган меҳмони билан нуқул Тошкентга бошқа вилоятлардан келган ўзбекларни жўрттага менга эшитадиган қилиб «қишлоқилар, даланинг одамлари» дея қошини чимириб пачакилаб ўтиради. Бир куни сабр косам тўлиб, шундай ёрилдимки, башарасига тик қараб: «Тошкентлик экансан, ички маданиятинг, қалб бойлигинг билан менга ўхшаган қишлоқиларни лол қилиб қўй, ана ундан кейин гапир. Сенга ўхша-

ган тошкентликлар писта билан сув сотишга ярайди, холос», – дея башарасига тупуриб чиқиб кетдим. У эса ортимдан оғзига келганини қайтармай бақирганча қолди.

У ердан кетиб тўқсонларга кирган карис кампир билан яшадим. Кампирга одам иси ёқмас экан, бир ой ўтар-ўтмас мени уйидан ҳайдай бошлади. Қўлимда ижарага бир йилга рози бўлгани ҳақидаги қофози борлиги учун кампирнинг хархашаларига эътибор бермай эшигимни қарс ёпиб яшайвердим. Кампир нима қилиб бўлса ҳам мени уйдан қувиш мақсадида ҳар куни бир найранг ўйлаб топарди. Эшитган қулоқ ишонмайди. Охири кампир уйда қип-ялангоч юра бошлади. Буниси энди ҳаддан ошиб тушди ва ўзимга ўзим: «Бу яхшилик аломати эмас», – дея қочиб кетишга мажбур бўлдим. Шу-шу ўзимнинг чол бўлишимни ўйласам, юрагим орқага тортиб кетади. Назаримда, қарисам тирноқ орасидан кир қидирадиган бадгумон чол бўлман. Сабаби, бу ҳаётни, одамларни ҳеч тушуниб бўлмайди. Ҳеч бир нарсага ишониб ёки суюниб бўлмайди. Ҳамма нарса мўрт. Қўзимга кўринган ҳамма нарса ўзимга ўхшаб бу дунёда қилтилаб турибди. Яхшиям, Худони кўришга қурбимиз етмайди... агарда уни кўришга имкон бўлганида, одамзод ундан ҳам бирон-бир камчилик ўйлаб топиши аниқ эди... Хуллас, «Одам қариса бекордан-бекорга нафақага чиқмас экан» деган хуросага келдим...

– Соня хола ўлса, уйи кимга қолади? – деди дабдурустдан Содиқ ўз саргузаштларидан чалғиб Толибга қараганча.

– Билмасам. Биз бу ҳақда ҳеч қачон гаплашмаганмиз. Беларусда иккита қиз жияни бор. Ҳар-ҳар замонда телефонда гаплашиб туради.

– Сен ўзинг гап бошласанг бўлмайдими?

— Эсинг борми? Соня хола худди онамдек бўлиб қолган. Онангга: «Ўлсанг уйни менга қолдир», — дейишга тилинг борадими?

— Йўқ, албатта... Фақат катта шаҳарда ижарама-ижара ҳар хил ижарадорларнинг найрангларига ўй-найвериб юрагинг ҳам адои тамом бўлади, ижара тин-кангни қуритади. Буни сен тушунмайсан, — дея бирпас донишмандлик қилганидан сўнг унинг ўрнига навбат-чилик қилиб туришга ваъда берди.

Толиб эса иш тугаши билан уйига жўнади. Ичкарига кириши билан тамаки ҳиди димоғига урилди. Ажабланди. Соня холам чекмасди-ку. Ким бўлди экан? Пойабзалини ечиб, ошхона томонга ўтди. Соня хола эшикка орқа қилиб Толибнинг жойига ўтириб олган, дераза пардасини олиб ташлаган, ойна ҳам қия очиқ, марказий кўчани тўлдириб ўтиб-қайтаётган машиналар шовқини баралла эшитилиб турарди.

Столда сигарет қутиси, кулдонда эзғиланган бир неча сигарет қолдиқлари.

— Бирданига бунчалик кўп чекмаслик керак, — деди Толиб унинг ёнидаги курсига бориб ўтиаркан. Соня холанинг бир тола ҳам қораси қолмаган сочлари бироз тўзғиган, юз териси салқиганидан охирги кунларда ухламагани боис янада озгани кўриниб турарди.

— Ўша куни кечқурун сени кутиб ўтирсам, Тоня телефон қилиб, ўзини ёмон ҳис қилаётганини айтиб қолди, — деди деразадан кўзини олмай гап бошлаб. — Борсам, эшик очиқ, Тоня тўшагида қимирламай ётибди. Мени кўриб ўзича жилмайган бўлди. Ҳаво етишмаётганидан ҳансира бурганини пайқадим. Дарҳол тез ёрдамга телефон қилмоқчи эдим, унамади. Ярим соат ўтар-ўтмас гапириб турган ерида илкис бир «уф-ф» дедиую жони узилди... Ишонасанми-йўқми, жони шун-

дай осон чиқиб кетди. Қариб-қовжираб қолган совуқ танаси қолди...

Бугун жойига қўйиб келдик. Эри юрагидан операция бўлган эмасми, бу жудоликни зўрга қўтариб ўтирибди. Шунча дарди камлик қилгандек, Надя буви келиб, унга чунонам бақирдики, гўё Тонянинг ўлимига Альфред сабабчидек. Ярим ўпка билан шунча йил яшади. Овсар кампир эса ҳеч нарсани тушунмайди.

Альфред яхши одам, оғир-босиқ, кампир шунча бақир-чақир қилияпти, бир оғиз гапирмади. Она сифатида унга осон эмаслигини билади-да. Бечора Альфред ўзи не аҳволда ётибди-ю, касалхонадан чиқаман деб туриб олди.

Кампирга ҳам шу ёшида бу айрилиқ жуда оғир. Аммо инсон тупроқдан яралиб, яна тупроққа қайтиши табиий. Начора, буюк қудрат қаршисида биз, бандалар, ожизмиз. Лекин ёшим саксондан ошиб шуни англадимки, одамзод ўлимдан қанчалик қўрқмасин, кўпроқ умр кўришни ҳарчанд истамасин, барибир, юз йилдан ошиқ яшаш унга оғирлик қиласкан... Тақдири илоҳийга қарши бориб бўлмайди. Худо берган умрни бандаси истаса-истамаса охирги сониясигача яшашга мажбур... Ёшлиқда умр бир қултум сувга ўхшайди, кексайганда эса баъзида мана шу бир қултум сувни ютишга ҳам одамнинг сабр-бардоши етмай қоласкан...

Надя буви шўрлик, девонага ўхшаб ҳар куни ўзининг ўлимини кутиб ўтиrsa-да, кутилмагандан... Менга қолса-ку, қазоси етса, кампирни қизининг ёнига кўмиб келган бўлардим. Аслида, кампирнинг дардига энг яхши даво шу. Шаккоклик бўлса ҳам айтай, ҳамма нарсадан шу қадар тўйиб кетдимки, ҳар куни бир хил нарса тақрорланади. Ейсан, ичасан, ётасан. Мақсадинг ўша кунни кутиш. Шунақанги ҳам bemaza ҳаёт бўла-

дими? Баъзан барчасига қўйл силтаб Тонянинг ёнига бориб ётгим келади ўзимнинг ҳам. Бироқ, начора, тақдир иши бандасига боғлиқ әмас.

Толиб бутун вужуди билан Соня холасини тингларкан, Надя буви ҳақида сўрамоқчи бўлар, нега у дафн маросимида кўринмаганини аниқлаштиргиси келарди. Соня хола бўлса нуқул ўз-ўзича гапирав, ёнида Толибнинг ўтирганини ҳам унутгандек эди. Толиб бу икки қўшни эллик йилдан бўён бирга яшаб келганини, булар билан бор-йўги ўн икки йилдан бери яшаётган бўлса-да, шунчалик яқин бўлиб қолганини ҳис қиласар, бу айрилиқни Соня хола юрагига яқин олаётганлиги, ёши ҳам бир жойга бориб қолгани Толибни хавотирга солаётганди. У ана шундай хавотир билан Соня холага қараб туриб ушбу шаҳарда онасиdek меҳрибон бу аёлнинг ўрнини ҳеч ким боса олмаслигини ўйлар, қолаверса, унинг бошқа дин, бошқа миллатдан бўлишига қарамай, ақлли ва содда фалсафаси Толибнинг саволларига шундай ечим топиб берардики, бу жавоб унинг дунёқарашига батамом мос келарди.

– Тонянинг эрига ёрдам керак, – деб қолди кампир бир маҳал. – Сен Альфреднинг ёнида яшаб турсанг, бироз хотиржам бўлардим. Биласан, касал одамни ёллизиз қолдириб бўлмайди...

Толиб кампирнинг таклифини ўйлаб ҳам кўрмай маъқуллади. Соня хола деразага тикилганча ҳамон аллақандай хаёллар билан банд эди.

Ҳозир ўйлаб кўрса, Толиб ҳеч қачон бирор билан яқин дўст бўлишга ҳаракат қилмаган экан. Баъзида ким биландир дилдан гаплашгиси келади-ю, сўз бошлиши билан сухбатдошининг кўзларига тикилади-да, ҳафсаласи пир бўлиб қолади. Сабаби, у ўзи ҳақида бирон нарсани гапираётганида рўпарасидаги одам Толибнинг ҳикоясини бошқача қабул қилаётгандек,

унинг сўзларида ниманидир ташлаб юбориб эшитаёт-  
гандек туюларди.

У Наргизни севиб қолганида ҳам шундай келишган  
ва чиройли қизнинг қўли эгри эканини, бегона нари  
турсин, ҳаттоқи ўзига ҳам овоз чиқариб айта олмас-  
ди. Айниқса, уни бошқа бир йигит билан қучоқлашиб  
турганини кўрганида; бечора юраги Наргизни севиши-  
да давом этаётганини ва бу жараёнга қарши қандай  
курашганини... Отасининг фавқулодда вафотидан сўнг  
калававинг учини бутунлай йўқотиб, тўнғич ўғил си-  
фатида оиланинг масъулияти зиммасига келиб туши-  
ши унинг учун гапирилмайдиган мавзуларга айланди.  
Ўшанда Толибнинг жим юришини кўриб Соня хола:

– Ҳар қандай вазиятда ҳис-туйгуларни ақл билан  
бошқариш керак, – деди ҳар бир сўзига урғу бериб.  
Шунда Тоня буви:

– Соня, Толибга нисбатан жуда қаттиққўллик қил-  
ма! Ёшлигингни озгина эсла. Нима, биз хато қилма-  
дикми? Бу ҳаётни ҳеч қачон тушуниб бўлмайди. Ҳеч  
бир қария ўтган умрини кўз олдига келтириб, агарда  
чин дилдан тан олса, тўғри яшадим дея олмайди. Нис-  
бийлик бор. Лекин бу дегани умр хатосиз ўтди дегани  
эмас. Одам ҳис-туйгуларисиз, фақат ақл билан яшаса  
қуруқ лошга айланиб қолади, – дея ўртоғига қарши  
чиққан эди. Альфред амаки эса:

– Вақт ҳаммасига даво, фақаттина унинг ўтишини  
сабр билан кутсанг бўлгани, аслида, вақт даво бўл-  
майди, одам бошига тушган кунинга кўнинади, – деган-  
ди эркакларга хос совуққонлик билан...

Эртаси куни Толиб ишдан қайтса, Соня хола унинг  
тўшакларини Тоня бувиникига кўчирибди. Шу-шу  
ишдан қайтиб, Соня хола билан овқатланиб, бироз  
гаплашиб ўтирас, у-бу ишларига ёрдам берар, сўнг-  
ра тунаш учун Альфред амакиникига чиқиб кетарди.

Чол Толибнинг келишини кутар, эрталаб ишга кузатиб қўяр эди, холос. Дам олиш кунлари эса, гарчи Соня хола айтмаса-да, Толиб ҳар иккала уйни супуриб-сидирар, чангларни артар, дўйкондан керакли озиқ-овқатларни келтириб қўярди. Илгарилари бу ишларни Соня холанинг ўзи бажаар, Толибга иш қолдирмасди. Тоня бувининг кутилмаган ўлими йигитни чўчитиб қўйди. У нима қилиб бўлмасин кампирни уринтир-масликка, эҳтиёт қилишга урина бошлади. Худо кўрсатмасин, кампирга бир кор-ҳол бўлиб қолса, аввало, Толиб қаерда яшайди? Мана, Содик ижарама-ижара шаҳарда тентираб юради. Майли, бунга ҳам кўнинади, бироқ отасининг барвақт ўлимидан кейин Соня холага суяниб қолганини, усиз калавасининг учини йўқотиб қўйишини билади. Бўш вақтлари Альфред амаки билан айвончада ўтириб шахмат ўйнашарди. Кейинги пайтларда йигитда пайдо бўлган маҳзунликни пайқаган Соня хола ҳам, Альфред амаки ҳам унинг кўнглига қўл солиб кўришди. Агар юрадиган қизи бўлса, уйланиб, бемалол келиб яшайвериши мумкинлигини айтишди. Толиб бўлса Гули ҳақида қарияларга гап очмоқчи бўлди-ю, сўнг вақти-соати билан айтарман дея индамай кулиб қўя қолди.

Умуман олганда, Толиб билан Соня холанинг ташвиши кўпайган эди. Юраги операция бўлганидан кейин Альфред амаки ортиқча ҳаракат қила олмас, Надя буви эса қизининг ўлимидан сўнг телба-тескари гапиргани етмагандек, инжиқ ва янги-янги қилиқлар чиқарадиган бўлиб қолганди. Соня хола ҳамма учун овқат пиширас, ҳар куни эрталаб Надя бувидан хабар олиб келарди. Толиб бир куни эътибор қиласа, Соня хола хиёл ҳансирашиб, пишиллаб нафас оладиган одат чиқарибди. Ўзига индамади-ю, юрагига баттар хавотир оралади.

Дам олиш кунлари Надя бувидан хабар олиш Толибнинг зиммасига тушди. Надя буви Толибни уйига киргизиб олар, эндиликда у чолини хотирлашни бас қилган, марҳума қизининг болалигидан тортиб то охирги вақтларгача тушган суратларини бирма-бир кўрсатар, бу суратлар билан боғлиқ воқеаларни ҳам хотирлар, сўнг Худони унга шунча умр бергани, бу билан уни масхаралагани учун қарғашга тушиб кетар, ҳаял ўтмай ётогидаги санам қаршисида туриб олиб чўқинганча кечирим сўрашга тушарди. Кампирнинг асаблари тамом бўлган, пов этиб ёниб, пис этиб дарров сўниб қоларди.

Надя бувининг уйи икки хонали бўлиб, учинчи қаватда эди. Хонадаги жиҳозлар ҳам унинг ўзига ўхшаб эски урфда бўлса-да, бу хонадонда, аввало, ёш бола бўлмаганлиги, қолаверса, уй бекаси ҳам уларни асраб-авайлалагани боис мебеллар яп-янгидек ялтираб турарди. Толиб эса юздан ошган Надя бувининг, юзи, қўллари, бадани ажиндан тиришиб кетганига қарамай, ҳамон ёшлардек гавдасини тик тутишига, ўз хонадонини чиннидек қилиб тозалаб ўтиришига ҳайратланаарди. Фақатгина, унинг назарида, кампир жуда кўп яшаганидан ҳаёти давомида кўрган ва учратган одамларини чалкаштирадиган, қизининг ўлимидан сўнг эса қариб чарчаган мияси янада кирди-чиқди бўлиб қолгандек эди. Толиб уни четдан кузатар экан, ишхонасидаги компьютерини эсларди. Агарда компьютерга ҳам вирус тушса, ёмон ишлайди ёки ишлашдан тўхтайди. Қизи Тоняning ўлими Надя бувининг миясига вирус бўлиб тушганди. Тиббиёт ана шу вирусни тозалаш йўлинни билганида эди, Надя буви, балки, ҳали узоқ яшарди.

Кунлар ўтиб Надя буви қизини йўқотганига кўникди, шекилли, бироз тинчили. Толибдан биргаликда

қабристонга бориб келишни илтимос қилди. У кампирни тушунса-да, аммо унинг бир лаҳзада ўзгариб қоладиган феълидан чўчиди. Сабаби, Надя буви киракаш машиналарга ўтирмас, йўл транспортларида учраган одам билан жанжаллашар, рўпарасида бир қора кўринса бўлди, ҳуда-беҳуда гапларни гапираверадиган одати бор эди. Шу сабабли Толиб кампир билан олдиндан келишиб олди. Яъни қабристонгача енгил машинада боришади. Пулинин ўзи тўлайди. Фақат Надя буви машинага ўтириб, тинчгина бориб-келса бўлгани. Кутилемагандек кампир дарҳол рози бўла қолди. Шундай ҳам Толиб бу итоаткорликка ишонмай киракашни кампирнинг ёши улуғлиги, инжиқ бўлиб қолгани хусусида огоҳлантириди. Киракаш фаросатли одам экан, «Хавотирланманг, ука, бизнинг эртанги қунимиз ҳам шу», – деди. Улар олдинига Надя бувининг чоли ётган қабристонга бориб, қабр атрофини тозалаб, чамбарини бўядилар. Сўнгра кампир Толибдан марҳумни хотирлаб Қуръондан бирон нарсани тиловат қилишни сўради. Толиб бир вақтлар бувиси ёдлатган суралардан бирини ичиди ўқиди. Кампир ҳам худди Толиб сингари қўлинини дуога очиб, охирида овоз чиқариб: «Гарчи динларимиз бошқа-бошқа бўлса-да, борадиган жойимиз битта», – дея ўрнидан турди. Шу вақт бир қуш чарх уриб уларнинг бошида бир-икки айланди-да, улардан икки қадам наридаги сувсизликдан қуришга тушган дарахтга қўниб сайрай бошлади. Кампир Толибга қараб: «Бу менинг чолим, ундан хабар олгани келганимдан хурсандлигини билдиromoқда», – деганча иифи-сиги қилиб, қуш билан гаплаша бошлади:

– Барибир, мендан кўра сенга енгилроқ. Борадиган жойингга кетдинг. Мен-чи, мен тириклар орасида масхара бўлиб яшамоқдаман... Ҳаммаси ёшимни ҳисоблайди... Одамлар жуда bemаза ва абллаҳ... Улар

шу ёшга киришимни ҳам кўролмайдилар. Сен мен-чалик узоқ яшамадинг... Уларни яхши билмай ўтиб кетдинг... Бу ҳам сенинг омадинг. Мен эса масхара бўлиб юрибман...

Толиб бир четда кимсасиз қабристонни кўздан ке-чириб, Надя бувини тинглаб, оғир хўрсинди, унинг умри поёнига етиб, бир бурдагина бўлиб қолганидан юраги эзилди. Айни чоғда, тоғдай суянчидан айрилиб, мунғайиб қолган онаизорининг маъюс нигоҳи кўзига кўриниб кетди-да, томоғига тошдай бир нарса қадал-ганини ҳис қилди. Нафаси қайтди. Кўкрагини ишқа-ди-да, ўрнидан сапчиб турди. Тинимсиз нола чекаёт-ган кампирни, шу билан бирга, ўзини ҳам чалғитиш учун бориб кампирнинг нимдошгина елкасидан қучди.

– Бувигинам, бўлди-бўлди, одамлар билан нима ишингиз бор, сизни мен яхши кўрсам бўлди-да, – дея уни юпата бошлади овози титраб.

Шу аснода қабристон чеккасида туриб унга имо-ишоралар қилаётган киракаш ҳайдовчига кўзи тушди. Толиб ҳушёр тортди. Шошилмаса бўлмайди.

– Буви, бўлди энди, кетайлик. Ҳали Тоня бувини ҳам зиёрат қилишимиз керак, – деди.

Кампир эса гўё Толибни унуглан, соғинган чоли-ни топиб олгандек у билан «суҳбат»да давом этарди. Қараса, бўлмайдиган. Надя бувини даст кўтариб ол-ди-да, йўлга тушди. Ҳеч нарсани тушунмаган кам-пирнинг кўзлари ола-кула бўлиб кетди. Қейин бирдан тинчили. Толибининг бўйнидан маҳкам қучиб олди-да, унинг қулоқларига фақаттинга у эшигадиган қилиб: «Дунёда яхшилик ва муҳаббат ҳамма нарсадан голиб чиқади», – дея пичирлади. Толиб эса кампирнинг би-сотида ҳалиям шунақа тушунчалар мавжудлигидан ҳайратта тушди. «Тўғри айтасиз, бувижон», – дея та-бассум қилди...

Тоня бувининг қабри янги бўлганлиги сабаб бу ерда ортиқча иш ҳам йўқ экан. Аммо кампир ўзи билан келтирган оқ бўёқли тунука қутичани Толибга берди-да, «Хочни бўя», – деди. Толиб унинг айтганини қилди. Сўнгра эътибор бериб қараса, бошқа қабрлардаги хочларнинг ҳаммаси қора рангда экан. «Бекор қилдик, қаранг, ҳаммаси қора рангда-ку», – деди. Кампир ўзиникини маъқуллаб туриб олди. Тоня қора рангни ёмон кўрарди, «Оқ рангда турсин, тамом-вассалом», – деди. Бир хаёли Надя бувига қулоқ солмай хочни қайтадан қорага бўяб қўймоқчи ҳам бўлди. Лекин фикридан қайтди, биринчидан, Надя бувиники яна тутиб қолиб, тўполон кўтариши ҳеч гап эмас, иккинчидан, «Рангининг қанақалигининг нима аҳамияти бор, ўликларга барибир эмасми?» – дея ўзини тинчлантириди. Надя бувини яна боягидай даст кўтариб қабристондан олиб чиқди. Машинага ўтиришлари билан кампир кутилмагандан камгап ва ювош бўлиб қолди...

Эртаси куни овқат олиб борганида кампир эшикни очмади. Нима қиларини билмай эшик очилишини анча кутди. Сўнг ҳовлига ўтиб кампирнинг парда билан тўсилган деразаларини кузатди. Бир маҳал парда очилиб, Надя бувининг қораси кўринди. Бундан Толибининг жаҳли чиқиб овқатни қайтариб олиб кетди. Соня хола эса унинг зардасига парво қилмай: «Овқатни эшик олдига қўйиб келавериш керак эди, у қари бўлса, сенинг ақлинг жойида-ку», – деди. Кейинги кун ҳам эшик очилмаганди, егуликни эшик ортига қўйидида, нарироқда кутиб турди. Бироздан сўнг ичкаридан оёқ товуши эшитилиб, эшик қия очилди ва кампирнинг қоқсуяқ қўллари овқатни олиб, эшик яна ёпилди. Толиб: «Ҳа, қурмағур кампир-а», – дея кулиб қўйиб ортига қайтди.

Соня холасига айтган эди, «Қўявер, қариллик-да», – деб қўйди. Толиб унга тикилиб бир нарсага иқрор бўлди. «Ҳа, Соня холам жуда хокисор аёл, бўлмаса, Надя буви унга ҳеч ким эмас-ку». Шу аснода Альфред амакининг бир гапини эслади: «Миямизга сингдирилган ақидага кўра, шу пайтгача динлар одамлар қалбини тозалаб турадиган бир восита сифатида ўйлаб топилган деб юрардим. Энди ёшим бир жойга бориб, Худонинг борлигини инкор қилолмай қолдим. Сабаби, уни кўра олмасак-да, бироқ у яратган фаришталар атрофимизда, худди ўзимизга ўхшаб, одам шаклида яшаётгани ва у яратган бу оламни ана шу яхши одамлар сақлаб турганига, бундай фариштадек одамлар ҳар бир халқ, ҳар бир миллат, ҳар бир дин орасида бор эканлигига аминман...» Ҳа, амаки тўғри айтадилар, Соня холам, Тоня бувилар фаришта бўлмай, нима ахир?!

Кунлар ўтиб Альфред амакининг аҳволи анча ўнгланди. Рангига қон югуриб, Толибнинг ёрдамисиз ўзини эплаб юрадиган, майда-чуйда уй юмушларни бажарадиган, хийла енгил нафас оладиган бўлиб қолди. Бироқ Надя бувининг аҳволи чатоқ эди. У овқатни олишга оларди-ю, эшикни ҳеч кимга очмас, телефонни кўтармас, дераза пардаларини бутунлай ёпиб ташлаган эди.

– Уч кундан бери Надя бувининг овқатлари ташқарида қолиб кетяпти, олмаяпти, – деб қолди Соня хола бир куни. – Деразасига термилавериб чарчадим, бошим қотди, сени кутиб ўтирибман...

Толиб тушунди. «Бир хабар олиб келмайсанми», – демоқчи.

Толиб индамай овқатланаркан, Соня холага: «Нима қилишимни истайсиз?» – дегандек тикилди. Кампирнинг югар-югорлардан тинкаси қуриганлиги яққол кўриниб туради.

— Балки, Надя бувини ўз ҳолига қўярмиз, керак бўлсак, ўзи телефон қилиб қолар, — деди.

Хола ўз хаёллари билан банд, Толибни эшитмасди ҳам.

— Менда қўшимча қалит бор, хўп десанг, бирга бориб кампирнинг эшитини очсак, — деб қолди бир маҳал. Толиб:

— Бизнинг ташрифимиз ёқмай, кампир жанжал кўтариб қолса-чи? — деди. Соня хола эса:

— Кейин нима бўлса бўлар, — деди нимадандир безовталаниб.

Кампирникига келиб, аввал қўнғироқни босиб, эшик очилишини кутиб туришди. Жимжитлик. Толиб қулоғини эшикка тақаб ичкарига қулоқ солди. Ичкаридан тиқ этган товуш эшитилмасди. Соня хола эса ниманидир пайқагандек, унинг ёнида юраги пўкиллаб турарди.

— Ҳеч нарса эшитилмаяпти.

Толиб эшикдан четроққа ўтиб, «Очинг», — дегандек Соня холага йўл бўшатди.

Соня хола қўллари титраган қўйи қалитни солиб буради. Эшик очилиши билан, худди шуни кутиб тургандек, ичкаридан ачқимтир ҳид ташқарига урилди. Иккаласи баравар оғиз-бурунларини бекитишиди ва ранглари ўчиб, бир-бирларига маънодор қараганча ичкарига қадам босишли. Барча хоналарнинг эшиклиари очиқ турагар, мебелларни чанг босган, дераза пардалари ёпиқ, ошхонадаги сув жўмраги чала ёпилгани боис сувнинг чик-чик томчилагани эшитиларди. Толиб тўғри кампирнинг ётоғига кирди. Ётоқ бўм-бўш. Ошхонага қараб югурди. Ҳеч ким йўқ. Соня хола эса унинг ортидан дийдираганча эргашиб юарди. Толиб залга ўтди, бу ерда ҳам ҳеч ким йўқлиги боис ҳиднинг қаердан келаётганини аниқлаш мақсадида бирпас тек

қотди. Соня хола ҳам бироз Толибнинг ёнида турдида, балконга, Надя бувининг кераксиз анжомлари турадиган томонга қараб югурди.

Балконга чиқдию бирдан:

– О, нет, нет, это грех! – дея чинқириб юборди.

У билан кетма-кет етиб келган Толиб шифт бурчагида ингичка арқонга осилиб турган Надя бувининг жасадини кўриб тошдек қотиб қолди. Шу аснода Соня холанинг ҳолсизланиб қулаб тушаётганини кўриб у томон отилди-да, кампирни суюб қолди. Кейин уни даст кўтариб, залдаги диванга олиб келиб ётқизди. Ошхонадан қўлига илинган идишга сув олиб келиб, унинг юзига сепди, ичинг деб оғзига тутди. Кампир бир-икки қултум ютгач чуқур-чуқур нафас ола бошлади. Толиб охирги вақтларда Соня холанинг юраги оғришини биларди-ю, аммо қандай дори ичишига эътибор бермаган экан, шу боис энг маъқули тез ёрдам чақириш деди-да, телефонга югурди.

Атроф жимжит, қаердадир соат чиқиллар, қаердадир чик-чик сув томчилаб турарди.

Бироз ўзига келган Соня хола ётган ерида нуқул:

– Боже мой, боже мой! – дея такрорлар ва тинимиз чўқинарди.

Толиб эса унинг ёнида, диваннинг бир четида кампирдан кўз узмай гарангсиб ўтирас эди.

Орадан бироз ўтгач дастлаб Соня хола ўзини қўлга олиб, Толибга қаради. Йигитнинг ҳам рангидан ранг қолмаган, кўзлари қўрқувдан ола-кула бўлиб кетган эди. Кампир ҳалиги идишда қолган сувни Толибга тутиб: «Ич», – деди буйруқ оҳангиди. Шундагина Толиб ўзига келиб, сувдан ҳўплади. Соня хола тетикланиб ўрнидан турди-да:

– Ошхонадан пичоқ олиб кел, – дея ўзи балконга чиқиб кетди.

Қуёшга қараган балкон эшик-деразалар берклиги боис ниҳоятда иссиқ ва дим эди.

Толиб пичноқ олиб келди. Соня хола жасадни кўтариб турди, Толиб бир амаллаб арқонни кесди. Кейин милиция келмагунча жасадга тегмаслик кераклигини билса-да, Соня холанинг буйруги билан ҳилвираб қолган жасадни кўтариб ётоқхонадаги диванга олиб чиқди. Бу орада Соня хола маҳалла милициясига телефон қилиб, бўлган воқеани шоша-пиша қисқача гапириб берди. Толибни Альфред амакига жўнатди.

Толиб йўл-йўлакай: «Бечора Альфред амакининг юраги кўтарармикан?» – дея ўйланиб борди. Эндиғина уйқудан турган Альфред амаки Толиб сўзини бошли масидан ҳаммасига тушунди.

– Кетдик, – деди, дарҳол елкасига камзулини иларкан.

Улар етиб келишганида маҳалла милицияси, яна бир неча киши ва тез ёрдам ходимлари уйни ҳамда жасадни кўздан кечириб, Соня хола билан суҳбатлашиб турарди.

\*\*\*

Жамоада норозилик кучайиб бораради. Бош муҳаррирнинг жамоани ёшартириш мақсадида бошлаган қалтис ҳаракати бу ерда анча ишлаб қўйган ходимларга оғир ботиб, ҳаммаси биргаликда муҳаррирга қарши нимадир уюштиromoқчи бўлиб юришар, юзга яқин ходим ошкора тарзда икки гуруҳга ажралган эди. Ҳали ишни яхши ўзлаштира олмаган ёшлар тажрибали ходимлар олдида ожиз, уларнинг жамоадаги ўрни ҳам билинмасди. Толиб тенгилар эса энди бемалол аравани торта олишарди. Шу боис бошлиқ асосан шу ёшдагиларга умид боғлаган эди. Улар билан яккама-якка, баъ-

зида ҳаммасини тўплаб, суҳбатлашар, жамоанинг келажаги хусусида кенгашарди. Бу эса кекса ходимларга ёқмас, кун сайин аламзадаликлари ортиб борарди.

Аввал ўринбосар бўлиб ишлаган, ҳозир оддий ходимликка туширилган Мансур ака деган киши бош муҳаррир хонасидан чиқаётиб Толибга қўзи тушдида, хонаси эшиги олдида тўхтаганча уни кутиб турди.

Аллақачон олтмишдан ҳатлаган бу одам охирги вақтларда, кейинги ўзгаришлар сабабми ёки ўзининг феъли шунақами, икки гапининг бирида биз ҳам элликдан ошиб қолдик деб ҳамманинг жигига тегиб юрар, ҳамиша икки юзи қизариб, укки кўзлари билан одамга шундай қарааш қилардики, Толибнинг назарида, бу қараashi билан ичингни ҳам кўриб тургандек эди.

У Толибни ҳайратта солганча қуюқдан-қуюқ сўрашиб кетди. Ҳатто қишлоқдаги онасининг соғлифи билан ҳам қизиқди. Кейин эшикни очиб, ичкарига таклиф қилди. «Гап бор», – деди.

Толиб индамай эргашди. Мансур ака ўз ўрнига бамайлихотир ўтириб олгач гапни мақтовдан бошлади. Толибни ва у тенгилар ҳақида: «Сизлар коллектив устунларисиз, сизларга қаттиқ ишонамиз», – деди. Толиб ичида фижиниб турган эса-да, унинг асл мақсади нима эканини тушунолмай жимгина эшитарди. Бу одам, айёргилиги етмагандек, иккююзламачи, ўз манфаати йўлида ҳеч нарсадан тап тортмайдиган, қачонлардир чоп этилган, лекин бир чақага арзимайдиган китоблари билан фаҳрланиб юрадиган, аммо, тан олиш керак, қонунни яхши биладиган кекса журналистлардан эди. Толибга ўхшаган ёшларни писанд қилмас, иш юзасидан саломга алик олса-да, улар бирон нарсани сўраб қолса, «Шуни ҳам билмасанг қандай қилиб бу даргоҳда ишлаб юрибсан?» деган оҳангда кибр билан жавоб қайтарарди.

Ўта эҳтиёткор, туллак бўлса ҳам, негадир бу сафар гапни кўп айлантирмади: мақсадини лўнда қилиб айтди-қўйди.

– Мен иш фаолиятим давомида озмунча бошлиқлар билан ишламадим, – деди қип-қизил юзларини қўллари билан фижимлаганча, – аммо бунақасини биринчи кўришим. Лекин ўрганганд жойим, умримнинг кўп қисми шу даргоҳда ўтди. Шунинг учун бу ердан кетишим осонмас. Қолаверса, нафақадалигим туфайли ишдан ҳайдашга умуман ҳаққи йўқ... Жамоани эса қаланғи-қасанғи чаласаводлар билан тўлдиришига жим қараб туролмайман. Бунинг устига, енгилтак котибаси билан эшикни ичкаридан қулфлаб, соатлаб ҳиринглашиб ўтиришларига ўлайми бу одамнинг!.. Лекин сизларга ҳам қойил эмасман! Нима учун мум тишлаб юрасанлар, кўзларинг кўр, қулоқларинг кар!.. Ахир, бугун ёшларга эътибор катта, гапларингиз кесади, ҳаракат қилмайсизларми?! Ариза билан чиқмайсизларми?! Агар йўл-йўриқ керак бўлса, мана, мен борман. Масалан, менда ҳозир ҳаммаси таппа-тайёр, юқори ташкилотга керакли хатни тайёрлаб қўйганман. Имзо чексангиз, бас, муаммо ҳал.

У Толибнинг олдига бир неча киши имзо чеккан хатни ташлади.

Толиб журналистикани танлаганидан ачинмайди. У бу соҳага аралашиб, ҳар хил давраларга кириб-чиқаверганидан одам танийдиган, киши қанчалик илмли, ички маданияти бой ва дунёқараши кенг бўлса, шунчалар хокисор, соддадил ва камтарин бўлишини, бу хислатлардан қанчалик маҳрум бўлса, шунчалик тубан ва такаббур бўлишини аллақачон тушуниб етганди. Агар ҳозир эшитган гапларни бошқа одам, таги тоза, ҳалол бир киши айтганида эди, балки, уни қувватлаган бўларди.

Тўғри, у бир пайтлар бош муҳаррир – Комил ақани қаттиқ ҳурмат қиласарди. Чунки биринчи бор бу даргоҳга келиб шу одамга учраган, унинг кимлигини билмай, соддалик қилиб анча-мунча гапларни гапириб юборган бўлса-да, тантлиик қилиб Толибни ишга олган ва ўрталарида кечган суҳбатни бирон марта юзига солмаган; ҳаттоки мақолаларида йўл қўйган камчиликларини кўрганда ҳам: «Ишга кираётганингдаги шиҷоатинг қани?» – дея бирон марта таъна ҳам қилмаган эди. Кейинчалик эса... Айниқса, котибаси билан боғлиқ мишишиларни эшитавергач, ихлоси қайтди. Ахир, кимсан, нуфузли бир нашрнинг раҳбари ўз жамоаси кўз олдидা шундай ишларни ўзига лойиқ кўрса... Ахир, бу жамоага ҳурматсизлик-ку!

Бир куни Толиб Альфред амаки билан шахмат ўйнаб ўтириб бошлигини шу борада «ғийбат» қилиб қолди. Шунда чол кулимсираб: «Дунё деган бу шалдироқ аравага энди ақлинг етятпими, ҳокимият қўлида бўлган эркаклар атрофида ҳамиша шунақанги аёллар ўралашиб келган, бундан кейин ҳам шундай бўлади. Гарчи сиёсатчилар ўзларини бошқалардан юқори қўйишга ҳаракат қиласалар-да, афсуски, уларнинг ҳаёт тарзи бир хил, менинг маслаҳатим, сен бундай ўйинларга аралашма, бошлиғингни бошлиғингга ўхшаган кучлироқ одамлар тартибга солсин», – деганди...

Мансур ака музлаткичидан муздек сув олиб Толибга узатди. Толиб сувдан бир ҳўплаб, стулга қайтиб қўйди-да, ўзини ҳушёрлик билан кузатиб турган суҳбатдошига тик қаради. Хатга назар ташлашни ҳам истамади.

– Мансур ака, мени бунаقا ишларингизга аралаштиrmанг, – деди. Сўнг: «Бошқа гаплашадиган гапим йўқ», – дегандек ўридан туриб эшикка қараб юрди.

— Бошлиқнинг ўйнашини ёқтирмасанг-да, ўзини яхши кўрасан, шундайми?

— Тушунмадим, — Толиб эшик олдида тўхтаб, унга ўтирилди.

— Бош муҳаррирни ҳурмат қилишингни биламан, — деди Мансур ака совуқ кўзларини унга қадаганча. — Агар менинг маслаҳатимга кирсанг унинг ўнг қўлига айланасан...

Толиб рўпарасидаги бу кимсанинг буқаламунлиги-дан ҳайратга тушди. Тавба, одам дегани ҳам шунчалик маккор бўладими?!

Мансур ака фурсатни қўлдан бермай столдан хатни олди-да, Толибга тутқазди.

— Аввал ўтириб хатни ўқиб чиқ, сўнг раҳбарнинг олдига кир-да, унга хатда ёзилганларнинг ҳаммасини оқизмай-томизмай гапириб бер, лекин имзо чекканлар, айниқса, мен ҳақимда ҳеч нарса дема, хатда айтилган талабларни бажарса, у керакли ташкилотга жўнатилмайди... Сен борини гапирсанг бўлгани, қолганини ўзимизга қўйиб беравер.

Толиб бир хаёли хатни ўқимай чиқиб кетмоқчи ҳам бўлди. Аммо, рўпарасидаги кимсанинг тирфалиб туриши таъсир қилдими, «Бўпти, ўқисам ўқий қолай» деган хаёлда жойига қайтиб ўтирди. Хатда бош муҳаррирнинг талайгина қинғир ишлари далиллар билан ёзилганди. Толиб кўп гаплардан бехабар экан. «Ҳа, гарчи олчоқ бўлса-да, бу одамнинг ҳам гапларида жон бор экан» деган ўйга борди Мансур ақага кўз ташлаб қўйиб. Кейин ўрнидан турди.

— Хўш, нима дейсан?

— Ўйлаб кўрарман...

Бу сафар ўқи мўлжалга текканини пайқаган Мансур ака йигитнинг ортидан айёrona жилмайиб қараб қолди.

Толибга хат жуда қаттиқ таъсир қилди. Үнда бошлиқнинг газета ҳисобидан қилган шахсий сарф-харожатлари обдан очиб берилган, алам қиладиган жойи, котиба билан қаерларда дам олгани ва бу ойимтиллага ҳар ойда қанча сарф-харажат қилингани рақамлар билан келтирилган эди. Агарда газета шахсий бўлганида ёки ходимлар ойлик маоши талабга жавоб берганида ҳам бошқа гап эди. Аммо тўртинчи ҳокимият деб аталадиган ушбу нашрнинг охирги вақтларда нуфузи тушиб, адади камайиб кетган, шунга яраша ходимлар ойлиги, қалам ҳақидан барака кетиб бораётган бир пайтда бошлиқнинг бунақа қилмишларини кечириб бўлмасди. Бош муҳаррирнинг ҳар йигилишда ижара пули, қоғоз нархи кўтарилиб кетяпти, шу сабабдан ҳозирча маошларни кўтаролмаймиз деган гапларини әсларкан, ич-ичидан титроқ турди. Ўз-ўзини оқлаш, бунинг учун минг турдаги ёлғонни ўйлаб топиш ёки борини бўрттириб кўрсатиш, айбини тан олмаслик одамнинг қадрини ерга уради. Шундай одамнинг жамоани бошқариши... Мана, маошларимиз кўтарилмаслигининг асл сабаби қаёқда экан! Бундай одамларда вижедон бўлмайди. Улар ҳар босган қадамида кимгадир хиёнат қилишади! Чунки улар ҳалоллик билан ҳаром-хариш, бузуқчилик тушунчалари ўртасидаги нозик пардани кўришмайди... Бу эса ёвузлик.

Содиқ эрталабдан бош кўтармай компьютерда нимадир ёзиб ўтиради. У Толибнинг паришонлигини кўриб ҳаммасини тушунди ва койиб берди:

– Нима, сен ақлдан озганмисан!? Мансур туллакнинг ноғорасига ўйнаб, бошлиққа қарши фитнага қўшилмоқчимисан? Эҳтиёт бўл, дўстим, бу қари тулки сени дорга остиради-да, ўзи бир чеккада чапак чалиб тураверади! Сен эса дорда лапанглаганча қолаверасан!

Толибнинг кўз ўнгидаги Надя бувининг арқонда осилиб турган жасади қайта жонланиб, афти буришиб кетди. Содик эса гапирадиганини гапириб, бир керишиб олди-да, икки чаккасини уқалашга тушди.

Шу лаҳзада ички телефон жиринглаб қолди ва котиба Толибни бошлиқ йўқлаётганини хабар қилди.

— Қойилман бошлиқнинг суфлёрларига! — деди котибанинг овозидан тутақиб кетган Толиб.

— Мансурнинг хонасига етаклашиб кириб кетаётганингни кўпчилик кўрган, қолаверса, икки қари тулкининг бир-бирини кўрарга кўзи йўқлиги ҳам ҳеч кимга сир эмас... бор, ўзингни оқлаб чиқ, — деди Содик.

— Қизиқ, ошкора эркакчасига гаплашишса бўладику ўртада мени овора қилмай, — деди Толиб иккисига ҳам фаши келиб.

— Мен сенга қанча айтдим, фитнага қўшилиб қолмадедим.

Толиб унга ҳеч нарса демади. Индамай ўрнидан турди. «Бу машмашани Содик билан маслаҳатлашиб олсан-чи», — деб бир ўйладио, бошлиқ кутаётгани, қолаверса, Содик ниҳоятда бандлиги учун таваккал деб хонасидан чиқди.

Қабулхонага кириши биланоқ Толиб беихтиёр котибанинг кийим-кечаклари, тақинчоқларига назар ташлади. Ҳамма нарсаси асл моллар бўлгани учун ҳам у янада чиройли ва жозибали кўринарди.

Ҳамиша қошларини чимириб юрадиган заҳаргина котиба кутилмаганда ўрнидан туриб, Толибга бўйбости, қадди-қоматини кўз-кўз этаётгандек, «Мана, кўриб қўй, қўлингдан нима ҳам келарди?» — дегандек ноёб атирлар ифорини таратганча олдидан кесиб ўтиб, бошлиқнинг эшигини очди.

— Марҳамат қилсинлар! — деди масхараомуз тавозе билан.

Толиб бу бачканда ҳаракатларга эътибор бермай, раҳмат дея ичкари кирди.

Бошлиқ әшикка қўз тикканча уни кутиб ўтирган экан. Бир қўли билан столни чертиб, иккинчиси қўли билан Толибга ўзининг яқинроғидан жой кўрсатди. У индамай бошлиқ кўрсатган жойга бориб ўтириди. Бир-бирларига бир сония сўзсиз тикилиб туришди. Бошлиқ томоқ қирди-да:

— Кейинги вақтда жамоадаги муҳит менга умуман ёқмаяпти, — дея гап бошлади. Толиб гап нимада эканини билса-да, индамади. Хўжайин эса ёш боладек чайналаверди. Хуфёна уюштирилган хатдан хабари борлигини ҳам чайнала-чайнала зўрга тушунтириди. Аҳвол шу даражага тушиб қолишига айбдор бўла туриб бу одамнинг ўзини оқлашга уринаётганидан фаши келди Толибнинг.

— Нимани кўрган бўлсам шуни айтаман, Комил ака, фақат хатга кимлар имзо чекканини сўраманг, — деди дабдурустдан бу сичқон мушук ўйинига нуқта қўйиш мақсадида.

Бошлиқ маъқул дегандай бош иргади. Толиб хатнинг мазмунини қисқача баён қилиб:

— Агар уларнинг шарти бажарилса, хатни юқорига жўнатишмас экан, — деди.

Раҳбар жимгина тинглади. Сўнг столидаги тартиб билан тахланган қофозларни яна тартибга сола бошлади. Толибнинг назари унинг титраётган қўлларига тушиб, ичида: «Ёшинг бир жойга борганида шу юрагинг билан ботқоққа ботишинг шартмиди?» — деб ўйлади ва индамай уни кузатишда давом этди. Хонага оғир сукунат чўкди. Котиба кириб келмаганида, бу жимлик қанча давом этиши номаълум эди. Котиба қанчалик тантиқ бўлмасин, вазият мушкуллигини тушунди, шекилли, чиройли идишларда музлаткичдан совуқ чой

келтирди. Толиб чойга қўлини ҳам текизмай, кетишига рухсат сўради. Бошлиқ эса ўзини тинчлантириш мақсадида муздай чойдан ҳўплар экан, яна бошини ликиллатиб қўйди, холос...

\*\*\*

Ишдан қайтган Толиб Соня холанинг уйда йўқлиги-га уччалик аҳамият бермай, нимадир еб олиш мақсадида музлаткични очиб ҳайрон қолди. Соня хола унга деб ҳамиша нимадир тайёрлаб қўярди. Ҳозир эса...

Толиб бугун ишда катта хатога йўл қўйганини англаб ўзидан норози кайфиятда ошхона деразасидан тирбанд кўчани қараб ўтирди. Дарҳақиқат, икки рақиб ўртасида әлчилик қилгани ярашмаган иш бўлди. Аввало, хатни ўқиб чиққач: «Агар хатда кўрсатилган фактлар тўғри бўлса, нега ўзингиз бошлиққа кириб, рўй-рост гапирмайсиз?» – дейиши керак эди. Имзо чекканлар, барибир, иш ўринларини йўқотишмоқда, қолаверса, нега катта авлод бизни саводсизликда, қўрқоқликда айблашади-ю, ўзлари панада қолишади? Олдин ўзлари кўрсатсин тўғри йўлни, кейин ёшларни айблашсин...

Толиб қилган ишидан гижиниб, қоронги тушиб қолганига қарамай, ошхонада чироқни ёқмай ўтираверди.

Бир маҳал кампир кириб келди. У ҳам чироқларни ёқмай, индамай Толибнинг ёнига келиб чўкди. Улар бир-бирларини шунчалик яқиндан билишардики, нафас олишларининг ўзиданоқ бири иккинчисининг қандай кайфиятда эканлигини ҳис этарди.

Толиб бу сукунатдан биринчи бўлиб ҳушёргарди, «Тинчлики?» – дегандек кўчага термилиб ўтирган кампирга қаради. Ошхона чироқсиз бўлса-да, кўча ёритқичларининг шуъласи ичкарига тушиб турарди.

Толиб кўчадан кўз узмай ўтирган Соня холанинг аҳвонли яхши эмаслигини ҳис қилиб:

– Тинчликми? – деб сўради.

Кампир хўрсинди.

– Альфред ўлди. Балки, марҳумни ёлғиз қолдирмай иккимиз уницида тунармиз, – деди қисқагина қилиб.

Бу нохуш хабардан Толиб чўчиб тушди. Чолникида тунаб юрганида унинг кечаси яхши ухлаёлмаслиги, тонгга яқин мизғиб олишини пайқаганди. Шунинг учун эрталаб ишга кетаётганида шошилинчда аҳамият бермади. «Ухлаб ётибди», – деб ўйлади. Навбатчиликда бўлгани учун ишдан кеч қайтиб, уникига кирди, ҳамиша уни кутиб ўтирадиган чолнинг ухлаб ётганидан ажабланди. Бироқ чолни безовта қилмаслик учун бироров унинг хонасига назар ташлади-да, чарчаганидан ўз ётоғига кириб ухлаб қолди.

Қаттиқ чарчаган экан, шу ётганча эрталаб турди. Тонг отиб кетибди. Шоша-пиша кийиндию ишига жўнади.

– Эрталаб соат ўнларда нонушта тайёрлаб, уларни кига бордим. Қўёнғироқни босдим, эшикни ҳеч ким очмади. Уйга қайтиб, Альфред берган қўшимча калитни олиб бориб эшикни очдим. Ичкари жимжит. «Эрталабдан қаерга кетди экан?» – дея хонасига қарасам, ҳалигача тўшагида ётибди. Юрагим безовталанди, чақирсан, жавоб бермайди. Секин юрагини ушлаб кўрсан, танаси тарашадек қотиб қолибди. Бир ойда учта ўлим...

Толиб Альфред амакининг вафотини эшитиб, ишхонадаги муаммоларини ҳам унугиб, худди бўшлиққа тушиб қолган одамдек Соня холага тикилганча қотиб қолди. Альфред амакини охирги марта ўтган куни ишга кетаётib кўрган эди. Наҳотки, Соня хола кеча уларни кига бормаган бўлса? Толиб бу ҳақда кампирдан сўрасинми, йўқми? Толиб Соня холага диққат

билан тикилди. Шўрлик кампир ҳаддан ортиқ ҳориган, кўзлари ич-ичига ботиб кетган, қарашларида ҳам қандайдир ўртаниш бор эди. Толиб бирдан ёш боладек уни қучоқлаб бақириб-бақириб йиғлагиси келди. Альфред амакининг ўлими, таҳририятдаги ўйинлар, ўзининг ўттизга кирса ҳам кимларнингдир қўйлида ўйинчоқ бўлаётгани, хусусан, биргалиқда осойиштагина яшаётган қарияларнинг худди шохидан тўкилган олмалардек битта-битта фойиб бўлаётгани Толибнинг юрагини ўртаб юборди...

— Ҳаёт шундай бир нарса эканки, кўзинг очиқ бўлса, ҳаммасини кўраверар экансан, кўзинг юмилгач эса ҳаммаси тугар экан, — деди Соня хола уф тортиб. Кеинин бирдан ҳушёр тортгандек: — Кетдик, марҳумни ёлғиз қолдирмайлик, — деди.

Соня хола олдинда, Толиб орқада боришаркан, кампир Альфред амакининг охирги вақтларда зиқна ва ўта хасис бўлиб қолганини, илгарилари ҳам хотини Тоня билан шу феъли туфайли кўп бора жанжаллашганларини, қайнонаси Надя бувининг уни кўрарга кўзи йўқлигига асосий сабаб ҳам шунда эканини гапириб борар экан, Толиб ёнидаги одамларни зинҳор яқиндан билмаганини англай бошлади.

Эртасига Толиб ишхонага кечикиб келди. У бир ишга кўриниб, бошлиқдан жавоб олиб Соня холанинг ёнида турмоқчи эди.

Хона қулғлигини кўриб: «Содиқ ҳам ҳали келмабди-да», — деб ўйлади. Йўқ, ичкари кириб қараса, компютери ёқиғлиқ, столи устида бетартиб сочилган қоғозлар...

Шу пайт ички телефон жиринглаб қолди. Котиба уни дарҳол мажлислар залига етиб келишини тайинлади. Ҳа, эрталабдан ҳамма ишни қолдириб йиғилиш ўтказишпами, демак, бир гап бор...

Бош муҳаррир тўрда, икки ёнида ҳозирги ва собиқ ўринбосари, котибдан ташқари ҳамма шу ерда. Толиб кириши билан қўпчилик унга ҳайратланиб, ажабланиб қаради. Толиб бунга эътибор бермай, ҳамхонаси Содиқнинг ёнига чўқди.

– Толибжон, шунча одамни куттириш яхши эмас, – деб қолди минбарда бошлиқнинг бикинида ўтирган собиқ ўринбосар Мансур ака.

Раҳбар томогини қириб сўз бошлади. У кеча Толиб ўзининг олдига киргани, кутилмаганда бошлиқнинг устидан керакли ташкилотга жамоа томонидан шикоят хати ёзилгани, унга ўттиздан зиёд ходим имзо чеккани, мабодо бош муҳаррир жамоани ёшартириш қарорини ўзгартириб, олдингидек ҳамма ўз ўрнида иш фаолиятини давом эттиrsa, хат ҳеч қаерга жўнатилмай, ёпиғлиқ қозон ёпиғлигича қолишини айтганини дона-дона, қисқа қилиб гапириб берди.

Сўзини тугаллагач ходимларга бегуноҳ фариштадек тикилди. Ҳамма лол. Залда пашша учса сезиладиган даражада жимжитлик. Фақат Толибнинг ёнида ўтирган Содиқ унгагина эшитиладиган қилиб: «Шунакаси ҳам бўларкан-да», – дея пи chirлади.

Толиб кечада қанақа ишга аралашиб қолганини ҳис қилган эди-ю, аммо воқеалар бу тарзда кечишини ўйлаб ҳам кўрмаган эди. У ҳамманинг дикқати ўзига қаратилганини сезгани учун секин ўрнидан турди. Аммо журналист сифатида ҳар бир гапини далиллар билан исботлашга ўргангани боис бу вазиятда бирон-бир сўз айтишга ожиз эканини ҳис қилди.

Шу маҳал раҳбарнинг янги ўринбосари Толибни минбарга таклиф қилиб қолди. У ноилож олдинга ўтди. Ҳамманинг кўзи унда. Бу кўзларда савол, мақсад, нафрат, қўрқув, ачиниш ва ҳайрат мавжуд эди. Бирдан раҳбарнинг Толибга раҳми келди, шекилли:

– Бу ерда Толибнинг зигирча айби йўқ, – деди ниманингдир олдини олмоқчи бўлгандай.

Кутилмаганда Мансур ака ўша айёр кўзларини Толибга тикканча худди ҳеч нарсадан бехабардек:

– Толибжон, бизга бир нарсани аниқлаштириб берсангиз бўлгани, сизга хатни ким кўрсатди ва унга кимлар имзо чеккан? Жамоа шуни билса бўлгани, қолганини ўзимиз ҳал қиласиз, – деди.

– Тўғри-тўғри, – деди бошини силкитиб рўпарасида ўтирган ёши улуг журналистлардан бири. – Бу ерда, Толибжон, ёшларни ҳеч ким айбламайди. Ҳамма бизни айблайди. Шунинг учун нимани кўрган бўлсангиз гапиринг, биз сизни қўллаб-қувватлаймиз.

Залдагиларга ҳам жон кириб, гапир-гапир деб қистаиди имзо чекканлар ҳам, чекмаганлар ҳам баравар фала-ғовур кўтариб.

Толиб Мансурнинг нақадар жирканч одамлигини яна бир карра эътироф этаркан, аянчлиси, айни дамда, ўзининг қопқонга тушиб қолганини, энди бундан чиқишга ниҳоятда ожизлигини англади ва сўз бошлиши билан яна бир хато қилишдан чўчиб индамай залдагиларга тикилди. Гўё эркак-аёл аралаш ҳаммомга кирган-у, фақат у ҳали кийимларини ечмаган, атрофидагилар эса: «Еч, ечавер, уяти йўқ», – деб бақираётгандек, ўзини фарид ва нотавон ҳис қилди. У бу оломонга тикилиб турар экан, кеча кўрган хати хусусида гапиришнинг фойдаси йўқлигини англади. Чунки бундай хат борлигини, уни ўқиганини, энг алам қиласиз жойи, хатнинг туллак Мансурда эканни қандай исботлаб бера олади? У одамларга қараб туриб:

– Мендан айб ўтган бўлса, кечиринглар, – деди, холос. Аммо яна нимадир дейиш керакмикан деб залга тикилди. Залдагилар эса жонсиз ҳайкалга айланган,

ҳар бир ходим унинг оғзидан ўз исмини кутарди. Тиқ этган товуш эшитилмас, етмишга яқин одамнинг нафас олгани сезилмас эди. Толиб ўзини гёё ўрта асрларга тушиб қолгану ҳозир кимнингдир исмини айтса, хўжайин ўшанинг бошини шартта чопиб ташлайдигандек, минбарда нима деб гап бошлишни билмай бироз серрайиб турди. У ҳамманинг кўзига бир-бир тикилиб хатдан кўпчиликнинг хабардорлиги, аммо уларнинг миқ этмай ўтирганидан қаттиқ оғриди қалби. Катта авлод ҳамиша ёш авлодни истаганча қоралайди ёшлар эътиборсиз, ёшлар саводсиз, ёшлар бе-сабр ва ҳоказолар деб. Аммо бу нимаси?.. Жамоанинг кўпчилиги элликдан ошган ва элликка яқинлашган одамлар. Наҳотки, улар ўзларидан кейинги авлодга қандай дунёни қолдираётганлари ҳақида чуқурроқ ўйлаб ҳам кўрмайдилар, ўзларига юкланган масъулиятни ҳис қилмайдилар, энг оғири, уларнинг бугун босаётган қадамларини ёшлар четдан кузатиб турганини англамайдилар? Шундай хаёллар билан, ниҳоят, нигоҳи Содикнинг кўзларига қадалди. Чунки шу кўзларгина унинг аҳволини тушуниб туради. Шу ҳолатда бир муддат тикилиб тургач Толиб аввал залга қараб сокин, самимий, майин кулимсиради, сўнгра қад ростлаб, жарангдор овозда гапириди:

– Тўғрисини айтсам, бўлган воқеани айтиб беришдан қўрқадиган жойим йўқ. Нари борса, ишдан кетаман... Аммо биз журналистлармиз, бошқа соҳа ходимларидан фарқли ўлароқ, сўз эркинлигини ҳимоя қиласиз. Хўш, нима асосида? Фактлар асосида! – Толиб: «Тўғри айтяпманми?» – дегандек залдагиларга тикилди. Сўнгра яна ўша жарангдор товушда давом этди: – Менда эса ўша фактлар йўқ. Агарда сизлар билан шу тарзда юзма-юз бўлишимни билганимда, аввалимбор, жаноб бошлиқ билан хатнинг муаллифи бўлмиш жа-

ноб «икс»нинг ўртасида әлчилик қилмаган бўлардим.  
Умид қиласманки, ҳамма мени тушунди.

«Яна кимдир савол берармикан», – дегандек жамоага саволомуз тикилиб турди.

Зал жим. Тиқ этган товуш эшитилмайди.

Шу пайт ушбу жимликни бузиб Толиб илк кўрган кунидан чуқур ҳурмат қиласиган хатлар бўлнимининг бошлиғи Олим ака исмли кекса ходимлардан, ижодкорлардан бири ўрнидан сакраб турди-да, гапиришга рухсат сўрамай, тўғридан-тўғри унга хитоб қила кетди:

– Сен болада ақл ёки виждан деган тушунча борми, ўзи?! Қўлингда ҳеч қанақангি факт йўғ-у, тагин бизнинг қаршимизда ўзингни оқламоқчи бўласан, бироннинг гапини биронга етказаётганингда миянг қаерда эди? Ёки бу даргоҳга тўғри боғчадан кириб келдингми!? Нима, бу ерда ўтирган шунча одамнинг шаънига лой чаплаб, шу жавоб билан қутулмоқчимисан?.. Биз ҳам ёш бўлганмиз, кимнингдир ўрнига келиб ишлаганмиз. Бу ҳаёт чархпалаги... Навбат келган бўлса, ёшларга ўрнимизни бўшатиб берамиз... Бир бемаза кишини деб бутун жамоани қоралаш инсофдан эмас.. Минбарга чиқиб олиб, сўз эркинлигини рўкач қилиб оғзингга келганини вайсайверасанми? Аввал танангда ўйлаб кўргин эди нимага аралашаётганингингни, аралашдингми, энди нима бўлса бўлар, охиригача гапирда, ҳаммани бир қозонга солиб қайнатмай...

Шу вақт қўқисдан Содик ўрнидан сакраб туриб, Олим акага юзланди:

– Балки, ўйлаб кўришга вақт бўлмагандир... Балки, ўша машҳур хатнинг муҳтарам муаллифи ўз ўрнидан турар...

Яна ғовур кўтарилиди. Жамоанинг бир қисми Олим аканинг, бир қисми эса Содикнинг ёнини олар, баъ-

зилар эса вазиятни томоша қилганча бетараф бўлиб ўтиришарди. Кимдир: «Толиб ҳали ёш, уни ҳам тушуниш керак», – деса, яна кимдир хат ёзган ва унга имзо чекканларнинг ўрнидан туришини талаб қиласар, «Агар хатдаги гаплар рост бўлса, биз ҳам имзо чекамиз», – дея шовқин соларди.

Бошлиқ ўринbosари столдаги қўёнгироқни босиб зални тинчлантиришга уринди. Лекин ҳамма ичидағи гапириб олмагунча тинчимади.

Толиб эса минбарда: «Узр, хато қилдим, на илож», – дегандек Олим акага тикилиб турарди. Аммо Олим акага ўхшаган соф виждонли кишилар бу ерда камчиликни ташкил қиласарди. Ана шунинг учун у Толибнинг бу хатти-ҳаракатидан ниҳоятда хафа бўлиб унга: «Қандай қилиб шундай хатога йўл қўйдинг?» – дегандек ўқрайиб қаради, сўнг ҳаммадан ҳафсаласи пир бўлгандек ўз жойига чўкди. Толиб бу одамнинг ҳар томонлама ҳақлигини тушунар, бироқ, афсуски, шу тобда ўзи нима қилишини билмасди. Мансур ака хусусида гап бошласа, кейин имзо чекканларни ҳам айтиш керак... Балки, хат умуман бўлмаган, шунчаки Мансурнинг ўз ўрнини сақлаб қолиш ва бошлиқни қўрқитиши мақсадида ўйлаб топган ҳийласидир... У эса лўп этиб бу ҳийлага учиб ўтирибди... Одам дегани шунчалар ҳам аҳмоқ бўладими?..

Жамоа ўринbosарнинг қайта-қайта талаби билан бироз тинчиди. Сўнгра ўринbosар кейинги йилларда жамоанинг ютуқлари ва ушбу ютуқлар бевосита бош муҳаррир фаолияти билан боғлиқлигини гапира кетди. Бироқ уни ҳеч ким, ҳатто ўзи ҳам эшитмаётгандек эди. Айни дамда, ҳамма жамоанинг бу бесаранжомлигигига айнан бошлиқ ва унинг ўзини ўзи назорат қила олмаслиги, энг ёмони, жамоани кўнглига сиққанича бошқаргани сабаблигини билиб турарди. Лекин

улар негадир бу ҳолатни кўриб, сезиб, энг даҳшатлиси, барчаси уларнинг кўз ўнгида содир бўлаётганига қарамай, ташаббусни кимдандир кутишар, ўзлари эса миқ этишмасди... Толибга ҳаммасидан ҳам уларнинг бу феъл-автори оғир ботиб, «Афсус, бу тарздаги авлод ўзларинигина эмас, келажакни ҳам яксон қилади», – дея пастки лабини қаттиқ тишлаб, унга таниш бўлган кишиларнинг кўзларида «Ноҳақлик!», «Ноҳақлик!» деган маъно ялтираб турганини кузатди.

– Узр, – деди кутилмагандга ҳаммани ҳайратлантириб Толиб ва минбарда ортиқ туришга тоқати етмай, атрофдагиларга эътибор ҳам бермай залдан чиқиб кетди. Кетар экан, уятдан имконияти бўлганида бошини юлиб олиб залнинг бурчагида фаррош қолдирган чиқинди чelакка ирфитиб юборарди. Начора, бошга тушганни кўз кўраверади дея ўзига ўзи fўлдираганча тезроқ ҳамманинг кўзидан йўқолишни истади.

У залдан чиқиб кетиши билан ортида яна ғала-ғовур бошланганини эшитди. Йўлакдан оғир-оғир нафас олиб борар экан, ишдан бўшашга қарор қилганича уйга жўнади.

Бекатга етганида бугун Альфред амакини кўмиш маросими эканини эслаб, охирги вақтларда ишхонада ҳам, уйда ҳам юракни оғритадиган воқеалар кўпайиб кетаётганидан чуқур хўрсинди. Ҳамма-ҳаммасидан ниҳоятда чарчаганини ҳис этди.

Уйда Соня холанинг йўқлигидан енгил тортди, демак, маросим давом этяпти деб ўйлади-да, тўғри хонасига кириб ўзини тўшакка ташлади. Хонанинг ланг очиқ қолган эшигидан мушуги Марсак миёвлаганча кириб келди. У диван ёнига келиб Толибга: «Кўйнингга кирсам майлими?» – дегандек ёлворганнамо нигоҳ ташлаб турди. Толиб ўйлаб ўтирмай: «Кела қол», – демандек тўшагини очди. Марсак бир сакраб Толибнинг

қўйнига кирди ва хуруллай бошлади. Толиб унинг ма-йин жунларини силаб, тўлиб кетган юрагини жони-ворга бўшата бошлади:

– Сенда ҳам ақл боров, бегонага яқин йўламайсан. Менда эса ўша ақлдан бир чимдим ҳам йўқ. Олим ака тўғри айтди. Ўз қадрини биладиган, ор-номусли киши бироннинг гапини биронга етказмайди. Товуқ-мия бўлганингдан кейин мингта институтни битирсанг ҳам фойдаси йўқ экан. Отам бечора мендек нотавонни илмли қиласман деб шаҳарга етаклаб келганди. Мана оқибати. Агарда у раҳматли ҳозирги ҳолатимни кўрганида, билмадим, қай аҳволга тушарди... Балки, уятдан йиғлаб юборарди ёки, бўлмаса, дабдурустдан юзимга тарсаки туширади. Сўз эркинлиги ҳақида дам урганингга ўлайми дея ўзининг устидан кулди. Ҳе, одам бўлмай ҳар бало бўл!..

Толиб ўзидан ўзи нафратланиб, мушукни силар-кан, кўз олдига залдагиларнинг ноҳақликдан бош кўтарганларини келтириб: «Олим ака ҳақ, бошлашга бошладимми, охиригача давом эттиришим керак эди. Аммо қўлимда ҳеч қанақантги гапларимни тасдиқлай-диган факт йўқ эди-да, оғзимни очсам янаям чувалашиб кетардим... Энг ёмони, энди Олим акага ўхшаганларга қай кўз билан қарайман?» – деганча ўзидан ўзи норозилигидан бўғилиб, газаби қайнади...

Кечга бориб Соня хола пишиллаганча кириб келди. У Толиб ётган хона эшигини очди, йигитнинг чойшабга бурканиб ётганини кўриб, «Альфред билан жуда яқинлашиб кетган эди, бу қайгуга чидаши қийин бўляпти, ҳечқиси йўқ, вақти келса, кўникади» деган хаёлда индамай эшикни ёпиб ортига қайтди.

Кечки овқатни иккаласи ошхонадаги пардасиз де-раза олдида, сершовқин кўчага кўз тикканча иштаҳа-сиз тановул қилишди. Кутилмаганда эшик қўнфиро-

ги жиринглади. Бир-бирларига қарашид: «Ким бўлди экан?»

Толиб эшикни очди ва анграйиб қолди. Қелгувчи унинг таклифини ҳам кутмай ичкарига кирди. Соня хола бу зиёлинамо нотаниш киши Толибнинг бошлиғи эканини дарҳол фаҳмлаб, уни залдаги диванга таклиф қилди. Қейин у билан сўрашиб, худди ўзбеклардек дуо қилди.

Толиб ҳам бошлигининг ёнидан жой олди. Нимагадир ҳамма бирдан жимиб қолди. Телевизорда бугунги янгиликлар кўрсатила бошлади. Улар гўё муҳим дунё янгиликларини тинглаётгандек экранга тикилишиди.

Соня хола меҳмоннинг кайфияти тушкунлигини дарҳол пайқаган, ўзининг аҳволи уникидан ҳам баттарроқ бўлса-да, ишхонада аллақандай кўнгилсиз воқеа юз берганини савқи табиийси билан ҳис этиб, бошлиққа муздек чой таклиф қилди. Бошлиқ Соня хола билан бироз сўрашган киши бўлиб, ундан-мундан сўзлай бошлади, гап орасида Толибни яхши йигит дея мақтаб ҳам қўйди. Орага яна жимлик чўқди. Кампир уларнинг жимиб қолганидан ўзаро гапи борлигини сезди. Уларни ёлғиз қолдириб қўшни хонага чиқиб кетди.

— Балки, хатнинг ташкилотчиларини айтарсиз, — деди, ниҳоят, бош муҳаррир муддаога кўчиб.

Толиб хат хусусида бир қарорга келиб ултурганди. У бошлиққа буни ётифи билан тушунтириди. Хат борасида ҳеч кимга чурқ этмайди, ишдан эса эртагаёқ бўшаш ҳақида ариза ёзади.

— Биласизми, Толибжон, — деди бошлиқ бироз титраган овозда. — Узоқ йиллардан буён зиёлилар, яъни халқимизнинг интеллект қатлами билан ишлаб келаман. Ўз тажрибамдан бир нарсага амин бўлдимки, фақат ана шу қатламгагина хос бўлган бир хусусият

бор: улар ҳеч қачон овозини кўтариб гапиришмайди, юзидан норозилигини билдиришмайди ва, энг ёмони, улар орасидаги баъзи бир галамислар майда-чуйда тубан ишлари билан ҳақиқий зиёлиларнинг юрагини худди қаламуш сингари кемиришади. Бу ғаламисларнинг ўзлари виждонли кишиларга ўхшашни исташади, бироқ уларнинг юраги кир, миялари фақат ўз манфаатлари билан банд. Худбин... Хатоларини тан олишмайди; натижада ана шундай майда-чуйда, писмиқона тубанликлар билан шугулланишади. Бу гапим билан ўзимни ҳақиқий зиёли қилиб кўрсатмоқчи эмасман, лекин атрофимдагиларнинг биронтасига ишонмайман. Ҳаммаси сотқин ва лўттибоз, юзига зиёли никобини тортган тубан одамлар. Илк суҳбатимизданоқ тажрибамдан келиб чиқиб сизда ҳис қилган нарсам бу – юрагингизнинг тозалиги... Мен сизни бўшатмайман, ходимларнинг фикрини ўзим ўзгартираман, сиз эса бир неча ҳафтача бир вилоятга хизмат сафари билан бориб келасиз. Унгача ҳаммаси ўз изига тушиб қолади. Аммо... аммо бу сир иккимизнинг ўртамиизда қолади, хатга кимлар имзо чекканини айтсангиз яхши бўларди. Чунки кўпчиликка ёқиш, уларни бошқариш – анча мурраккаб иш. Шунинг учун ҳам кимлар мендан норози эканлигини билсам дегандим...

Толиб бу саволдан тутдек тўкилди. «Атрофдагиларни ёппасига қоралаш, хушомадгўй, сотқинга чиқаришдан аввал, ҳеч бўлмаса, мана бугунгидай оғир вазиятларда озгина ўзингни ҳам тафтиш қилиб кўр, жамоани шу аҳволга келтирган ким? Сен ўзинг эмасми?! Атрофингта ўзинг тўпламадингми хушомадгўй одамларни? Хушомадгўйдан энди садоқат кутасанми, эртага оёғинг тойса, биринчи навбатда ўшалар сени сотмайдими?..»

Ичидан қайнаб келаётган бундай гапларни тилига чиқаришни истамади. Камчиликни бошқалардан из-ляяптими, бундай одам ўз билганидан қолмайди. Ву-жудининг қат-қатига сингиб кетган худбинона тушун-чалардан бошқасини тан олишга қодир эмас...

Соня хола зерикдими, уларнинг олдига келиб ўтириди. Лекин гап қотмади. Бошлиқ ҳам Толибнинг миқ этмай ўтиришидан энди умидини узди, шекилли, томок қириб қўйиб, кампирдан рухсат сўради. Кейин «Ҳали ўтирсангиз бўларди» деган мулозаматларга ҳам эътибор қилмай, ўрнидан турди.

– Биласанми? – дея гап бошлади кампир бошлиқни кузатиб ортига қайтиб, кетма-кет жудоликлар ва ишхонадаги нотинчликлардан гарантсиган Толибга қараб. – Менинг назаримда, инсон сўнгги нафасигача, ҳар қандай мушкул вазиятда ҳам ҳаётнинг қадрига етиши, инсоний қиёфасини йўқотмаслиги керак...

\*\*\*

Толиб ишхонага ҳар кунгидан эртароқ келди. У ке-часи билан мијжха қоқмади. Мансур аканинг макрига учиб, боши берк кўчага кириб қолганди. Ишдан бў-шайман деган хулосага келгани билан, жамоа орасидаги бу машмаша қаерга борса ортидан эргашишига имони комил, ишда қолай деса, баъзи бир ходимларнинг кўзига қандай кўринади. Энг даҳшатлиси, йиғиб юрган озгина бўлса ҳам жамғармаси йўқ. Ишдан бў-шаши – унинг пулсиз қолиши. Йўқчилик эса одамни абгор қилади.

Толиб шундай ўйлар билан йўлакдан кетиб борар экан, ортидан кимдир келаётганини сезиб қадамини тезлатди. Тезроқ хонасига кириб, эшикни ёпиб олса бўлгани. Балки, бу Олим акадир. Кеча бу одам унга

шунақанги нафрат билан гижиниб қарадики, Толиб бу қаращдан ўзини сариқ чакага ҳам арзимаслигиги тушуниб етди. Начора, яна шу даргоҳга келишга мажбур. У хонаси эшигини тезгина очди-да, ўзини ичкарига олди. Шукр, ҳеч ким билан юзма-юз келмади. У жойига ўтириб, компьютери тутгачасини босар экан, «Лекин қачонгача?!» деган овоз келди ич-ичидан. Ростданам қачонгача?..

Кутилмаганида эшик очилиб, остоңада Содиқ пайдо бўлди.

– Нима бўлди сенга, ортингга қарамайсан ҳам, – деди Содиқ у билан кўришаркан. Кейин, одатдаги дек, хона деразаларни оча бошлади. Толиб ўтирган жойида уни кузатиб ўтираверди. Содиқ Толибнинг аҳволига эътибор ҳам бермай, кечаги кун жуда ёмон бўлгани, жамоадаги машмаша камдек, банкдагилар унга тўловни кечиктиргани учун жарима тўлашини эслатгани, буларнинг барига маошнинг камлиги сабаб бўлаётгани ҳақида жаврай бошлади. «Бошлиқнинг ҳақиқий иблислиги, бир томондан, ҳаммани алдаб газета ҳисобида пул йўқ дейди, иккинчи томондан, ўз айш-ишратига миллионларни сарфламоқда. Катта-катта журналистларга ҳам ҳайронсан, нима бўлса ҳам ўз номини оқлаш билан овора, бирортаси ўрнидан туриб: «Хат бекордан-бекорга ёзилмагандир, бу ерда Толибнинг нима айби бор, асосий масала қолиб, нега уни муҳокама қиляпмиз?» – дейишишмайди-ей! Уларга нима кам, болаларини уйлижойли қилиб бўлишган, бизнинг қаршимизда турган ҳаётнинг авра-астарини чиқариб ташлашган, бу сохта муҳокаманинг ҳеч кимга кераги йўқлигини англаб туришибди... нега бунчалик ишга ёпишиб олишмаса?.. Қолаверса, менга ўхшаб банкдан қарзи бўлмаса, ижара уйда яшашмаса, уйида ёш болалари билан

хотини пул топиб келинг деб оғзини очиб ўтиргани йўқ...»

Содик ўзи билан ўзи гаплашаётгандек хонада у ёқдан-бу ёққа юриб, қаҳва тайёрлади. Кейин дераза олдига келиб чека бошлади. Толиб бу гапларга муносабат билдирадиган аҳволда бўлмаса-да, дўстининг аҳволи кун сайин ёмонлашиб бораётганини ҳис қилиб турарди.

Ниҳоят, Содик Толибнинг ҳар кунгидан бошқача бўлиб қолганига эътибор қилди.

– Эй, сенга нима бўлди? – деди унинг рўпарасида тўхтаб.

Толиб индамай, компььютерида нимадир ёза бошлади. Содик сигаретасини чекиб, қолдигини кулдонга эзди-да, унга яқинлашди. Мониторга эътибор қилдида, ҳовлиқиб кетди.

– Нима, ақлдан оздингми?!

Толиб индамай ёзишда давом этди.

– Менга қара, бу олижаноблигинг билан кимни ҳайратга солмоқчисан? Ёки виждонинг борлигини исботламоқчимисан?! Тупур ҳаммасига, индамай ишингни қилиб юравер. Кеча кўрмадингми?.. Мансур деганларининг кимлигини энди билдингми, анови сен ҳурмат қиладиган бошлиғингда озгина виждон бўлганида эди, кечаги спектакль-мажлисни уюштиргмаган бўларди! Ҳаммаси пул учун, ҳокимият учун интилишади. Кеча нега ҳамма жим ўтирди? Жамоадагилар хатни ким уюштирганини билмайдими, ҳаммаси билади. Лекин уларнинг биздан фарқи, гапиришмайди, индамай тишларини тишларига қўйиб ишлайверишади. Нима бўлса ҳам уларга тегишмаса бўлгани! Э, дўстим-а, бу ердан ишдан кетиб ўзингга, чўнтағинга жабр қиласан, холос. Кимнинг ичи ачийди, ҳеч кимнинг! Мен бир нарсага амин бўлдимки, одамларнинг кўпчилиги бирон нарса

хусусида гапирганида бошқача гапиришади, аслида эса гапирган гапларининг тескарисини қилишади...

Содиқ жаврай-жаврай яна дераза олдига бориб, чекишига тушди.

– Эҳ, қаердан пул топсам экан-а?.. Шунақа пайтда бойвачча болалардан дўст орттирганингта пушаймон бўп кетасан-да одам...

Кечако бош муҳаррир ҳар қанча сафсата сотмасин, Толибнинг ишдан бўшашиб ҳақидаги фикри ўзгармаганди, аммо Содиқнинг гаплари таъсир қилди. У ҳам ўзиға қаҳва тайёрлаб олди-да, дўстининг олдига бориб, ташқарига кўз тикканча, пуф-пуфлаб қаҳвасини ҳўплай бошлади. Шунда у Содиқнинг аҳволи ўзиникидан ҳам баттарроқ эканини англаб, унга ачиниб кетди.

Бирин-кетин хоналар эшиклари очилиб, қадам товушлари кўпайиб, янги иш қуни бошланди. Содиқ жойига ўтириб, чала қолдирган мақоласини давом этирди. Толиб эса қўли ишга бормай, қўлига тушган нарсани ўқиб ўтирди. Қейин ҳозир бошлиқ ишга келиши билан уни чақиртириши мумкинлигини ҳис қилиб компютери мониторига тикилди. Болалигидан бирон нарса ҳақида қаттиқ ўйласа расм чизадиган одати бор эди. У комьютеридаги тоф тизмаларининг суратини кўчириб чиза бошлади.

Хонага Одил кирди. Толиб билан кўришаркан:

– Йигитлар, кечаги тўс-тўполонга умуман тушунмадим, – деди талмовсираб.

Толиб ҳам, Содиқ ҳам гап қўшмади. Энди бир неча кунгача айримлар шунақа шамалар қилиб гап олишга интилишини ўйлаб Толибнинг юраги сиқилди..

Худди ўйлаганидек, котиба қўнгироқ қилиб, бошлиқ кутаётганини маълум қилди.

– Омад сенга, – деди Содиқ, – ҳеч кимга ўзингни ҳақорат қилишга имкон берма!..

Котиба уни совуқдан-совуқ қарши олди.

– Телефонда гаплашыптилар, кутиб туринг!

Толиб бурчакдаги ўриндиқлардан бирига ўтирди, назарида, котиба уни жўрттага куттириб, ўзининг нимага қодирлигини кўрсатмоқчилик эди.

У котибани кўз остидан кузатаркан: «Тавба, – деди ўзига ўзи. – Бир вақтлар мен ҳам худди бошлиқ сингари Наргизани яхши кўрганман. Ўшанде у кўзимга фариштадай кўринган. Энг қизифи, Соня хола Наргиза ҳақида бор гапни гапирса ҳам, тан олмаганман. Э, Наргиза билан қалбимда ҳамиша байрам эди, уни кўрсам, кўзларим қувонарди. Тавба! Севгининг кўзи кўр бўларкан-да. Ҳа, бечора бошлиғимизнинг аҳволини тушунса бўлади...»

Шу пайт кутилмаганда бошлиқ хонасидан чиқиб, қабулхонада Толибни кўрдию котибага: «Бу нима қилик?!» – дегандай норози қараб қўйди. Кейин Толибнинг елкасидан қучганча ичкарига бошлади. Ҳамма нарсага аралашиб ўрганиб қолган котиба, бошлиқ эшикни ёпганига қарамай, бир баҳона билан уларнинг ортидан кирди.

Бошлиқ котибанинг хонага кирганидан норози бўлса-да, Толибнинг олдида ўз обрўйини тўкишни истамадими ёки унинг хурмача қилиқларига ўрганиб қолганиданми, индамай гап бошлади:

– Мен сизни икки ҳафталиқ хизмат сафарига жўнатаман, буйруқни бериб бўлдим. Кассадан пулингизни олиб, сафарга тайёргарлик кўринг. Ишдан бўшашни хаёлингизга ҳам келтирманг.

Толиб қабулхонадан чиқса, йўлак бошида одамлар тўпланиб туришибди. Улар Толибни кўришлари билан жим бўлиб қолишибди. Буларнинг орасида Мансур ака ҳам бўлиб, Толибни кўриши билан ранги қув оқарди. Толиб уларнинг ёнидан ўтаётуб салом бер-

ди. Бу орада ўзини қўлга олиб олган Мансур ака гап қотди: «Ҳа, Толибжон, эрталабдан раҳбарни йўқлаб қолибсиз, кадрлар масаласида кенгашиб чиқяпсизми дейман». Толиб бу ғаламисга нима деб жавоб қилишни билмай, бир зум сўзсиз туриб қолди. Ёнидагилар эса унга масхараомуз тикилишди.

– Энди галстук тақиб юрсангиз ярашарди, – деди Мансур ака ҳужумда давом этиб.

– Э, Мансур, бас қил, – деди кутилмагандан у тенгилардан биттаси Мансур акадан фижини келиб.

Аммо бу орада Толибнинг сабри битиб, унга томон важоҳат билан юра бошлади. Мансур аканинг ранги ўчиб, четланди. Толиб уни ёқасидан фижимлаб ушлади-да, бир-икки силтаб, бурчакдаги чекиш учун қўйилган махсус ўриндиққа олиб бориб ўтқизиб қўйди. Атрофдагилар ҳайҳайлаб шовқин солишиб: «Э, капкatta одамсизлар, уят эмасми?» – дея иккисини икки томонга тортишди.

– Агар ишдан бўшаб кетади деб ўйлаётган бўлсанг чучварани хом санабсан, – деди Толиб рақибининг пешонасига кўрсаткич бармолини тираб, – билиб қўй. Мен ҳеч қаёққа кетмайман! Балки, аксинча бўлар.

Толиб шартта ортига қайтди-да, тўғри кассага борди. У ердан сафар пулини олиб, хонасига кирди.

Йўлакдаги содир бўлган қий-чувдан хабар топган Содиқ хонада Толиб пайдо бўлиши билан олдига келди.

– Тинчликми?

– Тинчлик, – Толиб хотиржам бориб жойига ўтириди. Кейин бўлган воқеани гапириб берди, Содиқ тана-сига сифмай қувониб кетди.

– Яша, дўстим. Энди бу ёғига бўшашма, ёнингда мен борман, қолаверса, биз ёлғиз эмасмиз, – деди. Кўрасан, ҳали тарафдорларимиз кўпаяди. Сафимиз

кенгаяди. Шундай қиласизки, ўзлари пиширган ошни ўзлари ейишади.

\*\*\*

Хизмат сафарининг ўнинчи куни Толибни таҳриятидан пойтахтга зудлик билан чақириб қолишиди. У туни билан йўл юриб тонг-саҳарда шаҳарга кириб келди. Бошлиқ уни нима мақсадда йўқлатганини билди, «Аввал унга бориб учрашай, сўнгра уйга бориб дам оламан» деган ўйда тўғри ишхонасига борди. Ҳали иш бошланишига икки соатча бор. Ўрта йўлак жимжит, икки тарафдаги эшикларнинг барчаси тақатақ берк. Толиб нима қиласини билмай, тўғри бошлиқ қабулхонаси эшиги олдига қўйилган айлана диванга бориб ўтирди. Бирпасда мизғиб қолди. Тушига отаси кирибди. Қўлида каттакон тўмтоқ, занг босган болта. У болта билан чириган кундани чопмоқчи бўлармиш, болта эса тўмтоқлиги боис кундага тегиши билан ортга сапчиб кетармиш. Отасининг атрофида эса болта ўткирлайдиган ҳар хил асбоблар териб қўйилган бўлса-да, негадир болтани чархлаб олиш унинг хаёлига келмас эмиш.

Толиб отасининг бу қилифидан ажабланиб унга буни тушунтиришга ҳаракат қиласмиш, бироқ ўз то-вушини ўзи эшитмас, олдига борай деса, қўл-оёғи қимирламасмиш. Шу вақт қаердандир Соня хола пайдо бўлибди-да, отасининг қўлидан болтани тортиб олиб, негадир йифлаб-йифлаб уни чархлабди. Сўнгра Толибга имо билан отасини кўрсатиб, нимадир дебди-да, кундани худди сомондай қилиб майдалаб ташлабди... Отаси бўлса тиз чўкканча йифлай бошлабди. Кампир ҳам унга қўшилибди. Улар иккаласи тиз чўкканча Толибга ниманидир тушунтира-тушунтира йифлашармиш. То-

либ уларни яхши эшитармиш-у, аммо гапларига сира тушунмас эмиши. Бу орада кимдир унинг тепасига келиб турткилай бошлабди...

Шу аснода уйғониб кетди-да, рўпарасида кулиб турган Содикни кўрди. Толиб ҳушини йифиштиромай анграйиб турди-да, бир муддатдан сўнг туш кўрганини тушундию негадир юраги гашланди.

– Хўш, Толибжон, сафарларга яхши бориб келдингми?

Доим шошилиб юрадиган, беҳаловат Содик унинг жавобини кутмаёқ ўз хонаси томон кетди. Толиб унинг ортидан тикилганча кўрган тушини яна бир бор хаёлидан ўтказар экан, ўзига ўзи: «Тушга нималар кирмайди?» – дея ўрнидан турди.

Содик икки идишга аччиқ қаҳва тайёрлаб, унинг рўпарасига келиб ўтириди. Ўша кундан бери энди кўришиб туришлари эди.

– Қандай қилиб Мансур туллакнинг тўрига илиндинг, ҳалигача тушунмайман... – деди Содик. – Аммо сени сафарга жўнатиб Комил ака тўғри қилди. Сен кетгандан сўнг кўпчилик ходимлар ғалати бўлиб қолди. Мансурбой эса ҳеч нарса бўлмагандай ишлаб юрибди. Афсуски, одамларимиз жуда андишли. Ана шу андиша деган нарса оёғимизга тушов. Аслида, Мансурга ўхшаганларни биз эмас, ўзи тенгилар бир четга олиб, ҳалигидай жойига яхшилааб ўтқазиб қўйишича, дами чиқмай қолади. Аслида, у жуда қўрқоқ одам. Масалан, мени кўриши билан бўйинини қисиб олади, хонасига кириб кетади.

– Йўғ-э, нега? – деди ажабланиб Толиб. – Сен ҳеч нарсага аралашганинг йўқ эди-ку.

– Ҳамманинг назарида, бу машмашани иккимиз уюштирган эмишмиз, гўёки бошлиқча янада яқинроқ бўлгимиз кепти. Лекин, назаримда, сени билмадим-у,

мен ҳақиқатдан бошлиққа яқинлашиб қолғандекман... Балки, адашаётгандирман.. Хуллас, редакциямизда ҳеч нарса ўзгаргани йўқ. Бу бошлиқ билан ҳеч нарса ўзгармайди ҳам... Бекордан-бекорга ҳалқимиз: «Балиқ бошидан сасийди», – демаган... Биргина сенинг минбарга чиқиб қизарганингни айтмаса, ҳаммаси ўша-ўша. Маликам ҳар кунгидек ўз жойида ўтирибди. Бошлиғимизнинг фаришта бўлишига эса қанот етишмайди, холос.

Толиб Содиқнинг гапларидан аччиқ ички бир оғриқ билан кулиб, сўнг:

– Нима бўлганда ҳам, ҳамманинг гўри алоҳида-алоҳида. Шундай экан, қайсиdir маънода бу тарздаги худбинлик натижасида одам ўз-ўзини яксон қилувчи куч таъсирига тушмаслиги, ҳар қандай оғир дамларда ҳам ўзлигини сақлаши керак-ку, – деди совуқ оҳангда.

Жим қолишди. Содиқ, одатига кўра, деразани очиб қўйиб тамаки тутатишга тушди.

– Мени нега чақиришди, билмайсанми?

– Нима, ишинг тугамай чақиришдими? Ҳа, унда хўжайиннинг олдига тезроқ кир, иш билан бир жойга кетиб қолмасин...

Кутилмаганда котиба у билан жуда қуюқ сўрашди. Толиб, одатдагидек, унга ортиқча эътибор қилмай, бошлиқнинг эшигига ишора қилиб:

– Ўзларидами? – деди.

– Ҳа, сизни кутяптилар.

Бошлиқ уни илиқ қарши олиб, сафар хусусида қисқагина суриштирди, кейин уни маҳалласидаги милиция ходимлари излаётганини, ҳозироқ бориб уларга учрашиши лозимлигини, шунинг учун сафардан эрта чақирирганини айтди.

Толиб ҳайрон бўлганча тўғри маҳалла нозири хонасига кириб борди. Уни Қурбонов деган полковник

қабул қилди. Бу одам билан биринчи маротаба Надя бувининг вафоти куни учрашган эди. Қурбонов Толибни зимдан кузатди, кейин столидаги қалашиб ётган қофозлар орасидан ниманидир излаб топди-да, Толибга узатди. Бу ерда ёзилишича, Толиб Соня холанинг яккаю ягона вориси бўлиб, ўлса, уни қўмиши лозим. Ана шунинг учун туман нотариуси уни қидирмоқда эди. Толиб полковник узатган қофозни қайта-қайта ўқиб чиқди, «Ҳеч нарсага тушунмадим», – дегандай полковникка қаради.

– Уй бекасининг дунёдан ўтганига икки кун бўлди. Сизни қидириб тополмадим. Ишхонангизга қўнфироқ қилгандим, сафардалигингизни айтишди. Марҳумни дафн этиш чўзилиб кетди. Шу боис сизни кутмай, қўни-қўшнилар ва кампирнинг ёр-биродарлари биргалашиб кўмиб келишди. Маросимларини вақти-соати билан ўтказарсиз... Дарвоҷе, туман нотариуси Қодировга учрашинг, у бу ишнинг икир-чикиригача ўзи тушунитиради. Қўлингиздаги қофозда ўша нотариус манзили ва телефон рақамлари ёзилган, – дедиую қаергадир кетиш мақсадида бош кийимини кийиб ўрнидан турди.

Толибнинг юраги Соня холанинг ўлимидан сим-сим оғрий бошлади, аммо қўзидан бир қатра ҳам ёш чиқмади ва ичидаги бу оғриқни кўрсатмасликка уринди. Бироқ Қурбонов етказган хабари Толибга оғир ботганини унинг юз-қўзларидағи ўзгаришдан дарҳол пайқаб:

– Баъзида одам ўз боласидан норози жон беради. Етти ёт бегона кампирингиз, қўни-қўшниларингизнинг айтишича, сиздан мингдан-минг рози кетди. Фақат охирги дамда ёнида бўлмаганингиз бироз чакки бўлди. Аммо атрофдагилар вазиятни кўриб туришибди-ку, – дея Толибга далда бериб у билан бирга кўчага чиқди. Шу ерда хайрлашдилар.

Одамлар ишга шошилар, қузнинг аччиқ изфирини хазонларни ҳар томонга тўзғитарди. Яланғоч дараҳтлар эса гўёки совуқдан жунжикиб тургандек эди.

Соня хола билан видолашишга улгурмаганлиги, ҳаттоки дафн маросимида ҳам қатнаша олмагани уни ларзага солди. Ажабо! «Ўлим у ёнимдан-бу ёнимга сакраб, ўзини бирон марта кўрсатмади», – дея ўзича шивирлаганича милиция рўпарасидаги скамейкага бориб ўтириди.

Яна Соня холани кўз олдига келтирад экан: «Охирги вақтларда шўрлик жуда қариб қолгани етмагандек, суюнган кишиларининг бирин-кетин дунёдан ўтиши, айниқса, Надя бувининг ўз жонига қасд қилиши уни адойи тамом қилди», – дея пичирлади. Ниҳоят, ўзини қўлга олиб, нотариусга қўл телефонидан қўнғироқ қилди. У киши ўз жойида эканлигини, агар хоҳласа ҳозироқ келиши мумкинлигини айтди. Толиб кечаси билан йўл юриб чарчаганига қарамай, Соня холасисиз ҳувиллаб қолган уйга киришни истамай, тўғри нотариуснинг олдига қараб жўнади.

Қодиров уни илиқ кутиб олиб, рўпарасидаги курсига ўтиришни таклиф қилди. Толиб кўрсатилган жойга ўтириши билан унга бир муддат назар ташлаб: «Гапнинг индаллоси бундай», – деди. Кейин Надя бувининг уйига қизи Тоня ва Альфред ворис бўлганини, Альфред амаки икки хонадонни ҳам Соня холага вассият қилганини, Соня хола эса ана шу хонадонларни бутун мол-мулки билан Толибнинг номига қолдирганини қисқагина гапириб берди. Толиб кутилмаган бу янгиликдан шу даражада ҳайратга тушдики, бир нарса дейишга қурби етмасди. Қодировга шундай тикилдики, бу қарашдан «Оғир вазиятда бу одам менга ҳазилил қилмоқдами ё ҳақиқатдан ҳам шундайми?» деган саволни уқиши мумкин эди.

– Сизнинг ўрнингизда ҳар қандай одам шу аҳволга тушиши аниқ, мўъжиза юз берди, – деди Қодиров унинг ҳолатини пайғаб. – Пойтахтда, қолаверса, унинг қоқ марказида бир йўла учта хонадонга эга бўлиш – бир омад!

У Толибга Соня хола қолдирган васиятномани узатди. Толиб қофозни қўлига олди. Ҳозиргина нотариус айтган гапларни қофоздан яна бир марта ўқиди. Кейин Қодировга қаради. «Ана шунаقا гаплар», – дегандай нотариус йигит кулимсираб бош иргади. Толиб яна қофозга кўз тикаркан, энг аввал отасини эслади. У Толибни бу қариялар оғушига ташлаб кетар экан, «Улардан ҳеч нарса кутма, аммо ҳеч қачон ёрдамиングни аяма, иложи борича уларга эътиборли бўл, улардан яшашни ўрган, инжиқликлариға сабр қил», – деганди. У қарияларнинг ўзига нисбатан меҳрибон эканлигини биларди-ю, аммо улардан бу даражадаги ҳимматни кутмаган эди.

Толиб қўлидаги қофозни ҳамон ўзига тикилиб турган Қодировнинг столига қайта қўйди-да, ортиқ ўзини ушлаб тура олмади. Кафтларини юзларига босиб ҳўнграб йиглаб юборди. Унинг юраги Соня холанинг ўлими ва охирги дамда унга қилган яхшилигидан тўлиб турганди. У шу тобда Альфред амакининг «Худонинг фаришталари атрофимиизда чарх уриб биз билан бирга инсон қиёфасида яшамоқда» деган сўзларини шивирлади.

Қодиров стакандаги муздек сувни унинг олдига қўйди. Соня хола билан кўпдан бери танишлиги боис Толиб ҳақида яхшигина маълумотга эга эди. Шунинг учун ҳалидан бери ўзига келолмай ўтирганлиги сабабини яхши тушуниб турарди.

Толиб сувни ичиб, юрагини сиқиб турган исканжадан қутулгандек бироз енгил тортиб бир-икки чуқур

хўрсинди. Нотариус эса уни тушкун кайфиятдан қутқариши мақсадида икки елкасидан дўстона қучганча ўрнидан турғазди ва:

— Соня хола сиздан миннатдор эканини айтиб чарчамасди. Сиз унинг дуосини олдингиз, Толибжон, — деди.

Толиб Қодиров билан хайрлашиб ташқарига чиқиши билан ўзини гёё ўзга бир оламга тушиб қолган-у, унинг қадрдонлари бошқа бир оламда қолиб кетгандек ҳис қилди. Қалби бу жудоликлардан норози бўлиб уйга томон қадам ташларкан, шаҳар манзарасига маъюс кузатар, қулоғи остида бирорвнинг, йўқ бирор әмас, унинг бу улкан шаҳарга келиб топган энг қадрли кишисининг овозини эшитгандай бўлди: «Инсон ҳаётни эъзозлаши, унинг қадрига етиши, охирги нафасигача инсоний қиёфасини сақлаб қола билиши лозим...»

Бир вақтлар замин узра ям-яшил бўлиб яираб ўстган ўт-ўланлар қовжираб қолган, қиши бошланган эди. Толиб юраги бетлаб-бетламай ўн икки йиллик умри ўтган, айни чоғда соҳибасидан айрилиб ҳувиллаб қолган ўксик хонадон сари бораркан, қор учқунлай бошлади. Кейин қалинлашди, капалак қор парчалари ер узра ёйила бошлади. Одамлар соябонларини очиб, манзиллари томон шошилишарди. Ҳаял ўтмай бутун борлиқ оппоқ оҳорли чойшаб билан қопланди.

## Аросатдаги одамлар

*Күнса*

Кунлар совиди. Куз оёқлаб қолди.

Дам-бадам симиллаб, майдалаб ёмғир ёғади. Симиллаб, майдалаб ёғса-да, кўкламдагидек хуш ёқмайди, этни жунжиктиради. Боғ-роғлар ҳали қиши уйқусига берилмаган, энди-энди мудрай бошлаган.

Қунишган боғ сукунатини яккаш бир овоз – қарғанинг нохуш қағ-қағи бузиб туради. Бир пайтлар бағрини хуш наволарга тўлдирган минг турли сайроқи қушлар эса уни аллақачон тарқ этишган. Аввалига бир неча кун узилиб кетолмай, боши узра чарх уриб, хайрлашиб, видолашиб... сўнгра жанубга, иссиқ ўлкаларга йўл олишган. Уларнинг борар манзиллари олис, машаққатли, хатарли. Янги манзил-маконларига етгунча қанчаси нобуд бўлади...

Олимларнинг айтишича, қушларнинг бу тарздаги олис масофаларга учиши даврида уларнинг баъзи турлари бутунлай қирилиб, йўқолиб ҳам кетаркан. Афсуски, қушлар миграциясини тўхтатишнинг сира иложи йўқ. Сабаби, бу жараён табиат ва йил фасллари билан боғлиқ. Илм-фан қушларнинг ўз-ўзидан содир бўладиган бу миграцияси олдида ожиздир... Инсоният тарихида ҳам тузумлар алмашинуви ёхуд урушлар, босқинлар авж олганда халқларнинг ёппасига ёки якка-якка ҳолда кўчиши кузатилади. Яъни халқларнинг

бу миграцияси оқибатида миллатларнинг бир-бири билан қўшилиб, чатишиб кетиши, айрим майда миллатларнинг катта халқقا қўшилиши эвазига уларнинг тили, урф-одатлари эртакларга айланиши, гоҳида дунё ҳаритасидаги ўрни кучли бир мамлакат таркибига қўшилиб кетиши ҳеч кимга сир эмас...

Нодир ҳайҳотдай кимсасиз ҳовли этагидаги боғида айланиб шуларни ўйларкан, бу ерларга охирги вақтларда супурги тегмаганидан файзи кетиб қолгани, ҳаммаёқ барг-хазон экани, атиргуллар, дараҳтлар қирқилмагани, токлар кўмилмагани, томорқа чопилмаганидан дили оғриди. Раҳматли отаси бу ерларни қандай парвариш қиласади-я. Айниқса, боғдаги ҳар бир новдага алоҳида эътибор қаратар, ҳар йили янги-янги дараҳт кўчатларини аллақаерлардан келтириб экар, бир дараҳтни иккинчи дараҳт билан чатиширарди, бу ишларда мактабда биология ўқитувчиси бўлганлиги ҳам қўл келиб, бор илмини ўзи яратган боққа сарфлар, натижада ҳовли билан боққа кирган одамнинг кўнгли яйрарди... Мана аҳвол...

Бир ойдирки шаҳарга қатнайди. Қаратмаган дўхтирик қолмади. Кирди-чиқди бўлиб қолган онасига қараб соғайиб кетишига кўзи етмай, умидсизликка туша бошлади. Ниҳоят, шифокорлар бир хulosага келиб, кеча руҳий касалхонага ётқизиши. Бир пайтлардаги довруқли раис, хўжаликни оз эмас, кўп эмас, йигирма йил бошқарган Олтиной Ҳайдарова ана шунақа нохуш бир шифохона беморига айланди...

Нодир эсини таниб онасини машинада кўрди. Бир вақтлар машинани отаси бошқарган, бора-бора эрини ортиқ овора қилмаслик мақсадида ролга онасининг ўзи ўтирган. Колхозга илк раис бўлган вақтларида унга алоҳида ҳайдовчи беришган. Ким билсин, гайрати ичига сифмагани ё машина орқа ўриндиғида яста-

ниб ўтиришни истамаганиданми ёки Нодирга номаълум бир сабаб бўлибми, онаси ҳайдовчини рад этиб, охирги дамларигача машинани ўзи бошқарди. У эртао кеч далама-дала, идорама-идора кезар, на нонушта, на кечки овқатда уйда бўларди. Уйдаги барча рўзгор ишлари, шунингдек, Нодирнинг тарбияси талабчан ва ниҳоятда қаттиққўл бувисининг зиммасида эди. Эртадан-кечгача уй юмушларидан тинмайдиган бувиси Нодир билан бирга эди. Онаси уйда камнамолигиданми, онаси уйга кириб келиши билан унинг тиззасида ўтириб эркаланарди. Аммо бундай дамлар кам бўларди, тенг-тўшларининг оналари уйдалигига ҳавас қилиларди.

Мактабда дарс берадиган Олимжон ака ўғилчасини вақтли уйғотиб, юз-қўлини ювдириб, нонушта қилдирарди-да, кейин ўзи билан эргаштириб олиб кетарди.

Хуллас, уларнинг хонадонида иш тутуми шунаقا эди. Бувиси билан отаси: «Ўзингни аямайсан. Темирдан эмассан-ку, одам вақти-вақти билан меҳнатига яраша ҳордиқ ҳам чиқариши керак», – дерди. Онаси эса ҳар сафар: «Бу йил иш кўп. Планни бажармасак бўлмайди», – дея ўзига ҳам, ўзгаларга ҳам тиним бермасди. Билгани, ўйлагани пахта, план, партия топшириги эди. Шундан бошқасини тан олмасди. Гўё у бўлмаса, иш тўхтаб қоладигандек, колхоз мулки талон-торож бўлиб кетадигандек, унга ишонч билдирган партия олдида юзи шувут бўлиб қоладигандек эди.

Йигирма йилча раислик қилган бўлса, кейинги ўн йили жуда беҳаловат кечди. Оғир йиллар эди. Мамлакат пахта плани ошгандан-ошиб борар, ернинг ҳам, дехқоннинг ҳам имконияти ҳисобга олинмасди. Натижада, «очкўзликка қарши маккорлик» деганларидаи, айрим хўжалик раҳбарлари қинғирлик йўлига ўтишиди. Пахта сотиб олишлар, қўшиб ёзишлар бошланди.

Далада гўзалар хивчинга айланиб бўлган, теримчилар яккачаноқ териб юришар, аммо йўқ ердаги тонналар ҳисботга тиркалар, режалар бажарилар, марказга «ёргу юз билан» рапортлар берилар... марказ ҳам бунга гўё ишонарди.

Нодир унда ҳали мактабда ўқиб юрган фўр бола эди, гоҳ-гоҳида ярим тунда уйга қайтган онасининг отасига ўкиниб айтган гапларини эшитиб қоларди.

– Мени бир нарса ўйлантиради. Биз-ку бу ерда қўшиб ёзмоқдамиз, аммо марказга кетаётган бўш вагонларни қандай тушунса бўлади? Наҳотки, ёлғон шунчалар болалаб кетган бўлса? – дерди онаси ҳар сафар манглайнин силаганча. Отаси:

– Олтиной, шу ишингни ташла, охиривой. Бу қинғир ишларнинг бир кунмас-бир кун иси чиқади. Бас қил, – дерди. Онаси эса чуқур-чуқур уф тортиб:

– Биласизми, сафимиз жуда кенг. Ҳамма бир-бираiga боғлиқ. Қандайдир тўрга тушганмизу оқибатини била туриб тўрни кенгайтириб тўқимоқдамиз... Афсус, бу тўрнинг бир ипи менинг қўйлимда... Начора, биз тўрга тушиб бўлганмиз. Фақатгина марказ шундай бир оқибона қарор қабул қилиши керакки, ўйланмай қўйилган план оқибатида мана шу тўр тўқилганлиги, бунда, аввало, ўзлари айбдор эканлиги кўрсатилиши лозим. Амалга ошириб бўлмайдиган буйруқни ким бермоқда? Ким унданмоқда бизни қўшиб ёзишга?.. Ким ўз халқини жиноят қилишга мажбурламоқда?.. Қани соҳа мутахассислари?.. Нега ҳамма жим?.. Нима, ҳамма соқовга айланганми?!.. Бўш вагонларни кутиб олаётганлар нега жим?.. Энг қизиги, ҳар сафар бонг урадиган журналистларнинг дами ичига тушиб кетган...

Нодир ўшанда, табиийки, ота-онасининг бундай суҳбатларини тинглаб ҳеч нарсага тушунмас, аммо онаси билан боғлиқ кўнгилсиз нимадир содир бўлаётганини

бувиси билан отасининг қайгули кўзларидан кўриниб турарди. Охирги вақтларда уларнинг бу тарздаги сухбатлари кўпайди. Отаси эса ғам-ғуссага ботиб, онаси уйда эмаслигига боғида ёлғиз ўзи узоқ айланадиган одат чиқарди. Болаларига келиб тушаётган кутилмаган зарбадан бувиси тобора қартайиб, куч-қувватини йўқотди. Сўраб-суринширишлар узоқ давом этмай онаси биринчилардан бўлиб қамалиб кетди.

Таажжубки, қўёшиб ёзиш эвазига жуда катта фойда кўрган марказ корчалонлари, мамлакат бўйлаб бориб-келган бўш вагонларни қабул қилганлар, шундай планни ўйлаб топганлар сувдан қуруқ чиқиб, тонгдан шомгача далада тер тўкиб пахта етиштирганлар айбдор деб топилди. Очиққан қатағон машинаси ўлка бўйлаб «затарли» юриш бошлади. Ҳамма кўриб-билиб турган оқ олтинни етиштирган олтин қўллар ёппасига қамалди... Озгина фурсатдан кейин қудрати ниҳоясиз кўринган, аммо ич-ичидан зил кетиб улгурган империя қўргони қулаб, ўзини илоҳ даражасига кўтарган ягона партия ерга тушиб чилпарчин бўлган санамдек тирқираб, тарқаб кетди.

Эл қатори беш йиллик тутқунилиқдан сўнг онаси оқланиб уйга кириб келди. Аммо бу вақтда отаси билан бувиси олдинма-кетин дунёдан ўтишганди.

Жамоа хўжаликлари тугатилиб, фермерлик ташкил этилган. Янги ишбилармонлар фурсатдан фойдаланиб собиқ хўжалик балансидаги бинолар ва техникаларни қўли етгунча, қучогига сиққунча шоша-пиша ўзлаштириб-хусусийлаштириб олишга улгуришди-ю, бироқ «Холва деган билан оғиз чучимас» деганларидек, колхозда иш юритиш бошқа, шахсий хўжаликда бошқа эканини аввалига тушунишмади.

Ер ўзингникими, уругми, ўғитми, техника сарфими – ҳамма-ҳаммаси ўз киссангдан кетади. Камига,

ищчиларга маош тўлаш муаммоси ҳам юзага қал-киб чиқди. Ишчилар тонг оқариши билан кетмонини елкалаб далага чиқиб келаверишади. Аммо янги ер эгаларининг биттаси ўз ишини эпласа, бештаси эплай олмасди. Натижада уларнинг орасида ҳам тез-тез иқтисодий инқирозга учраш бўлиб турар, бечора ишчилар эса, маошини ололмаслигига қарамай, чор-ночор кетмонини кўтариб далага бориб-келаверишарди. Уйда қора қозон қайнамаса, хотин деганлари фингшийверса, полапонлар ейман-ичаман деб чирқиллаб турса, йўқчиликдан эркаклар ўзларини ўқقا-тиққа уришар, кимдир бир-икки танга ваъда қилса, ўшанга эргашиб кетаверишар, шу кетишда бир кун қарашса, етти ухлаб тушларига ҳам кирмаган, етти ёт бегоналар юртига бориб қолишган бўлишади. Яна бирлари эса ишсизликдан уйда ўтиrolмай, аниқроғи, хотиннинг фишавасидан безиллаб уззукун кўчада юрадиган одат чиқарди. Чойхона-гузарларда, ҳамма-ҳамма жойда ишсизлар, бекорчилар кўпайганидан виж-виж майдаги гийбатнинг жони кирганди...

Улар-ку, оддий кетмончи, олий маълумотлиларнинг аҳволи уларницидан ҳам оғирроқ. Мамлакатда зиёлилар билан боғлиқ жуда кўп ташкилотлар, лабораториялар союзнинг бошқа мамлакатлари билан боғлиқлиги эвазига тўхтаган, янги тузум эса бу ерларни қандай йўлга қўйишга боши қотган. Ишсизлик, йўқчилик одамларни телба қилиб қўйганди. Нодир ҳам қишлоқ одамларининг кўйига тушган; олий маълумотли, қишлоқ хўжалиги бўйича ноёб мутахассис.

Онаси қамалиб кеттач, умр бўйи мактабда кимё, биологиядан дарс бериб келган камсуқумгина отаси ўзи емай-ичмай ўғлини ўқитди. «Сен чида, тишинтишга қўй, болам, ҳаммаси изига тушиб кетади. Умидсиз бўлма. Иродали ва кучли бўл, ана ўнунда енгил-

майсан», – дерди. Отасининг ўлимидан икки йил ўтиб ҳардамхаёл бўлиб қолган онаси уйга кириб келди. Аввалги онасидан асар ҳам йўқ эди.

Одам боласи қизиқ-да. Онасини қамалибди деб эшитган кўпчилик аввалига ажабланди. Ачинди. «Йўғ-э, бўлиши мумкин эмас», – дейишди. «Кимсан, Олтиной Ҳайдарова, довруғи республикага кетган, бир неча орденлар эгаси-я», – дейишди. Бир муддат ўтиб эса фикрлар, қарашлар ўзгарди. «Давлат бекорга қамамайди, қинғир ишни минг йил яширсанг ҳам, куни келиб чиқади», – дейишди. Озодликка чиқиб келгач эса яна ажабланиши. «Тавба, давлатнинг кети кенг экан-да, шунча айби билан ҳам қўйворишибдими?» – дейишди. Кейин бошқа тўхтамга келиши: «Бечоранинг эси кирди-чиқди бўлиб қолгани учунам гуноҳидан ўтиб юборишган, Худо жазосини бериб қўйибди-ку».

Ростданам қамоқдан Олтиной Ҳайдарова ғалати бир аҳволда қайтди. Илгарилари у камгап, гапирмоқчи бўлган гапини минг ўйлаб, сўнг гапирав, шунда ҳам айтмоқчи бўлган фикрини қисқа-лўнда, тушунарли баён этарди, қўл остидагиларни тинглашни билар, ёш-қари, аёл-эркак, ҳаммага бир хил ҳурмат билан муносабатда бўлар, ҳаддидан ошганни, жойи келса, ўрнига ўтқазиб ҳам қўярди. Ана шундай аёл ақлдан озиб қолганди. Боф билан катта ҳовлида у ёқдан-бу ёққа юрганча маърузасини бошлаб юборар, ҳар гал: «Ноҳақлик, кўзбўямачилик, соxта кўрсатмалар ҳар қандай тузумни емиради, халқни тушуниш керак, тарбиялаш лозим, зинҳор-базинҳор боши берк кўчага киргизиб, жиноят қилишга мажбурламаслик зарур», – дерди.

Одамлар секин-секин бу эшиқдан ўзларини торта бошлишди. Нодирнинг онаси эса ўзи билан ўзи овра,

ҳовлида туну кун «мажлис» ўтказади, одамлар турмушини ўнглаш, атроф давлатлардан ортда қолмаслик йўлларини излайди, удумлар, ҳар хил майда-чуда урф-одатлар сабаб ҳалқнинг қолоқлашиб кетаётганидан фигони кўкка чиқиб: «Эй, биз ўзи қачон одам бўламиз?» – деб бақириб-чақиради. Баъзида қамалиб чиққани эсига тушиб, хизматларини қадрлашмагани, энг ёмони, унга қўшиб неча-неча бегуноҳни қамаб юборишганини, айримлари ўша ёқларда ўлиб кетганини айтиб иғлашга тушади...

Нодир онасининг аҳволини четдан кузатиб боши қотди. Даволатай деса, қўлида бир мири йўқ. Ўртоқларига ўхшаб бошқа мамлакатларга бориб бир-икки сўм пул ишлаб келай деса, онасини ёлғиз ташлаб кета олмайди. Ўйлай-ўйлай бир қарорга келди: уй-жойини сотиб, ўзи бироз ижарада яшаб, онасини даволатади. Қолган сармояга шаҳар четроғидан бошпана олади. Барibir, у ерда бирон-бир ишга кириш имкони бўлали... Йўқ, унинг режалари хом бўлиб чиқди. Эски тузум пуллари барҳам топдию каттагина бир ҳовлининг пули кулга айланиб қолди. Тақдирнинг бу зарбаси етмагандек, онасини даволатишдан ҳам ҳеч қандай натижга чиқмади. Шифокор маслаҳати билан уни руҳий шифохонага жойлаштириди. Ўзи эса мутлақо бошпанаиз қолди. Фақатгина миясида отасининг «Кучли ва иродали бўл» деган сўзлари бот-бот жаранглайдиган бўлди.

Шаҳар аҳволи ҳам қишлоқникидан қолишимасди. Завод-фабрикалар, турли ташкилотлар ишдан тўхтаган. Ишсиз қолганлар ноchorликдан ўзини бозорга урган, баъзи бировлар дехқоннинг молини ултуржи олиб, майдалаб сотар, баъзилари хорижга пул ишлагани кетиб, уқувлироги тўрт-беш сўм топиб қайтар, омади чопмагани шу кетишида изсиз йўқолар, инсоф

құлса бир әнлик хат ёзар, бўлмаса, ўша ҳам йўқ... Хуллас, ҳаммаёқда судхўрлик, қасамхўрлик урчиган, бирор бировга қарз беришдан қўрқади. Қўрқмай қарз берганлар қарзини қайтиб ололмай ич-ичидан унни-қиб юради. Иш топдим деб қувониб, лекин маошини ҳадеганда ололмай жиғибийрон бўлиб юрганлар қан-ча...

Нодир: «Фақат кутиб ўтиrmай, олға интилавериш керак», – дерди ўзига ўзи. Шундай дерди-ю, бироқ олдинда милт этган ёруғлик кўрмагани учун баъзида руҳсизланиб кетар, ўзини жуда ҳам уқувсиз, боши берк кўчага кириб қолган одамдек ҳис қилар, ким биландир маслаҳатлашгиси, кимгадир ишонгиси, кимгадир суяңгиси келар эди. Савдо-сотик қўлидан келмайди, замоннинг алдам-қалдамларига мослаша олмайди, қишлоқ хўжалиги йўналишида олган билимининг эса айни дамда ҳеч кимга кераги йўқ. Бир-икки дафъа тегишли илмий тадқиқот институти эшигини қоқиб борди. Ўзи амал-тақал қилиб кун ўтказиб турган ташкилот яна бир нонхўр – тажрибасиз ходимни яқинига ҳам йўлатмади. Нодир касби бўйича иш излашдан умид узиб, тўғри келган ишга ўзини уриб кетаверди. Бир ўртоғи билан ресторонда официантлик қилди. Маош берилмас экан, «Чойчақани хўрандалардан ундирасанлар», – дейишиди. Бу шартга рози бўлишди. Бироқ аксари хўрандалар (ҳатто пўрим кийиниб юрадиганлари ҳам) ҳаётдан норози, аламзада. Еган-ичганлари ҳақини ҳам оғриниб, минг битта иddaо билан тўлашади. Қайта-қайта ҳисоблатишади. Айрим бадмастлари: «Ҳамманг фирибгарсан, юлгичсан», – дея очиқ-ошкора ҳақорат қилиб чиқиб кетишади. Нодир хўрандаларнинг бу тарздаги аччиқ кесатиқларига ортиқ тоқат қилолмади. Бир ойга ҳам етмай ойна ишлаб чиқарадиган хусусий корхонага ўтиб кетди. Зора,

ишимни кўриб, маошимни кўтаришар деган умид билан бу ерда тиришиб ишлади. Қаёқда, маошни кўтариш у ёқда турсин, унинг ўрни бўшаса, ёнидагилар бирон-бир таниш-билишини олиб келиш илинжида. Аксига олиб, маоши ижара пулидан хиёл ортар, амаллаб очин-тўқин кун ўтказар, касалхонага деярли қуруқ қўл билан бориб-келар, бирордан қарз олишдан аввал қайтаришини ўйлаб имкони даражасида қарзсиз яшашга уринар, сўраганда ҳам атрофидагилардан қарз берадиган мард топилишига кўзи етмасди. Ёшлик қилиб маош масаласида катталарга арз қилишдан ҳам бир иш чиқмайди. «Сизни ушлаб турган жойимиз йўқ», – деб эшикни кўрсатиб қўйишилари тайин. Хуллас, бу ер ҳам бўлмади. Излай-излай яна иш топди. Ҳайҳотдай майдонни эгаллаб ётган, бир пайтлари «Қорақум» шоколадлари билан машҳур бўлган, аммо ҳозирда қўнқайтан тўрт-бешта иморатию чирк босган станокларидан бўлак бисоти қолмаган фабрикага тунги қоровулликка олишди уни. Маҳсулот бермай қўйган корхона мулк солифини тўлолмай қарзга ботиб қолган экан. Корхона бошлиғи куни бўйи ҳудуд айлануб, сотишга ярарли ул-бул нарсани мўлжаллаб чиқади. Кечаси кимларгадир ўгринча пуллайди. Бу ўғрилик Нодирнинг кўз ўнгиди, қай бир маънода унинг иштирокида содир бўларди. Нодир ажабланади: «Ўзи мен нимани кимдан қўриқлашим керак?! Бошлиқнинг ўзи бош ўғри бўлса!» Тўғри, унга буни: «Корхона эҳтиёжи учун, солиқдан қутулиш тадбири», – деб изоҳлашади. Нодирнинг содда ақли бу мантиқни қабул қилолмайди. «Унда нега бу ишлар тунда, бекитиқча, қўрқа-писа амалга ошириляпти?» – деб ҳайрон бўлади. Хуллас, бу ер ҳам тўғри келмади. Кетди. Мана икки ойки ишсиз, пулсиз. Бу орада неча бир эшикка иш сўраб борди. Эшиклар очилмади.

Мана, бугун ҳам эрта тонгдан бош қотириб ўтириди. Қаерга борсин? Бормаган жойи қолдими, ўзи? Ўйлай-ўйлай: «Онамдан хабар олганим маъқулроқ, кейин бир гап бўлар», – дея ҳовлига кўз ташлади. Маъруф ота кўринмайди. Тез-тез юриб кўчага чиқиб кетаётib кўча эшиги олдида Маъруф отага дуч келди, юраги шиф этиб, бир қунишиб олди. Салом-аликни қисқа қилди-да, шошиб турган кўринишда ундан тезгина узоқлашди. Икки ойлик ижара пули тўланмаган эди.

Шифохона шаҳар чеккасида жойлашган. Яёв йўлга тушди. Қорли-қировли кунлар ўтиб, кунлар исий бошлаган. Қиши чўзилгани боис дараҳтларда энди-энди куртаклар бўртиб бораётган эди. Вақтнинг ўтишини қара. Қеч кузда шаҳарга кўчиб келган эди. Ўз ташвиши билан бўлиб бутун бошли қишини ўтказиб юборганини пайқамабди ҳам...

Ранги унниқиб кетган темир дарвоза, ёнида чоғроқ-қина қоровулхона. Нодир қоровулхона эшигидан ўтиб, ҳовлига кирапкан, ажабтовур манзарага кўзи тушди. Ҳовли ўртасидаги ҳовуз бўйида йўл-йўл пижамали беморлар саф тортишган. Саф олдидаги бемор қўлида челак, у ҳовуздан сув олди-да, нарироқдаги ёғоч бочкага олиб бориб тўқди. Сув бочка ёриқларидан шариллаб оқиб ҳовузга қайтиб тушди. Бемор унга деярли эътибор қилмай, бўшаган челакни навбатдаги шеригига тутқазиб, ўзи сафнинг охирига бориб турди. Қеининг бемор ҳам челягини сувга тўлатди... Шу тахлит челак қўлдан-қўлга ўта бошлади. Сув ҳовуздан челакка олинади, челакдан бочкага қўйилади, бочкадан ҳовузга қайтиб тушади. Йўл-йўл пижамалилар эса бу ишларидан мамнун, ҳеч бири шошилмай, жиддий қиёфада айланма ҳаракатларини давом эттиришмоқда. Ҳовуздан нарироқда, яккатол соясидаги ўриндиқларда

оппоқ халатли талабалар, тиббиёт институтида ўқиши-са керак, бу мантиқсиз манзарани кузатиб, ўзларича нималарнидир дафтарларига қайд этиб ўтиришибди.

Нодир беморлар орасидан онасини излаб секингина икки талаба ўтирган ўриндиқнинг четига бориб чўқди. Талабалардан бири кўзойнак таққан, тўладан келган, иккинчиси эса оқ халати ўзига ярашган, озгин. Улар Нодирга: «Сен бу ерда нима қилиб ўтирибсан?» – дегандек бир-бир қараб олишди-да, сухбатларида давом этишди.

– Эртага байрам, балки, дам беришар, – деди кўзойнаклиси негадир Нодирга кўз ташлаб олиб.

– Э, жиннилар байрамни билармиди? – деди иккинчиси ёзувдан бош кўтармай. – Биз ҳам жиннилар қаторидамиз.

– Ҳамма гап домлада. Эртаю кеч мана шулар билан юравериб томи кетиб қолган. Байрам куниям ишлайдими эси бутун одам?! Эртага ҳамма ёқда Наврўз. Биз бўлсак жиннилар билан оварамиз. Ўзи нимани кутамиз бу ерда? Таги йўқ бочканинг тўлишиними ёки ҳозвузнинг қуришиними?!

Шериги жавоб бериш ўрнига: «Э, мендан нима истайсан?» – дегандек норози қараб қўйди-да, кейин шартта ўрнидан туриб, бошқа ўриндиққа бориб чўқди. Ёзувини келган еридан давом эттирди. Кўзойнакли бўлса: «Буям ўзига етгунча жинни!» – деб қўйди илжайиб. У бу гапни Нодирга айтдими, ўзигами, Нодир фарқлай олмади. Шу маҳал bemорлар орасида турган онасига кўзи тушиб, беихтиёр ўрнидан турди. Кўзойнакли талаба ялт этиб унга қаради. Нодир унга эътиборсиз онасини кузата бошлади. Олтинон опа кейинги йилларда ўзини анча олдириб қўйганига қарамай, гарчи ҳамма қатори касалхона кийимида бўлса-да, нимаси биландир бошқа bemорлардан ажralиб турар,

қомати тик, қарашлари сокин, ҳаракатлари қатъий. Онаси челягини бўшатди-да, кейин бочка ёрифидан оқиб тушаётган сувни жимгина кузатди. Шу туришда ҳам ёнига келган навбатдаги беморни пайқаб, унга қарамай челякни узатди.

Бу улуғвор хатти-ҳаракатлар, кўз қарашлар Но-дирга қанчалар таниш, азиз ва яқин бўлмасин, касаллик туфайли онасида пайдо бўлган қандайдир совуқлик, қўрслик уларнинг орасига муз ташлаганди. Шу сабабданми, у онаси билан бориб қўришмоққа ошиқмай, ҳар сафар келганида олисдан маъюс ва фуссали нигоҳ билан кузатиб тураверди. У кейинги пайтлар бир нарсани одат қилган эди. Агар онаси унинг келганини кўрса ва таниса, у билан кўришиб, сўрашади. Агар танимаса, кўриб турса-ю, эътибор қилмаса, унинг ёнига бориш бефойда. Минг марта: «Она, онажон, менман, ўғлингизман», – демасин, онаси дим бегона қиёфада унга бир-икки қараб қўяди-да, индамай нари кетади. Илгари бир-икки марта шунақа қилганида ортидан эргашган эди, шундай совуқ қарашиб қилдики, қўрқувдан сесканиб кетди. Кейин эса ҳар гал келганида онасини олисдан кузатадиган, авзоига қараб иш тутадиган бўлди. Мана, ҳозир ҳам у ўзи билан ўзи овора, ўғли томонга қиё ҳам боқмади.

Нодир аҳволи ёмонлигидан, томогига алланима тиқилгандек, оғир-оғир нафас олар, онасига тикиларкан, уни ҳаётда яккаю ягона тушунган, қадрлаган, эҳтиётлаган ва унга ҳаммадан кўп ачинган отаси кўз олдига келарди.

– Онангизми?..

– А?..

Нодир ялт этиб ёнига ўтирилди.

– Бемор Ҳайдарова онангизми? – деди кўзойнакли талаба ҳамдард оҳангда.

Нодир мужмал бир йўсинда бош иргаб қўйди-да, нари кетди...

Онасининг олдидан кайфияти янада тушкун қайтган Нодир ижара уйига қамалиб олиб, тўшагига ағанаб ётганча кунни кеч қилди. Бу орада икки марта ёмғир шаррос қўйиб бериб, яна тинди. Қаттиқ шамол қўзғалиб, ҳовлида бесаранжомлик бошланди. Алла-қаерда тунука тақирлар, энди уйғона бошлаган кекса дарахтлар нолакор гижирлар, деразалар шамолнинг ҳар ҳамласидан зириллаб кетар, ҳовли этагида боғлоқ турган қари кўпак бир-икки ҳуриб, орқасидан фингшиб қўяр, Нодир атрофда тиқ этган товушни эшитар, шу билан бирга, миясида бир ўй кундан-кунга йўқчиликдан қалашиб кетаётган муаммолар калавасини ечмоқчи бўларди-ю, эплолмасди. Ҳамма тузган режалари бўш, натижасиз, барчаси охир-оқибатда бориб-бориб пулга тақаларди. «Биринчи галда, пул топишим керак. Пул! Пулсиз бир қадам ҳам олдинга юриб бўлмайди», – дея Нодир юраги ториқиб ўрнидан туриб кетди. Чойнакда совиб қолган аччиқ чойни ютоқиб-ютоқиб ичди. Кейин бироз миям тиниқлашсин деган мақсадда бориб деразанинг икки табақасини ҳам очиб юборди. Ёмғирдан кейин бошланган салқин шамол ичкарига ёпирилиб кирди. У ҳеч нарсага парво қилмай, шундоқ пештахтага ўтирганча чуқур-чуқур нафас ола бошлади. Унга ҳаво етишмаётгандек эди...

Шу маҳал дарвозахона томондан машина сигнали эшитилди. Ҳовлидаги иккита чироқ бир вақтда ёнди. Нодир ҳушёр тортиб, деразани қайта ёпди-да, ўрнига бориб яна чўзилди. Дераза олдидан бирор шип-шип қадам босиб шошилиб ўтиб кетди. Дарвоза очилиб, чироқларини баралла ёқиб олган машина ичкарига кирди. Аввал мотор овози, кейин машина чироқлари ўчди. Ҳовли тўридаги хонада болаларнинг шодон қий-чуви

кўтарилиб, тинди. Дераза ёнидан Маъруф ота ўтди. Нодир уни оёгини судраб босишидан таниди. У ҳозир дарвоза танбаланганими-йўқми, текшириб кўради. Келинлар сувни, газни ўчирганми, кўздан ўтказади. Кейин ҳовлидаги чироқларни бир-бир ўчириб чиқади. Йўл-йўлакай Нодирнинг хонасига қараб қўяди-ю, бош суқиб кирмайди. Хуллас, чол ҳамма нарсадан кўнгли хотиржам бўлгач, тинчиб, ётогига кириб кетади... Бу хонадонда ҳар куни бир хил вақтда ва бир хил тарзда такрорланадиган ҳол.

Нодир арzonроқ ижара уй излаб маҳалла оралаб юрганида биринчи бўлиб шу чолга йўлиққан эди. Сахт-сумбатидан илгари тузукроқ бир амалда бўлгани кўриниб турган бу қария бир чуваккина чол билан гаплашиб ўтирган экан. Нодир одоб билан салом бериб, чолларга яқинлашди. Мақсадини айтди. Шунда Маъруф ота уни бошдан-оёқ назаридан ўтказди-да, ичида ўзича нимагадир қаноат ҳосил қилди, шекилли, индамай ўрнидан туриб: «Бу ёққа юр-чи», – дея ҳовлисига бошлади.

Ҳовли каттагина бўлиб, ўртада тўрт-беш туп дарахт – ўрик, олма, гилослар. Ҳовли айлантириб том баравар қилиб ишком кўтарилиган. Токлар қирқилиб, ихчамлаб қўйилган. Ҳовли этагидаги уч хонали уйда чолнинг бир ўғли оиласи билан, ҳовлининг чап тарафидаги уч хонали уйда марҳум ўғлининг беваси икки боласи билан тураркан. Ўнг қўлда яна бир неча хоналар бўлиб, дарвозадан кираверишдаги бир хонада Қобил деган талаба йигитни ижарага қўйишган экан.

Чол чўнтагидан бир шода қалит чиқариб, шу хона эшигини очди. Хона каттагина, чамаси, тўққиз-ён метр, ўртага кичикроқ гилам тўшалган, икки четида бир кишилик иккита диван, эшиқдан кираверишда чап тарафда китоб ва кийим-кечакка мўлжалланган

жавонлар, жавонлар рўпарасида, хона ўртасида ёзув столи, иккита стул.

Чол Нодирга: «Хўш, қалай?» – дегандай қарашиб қилди. Қейин стол устидаги китоб-дафтарлар, эшик олдидаги пойабзаллар унинг эътиборини тортганини кўриб изоҳ берди:

– Студент бола бор (У бу вақтда йўқ эди). Бирга турасизлар, зерикмайсизлар. Бўладими?

Нодир бош иргади.

– Танишиб олайлик. Исминг?

– Нодир...

– Ҳм, Нодир, яхши... Мени Маъруф ота дейишади. Студент бола Юридик институтда ўқииди. Мана, битта калит сеники. Кўринишдан туппа-тузук оиланинг боласига ўхшайсан, умид қиласманки, бегалва яшайсан, – деди нимагадир бироз пичинг оҳангидга чол.

Уларнинг танишуви шу тарзда кечган. Илк учрашувдаёқ Нодир чолнинг ҳаётдан унча мамнун эмаслигини, шу билан бирга, сўққабошлигини пайқади.

Ўша куннинг эртасига бор кўч-кўронини кўтариб кўчиб келди бу ерга. Ҳамхонаси Юридик институтнинг иккинчи босқичида ўқиркан. Нодирга оғир ботгани, институт талабаси бўлишига қарамай, у ўзини аллақачон туман прокуроридек ҳис қиласар, гап-сўзлари, юриш-туриншида буни сездириб қўярди. Нодир ўзича: «Бу бола прокурорликни репитиция қиляпти», – деб мийигида кулиб қўярди. Унинг хатти-ҳаракатидан ўрталарида носамимий муносабат юзага келганини ҳис қилиб: «Одамзод ҳар хил бўларкан-да», – деб ҳам қўярди.

Нодир ўқиш даврида бунақа тоифа йигитчаларнинг кўпини кўрган, уларнинг бирортаси билан дўстлаша олмаган, чунки бу каби одамларнинг, аслида, мияси бўш, бўлар-бўлмас гапни валақлаб вақтнинг ҳам, одамнинг ҳам қадрига етмайди.

Нодирнинг фам-ғуссага ботган кўзларини қўрибоқ Қобил ўзича уни «ландовур»га чиқарди. Табиийки, у Нодирга қўйтган ташхисини гапирмагани билан, калта-фаҳмлиги боис кўзларида акс эттирди. Айни пайтда, Нодир ҳам буни пайқади-ю, ўзини пайқамаганга олди. Икки ойча бирга яшаган бўлишса ҳам, бир эшикдан бегонадай кириб-чиқишиди. Очилиб, «одамга ўхшаб» гаплашишмади. Асосан кечки пайт бирга бўлишар, шунда Нодир китобга щўнгир, Қобил ухласа-ухламаса диванга чўзилиб оларди. Мақсад бир-бирининг хона-далигини сезмаслик эди. Бу ҳамхоналар билан фақатгина чол қизиқарди. Ҳар ойнинг биринчи куни улар индамай ижара пулинни алоҳида-алоҳида узатишар, чол эса ҳафсала билан битта-битталаб санаб оларди.

Бунақа ҳамхоналик иккиси учун ҳам оғир эди. Нодир чидашга мажбур эди, чидади. Қобил бўлғуси прокурор сифатида бундай ҳаёт тарзини ўзига муносиб билмади. Бошқа бир қимматроқ, лекин «люкс» жой топганлиги хабарини биринчи марта сиполик қилмай, ёш болалардай мақтаб-мақтаниб айтди-да, чиқиб кетди. Мана шундан бери Нодир ёлғиз яшайди. Ижара истаб келганлар учрамаяпти, шекилли, чолнинг ўзи дам-бадам: «Бирорта ҳамхона топсанг яхши бўларди, ёлғизлик яхши эмас», – деб Нодирга шама қилиб қўяди. Бунинг устига, Нодирнинг ўзи ҳам уч ойдан бери ижара пули тўлолмайди. Олдинига чол ҳар эрта кириб, қисталанг қилиб кўрди. Нодир қизариб-бўзариб: «Ишга кириб олай, биринчи ойлигимдан ҳаммасини узаман», – деб сўз беришдан нарига ўтмади. Чол тергов қилаверишдан чарчади, шекилли, кейинги пайтлар уни ҳадеб йўқлайвермади. Лекин бу тинчликнинг яқинда бир портлаши борлигини Нодир яхши билади. Бугун эрталаб кўча эшигига дуч келиб қолганида саломига зўрга бош иргаб қўйгани, ажин босган баша-

раси бир тиришиб олгани ҳам бежизга эмас. Чолнинг сабри тугаб боряпти. Ишқилиб, яна кўчада қолмаса гўрга эди. Неча кундан бери елкаси қисилиб, уйга бекитиқча кириб-чиқиб юрганди. Уйдан чиқиш олдидан кийиниб оларди-да, деразадан ҳовлини кузатар, чол кўринмаса, шоша-пиша эшикни қулфлаб, ташқарига отиларди. Бугун фалокати қисиб, дуч келиб қолганини қаранг. Баъзида: «Чолнинг ўзи ҳам афтимни кўришни истамай қўйди, шекилли», – деб ўйлаб қолар, аммо, барибир, қай бир деразадан унинг кириб-чиқишини кузатиб тургандай туюларди унга.

Эҳ, нима қиласаки, қўлига озроқ пул тушса!.. Ҳалим чол инсофли экан. Бошқа одам бўлганида аллақачон ковушини тўғрилаб қўйган бўларди. Ижара-ма-ижара юравериб кўрди-ку. «Чироқни кўп ёқманг, сувни, газни тежанг, булатнинг ҳаммаси пулга ишлайди, акаси», – деб нафас олдирмайдиганларга ҳам йўлиқди. Уларнинг олдида Маъруф отанинг бошидан сув айлантириб ичса арзиди. Ҳали бир кун албатта уни хурсанд қилади. Фақат ёмон хаёлларга бориб юрмаган бўлсин-да. «Йўқ, Маъруф ота, сиз унақа ўйламанг, мен номард эмасман. Ҳеч қачон, ҳеч ерга қочиб кетмайман. Ишонинг!.. Эрта бир кун ишларим ўнгланиб кетса, Худо хохласа, бу яхшиликларингизни қайтараман. Айтишади-ку ойнинг ўн беши қоронги бўлса, ўн беши ёруг дея. Начора, қоронгида қолдим. Фақат озроқ сабр қилинг. Озроқ. Қўлимга пул тушиши билан биринчи сизнинг қарзингизни узаман...»

Нодир хаёлан Маъруф ота билан сўзлашаркан, беихтиёр унга ҳаваси келди. Унга мазза-да. Ишламаса ҳам, ой сайин келиб турадиган беминнат нафақаси, бошида бошпанаси бор...

Нодир ётган еридан туриб, дераза олдига келди. Ташқарига қулоқ солди. Тик этган товуш йўқ. Чироқ-

лар ўчган. Ҳеч қандай шарпа сезилмади. Негадир ҳовлига чиққиси келди. Эшикни секин очиб, ташқарига чиқди-да, чиқсан ерида пиллапояга ўтиреди. Ёмғирдан сўнг ҳаво салқин ва тоза эди. Чуқур-чуқур нафас олди. Ҳовлига разм солди. Осудалик. Ҳатто ҳалигина шамол-тўполонда ҳаловатсизланган қари кўпакнинг ҳам саси чиқмайди. Ҳамма оромда. Фақат биргина у... Унинг юрагида ҳамон тўс-тўполон давом этяпти. Ҳаловати йўқ. Ҳаммасига сабаб биргина пулсизлик, шундайми?.. Бўлмасам-чи! Агар пули бўлганида, елкаси қисилармиди, кап-катта йигит бекиниб-биқиниб юармиди?!.

Бошини чангаллади. Кўзларини қаттиқ юмди: нима қиласин?! Шу тарзда қанча ўтирганини билмайди. Бир маҳал елкасига бирор туртгандай бўлдию чўчиб кўзи ни очди. Қараса, Маъруф ота. Шаҳд ўрнидан турди.

– Ассалому алайкум!

– Нима қилиб ўтирибсан ярим кечаси, бирон жоининг оғрияптими? – деди чол юмшоқлик билан.

– Йў-ўқ... Шунчаки, уйқум келмади. – У шундай деди-да, гўё энг яқин кишисини учратган каби биратўла очиқласига гапириб юборди. – Очифи, юрагим сиқилиб кетди, Маъруф ота. Нима қиларимни билмай қолдим. Иш сўраб кирмаган эшигим, қарз сўрамаган танишим қолмади. Ҳудди ҳамма мендан юз ўтиргандек... қашшоқлик, йўқчилик одамни хароб қилар экан. Нима қилай, кундан-кунга ижара қарзим ҳам кўпайиб бормоқда. Лекин кўнглингиз тўқ бўлсин, қўлимга пул тушиши билан қарзингизни узаман.

Чол Нодирни дикқат билан эшигти ва ажиндан осилиб кетган бўйни билан иягини силаб:

– Ёшлик ўзи шунаقا, бетоқатлик, сабрсизлик, боши берк кўчалари кўп... – деди ўйчан оҳангда. – Жавобсиз саволлар, жумбоқ воқеалар, адоги кўринмайдиган ор-

зулар, изтироблар... Аммо, барибир, ёшликка ҳеч нарса тенг келмайди...

Чол Нодирнинг ёнига пиллапояга чўккалади.

– Э, бунақанги ёшликнинг кимга кераги бор, Маъруф ота? Ишлайман десанг, иш йўқ. Тўрт-беш сўм жамғармам бўлганида ҳам, балки, арzonроқ жойдан бирон нарса олиб, бошқа жойда қимматроққа сотиб бир кунимни кўрармидим. Билмадим. Одамлар нимадир қилишмоқда-ку. Аслида, менга кўп нарса керак эмас. Истагим оддийгина: ҳеч кимдан қарз бўлмаслик, ҳеч кимдан қарз сўрамаслик, яна, камтаргина оиласм бўлса бас. Кейин онам соғайса... Ҳозирги ҳолатимда эса саҳрода бир ҳовучгина сувга муҳтоҷ бўлиб ётган бутага ўхшайман. Нимаики қилисам, хато бўлиб чиқяпти. Ота-онам бутун умр тиклаган иморатни сотиб, онамни даволатмоқчи, қолганига эса шаҳардан кичкинагина ҳовлича олмоқчи эдим. Эс-ҳушли одам замон алғов-далғов пайтида ҳовли сотадими? Мана, нима бўлди, бутун бошли иморатнинг пули кулга айланди... Онам бечора жиннихонада таги йўқ бочкани сувга тўлдириш билан овора. Тоғни урса талқон қиладиган мендек ўғли биттагина қорнини тўйдиролмайдиган нотавон бўлиб ўтирибди. Эҳ, Маъруф ота, сиз ёшликни ҳеч нарсага тенглаштириб бўлмайди дейсиз, қани, айтинг-чи, кимга керак бунақанги ёшлик?!

Чол йигитчани бироз чалғитиши мақсадида ўтган умридан у-бу воқеаларни гапириб берди. Гап орасида узоқ йиллар турли вилоятларда прокурор бўлиб ишлаб, бутун умр қонунни ҳимоя қилгани, юксак гояларни деб баъзида тўғри, баъзида нотўғри яшаб, мана шу ёшга кириб қўйгани, бироқ танаси қариб тўкилиб бораётганига қарамай, юраги ўша-ўша, ҳеч бир қариликни тан олмаслигини айтди. Қун келиб ҳаммаси

изга тушишини, лекин чолда бундай ҳолат бўлмаслигини, кундан-кунга қариб-чириб боравериши эвазига ўлимликларини тайёрлаб, ўғлига охирги вақтларда тез-тез бир куни жони чикса, қабристоннинг қаерига қўмишни васият қилаётганлигини айтиб:

– Кўряпсанми иккимизнинг ўртамиздаги фарқни?  
– деди.

Аммо бу гаплардан ҳам Нодирни кайфияти ўзгарамай:

– Иккимизни солиширадиган бўлсак, аҳволингиз, барибир, меникидан тузукроқ. Қорин ғамини ўйла-майсиз, қарзини тўламасам, кўчада қолиб кетаман деб қайғурмайсиз. Иссиққина тўшагингиз, атрофингизда яқинларингиз бор, ўлим хавфи бўлгани билан, яшаш имкониятларингиз кенг, – деди.

Чол ўрнидан турди, унга диққат билан тикилди. Қоронфида аниқ кўринмаса-да, Нодир унинг кўзларида ҳамдардона бир ифодани пайқади.

– Ҳар бир авлоднинг ўз фожиаси бор, – деди у тасалли оҳангидা. – Кучли одам сабрни билади, ўлиб қолмагунча ҳаракатдан тўхтамайди, ўғлим. Ўтиш даври вақтинчалик. Қўрмагандай бўлиб кетасан, баъзида инсон матонати шундай жараёнларда тобланади. Албатта, бундай вазиятларда у куч тўплайди. Вақти келиб ожизликдан ҳазар қилади. Биласанми, мен жиноятчилар орасида шундай тоифадаги одамларни учратдим. Улар баъзан тақдир тақозоси билан, баъзан эса адашиб жиноятга аралашиб қолишади. Вақтинчалик турмага тушишлари билан бутун ўтган умрини нуқта-вергулигача ўйлаб чиқишади. Шу йўл билан улар ақлларини чархлашади. Қамоқдан чиқишлари билан ҳаётларини тубдан ўзгартиришади. Қамоқ югуриб кетаётган одамни тўхтатиб, ҳаётнинг моҳиятини очади. Бу тоифадаги одамлар турмага қайтишмайди.

Турмадан қутулишлари билан унгача эришмаган на-  
тижаларига қамоқдан кейин эришишади.

Шу ерда Нодир онасининг қамоқ билан боғлиқ тақ-  
дирини гапириб берди. Чолнинг Нодирга раҳми кел-  
ди, аҳволи анча мураккаб эканлигини, бу вазиятдан  
қутулиши учун кутилмаганды учрайдиган омад ёки  
кимнингдир четдан озроқ таянчи кераклигини англа-  
ди. Шунда ҳам чол дунёда ҳеч бир мўъжиза вақтни  
орқага қайтаролмаслигига имони комиллиги учун:

– Ҳали қўрасан, кунларинг оғирлигига қарамай,  
хотирангнинг бурчак-бурчакларида фақат ёшлигинг  
қолади. Яхшиси, ҳозир ҳеч нарсани ўйлама, кириб  
ухла! – деди-да, оёғини судраб босиб ўз хонаси томон  
кетди...

\*\*\*

Маъруф ота узоқ йиллар турли вилоятларда бош  
прокурор бўлиб, охирги дамларгача одамларни қонун-  
га бўйсунишга мажбур қилди. Исбот-далиллар билан  
айбини тан олмайдиган жиноятчиларнинг айбини бўй-  
нига қўйиб, уни турли йўллар билан оқлашга ҳаракат  
қиладиган адвокатлар билан эртадан-кечгача олишди.  
Балки, чол ўтган даврда қонунни ҳамма нарсадан уст-  
тун қўйиб, кимларгадир жабр қилгандир, бироқ ар-  
зимаган сабаб билан имкон пайдо бўлганида бирорни  
қасдан турмага тиқмади. Судьядан кимгадир кам-  
роқ жазо талаб қилиб пора олгандир, пул, машина,  
кўнглига ўтирган аёллар билан айш-ишратга берил-  
гандир, дунёning номи чиққан курортларида дам ол-  
гандир, бироқ имкон даражасида одамийлик чегара-  
сидан четта чиқмасликка ҳаракат қилди. Гоҳида бу  
чегарадан ўтган кишилар даврасида ранг-қути ўчиб  
жимгина ўтирди. Сабаби, у бошқача яшашни билмас,

бу давралардан ўзини четта тортиши ўтирган курсисини йўқотиш дегани эди, яъни бир қусури – у фақат ўзини ўйлайдиган худбин эди. У бу қусурни йиллар давомида орттирдими ёки наслдан-наслга ўтганми, нима бўлганда ҳам, чол бу камчилигини билади, аммо тузатишни истамайди. Чунки бу қусури билан қулоғи тинч, кўзлари ортиқча фалвани кўрмайди. Ҳозир ёши саксондан ошганига қарамай, ақли тиниқ, ҳамон фақат ўз фойдасини ўйлайди. Лекин жойи келганда раҳмдиллиги тутиб кетса, қон-қариндоши у ёқда турсин, етти ёт одамларга ҳам ҳотамтойлик қила олади. Ҳуллас, ўтган умрида яхшими-ёмонми ўз бурчини адо этди. Нафақага чиқиши билан ўзига ўзи: «Етар, бас! Қора қаргалар орасидаги оқ қарғага ўхшаб қонунни ҳимоя қилиш жонимга тегди», – дея, катталар ҳай-ҳайлаганига қарамай, ишдан кетди. Бироқ айби бўла туриб ўзини оқлашга уринадиган тоифадаги одамлар билан олишавериш қонига сингиб кетган экан. Нафақага чиққани билан, ҳар қадамда бундай тоифадаги одамлар учрайверади. «Намунча буларнинг сафи кенг бўймаса?» – дея гоҳида хўрсинар, гоҳида гап талашиб ҳам қоларди. Шундай пайтларда дили оғриб, «Одамзод ўз айбини ҳар доим ҳам кўрмайди, аянчлиси, кўриб турган кишини сезиб қолса ёқтирмай қолади» деган қарорга келиб ўзини улардан панага оладиган одат чиқарганди. Баъзида ўғли билан ҳам оддийгина нарса устида тортишиб қолса, ўғли ноҳақлигини била туриб айбини хаспўшлай бошласа, чол тутақиб, ўзини босолмай қолар, ўғли эса отасининг арзимаган нарсага бақиришидан юраги безиллаб қолганидан: «Биласизку, одатдагидек, айборман», – дер, чол эса, аслида, бу жавобдан ҳам кўнгли тўлмаса-да, «Шундай экан, ишончли фактларни гапир, қароримни ўзгартирай», – демай, бирдан юмшаб, «ҳммм» деганча қолар, заҳри-

ни баъзида ичига ютарди. Баъзан эса: «Одамзоднинг ҳаммаси бир гўр: ўзинг тарбиялаган ҳам, бегонала-ри ҳам», – дея барчасига қўйл силтарди. Бу феълини билган келинлари ҳам унинг олдида тўғрисўз бўлишга интилишар ва қарияни бўлар-бўлмасга безовта қил-масликка уринишарди. Аммо ҳамма оиласалардаги син-гари уникида ҳам тез-тез нималардир содир бўларди. Ўша учун чол турмуш икир-чикирларини деб бола-ларининг ишига аралашмаслик, яъни уларнинг ҳам, ўзининг ҳам кўнглини вайрон қилмаслик мақсадида охирги вақтларда янада худбинлашганди.

Хотинининг ўлимидан сўнг ҳам ёлғизлики ёмон кўришига қарамай: «Қариган чоғимда хотин зоти билан гижиллашиб куним ўтганидан ёлғизликда сиқилиб ўлганим маъқул», – дея сўққабошликни афзал билди.

Хотини... гарчи ҳеч қачон ўзига айтмаган бўлса-да, жуда чиройли, нафис чеҳра, пайваста қош, айни пайтда, камсуқум, мулоийимгина бир аёл эди. Энг му-ҳими, Маъруф Заировичга энг маъқул келган фа-зилати, хотини уни тергамас, ишларига аралашмас, унга ишонар ёки ишонгандай тутарди ўзини. Қўли узун, имкони чексиз бўлганидан кўнгли тусаган ишни қилишга ўзини ҳақли деб билди. Ҳозирги ақли билан оиласада ўзини шундай тутишига аёлининг ўзи сабаб-чи дейди. Аёл эрининг олдида ҳақлигини, шаънини доноларча ҳимоя қила олиши керак. Табиатан ҳам-ма эркак хотини миқ этмай амрига буйсунишини ис-тайди. Афсуски, эркакнинг истаги ҳамиша ҳам тўғри бўлмаслиги мумкин. Ҳамма буйруққа бўйсунадиган хотин эса хотин эмас, қулдек гап. Ана шунинг учун соғлом ақлга эга эр-хотинлар орасидаги баъзан маш-машалар, келишмовчиликлар оқибатидаadolat таро-зиси тикланади. Яъни, бир текисда томчилайдиган сув темирни емирганидек, эркак ҳар сафар хотинининг

ақлига қойил қола бошласа, ўз-ўзидан у билан кенгашади. Үнга нисбатан ишонч ва таянч ҳислари пайдо бўлади. Оилада эр эр, хотин хотин ўрнида қолади. Натижада эр «эрман» дея аёлининг чегарасини босиб ўтишга ҳадди сифмайди. Чол ана шундай ўткир, доно аёлни орзу қилгани учунми ёки хотини уни йўқотиб қўйишни истамай, эрига қарши чиқмадими, хуллас, у билан ўтган бутун ҳаётидан қониқмади. Бироқ иши юзасидан ҳеч нарсадан тап тортмайдиган, «мен»ини ҳамма нарсадан устун қўядиган аёлларни кўраверганидан хотинининг: «Сиз нима десангиз шу», – дея бутун тақдирини унинг қўлига ташлаб қўйганига ҳам бора-бора кўникди. Гоҳ-гоҳида юраги сиқилиб, уйга келганида у истаган овқатни қилиб кутиб ўтирганини кўрса, «Барака топқур, сенда ҳам фантазия борми? Бир менинг кўзим билан яшаш жонингга тегмадими? Зерикмадингми!?» – дея қичқириб юборарди. Шунда ҳам хотини миқ этмасди. Кейин эса ёлғиз қолганида «Эр-хотин орасидаги тортишувлар ҳам бир текис ҳаётда унутила бошлаган муҳаббат ҳиссини уйғотса керак» деган хulosага келарди. Аммо хотини эрининг қалбидан нималар кечаётганини билмас, тинч-тотув ҳаёт кечирад, чол эса хотинга уйидаги кераксиз, лекин ташлаб юборишга кўзи қиймайдиган буюмга қарагандек қааради.

Кутилмаганда хотини ўлиб бердию кўзи ярқ этиб очилди. Уни телбаларча севишини, айниқса, кейинги йиллар унга суяниб яшаганини, энди эса суянчиқсиз қолганини англаб етди. Назарида, бу ноҳақлик эди. Хотини ўлмаслиги керак эди. Уйда ўтирди, жонини қийнаб бирон жойда ишламади, фақат икки боласини ўйлади. Унинг бор-йўқ дунёси болалари эди. Уни фарзанд доги, тўнгичининг ўлими адo қилди. Маъруф чолга эса балоям урмади...

«... Аслида, мен ўлишим керак әди. Нега у ўлди? У покиза әди, ҳалол әди. Менга ўхшаб пул, мансаб орқасидан қувиб, ёққан-ёқмаган одамлар билан муроса қилишга мажбур әмасди. Ёлғон-яшиқ қалтис ишларга аралашмасди. Бир умр менинг соямда тинчгина намозини ўқиб юрган одам худди бир қултум сувни ютгандек осонгина ҳаммасига қўл силтаб кетворса... Бу – ноҳақлик...»

Маъруф чол шу тарзда ўзи билан ўзи олишиб, ичичидан эзилиб юраркан, олдинига хотини билан бирга тушган суратларига тикилиб, у билан гаплашадиган одат чиқарди. Кейинроқ эса суратларсиз ҳам, хонада ёлғиз қолдими, у билан гаплашаверадиган бўлди. Гаплашганда ҳам... гоҳида жиғибийрони чиқиб, у билан фижиллашиб кетар, «Ўттиз уч йил бирга яшаб ҳам тушунмадинг, ўлганингдан кейин ҳам тушунмаганингни қара», – деганча бақириб-чақириб қоларди... Ҳозир эса, ярим тунда, Нодир билан ҳовлида анча гаплашган бўлди-да, кейин узлатхонасига чекинди. Эшикдан кириши билан тўғри аёлининг деворга осиғлиқ сурати олдига борди.

– Бу йигитчага қандай ёрдам беришимни истайсан?  
– деди чол ўзига синовчан нигоҳ билан қараб турган хотинига. – Биласан, одам ажратада оламан. Сезгиларим жуда ўткир. Гапнинг индаллоси, йигитча бир таянчга муҳтоҷ. Э, бунақангидан олатасир замонда ҳаммага таянч зарур, бироқ йигитчанини яна ҳам мушкуроқ... Бекордан-бекорга ўтиш даври дейилмайди-да. Начора? Шунақа дейман-у, бизга енгилмиди? Партия деган бир бало нафас олгани қўймасди-ку. Ҳаммани бир қозонга солиб қайнатди-ку. Ҳозир-чи дейсанми, ҳозир... бирорвга қарасанг, қашшоқлигидан битини сотишга тайёр, бошқасига қарасанг, кекирдагигача бойликка ботган. Бойлигини қўйгани жой тополмайди. Ёшлар

ўртада сарсон. Нима истайсан, капитализм. Инсоннинг зигирча қадри йўқ... Мантиқан ўйласанг, ҳеч бир замонда инсоннинг қадри бўлмаган, бўлмайди ҳам. Фақат ўзи ўзининг қадрига етиши, ҳар бир қадамини назоратидан чиқармаслиги керак... Акс ҳолда, учраган одам уни янчиди ўтиб кетаверади. Ачинарлиси, ҳамма замонларда жамият, тизим ўзгаришидан халқ зиён кўради. Зиёли қатлам боши берк кўчага кириб қолади ёки иккинчи бир тузумнинг зулми остида қирилиб кетади. Биласан, ўтган аср бошидаги йўқсиллар «инқиlob»и даврида шундай бўлди-ку. Озиқ-овқат етишмаслигидан одамлар арпа, ўт еб шишиб ўлишган. Имло таниган, уч-тўртта китоб кўрган борки тазийиқ-қа учради. Улгургани қочиб қутулди, сенинг отангга ўхшаганлар азза-базза халқ душманига айланиб қолишиди-ку. Қанчаси отилди, гадойтопмас ерларга сургун қилинди. ... Ҳа, хотин, ҳаёт мураккаб, Навоийми, қайси бири айтган экан юз йил яшаш учун юз йил сабр қилиш керак деб. Сен жонингни қутқариб кетдинг, қийин-қийин, менга қийин, ёлғиз ўзим сўппайиб қолдим...

Чол оёқда тураверганидан толиқди, шекилли, портрет рўпарасидаги тебранма курсига ўтирганча кўзларини юмди.

Нима бўлди-ю, ҳалигина Нодир билан қилган суҳбатда унинг бир жумласи лоп әтиб ёдига тушди: «Э, бунақанги ёшликтининг менга кераги йўқ, Маъруф ота!..»

– Тўхтаб тур, йигитча. Сенинг бир адабингни бермасам. Агар гапинг чин бўлса, ўрнимга бир ўтириб кўр. Ҷейин гапларимнинг маъносини тушунасан. Ҳозир нима десам ҳам, барибир, кўнглингни кўтара олмадим, айтган сўзларим қалбингга етиб бормади. Тананг тўкилиб, атрофингда тенгдошларинг қолмаса, ёши улуғ

киши борки бирма-бир дунёдан кўз юмиб кетаверса, «Навбатим келиб қолди», – дея қўрқувда юрак ҳовучлаб яшаш олдида сенинг муаммоларинг бир чаҳага арзимаслигини тушуниб етмадинг. Бу ичимлик агар таъсир қилиши рост бўлса, кўп эмас, бир-икки ой ўрин алмашиб қўрайлик, кейин аҳволингни кўраман. Инсон психологияси ўзи шунаقا, борига чидамайди, йўғини орзу қиласди.

Шундай дея Маъруф чол беихтиёр эсига тушган нарсадан завқланиб ўрнидан туриб кетди. Миясига келган фикрдан танасига куч кирдими, ҳалиги маҳзунлигидан асар ҳам қолмади.

У тўғри бориб, китоб жавони тортмалардан бирини очди, ундан жажжи сандиқчани олди. Шарқона ўймакорлик билан ишлов берилган бу сандиқчани бир вақтлар Эрондан олиб келган эди. Сандиқчани стол устига қўйди-да, ундан кичкинагина шиша идишни олди. Тунчироқ ёруfiga солиб, қорамтири шиша чани диққат билан кўздан кечирди. Маъруф ота ичадиган ҳар бир дори таркибини аввал ўқиб, сўнг ичишга одатлангани учун шиша атрофидан бирон-бир ёзув бормикан дея хира кўзлари билан текшириб, ҳеч нарсани кўрмагач кўзойнагини тақди. Бу ҳам чолга камлик қиласди, шекилли, дераза ёнидаги лупага ҳам солиб кўрди. Ҳеч қандай ёзув йўқ. Кейин қопқоғини очиб, бурнига яқинлаштириди. Ҳеч қандай ҳид сезмади. Оғзини қайта беркитиб, стол устига қўйди, ўзи эса тебранма ўтиргичга чўкканча кўзларини юмиб бу сирли шишача қандай унинг мулкига айланиб қолганини эслади...

Бу идишни чолга кекса бир чўпон берган эди. Чўпоннинг яккаю ёлғиз ўғли машинасида кўчада бир маст одамни уриб кетиб ўзи касалхонага кўтариб олиб борган, лекин ҳалиги одам касалхонада икки кун ётиб оламдан ўтган эди. Суд бўлишидан бир соат олдин чў-

пон тўғри чолнинг олдига бостириб кириб, пули борлигини, фақат ўғлига енгилроқ жазо сўраса, истаганини беришини айтди. Чол эса содда чўпонни пора беришда айблаб: «Ўзингни ҳам ўғлингнинг ёнида қаматиб юборраман», – дея дағдаға билан хонасидан чиқарип юборди. Суддан ўлган кишининг хотинининг талаби билан чўпоннинг ўғлини қаматмай, унинг икки норасидасини то вояга етгунича қарамогига олишини сўради.

Суд тугагач, яна чўпон чолнинг хонасига киришга муюссар бўлди. У бу сафар гап бошлишдан чўчиб стол устига мана шу шишаҷани қўйди. «Хоҳ ишонинг, хоҳ ишонманг, идишдаги суюқликни қари билан ёш йигит бир вақтда ичса, ўринлари алмашиб қолади. Қари одам ёшнинг, ёш йигит кекса одамнинг танасига кириб қолади. Шарти, бу алмашишга икки томон ҳам бирдай рози бўлиши керак. Акс ҳолда мўъжиза рўй бермайди», – деди.

Ўшанда Маъруф Заирович навқирон ёшда, шаҳди баланд пайти эмасми, чолнинг гапларидан кулди, холос.

Чўпон эса самимий ва миннатдор бир қарашиб билан: «Прокурор, буни менга отам ўлими олдидан васият қилиб қолдирган. Бу суюқлик ҳақиқатдан ўз кучига әгами, эга эмасми, буни синаб кўрмаганман, аммо шишаҷадаги суюқлик ўғлимдек ҳамма нарсадан қадрронроқ. Сиз менга бир қадрдонимни қайтариб бердингиз, мен эса сизга иккинчи бир қадрдонимни совфа қилмоқдаман. Илтимос, олинг. Ишонмаслигингизни кўриб турибман, ақли-ҳуши жойида бўлган одам бунақангига гап-сўзларга ишонмайди. Аммо табиатнинг, дунёнинг ўзи мўъжиза, шу боис ишониб, шу кунгача сақладим, қолгани сизнинг ишингиз», – дея шишаҷани стол устида қолдириб чиқиб кетди. Одамзод бундай вазиятларда ёлғон гапирмаслигини билгани учун чол чўпон

хонани тарқ этиши билан юрагида пайдо бўлган телба бир умид билан шишачага тикилди. Бу ҳақда у бирон марта бировга гапирмади, лекин юрагидаги бир сирга айланганди. Яқингинада нимадир излаб ҳад-ҳисоби йўқ ҳадя-совғаларни титиб ўтириб шишачани топиб олган, «Бу суюқлик сирлигича қолди-да», – дея яна сандиқчасига жойлаб қўйиган эди.

Мана, вақти келди. Бўлди, дорини синаб кўради. Нодир Маъруф отани қариб мияси айниб қолибди дея ўйлайди, холос. Йўқотадиган ҳеч нарсаси йўқ. Синаб кўрсин, зора...

Чол деразага қаради, ҳали тонг ёришмаган, олдидаги соат миллари эса тонгти тўртдан ошаётганини кўрсатарди.

«Ҳа... қариб қолдим. Маҳаллада мен тенгилар қолмади. Саксон олти ёш. Ёшлиқда бунақа ёшга киргандилар ҳақида эшитиб қолсам, «Эҳ-ҳе, шунча йил яшабдими?» – деб ҳайратга тушардим. Узундан-узоқ бўлиб кўринарди... Энди бўлса сал кам тўқсонни уриб қўйибман-у, ҳеч қанча яшамагандайман. Кўз очиб-юмгунча ўтиб кетгандай... Умуман, ўлим ёш билан қарига бир хил. Фарқи биргина: ёш кутмай ўлади, қари эса кутади. Ана шулар орасида осмон билан ерча фарқ бор. Ҳозир техника ривожланиб, она қорнидаги митти юракчани аниқлаб олишмоқда. Агарда Худойим бандаларига жончиқар вақтини билдириб қўйса борми... Билмадим, бу яхшилик аломати эмас. Қолаверса, ҳокимиятни ушлаб турганлар ҳам, олимлардан биронтаси аниқлай олса-да, бу сирни ошкор қилдирмаса керак. Киши ўзининг охирги кунини билмагани тузук. Агарда билса чала-ярим ишларимни битказиб олай ёки яшаб қолай ё бўлмаса улгуриб қолай деб ўйламай-нетмай нималар қилиб қўйиши мумкин. Айтайлик, нимадандир, кимдандир аламзада

бўлса, аламим ўзим билан кетмасин деб... Агар оддий одам бўлса-ку, хўп-хўп, катта бир қудратли давлат раҳбари бўлса-чи, унинг аламзадалик билан қилган иши инсониятга қанчалар зарар етказиши мумкин?.. Уф!.. Нималар устида бош қотириб ётибман-а? Миям ғовлаб кетди. Очиқ ҳавога чиқмасам бўлмас. Бу кеча уйқуниям мазаси бўлмади. Ҳа, зарари йўқ, ҳали кўп ухлайман. «Ўлим, бу – қаттиқ уйқу», – деган экан биттаси... Ҳаммаси жонга тегди, эшикка тезроқ чиқмасам бўлмайди...»

Чиқди. Жимжитлик. Осмонга қаради, юлдузлар кўзга чалинмади. Ҳаво булут, симиллаб ёмғир ёғаётган экан. Аввал оқшомги шаррос ёмғирдан сўнг қаттиқ шамол булатларни ҳайдаб кетган эди. Энди яна... Баҳор-да...

Ёмғир остида бироз турди. Болалигида яхши кўрарди ёмғирда шалаббо бўлиб юришни. Баҳор ёмғирларини, кейин эрта кузда соғинтириб-соғинтириб ёқ-қан дастлабки ёмғирларни жуда ёқтиарди. «Мабодо мўъжиза рўй бериб, йигитта айланиб қолсам, йигитча мункиллаб қолса-я, иккимиз ҳам бу мўъжизани миямизга сифдира олмай ақлдан озиб қолмасмикинмиз?.. Ўғлим иккимизни ҳам Нодирнинг онасининг ёнига олиб бориб қўяди-ку. Нодирга шифокорлар: «Наслдан-наслга ўтган», – дея ташхис қўйса, менга: «Қариб, мияси суюлиб қолган», – дейишади, холос. Йўқ-йўқ. Қари бўлсан ҳам, ақлим тиниқ. Шошиб қолишим аниқ. Лекин, шундай бўлса ҳам, оддий кўз билан яшаш услубимизни ўзгартирдик деб қарашимиз керак ё ақлимиз ҳам зарар кўтармикан?.. Тўғри-да, оғини зўрга судраб юрган одам бирданига қони гупуриб турган йигитта айланиб қолса!..» – дея чол ортиқ кутишни истамай, тонг гира-шира ёришиши билан Нодирнинг эшиги томонга юрди.

Эшикни тақиллатди. Жавоб бўлмади. Маст уйқуда бўлса керак-да, эҳ, ёшликнинг садағаси кетсанг арзийди. Шунча муаммо-ташвиш билан ҳам қотиб ухлаб ётиби. У бўлса туни бўйи ухламай юриб чиқди. Эшикни бу сафар қаттиқроқ тақиллатди. Ичкарида эски диван гичири эштилди ва оstonада мурдоги тарқамаган, ажабланиб қараб турган Нодир пайдо бўлди.

– Маъруф ота, тинчликми?

– Юр бу ёққа! Гап бор...

Чол шундай дея орқасига қайтди. Нодир ҳовли юзидаги кранда юзини чайиб олди-да, дастрўмолига артинганча чолнинг хира ёритилган хонасига қараб юрди.

Нодир ичкари кириши билан чол унга ошхона томонга ўт дегандай ишора қилди-да, ўзи эшикни очиб, ҳовлини кузатди. Ҳамма қаттиқ уйқуда эканига ишонч ҳосил қилгач Нодирнинг орқасидан ошхонага кирди. Ҳеч нарсага тушунмай, анграйиб турган Нодирга ўтири деган ишора қилди-да, чўнтағидаги шишачани стол устига қўйиб, стулларнинг бирига чўкди.

– Ширин уйқунгни бузганим ёқмади, а? Бир фикр пайдо бўлди. Ортиқ кута олмадим, қолаверса, болаларим ҳаммаси уйқуда. Ҳеч ким бизга халақит бермайди, – деди ундан кўз узмай ажабсиниб тикилиб турган Нодирга. – Ҳозир бир гап айтаман, баттар ажабланасан, бу чол миясини еб қўйибди дейсан. Майли, нима десанг, қандай ўйласанг, ихтиёргинг.

Чол шиша идишни столга қўйиб, йигитга оғзини очиб қаради. Унинг оғзида қоплама тишлари йўқ эди, Нодир уни бу ҳолатда биринчи марта кўриб турганди, гапираётган гаплари ҳам тушунарсизроқ, кўриниши ҳам қарироқ эди.

– Айтишларича, бу шишадаги суюқлик бирпасда йигитни чолга, чолни йигитта айлантириб қўядиган

кучга эга экан, – деди чол, сўнг гапим қандай таъсир қиларкан дегандек тикилди.

Улар жуда бир-бирларига яқин ўтиришар ва бир-бирларининг нафас олишини ҳам эшитишарди. Нодирнинг уйқусираб турган юзида чолнинг гапини инкор қиласидиган нимадир ярқ этди. Аммо фаросатли йигит бўлгани учун чолнинг кўнглини оғритмай вазиятдан қутулиш мақсадида носамимий қулимсиради. Чол эса бўш келмай гапида давом этди:

– Биздан нима кетди? Бу ҳам бир яшашнинг турида. Агарда ҳақиқатдан мўъжиза содир бўлса бўлди, содир бўлмаса ҳам, ҳеч нарса йўқотмаймиз. Мабодо содир бўладиган бўлса, иккимизгаям яхши бўлади. Мен қарилик балосидан қутуламан, сен қарздорлик балосидан. Моли дунёим борича сенга ўтади. Кейин бу ерда мажбурийлик йўқ, икки тараф ҳам ич-ичидан бирдай рози бўлиши керак. Кўриб турибман, йўқсиллик суюк-суюгингдан ўтиб кетган. Мен бўлсам умримнинг охирида яна бир ёшликни ҳис қилиб кўраман. Пул, машина, уй-жой – ҳамма-ҳаммаси сеники.

Нодир ғалати бу битимдан миясига тузукроқ бир фикр келмай, жим турганим маъқул дея миқ этмади. Чол эса буни ўзича тушуниб:

– Ташқи кўринишим ўзгаргани билан, тажрибам ўзим билан қолса керак. Пул қаердан ва қандай топиши мен учун ҳеч гапмас. Қолаверса, ўтиш даврини бир марта бошимдан кечириб бўлганман... Хуллас, ортиқча гапирмай, ўзим ҳам сенга ўхшаб шубҳадаман, – деди.

Шундан кейингина Нодир, ҳар тугул, бутунлай ақлдан озмабди дея чуқур бир нафас олиб:

– Аҳволимни билиб, устимдан куляпсизми ё калака қиляпсизми? – деди хафа бўлган оҳангда.

Маъруф ота Нодирнинг вазиятини тушуниб тургани ва бошқача жавобни ҳам кутмагани учун ўзининг

эшиттган қулоқ ишонмайдиган гапни гапираётганига иқрор бўлиб айбдорларча елка қисди, холос. Унинг оддийтина бу хатти-ҳаракатидан Нодир чол чин дилдан гапираётганини тушунди. Нафасини ростлади. Тонг-саҳарда эшикни тақиллатиб келишини, етти ухлаб тушига кирмайдиган таклифини нима деб ўйлаш мумкин... ёки туни билан ухламай ақлдан озадиган дарражадаги бирон-бир фантастик кино кўрдимикан?

– Ҳм, мен ҳам сенга ўхшаб мўъжизаларга ишонмайман; бу ҳақда бирровга айтмаганман. Чунки ўзиммам ишонмаганман. Оддийтина тушунтиурсам, бу сирни ўзим билан қабрга олиб кетишим мумкин эди. Бироқ жойи тўғри келиб қолди. Сенга ёрилдим. Истасанг, синаб кўрамиз. Истамасанг, шу ҳолида қолдиррамиз. Биласан. Ўтган умримда оддий ишларда ишламаганман. Шишани берган киши тоғда бир чўпон бўлгани билан, шишани қолдирган чоғидаёқ қалбимда телба бир ишонч уйғонганди. Ана шунинг учун уни шу кунгача сақлаб келдим, бирровга бу ҳақда оғиз очмагандим. Кечаки бир-бирилизга юрагимизни ёриб гапирганимиздагина илинж пайдо бўлди. Балки, ўлганимдан сўнг болаларим дори-дармонларимга қўшиб ахлатта ирғитиб юборишлари мумкин эди. Кел, ўғлим, сенам ўзингни ишонтири. Бир ичиб кўрайлик, зора, манави нарсанинг сири очилса. Хўш, нима дейсан?.. Фақат ўрнимда бўлиб қолишини чин дилдан исташинг керак, холос...

Нодир бир шишачага, бир чолга қараб «Мендан нима кетди, рози бўла қолай, аввало, бу ҳаммаси хомхаёл. Натижа маълум» деган хаёлда:

– Ўрнингизда бирон-бир бемазагарчилик қилиб қўйисам ҳам, кейин койиб юрмайсизми? – деди ҳазиломуз оҳангда.

Бу гапни розилик аломати деб билган чол бирдан яшнаб кетди:

– Э, ўғлим-эй! Истаганингча яша, кўнглингга сиқ-қанини қил. Бу ҳаётда мендан нима қоляпти? Ҳаммаси эскириб, ўзимга ўхшаб авра-астари чиқиб кетган. Тўплаган бир-икки сўмлик жамғармамга эса тупурдим.

Чол қаттиқ ҳаяжон ичида шоша-пиша шишача қопқоғини очди. Стол устидаги икки пиёлани яримлатиб суюқликдан қуиди. Шиша идишда яна шунча миқдорда суюқлик қолди.

– Ҳар эҳтимолга қарши бу ёфини қолдирамиз, – деди чол. – Бир кун орқага қайтишимиз учун... Ҳа, бир нарсани айтиш өсимдан чиқибди. Сен тағин: «Маъруф ота менинг ночор аҳволимдан фойдаланиб қоляпти», – деб ўйлама. Эрта бир кун қариллик жонингта тегса, тегиши аниқ, ўшандা яна иккимиз бу ерга келиб ўтирамиз-да, қолганини ичамиз. Кейин ўз йўлимиизга кетаверамиз. Баҳонада сен ўзингни анча тиклаб оласан. Мен ҳам бир пайтлар қадрига етмаган ёшлигимга қайтиб, қариганимда уни яна бир ҳис қилиб кўраман. Бўлмаса, қани, ичдик. Қадаҳ сўзи айтиш йўқ. Бу ароқ әмас. Илоҳий... нима десамикин, шифобахш дорими, бўпти, бисмилло деб ичамиз... Иккимиз бараварига. Қани!..

Ичишди. Бир-бирига қараашди. Афтлар буришмади. Оддий сув каби жимгина, томоқларни қуидирмай, ачиштирмай юмшоққина ўтиб кетди.

– Мазаси яхши экан. Лекин қанақангги гиёҳларнинг таъми эканлигини англай олмадим, – деди чол шиша-да қолган суюқликни чироқ ёруфига тутиб. – Сен-чи?

Нодир елкасини қисди. Кейин кулиб юбормаслик учун пастки лабларини тишлади.

– Агар юзимда бирон ўзгариш бўлса, тортинмай айт, мен сеникини айтаман, – деди чол мўъжиза содир бўлишига нимагадир астойдил ишонч билан.

Нодир ўзини ортиқ тутиб туролмай кулиб юборди. Чол унга аҳамият ҳам бермай дераза ёнида турган соатга кўз ташлади.

– Кутганингда вақт тўхтаб қолади... Э, ана, сенда бошланди!

– Йўғ-э!..

Нодир юзини пайпаслади. Ниманидир сезди, шекилли, ҳовликқанча қўшни хонага ўтиб, девордаги ойнага рўпара бўлди ва юраги шув этиб кетди. Силлик ва тиниқ юзларида майда-майда ажинлар пайдо бўлишга улгурибди. Кейин кўз қарашлари ҳам ўзгарибди. Ўзиники эмас. Қошлари ҳам бошқача, уники қуюқ, тимқора, ўртаси туташиб кетган эди. Кўзгудаги аксида эса... Ие, иягида чуқурча пайдо бўлибдими, тавба! Азбаройи қўрққанидан кўзлари олайиб кетди. Ўзини босишга уринди. Қўрқма, ўзи шунаقا бўлиш керак эди-ку... Демак, бошқа қиёфага кириб боряпти. Энли даҳанидаги чуқурча ҳам чолники. Мана, ҳозир унинг ўрта ёшлардаги кўринишига ўтмоқда. Қиёфа изчиллик билан ўзгараверди. Ҳалиги ажинлар чуқурлаша борди. Юз териси салқий бошлади. Кўз қарашлари ҳам шунга монанд ўзгариб, мунгми, аламми пайдо бўлди уларда. Шу пайт ойнада иккинчи қиёфа пайдо бўлди. Нодирнинг ўз қиёфаси. Ялт этиб ёнига қаради. Во ажабо, ёнгинасида ўзини кўриб туради, биттагина фарқи, ёнидаги қиёфадоши чолнинг либосида эди. Четдан қараган одам беихтиёр кулиб юбориши мумкин: ёш йигитча кексаларнинг тунги пижамасида, қари чолнинг әтнида эса қизил футболка, спортчилар шалвари.

– Энди шошилишимиз керак! – Нодир ялт этиб унга қаради: «Тавба, менинг овозим-ку!» Чол чаққон бир ҳаракат билан эшикни очиб, ташқарига кўз ташлаб келди. – Болалар уйғониб қолмасидан кийимла-

римизни ўзгартириб олайлик. Кейин мен тез бориб, сенинг уйингга кириб олишим керак. Сен бу ерда қоласан.

Фалати ҳолат: ёш йигитча отаси тенги одамни сенлаб гапиряпти.

– Эҳтимол, менинг хонамга киармиз? – деди Нодир. Овози титраб чиқди. Айни чогда вужудида беҳоллик сезди. – Ҳеч ким бизга халақит бермайди...

– Тўғри айтасан, бу ерда бирор кўриб қолса ақлдан озиши ҳеч гап эмас! – Чолнинг овози ўқтам, тантанавор эди. Кайфияти ҳам хушҳол, кўзлари чақнарди.

Олдинма-кетин Нодирнинг хонасига киришди. Нодир ўз жойига, чол эса иккинчи ижарачи учун мўлжаллаб қўйилган ўринга бориб ўтирди. Худди шу вақт кимдир дераза ёнидан лип этиб ўтди.

– Қара-я, роса вақтида чиққан эканмиз, – деди чолкулимсираб.

Нодир бош иргаб қўйди. У ҳамон тушимми, ўнгими дея шубҳадан қутула олмаётганди. Кўриб турганилари ростми ё рёё? Наҳотки, шундай бўлиши мумкин? Агар ҳаммаси рост бўлса, энди бу ёғи нима бўлади? Э, онаси-чи?! Ундан қандай хабар олади? Ҳеч тинмас эканман-да, ҳар сафар қанчалик эҳтиёткор бўлмайин, нимагадир аралашиб қоламан... Бунинг устига, шу пайтгача ҳис қилмаган бемажоллик унинг руҳини баттар азоблай бошлади. Бундан чиқди, жисмоний беҳоллик руҳга ҳам таъсир қиларкан-да. Унда нега айрим саксон-тўқсонни уриб қўйган қариялар, ўзлари қилтиллабгина қолишган-у, руҳлари бардам. Ўлимни писанд қилишмайди. Худди бир сафарга-саёҳатга отланган одамдай тутишади ўзларини. Лекин манови одам унақа эмас. Ваҳима, хавотир, ҳадикда яшайди мудом. Сира кеттиси йўқ. Ҳа, демак, ҳаммаси тушунарли...

Нодир шу онда англаб етган ҳақиқат шу эдики, унинг руҳи ўзига нолойиқ вужудга тушиб қолган. У шундан қийналяпти.

– Биласанми, сенга қараб туриб ҳайрон қоляпман, – деди чол илжайиб, – мен ўзимни унчалик қари деб билмасдим. Ёки ўзимга сезилмасмиди?.. Нимагадир менданам қарироқ бўлиб боряпсан. Ҳали болаларим бир кунда шунчалик қариб кетганлигимни кўриб ҳайрон қолишмаса эди.

Нодир жавоб қилмади.

– Умуман, мен, бу – менман, сен эмасман. – Чол ўрнидан туриб Нодирнинг олдига келди. – Худога шукр, суюқлигимиз яна бор. Зарурат туғилса, яна ўз ҳолимизга қайтишимиз мумкин...

– Тўғри айтдингиз, – деди бу тапдан дадилланиб Нодир, ниҳоят, тилга кириб. – Мен бу – менман, сиз эмасман!

Кутилган мўъжиза рўй берди. Нафақат Нодир, Маъруф чолнинг ўзи ҳам ростданам бу ҳодиса рўй берганига ақли бовар қилмай, кўп ўтмай ҳаммаси изига тушади, ухлаётган бўлсак уйгонамиз, барчаси тушимизда содир бўлганини ёки галлюцинация ҳолатида бўлганимизни тушуниб етамиз, деб, бир-бирларига ажабсиниб, ишонқирамай тасаввур эмасмикан дея бир-бирларини ушлаб ҳам кўришди.

Сўнг бирдан чол хохолаб ғалати кула бошлади.

Нодир эса ваҳимага тушиб, ўрнидан туриб кетди. «Нима бало, ақлдан озиб қолдими? Ишқилиб, бирортаси эшитиб қолмасин-да» деган хавотирда деразадан ташқарига қараб қўйди. Чол Нодирни бутунлай унугандек кўзларидан дув-дув ёш оқиб кулишда давом әтаркан, «Нима, мен шунаёнги қариб қолганмидим?» – деб ора-орада ўзига савол ҳам бериб, Нодирнинг атрофида айланниб ҳар томонлама кузатарди.

Нодир караҳт бўлиб жойида ўтириб қолганди. «Энди шу бало бормиди, мияси айниб, жиннихонага тушиб қолса-я. Ўзи бошида рози бўлмаслигим керак эди. Ким ишонибди? Бир ҳисоби, чол айтганидек, бошпанам бор, ҳар ойда беминнат келиб турадиган нафақам, ҳаммасидан ҳам кунлик тирикчилик ташвиши юрагимни ўйнатмайди... Ҳм, Маъруф ота, бир кўринг, кўзингизга бир ландавурга ўхшаб кўринардим!.. Сизга менга нисбатан енгилроқ, барибир, ижара пулини сўрамайман...

Хайрият, чол тинчигандай бўлди. Жойига қайтиб ўтирди-да:

– Э Парвардигор! Одам боласига шунчалар имкониятлар бериб қўйгансанки, теримга сифмай боряпман, – деди. Кейин Нодирга қараб кулди. – Шу ёшга кириб бирон марта бунаقا ғайритабиий воқеаага дуч келмаганман. Худди кинода рол ўйнаётган актёрга ўхшайман...

Кейин бирдан жиддий тортиб, жимиб қолди. Ранги қув ўчиб кетган Нодирнинг аҳволини пайқади, шекилли, ўрнидан туриб унинг олдига борди. Елкасидан қучди.

– Сен, ўғлим, қўрқма, – дея тинчлантиришга киришди.

– Ҳаммаси вақтинча, Нодир болам. Бу сирни ҳеч ким билмайди, нима учун ичимликнинг ярмини олиб қолдим, яна аслимизга қайтиш учун-да, бошида шундай келишдик-ку!..

Нодир оғзида бир дона ҳам тиши йўқ, қулоқлари том биттандек, кўзлари хира тортиб турганига қарамай, мияси, ақли ўзида қолтани сабаб аниқ-тиник фикр юритаётган эди. Бироқ кўз ўнгигда содир бўлаётган воқеалар уни караҳт қилиб қўйган эди.

Бундан чол ҳушёр тортиб, жимиб қолди. Аланглаб ташқарига қаради. Тонг ёришиб қолганди.

— Кел, бир-икки кун шундай юра турайлик, буям бир гап-да, — деди чол ёшариб қолганидан мамнун оҳангда, айни дамда, Нодирнинг фикридан қайтиб қолишидан хавотирга тушиб. Нодир эса чолга бу ҳолат ёқиб қолганидан ўзини зўрлаб кулимсиради.

— Вақтимни қизғанишим нимаси, барибир, бекорчиман-ку. Бекорчининг кимга кераги бор, Маъруф ота?

— Кейин кўнглидан кечган ўйдан қулгиси қистади: «Маъруфбой десам қандай бўларкин?..»

— Гап бундай, — деди чол енгил тортиб, — ҳозир нонушта қилиб оламиз. Энг муҳими, ўрнимизни унутмаслигимиз керак. Мен Нодирман, сен Маъруф ота. Бунга ич-ичимиздан ўзимизни ишонтиришимиз керак. Яъни рол ўйнашимиз керак. Бўптими, Маъруф ота? Қани, айт-чи!..

Нодир кулди.

— Ҳа, ноқулай бўляптими? Айт, Нодиржон де! Бунақада сездириб қўямиз, Маъруфбой!

— Қўрқманг, мен аллақачон ўзимни тайёрлаб бўлганман. — Нодир шундай деди-да, жиддий тортди. Қувовини уйди. Томогини қириб, жойига бориб ўтирди.  
— Қани, Нодирвой, охирги гапингни айт, ижара пулинин қачон берасан?

Чол йигитдан бунақа дадилликни кутмаган эди. Талмовсираб, нима дейишини билмай қолди.

— Яна қанча муҳлат керак, бир ҳафтами, ўн кунми, а?!  
Чол атрофга аланглаб олиб, шивирлашга ўтди:

— Қанақа ижара пулинин айтаяпсан, Нодирвой? Ахир келишдик-ку!

— Биринчидан, сенлама, томинг кетиб қолдими сен боланинг? Иккинчидан, Нодир эмас, мен Маъруф отангман, Маъруф отанг! Кўчада тентираб юрганингда сенга уйининг тўридан жой берган Маъруф отанг-

ман! Уқтингми? – Нодир овозини кўтарди: – Уқтингми деяпман!

– Уқтим, уқтим... Нодир болам...

– Янами?!

– Кечирасиз... Маъруф ота.

– Ҳа, шундоқ бўлсин... – дея Нодир ўзини тутолмай кулиб юборди. Маъруф чол Нодирнинг бу дағдасидан вазиятнинг яхши-ёмон тарафларини тушуна бошлади.

– Э, ҳазилинг қурсин...

– Айтиб қўяй, кейинги сафар ҳазил қилмайман, – деди Нодир илжайиб, – айнан ўғлингизнинг олдида ана шунаقا сўроққа тутаман. Тайёр бўлиб туринг. Тагин, ҳалигидай «Нодир болам»лаб ўтирманг-а!..

– Ҳа, жа унчаликка борма-да. Сен ўғлимнинг феълини билмайсан. Ижара пулига қизиқиб сўраб-суринтириб юрмайди-ю, бироқ сенинг қанча қарзинг борлигини ва уни тўламай юрганлигингни билиб қолса мени эшикдан итдек қувиб чиқариши аниқ. Вазиятни мурракаблаштирма. У лақма эмас, алдаб бўлмайди. Ана шунинг учун ўғлим ҳеч нарсани сезмаслиги, иложи борича биз кам кўришиб, кам гаплашишимиз керак. Сен-ку ролингни қотиаркансан, мен довдираб қолишим мумкин...

– Маъруф ота, бир нарса сўрасам, хафа бўлмайсизми?

– Сўрайвер, хафа бўлиш йўқ.

– Умрингизда бирор марта сизни шунаقا сўроққа тутишганми? Қарзингни қачон тўлайсан, йигитмисан ўзи деб бақириб беришганми? Йўғ-а? Мени бўлса кўп қийнашган. Сиз эмас, сиздан олдингилар. Энди яна битта савол, мана, сиз менинг ёшлигимга, умуман, ҳозирги ёшларга ҳавас қилдингиз, тўғрими? Лекин қандай яшаб кетишингизни ҳис қиляпсизми?

Биринчидан, ишсизлик муаммосини ҳал қилишингиз керак. Суд-ҳуқуқ тизимларидан иш тополмайсиз. Чунки таниш-билишларингизга бориб, мен фалончиман деёлмайсиз. Қейин дипломингиз, паспортингиз буни тасдиқламайди ҳам. Сиз Маъруф Заирович эмас, Нодирсиз, қишлоқ хўжалиги бўйича мутахассис. Мен, масалан, вазирлик тугул, оддий бошқармалардан ҳам иш тополмадим. Ҳозир тогни талқон қилишга қодир куч-қувватга эришдингиз. Лекин ўша талқон қилинадиган тогни қаердан топмоқчисиз?! Бу томонларини ҳам ўйлаб кўрдингизми?

Нодир қиёфасидаги Маъруф чол бир зум бошини қуи солиб турди-да, қўл силтаб ўрнидан турди.

— Сен бола яна ўзингнинг қўшиғингни айтяпсан. Замон ўзгаргани йўқ. Фақат тузум ўзгариб, одамлар тентак бўлиб қолгани, ишсизлик ҳаммани ўйлантириб қўйгани рост. Аммо манаман деган саркардалар, мингминг пулнинг устида ўтирган миллиардерлар, дунёни бошқараётган ҳокими мутлақлар ёшликка қайтишни орзу қилиб армонда ўлиб кетишган. Худонинг марҳаматини кўрки, бу мўъжиза менга насиб қилди. Бу – баҳт. Буни ҳис қилиш керак. Одам ҳамма нарсани ҳис қилиб яشاши керак. Ҳис-туйғулар билангина ҳаёт қизиқ. Нега ўқиган бола бўла туриб сен шунақанти нарсаларни тушунмайсан? Қолгани таваккалига...

Нодир чолнинг гапларини тинглаб унга тикилиб:

— Сиз йўқчилик нима эканлигини билмай қариган экансиз, – деди.

— Ҳозир нонушта қиволайлик, ошқозон карнай чалиб юборди. Йигирма йиллардан бери бунақа оч қолмаган эдим. Юр-чи! – деди чол Нодир билан тортишишни истамай.

Маъруф чол ютоқиб, Нодир мижговланиб нонушта қилди. Қейин ошхонадан чолнинг хонасига ўтиш-

ди. Чол ўзининг тебранма курсисига Нодирни ўтқазиб, пардаси очиб қўйилган деразага ишора қилди. Бу ердан дарвоза ва икки томондаги узун пешайвонлар остидаги хоналар яққол кўриниб турарди. «Ҳа, чол бу хонани бекорга танламаган экан», – деб қўйди Нодир ўзича.

Шундан сўнг чол аввалига катта келини ва икки набираси, кейин кичик келини, ўғли, икки набираси, хуллас, бутун оила аъзолари ҳақидаги икир-чикир маълумотлар билан Нодирни таништириди. У ўғлининг камгап, босиқ, аммо ниҳоятда сезгиригини, агар ўзи гап бошламаса, ўзича гап қотмаслигини, салом-аликдан нарига ўтмаслигини тайинлади. Ўғли ҳар куни хабар олгани кириши, соғлигини сўраши мумкинлигини айтди. «Қисқаси, менинг ролимни ижро этишнинг энг осон йўли – индамай уларни кузатиб туриш. Гоҳида келинми, набираларни нимадандир норози бўлиб келиб қолса, иложи борича қуюниб ўтирма, агар эп-лай олсанг озгина насиҳат қилиб кўр, лекин боягидай ролга киришиб кетма. Минг насиҳат қилма, барибир, улар ўз билганидан қолишмайди», – деди чол секингина хўрсиниб қўйиб. Кейин уйга оид ҳужжатлар жойини кўрсатди, ўз паспортини тутқазди. «Энди сенам ҳужжатларингни берсанг», – демоқчи бўлди-ю, ниятидан қайтди. «Жойини айтсанг, ўзим топиб оларман», – деди. Шу лаҳзада бир нарсани туйди: ҳалигина ўзи қартайган чол эди, энди бўлса манови қилтиилаган чоннинг оёғига қараб юришни ўзига эп билмаяпти!..

Хонасидан чиқар экан, уйидан ошхона томонга қараб келаётган ўғлига рўпара бўлди. Ўғли унга: «Эрталабдан отамнинг хонасида нима қилиб юрибсан?» – дегандек қарааш қилди. Ота бўлса Нодир қиёфасида биринчи одамга дуч келаётгани учун беўхшов бир ҳаракат билан ёнидан ўтиб кетди. Бу эса ўғилда баттар

шубҳа уйғотди. Яхшиям, «отаси»нинг ўз ўрнида, дераза ёнидаги тебранма курсида ястаниб ўтирганига кўзи тушиб, уни тўхтатиб, сўроққа тутмади. Лекин то ўз хонасига кириб кетгунича ўша қарааш билан ортидан кузатиб қолди.

Чол Нодирнинг хонасига кириб олиб, хотиржам тортди. Ўғлини унугтди. Девордаги ойнага ўзини солганданча бирпас маҳлиё бўлиб туриб қолди. Одатдагидек, иягини ишқалаб, соқоллари ўстганини пайқади. У ҳар куни соқолини қиртишлар эди. Лекин ҳозир ниятидан қайтди: хийлагина ўстган қора соқол юзига янада кўрк бериб туарди. Э, ёшликка нима етсин. Ҳамма нарса ярашаверади унга. Барака топсин, йигитчага бу дунёда фақат унга қийиндек туюлади. Мана, ҳамма нарсанг бор, бир ўтириб кўргин... Тебранма курсида ҳансирабгина ўтирган «бечора бола»ни кўз олдига келтириб унга ачиниб қўйди. Кейин ўзини юпатди: нима бўлгандаям, у зарар кўрмайди. Анча ташвишларидан қутқараман. Фақат ўрнимда бир ишқал қилиб қўймаса бўлгани.

Тавба, кўзгуда кўриб тургани – Нодирнинг қиёфасига ҳали ҳеч қанча ўтмай кўзи ўрганиб қолдими? Ўрганиш нимаси, кўзига оловдай кўриниб боряпти-я! Худди онадан худди шу сувратда туғилгандай. Кўз қараашлари маъноли, жиддий, чимирилган қошлари қуюқ, тимқора, ўртаси туташиб кетган... Нима бало, ўзининг Маъруф Заирович экани, шу исм-шарифда, шу тана-тўшда 86 йилдан бери яшаб келаётгани дарҳол унугт бўляптими?!

Нодирнинг ҳужжатларини диван остидаги чемодандан бирпасда топди. Паспорти, институт дипломи билан бирга ҳайдовчилик гувоҳномаси ҳам чиқди. Уларни стол устига олиб қўйди. Шу маҳал ташқаридан машина овозини эшитиб, дераза олдига борди.

Ишга отланаётган ўғли билан яна нигоҳи тўқнашди. У машинасида ўтирганча кетишга шошилмас, негадир Нодирнинг деразасига тикиларди. «Оббо, – деди чол, – бу бола намунча сершубҳа бўлмаса, кетавермайдими ишига?..» Ўғлининг телефонда гаплашаётганини кўриб хотиржам тортди. Сўнг ўзини койиди: «Сен, қари тўнка, бунча ҳар нарсадан ҳадиксирайверасан?..» Дераза олдидан нари кетиб, Нодирнинг ҳужжатларини синчиклаб кузатди. Ҳайдовчилик гувоҳномаси, айниқса, қизиқтириб қўйди, фикри ойдинлашди: «Бўлди, ҳайдовчилик қиламан!» Бундан бир ҳафта илгари сотмоқчи бўлган «Уазик»ни эслади. Яхшиям, нархини келишолмагани. Акс ҳолда... Шу заҳоти ташқарига чиқмоқчи бўлди-ю, ўғли ҳали кетмаганини эслаб ортига қайтди. «Яхши бўлди, таксичилик қиламан. Таксига иши тушмайдиган одамнинг ўзи йўқ. Бекор қолмайман... Эҳ, кетса кета қолмайдими бу инжиқ Мажид! Онаси уни менга ўхшатарди, инжиқлиги сизданам ўтади-ей дерди... Қизиқ, бугун у хонамга бир бош суқмадиям. Ҳа, майли, кирмагани маъқул. Анови бола қовун тушириб қўйиши мумкин. Э, хайрият, кетди-е..»

Шошиб ташқарига чиқиб, тўғри гараж томон юрди. Шу пайт рўпарадаги эшик шаҳд билан очилиб, ўн ёшли набираси Маъмур отилиб чиқди. Бобо одати бўйича жойида тек қотиб, икки қўйини ёзганча фоз қотиб қолаверди, набира одати бўйича ўқдай отилиб келиб, унинг пинжига кириш... ўрнига ёнидан зув этиб ўтиб кетди. Ажабланиб: «Ие!» – деди-ю, бирданига ўзининг бобо эмаслиги эсига тушиб қолди. Шартта қайрилиб гаражга қараб юрди. Калитни қўйган еридан топиб, гараж эшигини очди. Дарвозани ёпиб қайтган набираси бўлса қизиқсиниб унинг олдига келди. Маъруф (энди чол сўзини қўшмаганимиз маъқул) унга алаҳсими, машинага чиқиб ўтиреди-да, моторни ўт олдирди.

Бир ҳафтагина муқаддам харидор олдида уни юргазиб кўрсатган, русуми эски бўлса ҳам, деярли минилмаганини тушунтиromoқчи бўлганди. Харидор айтган нархида туриб олиб: «Отахон, бунингизнинг даври ўтди, музейга қўйиб қўйиш керак», – деб писандада қилавергач, уни қувиб солганди.

Маъруф машинани гараждан ҳайдаб чиқди. Бу орада Мақсуд исмли тўнгич набираси ҳам ичкаридан чиқиб келди-да:

– Амаки, машинани бобом сизга сотдими? – деди.

Маъруф:

– Ҳа, сотди, нимайди? – дея гапни қисқа қилди-да, гаражни ёпиб Нодирнинг олдига қараб жўнади.

Тебранма курсига ўтириб олган Нодир чол (энди уни шунаقا атаганимиз маъқул) ўзи билан ўзи овора эди. Уни ҳозир ташқаридағи воқеалар эмас, танаси бўйлаб кўчиб юрган симиллаган оғриқ ташвишга солаётган эди.

Маъруф оstonада кўриниши билан шикоятини бошлади:

– Ҳаммаёғимда оғриқ. Иссиғимам бор. Бутун танам шовдираб қолган машинага ўхшайдими-ей, сал қимирласам сочилиб кетадиганга ўхшайман... Бу нима, ўзи, қанақа касаллик? Қанақа дори ичирдингиз? Сиз дарҳол танамни ўзлаштириб олдингиз-у, мен кўника олмаяпман танантлизга...

– Э, менга қара, – деди Маъруф тажангланиб, Нодирнинг рўпарасига ўтиаркан, – ҳеч қанақа касаллик йўқ сенда. Бу қарилликдан. Бир-икки ҳафтага чидаб бер, кейин кўникасан!.. Хўп, энди гапни эшит...

Нодир эшитди. Маъруф гапирди. Демак, киракашлик қиласди. Ҳайдовчилик гувоҳномаси бор, машина бор. Фақат иккалови нотариусга бориб, машинани Нодирнинг номига расмийлаштиришса бўлгани...

– Ихтиёргиз, – деди Нодир инқиллаганча ўрнидан туришга ҳаракат қилиб. Маъруф унинг туришига кўмаклашиш учун қўлтиғидан оларкан, фаши келганини яширмади.

– Бунча бўшашибдинг. Бу қари танани мен шу чоққача бинойидек эплаб юрган эдим-ку!

– Менам кўникарман, – деди Нодир чолга аламидан бир нарса деб юбормасликка уриниб...

\*\*\*

Маъруф шаҳар ташқарисига қатнайдиган машиналар бекатига етиб келганида кун ёришиб қолган, ёмғир савалаб турарди. Йўловчилар сийрак. Бори ҳам аниқ йўналишларда қатнайдиган автобусларни кутиб туришарди. Турли русумдаги киракаш машиналар қаторидан жой олиб, атрофни кузатди. Мабодо йўловчи топилмаса ҳам, зарари йўқ, муҳитни, шароитни ўрганади. Ҳозирча кира пулига куни қолганича йўқ-ку. У шундай хаёлда ўзини хотиржам қилди-да, машина радиоси мурватини буради. Ҳар турли ахборотлардан кўра мусиқий канални эшитишни маъқул кўрди.

Шаҳар уйғонган, тўда-тўда уйқусираган одамлар метрога киришади, метродан чиқиб келишади. Аксари автобусларга қараб ошиқади, камдан-ками киракаш машиналарга яқинлашади. Битта йўловчини тўртта ҳайдовчи ўртага олади. Маъруф атрофни кузатиб зерикди. Машинасидан тушиб, олди-қочди гаплар билан бир-бирининг қитиқ патига тегиб ҳангомалашиб турган янги «ҳамкаслари» тўдасига яқинлашди. Бир чеккадан қўйл бериб, саломлашиб-танишиб чиқди. Кеийин ўзининг янгилигини айтиб: «Маслаҳат, йўл-йўриқларингизни аямассизлар?» – деди ўзини соддаликка олиб. Айримлари: «Ўзи, сен етмай турувдинг»,

— дегандек қарааш қилиб нари кетишиди, айримлари: «Э, оғайни, карвон кўп, ризқи бўлак. Ҳаммамизга етади. Бизда бирорнинг кўкрагидан итариш йўқ!» — деб бир-бирларига маъноли қараб қўйишиди. Кўзи пишиб кетган собиқ прокурор одамларга сингишиб кетишининг ҳадисини олгани учун юзидан яхши одамга ўхшаб туюлган ёши каттароқ бир ҳайдовчини мўлжалга олди. Унга яқинлашиб, машинани ижарага олгани, буғун биринчи куни йўлга чиқиши эканини айтиб, маалол келмаса, йўл-йўриқ кўрсатишини илтимос қилди. Унинг гапини бошқа биттаси ҳам эшитиб турган экан, дарров орага суқилиб: «Укам, Қумтепага транспорт етишмайди, лабовойга «Қумтепа» деб ёздириб олинг, бирпасда йиғиб оласиз», — деди. Маъруф унга ишон-қирамай қаршисидаги одамга юзланди. У бош иргади: «Шундай қилинг...» Бир зумда кимдир картон қофоз, кимдир қалин ёзадиган қалам топиб келди. Ҳаял ўтмай машина олд ойнасида ҳусниҳат билан битилган «Қумтепа» лавҳаси пайдо бўлди. «Мендан тезроқ қутулишмоқчи» деган ўйга борди ҳамма нарсадан шубҳа қиладиган собиқ прокурор. Лекин кўп ўтмай машинаси йўловчига тўлганини кўрган Маъруф: «Алдашмабди лекин...» — деб ажабланиб қўйди. Кейин атрофга аланглаб, ҳалиги маслаҳат берган ҳайдовчига кўзи тушди: қизиқ, у ҳалиям кўзи олма-кесак териб йўловчи изларди. Маъруфга қўл силтаб, илжайиб қўйди. Маъруф яна ажабланди: «Нега ўзи Қумтепага бормай, менга ошириб юборди экан?...» Кўнглига шубҳа оралади...

Қумтепа — юз эллик чақиримча наридаги кичик бир шаҳарча. Маъруф у ерни яхши билади, кўп борган. Аммо унда Маъруф эмас, Маъруф Заирович эди, уни зулукдай қора машиналарда олиб юришарди, бир мизғиб олгунича етиб олар, йўл машаққати сезилмасди.

Ҳозир бўлса... Пойтахтдан чиқиб, хиёл юрмай аҳвол ойдинлашди: кам деганда йигирма йил нари-берисида йўл эгасиз қолган. Ҳаммаёқ ўйдим-чуқур, тезликни оширишнинг сира иложи йўқ эди. Хушчақчақлик билан йўлга чиққан Маъруфнинг бирпасда ҳафсаласи пир бўлди. Манглайи тиришди. Тишини тишига босиб, ўйдим-чуқурларни четлаб юриб бораркан, ўзини қўлга олишга уринди. «Нима бўлгандаям сир бермаслик керак. Тавба, – дерди ўзига ўзи, – шаҳар ташқарисидаги йўллар шундай аҳволга келиб қолган экан-а. Ҳаётдан орқада қолиб кетибди-да. Илгари, хизмат сафари билан бу ёқларга йўли тушганида бунчалик эмасди, шекилли. Ҳа, майли, бошга тушганини кўз кўради. Бир адашди-да. Кейинги сафар ишини билиб қиласди».

Маъруф кўзгуга қараб салондаги йўловчиларни кўз қирида кузатаркан, бир нарсани пайқади: ёшми, ўрта ёшми – ҳаммасининг қиёфасида ҳорғинлик. Мудроқлик. Ким билсин, бу нимадан экан, балки, Худо берган умрининг энг жўшқин фасли фақат тирикчилик илинжиидаги югур-югурларга сарф бўлиб кетаётгани учундир?

Маъруф ўзини чалғитишга уриниб ёнидаги йўловчи йигиттга гап қотмоқчи бўлди. Қараса, машина эшигига елка тирганча оғзи ярим очиқ ҳолда уйқуни уряпти. Тавба, шунақа ўнқир-чўнқир йўлдан бораётган машинада ҳам ухлаш мумкин экан-да. Тагин алпдай йигит-а! Ким билсин, тирикчилик эзиз қўйгандир. Ўзича тахмин қилди: кеча бозорга келган, ултуржи бозордан талашиб-тортишиб нималардир олган. Кейин бозорчи бирорта танишига ўтқазиб, тўрт-беш сўм билан уйига қайтаётгандир. Бошқа нима ҳам қилиши мумкин? Ёки қиши билан асраб чиққан картошка-пиёзини ҳозирги иликузилди пай-

тида пуллаб қайтаётгандир... Ҳар ҳолда, туни бўйи ухламагани аниқ. Нодир бечоранинг қўлидан шунаقا олди-сотди ҳам келмасди. Унинг тарбияси бошқача бўлган. Уни ўқитишган, тириқчиликка ўргатишмаган. Маъруф ажабланди: қизиқ, фикрлашим ҳам бошқача бўлиб боряптими?! Ёки Нодирдан юқтирдими, ҳар ҳолда, унинг танасида яшаяпти-ку.

Шу тобда хаёл уни ортга, ўзининг тебранма курсисида деразага кўз тикиб ўтирган Нодирга қайтарди. Унинг алам-изтироб билан айтган гаплари қулоги остида жаранглаб кетгандай бўлди: «Ҳозир тоғни талқон қилишга қодир куч-қувватга эришдингиз. Лекин ўша талқон қилинадиган тоғни қаердан топмоқчисиз?! Бу томонларини ҳам ўйлаб кўрдингизми?»

Маъруф негадир беписанд илжайди: ўйлаб кўришга ҳожат йўқ. У бу докули ҳаётни бир сидра босиб ўтди. Гарчи танаси Нодирники бўлса-да, тажриба, онг-шуур ўзиники. Ҳар қандай тегирмондан бутун чиқади. Ҳозирги ёшларга яшаш қанақалигини кўрсатиб қўяди. Энг муҳими, анави тебранма курсисида ўтирамайди, илгари хаёлига келмаган савобли ишларга қўл уриши, кимгадир нафи тегиши мумкин.

Маъруфнинг хаёли бўлинди. Машина салонидан ёшлилган қаттиқ-қаттиқ овоздардан ҳушёр тортиб, олд кўзгудан йўловчиларни кузатди. Охирги ўриндиқда ўтирган тўртта, чамаси, талаба йигитчалар ўзаро баҳсга киришиб кетган, бақириб-чақириб бир-бирига ниманидир уқтиromoқчи бўлишарди. Улардан бери-ти ўриндиқдаги бири ориқ, бири семиз икки аёл йигитларни тартибга чакирмоқчи бўлиб улардан баттар шовқин кўтаришарди. Уларни ойнадан кузатиб Маъруф кулиб қўйди. Кейин ўрта ўриндиқда, ҳеч кимга қўшилмай ойнага қадалиб келаётган оқ-сариқдан келган нозиккина қиз эътиборини тортди. Назарида, у

унниқиб, сим-сим йифлаб келаётган эди. Қизнинг ёнида ўтирган бир барзанги эса дунёдан бехабар хуррак отиб ухларди. Ундан олдингилар ҳар замон турткилаб уйғотиб қўйишар, у атрофга бир аланглаб олиб, узр сўрарди-да, зум ўтмай боши қийшайиб, яна баралла хуррак отишда давом этарди.

Маъруф диққатини йўлга қаратди: бу юришида уч соатларнинг нари-берисида Қўмтепага етади. Бир соатларда одам тўплаб ортига қайтса, соат учда пойтахтда бўлади. «Топган пулимнинг ярми бензин-мензинга кетса, қолган ярми ҳам ёмон эмас», – дея хомчўт қилиб бораради.

Машина имиллаб, лапанглаб илгарилар, тезликни оширишнинг иложи йўқ эди. Йўлнинг икки чеккаси тутлар, толлар, тераклар. Далада экин-тикин мавсуми бошланган, онда-сонда тракторлар кўринар, тизим ўзгариб, колхозлар тугатилгани боис аввалгидек сафарбарлик йўқ, одамлар сийрак, бутун бошли далада беш-ўнта кетмон кўтариб юрганларгина кўзга чалинарди. Ёмғир тиниб, кун исий бошлаганди.

Пешинга яқин Қўмтепага кириб борди. Тамадди қилиб олмоқчи эди. Машинаси атрофини ўраган йўловчиilarни кўриб фикридан қайтди. Ҳа, йўлнинг нотекислигини айтмаса, умуман, бошланиши ёмон эмасди. Машинасиям ҳали бақувват, бемалол беш-олти ой тиқ этмай хизмат қилиб бериши мумкин. Фақат бунаقا йўллардан камроқ юриши керак. Бугун бир алдандида... Лекин кимдир қатнаши керак-да бу томонларга ҳам. Манови бечораларнинг ҳам тирикчилиги бор. Ҳар тутул, Нодир айтганидек ишсиз қолмади.

Шу куни Қўмтепага икки марта бориб-қайтди. Уйига тун ярмида кириб келди. Ишлаб чарчамайдиган «ёш йигит» эмасми, унчалик ҳоргинлик сезмади ҳам. Алланечук дили равшан эди. Равшан бўлмасинми...

Ҳовлида чироқ қўринмас, ҳамма уйқуда эди. «Уазик»ни гаражда қолдириб, хонаси томонга юрди. Дераза ёнidan ўтаётиб таққа тўхтади. Хонаси эгалик, тебранма курсиси банд эди. «Э, адашибман-ку», – деганча кулимсив қўйди-да, эшикни очди.

– Мумкинми?..

– Э, бормисиз, намунча кўчада қоп кетдингиз? – деди Нодир чол ўтирган еридан қўзгалиб ҳам қўймай.

«Ҳа, анчагина кўникибди, – кўнглидан кечирди Маъруф. – Тузук. Энди фақат менинг мен эмаслигимни унугиб, сенсирашга ўтса, зўр бўларди»...

– Кўча ёқиб қолдими дейман...

– Ҳа, чидаса бўлади... Ҳўп, ўзингдан гапир-чи, кўникдингми?

– Кўникяпман.

– Қани-қани, нималар бўлди, гапир-чи, – деди Маъруф йўқлигига хонадонида нималар содир бўлганига қизиқиб унинг қаршисига ўтиаркан. – Ўғлим кирдими олдингга?

– Кирди. Мажид ишдан келиши билан ўғилчалари янгиликни етқазишибди. Бундан бехабарлигим учун у хонага кириб, бироз олдимда ўтириб соғлиғимни суриштирди ва гап орасида: «Машинани сотдингизми, аренданга бердингизми?» – дейди. Аввалига нима дейишни билмадим. Қовоғимни уйиб туравердим. Охири бақириб бердим. «Э, гаражда ётган нарса бўлса, бир бечорага фойдаси тегсин-да», – дедим. «Мусоғир бола бўлса, онаси касал бўлса, кира ишлаб, ўзигаям, бизгаям чойчақа оп келса, бунинг нимаси ёмон?» – дедим. «Ахир савоб иш ҳам қип турайлик-да, менинг бу ёғимдан у ёғим яқин бўп турибди, сенга керак бўлмаса, менга керак савоб», – дедим. Тўғри айтибманми, Маъруф ота?

– Қойил, боплабсан-ку! Ҳўп, гапир-чи, Мажид қанақа аҳволга тушди?

— Анграйиб, эшик олдида бироз қотиб турди-да: «Мен фақат сўрадим холос. Тавба, бу ҳам ишлаб келган, асабини бузмай демайсиз, бақирганингиз-бақирган», — деди. «Ўтириб кўр ўрнимда, кўраман аҳволингни», — дедим. Бечора ўғлингиз бир қараб, дарди ичиди миқ этмай чиқиб кетди. Тўғрироғи, ўрнингиз менга ёқиб қолди. Келинларингиз атрофимда парвона. Телевизорда хоҳлаганимни кўраман. Фақат мана бу шалоги чиққан танангизни әплаш бироз мушкулроқ бўляпти.

— Тасаввур қиляпман, — деди Маъруф қизариниб кулганча. — Бечора боламнинг эси оғиб қолай дегандир. Ўзингдан кетиб, бўлар-бўлмасга бақираверма... Болаларимга секин гапир; секин тушунтиранг, уларга гапларинг кўпроқ таъсир қилади. Бўлар-бўлмасга бақириб-чақираверсанг ҳамманинг меъдасига тегасан.

Беихтиёр девордаги суратга кўзи тушди. Юзига ойна қопланган чиройли чорчўп орасидан аёли қулимсираб, «Нималар қилиб юрибсиз, дадаси?» — дегандек бошини бир тарафга хиёл этганча синовчан қараб турарди. Ҳамроҳига қаради.

— Оббо, Нодирвой, ҳали шунақа қилдим дегин!.. Қоийил. Хўп, мендан сўрасанг, ишларим ёмонмас. Қумтепага икки рейс қатнадим. Анча-мунча ишладим. Ёмонмас. Яшаса бўларкан...

Нодир унга зеҳн солиб тикилди: «Бу гапи билан нимани исботламоқчи? Нима, мен бекордан-бекорга қарзга ботдимми!? Менда ҳам сиздаги имконият бўлганида қараб турмасдим... — дея кўнглидан ўтказди. — Ҳали бошланиши, бир-икки кун ўтсин, кўрамиз».

Чол чарчагани учун дарҳол Нодирнинг хонасига қайтиб, тўшагига чўзиларкан, бутун вужудида ёқимили бир оғриқ, фақат ёшликка хос лаззатли ҳоргинлик туйди. Охирги ўн йил давомида бошини ёстиққа қўйи-

са, мияси ҳар хил ўйлардан ғовлаб кетарди. Бу гал ундаи бўлмади. Тош қотиб ухлади. Қўпдан йиллардан бери биринчи марта туш ҳам кўрмади...

Чолнинг ишлари анча юришиб, озроқ сармоя ҳам тўплади. Биринчи марта Қўумтепага бораётганида эътиборини тортган ҳалиги оқ-сариқдан келган қиз билан танишиб ҳам олди.

Қиз Қўумтепа бозоридан сузма, сарёф олиб келиб, пойтахт бозорида бировга топшириб тирикчилик қилиларкан. Қолаверса, мاشаққатли бу ишни ҳаммаям қиломас, ўзига яраша қийинчилиги бор; қиз эса қийналса ҳам, қўлида бир-икки сўм пули бор, бировга муҳтоҷ әмас. У ҳам Нодирга ўхшаб қишлоқ ҳўжалиги институтини тугаллаган, иш ўрни йўқлиги натижасида ўзини шу йўлга урганди. Қиз ҳар икки кунда атроф қишлоқлардаги сузма-қатиқларни йиғиб, оғир юки билан машинага чиқарди. Уни кўриши билан Маъруфнинг кўнгли яйраб, файратига файрат қўшилиб, йўл бўйи йўловчилар билан чақчақлашиб келар, йўлнинг олислиги, мешаққати ҳам сезилмасди. Қиз билан тезгина тил топишиди. Аммо қиз Маъруфдан ички бир сезги билан шубҳа қилар, буни зийрак Маъруф дарҳол пайқаган, оқибатда улар орасида иккисига ҳам аён бир масофа сақланиб турарди. Қиз қанчалик Маъруфга қизиқмасин, у ҳақда ҳам ҳеч нарсани суриштирмас, шунингдек, ўзи ҳақида ҳам гапирмас, об-ҳаво, бозордаги нарх-наво, шунга яқин гап-сўзлар бўлиб, асосий мавзу четда қоларди. Маъруф бир кўрибоқ қизнинг эсли-ҳушлилигини, ўзининг эса вақтинчалик ёш эканлигини ҳисобга олиб масофани сақлади. Шу орада йўловчилар орасидан кўз таниш бўлиб қолган Омон ака деган қирқ ёшлардаги бир киши унга яхшигина иш таклиф қилиб қолди. Унинг айтишича, агарда режалари амалга ошиб, ишлари юришиб кетадиган бўл-

са, бир-икки йилда шаҳардан кичикроқ бир бошпана сотиб олиши ҳам мумкин экан. Бу фикр Маъруфга маъқул тушди. Кўнглида: «Кўрдингми, йигитча, ўрин алмасиб тўғри қилдик», – дея Нодир билан гаплашиб қўйди. Уйни сотиб олгач Нодирга ҳадя қиласиди ва ўзи яна асл ўзига қайтади. Ана шу яхши нияти туфайли ҳам нари-берисини кўп ўйлаб ўтирмай Омон аканинг таклифига розилик бериб юборди.

\*\*\*

Қарийб тўрт гектар жойни эгаллаган шаҳар чеккасидаги ёғ-мой комбинатида бир вақтлар минглаб ишчилар меҳнат қилган. Тузум ўзгаргач, асосий харидорлар қўшни республикалар бўлгани ва бу республикалар ёғни бошқа мамлакатлардан сотиб олиши эвазига корхона касодга учради, бутун бошли комбинатдан биттагина цех номига ишлаб туради. Омон бу ерга раҳбар бўлиб келгач турли тадбирлар қўллаб вазиятни ўнглашга уринди. Уддасидан чиқмади. Корхона тугатилишга маҳкум эди. Аммо омборда эскидан қолган анчагина захира ёғлар тахланиб ётарди. Янги раҳбар «Ётиб қолгунча отиб қол» қабилида иш тутиб, ўлик молни хорижга сотиб, пулга айлантириш ҳаракатига тушди. Маъруфни шу ишга жалб қилмоқчи эди.

Келишилган куни Маъруф комбинат омборига машинаси билан кириб келди. Омон уни янги мебеллар билан жиҳозланган оғисига бошлаб кирди. Бир пиёладан чой ичиш асносида унга йўл-йўриқлар берди. Собиқ прокурор, ҳар ҳолда, қандайдир ғайриқонуний ишга аралашиб қолганини пайқади. Пайқади-ю, ит эгасини танимайдиган замонда ҳамиша шундай бўлади деб ўйлаб, тақдирнинг йўриғига ўзини топширди. ... Улар оғисдалигида ишчилар «Уазик» ўриндиқ-

ларини олиб ташлаб, бир лите́рик елим идишларга солинган пахта ёғларини тифиз жойлаштиришиди. Омоннинг тушунтиришича, ёғ қозоқ чўллари орқали яширин йўллар билан Россия чегарасига етказилиши лозим экан. У ерда Маъруфни Омоннинг ўша ерда ишлайдиган укаси кутиб оларкан. Омоннинг ўзи эса мамлакат чегарасидан чиққунча бирга бўлади. У ёғига ёлғиз ўзи кетади. Чегарада бир ҳарбий билан келишишилган экан, уларни ортиқ ушлаб турмай ўтказиб юборди.

Шундай қилиб, Қумтепага тинчгина қатнаб юрган Маъруф етти ухлаб тушига кирмаган қайноқ чўл бағрида ёлғиз ўзи кетиб боряпти. Қуёш юқорилагани сари ҳарорат кўтарила борди. Ён атроф бийдай дашт, кўклам аввалида дашт бағрини гиламдай қоплаган ўт-ўланлар аллақачон қовжираб қолган. Қимиirlаган жонзот кўринмайди. Бори ҳам, чамаси, тунда овга чиқиб, кундузи пана-пастқамларга уриб кетишса керак. Онда-сонда хас-хашакларни тўзитиб қуюнчалар айланишиб қолади.

Маъруф чўл ичкарисига кириб боргани сари нафас олиш қийинлашаётганини сезди. Эгнидаги юпқа кўйлагини ечиб ташлади. Бошига ойна артадиган оқ қийиқчасини танғиб олди. Йўл харитада аниқ қилиб кўрсатилган, адашиб қолиши мумкин эмас. Худо кўрсатмасин, мабодо адашиб қолса, оқибати нима бўлишини тасаввур ҳам қилолмасди. Хўп, захира суви бир неча кунга етар, кейин-чи?! «Кейин тамомсан, вассалом, аммо сен билан боғлиқ Нодирнинг тақдири нима бўлади? Қари тўнка, илгарилари ҳам баъзи нарсаларга фаросатинг етмаслигини сезардим-у, буниси ўтиб тушди, мана, ўзингга ортиқча ишонишнинг, бино қўйишнинг оқибати...» – деб ўзининг устидан аламли кулиб қўйди.

Қачонлардир чўлнинг қоқ ўртасидан ўтган бу йўл анча текис ва равон бўлгани аниқ. Кейинчалик янги йўл қурилиб, бу йўлда қатнов камайгани сабаблими, эътиборсиз қолган. Қаҳратону саратоннинг забтидан асфалът уваланиб, уйдим-чуқурлар ҳосил бўлган. Айрим ўринларда қум кўчкиларидан қолган уюмлар машина юришини баттар қийинлаштиради. Осмон этағига туташиб кетган ёввойи саҳро билан ёлғиз қолган Маъруф аллақандай жунжикиб, елкасини қисиб олганча, миқ этмай рулни бошқариб борар, бир соат, бир кун, бир ҳафтадан кейин бошига нима тушишини билмас, бу ҳақда ўйлашдан ҳам қўрқарди. Унда-бунда учраб қоладиган саксовулни айтмаса, тиккайган бирор дараҳт йўқ. Атроф чилғай қумтепалардан иборат, сап-сариқ қумтепалар.

Машина қисқа-қисқа тўхталишлар билан саккиз соатча йўл босди. Сўнгти нафас ростлашдан кейин хийлагина текис йўлда тезликни ошириб, жадаллаб бораркан, қаршисида олисда бир қора кўринди. Қора яқинлашиб қизга айланди: оқ-сариқдан келган ҳалиги қумтепалик қизга. Маъруф ғалати ўхшашлиқдан ҳайратга тушди. Қумтепалик қиз қумтепалар орасида нима қилиб юрибди экан? Шу аснода ҳушини йифиб олди. Бу бор-йўғи шарпа, саҳро сароби! У бу ҳақда илгарилари эшитган-у, биринчи бундай ҳолга рўпара келиши. Сароб! Бундан бошқа нарса әмас! Қўрқма! Устига бостириб боравер! Эътибор билан қараса, қиз бир йиглаб, бир хохолаб кулиб у томонга югуриб келяпти. Нима қилсин, тўхтасинми ёки четлаб ўтсинми? Йўқ, мумкинмас, хиёл четланса, йўлдан чиқиб қумга ботади. Тўхтаса-чи?.. Йўқ, буям хавфли, балки, бу сароб әмас, жинми, алвастими, алламбало бир нарса бўлса-чи?! Содда одамларнинг ваҳимали гаплари ёдига тушди. Бир оғзи қийшиқ одамни кўрсатиб:

«Буни жин чалиб кетган», – дейишарди. Қизиқ, қумтепалик қиз ҳалитдан бери югуриб келяпти, машина ҳам у томон елдек учиб боряпти, лекин түқнашув юз бермаяпти. Тавба, туш күрятпими ё? Күзи очиқку. Атрофга олазарак қараб олди. Тушга ўхшамайди. Осмонда қуёш, атрофда барханлар, бетоқат изғиган қуюнчалар. Машинани теззатиш керак! У педални босиб тезликни оширди. Машина ваҳимали ўкириб олдинга интилди ва бу сароб хаёлотини босиб-янчиб ўтиб кетди...

Мана икки кунки йўл босади. Манзилга ҳали олис. Учинчи кун айни пешин маҳали олдинда машина кўринди. Маъруф яна саробга дуч келдимми деб кўзларини йириб-йириб диққат билан тикилди. Йўқ, саробга ўхшамади. Ҳақиқатдан ҳам машина, галати русумли кўкиш машина. У яқинлаб келаверди-да, юз қадамлар нарида шартта тўхтаб, кўндаланг бўлиб туриб олди. Йўл тўсилди. Маъруфнинг ранги ўчиб, юрагининг аллақаери куйгандек ачишди. Ноилож тормоз педалини босди. Сабаби, машинадан тўртта ниқобли, қуролланган йигит тушган, улар ҳам саф бўлиб йўл устида туриб олишган, ортга қайтишнинг ҳам, ёнлаб ўтишнинг ҳам иложи йўқ. Умрида бунақа вазиятга тушмаган, бунақа вазиятларни фақат кинода кўрган Маъруф ҳаммасини яхшиликка йўйиб (ахир, шундай тинчлик замондаям йўлтўсарлар бўлиши мумкинми?) машинадан тушди. Тушишда машина ва ундаги юклар ҳужжатини қўлига олиб олди. Ҳалигиларга яқинлашиб салом берди. Ниқобли кишилар миқ этмай қотиб тураверишди. Маъруф қўлидаги ҳужжатларини кимга беришни билмай турганида машинанинг орқа эшиги очилиб, қўлида тасбех тутган, ўсиқ қора соқолли, баланд бўйли қуролсиз бир киши тушди. Маъруф шу одам буларнинг кат-

таси эканини тушуниб у томон юрди. Қора соқолли ҳужжатларга кўз ташлади-да, ўсиқ қошлари остидан унга қаттиқ тикилди.

– Ҳаммаси тўғри. Йўл ҳақини тўллагин-да, ўтиб кетавер, – деди.

– Йўл ҳақи? Менга бу ҳақда ҳеч нарса дейишмаганди-ку, – деди ажабланиб.

Тасбеҳли индамай ортига қайрилди-да, машинасига бориб ўтирди. Лекин эшикни ёпмади. Маъруф у томон юрмоқчи эди, ниқобли йигитлардан бири йўлини тўсади.

– Гап шу, пулни тўллагин-да, ўтавер.

– Ўртоқ бошлиқ!..

– Ўртоқ?! – қора соқол хохолаб кулиб юборди. – Бу йигитча ҳалиям совет замонида юрибди-ку! Осмондан тушганимисан? Мана, қофозларинг ўзингга сийлов! – ҳужжатларни улоқтирди унга. – Пулни тўла!

Фақат қора соқол гапирав, қора соқол кулар, қолганлар эса ҳайкалдек қотиб туришар, на бошлиқларига қўшилиб кулишар, на гапиришар эди. Маъруф вазиятни тушунтирмоқчи бўлди. Лекин унга нима деб мурожаат қилишни билмай довдиради.

– Гражданин начальник...

– Нима?!..

– Кечирасиз, ҳурматли бошлиқ.

– Сенинг бошлиғинг эмасман. Майли, гапир гапингни, сартти боласи.

– Амаки, кечирасиз. Бу ёқларга биринчи келишим. Бунақа гаплардан хабарим йўқ эди. Хизмат ҳақимни молни топшириб қайтганимдан кейин олишга келишганман... – Маъруф ҳаммасига тушунган, назоратчиларга эмас, қароқчиларга дуч келган эди. Яна нима десин, нима деса эсон-омон қутулиб кетаркин?.. – Ҳа, мен тушундим. Пулни тўлайман. Юкларни топшира-

ман-да, қайтишда... – Қора соқолнинг қаҳрли кўзлари учқунланиб кетганини кўриб гапини йўқотди.

Кун иссиқ. Атроф жимжит. Қароқчилар каттаси қўлидаги тасбеҳини Маъруфнинг юрак уришига мослаб асабий чиқиллата бошлади. Маъруф таранг ва-зиятни юмшатиш учун яна нималардир дейиш учун сўз излай бошлади.

– Истасангиз, уй манзилимни бераман, – деди ти-лига келган гапдан дадилланиб. – Фақат ҳозир ёнимда пул йўқ, ишонинг, текшириб кўришингиз мумкин.

Умрида биринчи марта ожизлигини ҳис қилиб, ҳаммага илтижоли тикилди... Каттадан ишора бўлди, шекилли, никоблилар ҳаракатга тушди. Машинанинг тит-питини чиқариб қараб чиқишиди. Керакли нарса топилмаганидан ўнталаб қадоқланган ёғ ўрамлари у ёқдан-бу ёққа улоқтирилди. Маъруф йўлга чиқаётшиб айрим ҳолатлар юз бериши, масалан, адашиб қолиши, сувсизликка дуч келиш каби тасодифлардан ҳадиги бор эди-ку, лекин қуролли қароқчиларга учрайман деб сира-сира ўйламаган эди. Омон деганлари, инсоф юзасидан бўлсин, огоҳлантирмабди ҳам. Бу одамлардан ҳамма нарсани кутиш мумкин. Бир оғиз эҳтиёtsиз гап ҳаммасига нуқта қўйиши мумкин. Бегона жой, овлоқ дашт. Ким сўраб-суриштиради? Ўзи майли-ку, Нодирнинг аҳволини ўйлаб чинакамига қўрқувга тушди. Бир сафар, биринчи сафар кечиришларини, агар ижозат беришса, ҳозироқ ортига қайтиб кетишини ўтиниб сўрай бошлади.

Тўдабоши Маъруфга қараб ҳам қўймади. Тасбеҳини ўғирганча кўзларини юмиб ўтираверди. Маъруф қараса, ҳар ёққа улоқтирилган ёғ ўрамлари қайтадан «Уазик»ка жойланяпти. Кейин машина эшити қулфланиб, атрофига айлантириб бензин сепиб чиқилди. Маъруф ялиниб-ёлворишдан иш чиқмаслигини би-

либ йўл чеккасида мўлтираб ўтираверди. Бир маҳал ниқобли нусхалардан биттаси унинг устига бостириб келди-да, автомати қўйндори билан уриб йиқитди, ке-йин тепкилай кетишиди. Маъруф бошига теккан оғир зарбдан ҳушини йўқотди...

\*\*\*

Даҳшатли гумбурлаш саҳро сукунатини бир қал-қитиб олди. Яна кўницилган жимлик, мудроқ ҳаёт ўр-нига қайтди.

Муҳтор оға шоша-пиша йилқиларини ўтовга ҳайдаб келиб, қўрага қамади-да, кампирига: «Хозир келаман», – деб ортига қайтди. Қари саманини ту-тун бурқиётган томонга йўрттириб кетди. Атрофда доғланаётган ёғнинг аччиқ бўйи анқирди. Манзилга яқинлашганида саманнинг қулоқлари дикрайиб таққа тўхтади. Манзара чинданам қўрқинчли эди. Машина бўлаклари сочилиб ётар, ҳар ер-ҳар ерда уюм-уюм нарсалар ловуллаб ёнарди. Бироқ тирик жон кўрин-масди. Қария отидан тушди-да, гулханчаларни оралаб атрофни кузата бошлади. Йўл чеккасида мук тушиб ётган одам жасадини кўриб шошиб унинг тепасига борди. Елкасидан тортиб чалқанча ётқизди. Йигит-да жон асари кўринмади. Кўкрагига қулоғини қўйиб, бирпас жим турди. Хотиржам тортди. Қейин отини чақириди.

Магфират кампир отини етаклаб қайтаётган чолини кўриб, қўлидаги юмушини ташлаганча унинг қар-шисига ошиқди. Икковлашиб отда кўндаланг ётқизилган йигитни кўтариб ўтовга олиб киришди.

Кампир Маъруфнинг қонталаш лабларига сув томизди. Йигит тамшанди. Аммо кўзларини очишга қуввати етмади. Уни ёлғиз қолдириб эр-хотин чодирдан

чиқишиди. Кампир овқатга уннади. Чол қандайдир ўт-ўланлардан малҳам тайёрлашга киришиди.

Маъруф бир муддат ўтиб кўзларини очди. Қаерда эканини идрок қилолмади. Бир нарсани тушундикки, у омон қолибди. Яратган унгами, Нодиргами раҳм қилибди. Шукр! Омон қолдирибдими, демак, бу ёғига ҳам Ўзи асрайди...

Орадан қанча муддат ўтди, билмайди. Фақат бир нарсани – дим бегона чол-кампирнинг парваришидан ўзига келаётганини сезиб турди. Бир куни кигиз чодир шифтига тикилиб ётаркан, беихтиёр «Бу ётишинг нимаси, ўрнингдан турсанг-чи, пиширган ошингни охиригача ейсан-да энди» деган ички бир овоздан ҳушёр тортди. Секин қўлларига таяниб туриб ўтирди. Яна бир ҳаракат қилиб оёққа турди. Атрофга аланглаб, таянч бир нарса излади. Секин ўтов эшигини мўлжаллаб юра бошлади. Дарчага елка тираб нафасини ростлади.

Саксовул ёқиб, лой ўчоқда сут қайнатаётган кампир уни қўриши билан шошиб қолди. Чоли эса қўринмасди. Кампир каловланиб уни ўтовнинг соярав томонига тўшалган кигизга ўтқазди. Олдига дастурхон ёзиб, бир косада қайноқ сут қўйди. «Ич, болам, қувват бўллади», – деди. Маъруф сутни хуш кўрмасди. Аммо кампирнинг кўнгли учун пуф-пуфлаб ичди. Вужудига сингиб бораётган қултум-қултум қайноқ оқликдан танаси яйраётганини туйди. Мана бу саҳройи аёл қай бир жиҳатлари билан бундан қирқ йиллар бурун оламдан ўтиб кетган онаизорини эслатиб, камига, бу дунёнинг сир-саноатларини биламан деган бир вақтда ёш болага ўхшаб боши берк кўчага кириб қолганидан аламидан кўзларига дув ёш қуиилиб келди...

Маъруф ўтирган ерида атрофни кузатди. Мухтор оғанинг ўтови чўл билан адирлик туташган жойга ўр-

натилган, яқин ўртада бошқа ўтов кўринмасди. Бир тарафда бош-кети кўринмайдиган қозоқ чўли, иккинчи томонда эса бир-бирига мингашган адирликлар яс-таниб ётарди. Қуёш ҳали тиккага келмай дам қайта-пар даражада кун қизий бошлаган эди.

Бошини ўтовга тираб қуёшга тикилди. Қўзлари қа-машиб ёшланиб кетди. Қўзларини чиппа юмиб олди.

– Ширағим!..

Маъруф кўзларини очди.

– Мана бу этни еб олгин, балам, – деди қозоқчалаб.

Мағфират кампир бир патнисчада нон, пиширилган гўшт кўтариб чиққан эди.

– Раҳмат, моможон. Мухтор оғам кўринмайдилар.

– Йилқиларни эрта саҳарлаб опчиқиб кетган. Қеп қолади, кун қизигида қайтади. Ҳа, ана, қайтишяпти...

Адир устида йилқилар уюри кўринди.

– Сен этдан егин, балам. Қувватга ингин.

Маъруф кампирнинг қистови билан истар-истамас тотинган бўлди. Шу аснода уйида – тебранма курсида деразага тикилиб ўтирган Нодир кўз олдига келди. Эҳ, шундай бўлади деб ким ўйлабди? Аслида, бир-икки кун киракашлик қилиб машинани Нодирга бе-риш керак эди. Тўхташ керак жойимда тўхтамадим. Қуюшқондан чиқдим. Мана, оқибати нима билан туга-ди. Начора, яхшилик истаган эдим, оқибати эса... Энди бир амаллаб ортига қайтиши керак.

Мухтор оға уюрни қўрага ҳайдаб киритиб, устидан тамбалади. Кейин офтобада юз-қўлини чайиб, кампири узатган сочиққа артинди-да, Маъруфнинг қарши-сига келиб чўккалади.

– Ҳаммамизни Яратганинг Ўзи асрасин, – дея юзига фотиҳа тортди. – Ҳў-ўп, Маъруфбай иним, сўйла-чи, энди тузукмисан?

– Тузук...

— Ҳа, шукр, шукр. Жонинг омон қолди. Молтоплади. Замоннинг нотинчлигини била туриб эскийўлдан юришингни қара. Тушунаман сени. Тирикчилик одамларни шу кўйга солмоқда, — чол ниманидир сўрашга иккиланаётгани аниқ эди, — Чўл ҳавоси ёқдими, ишқилиб? — деди паришонроқ бир алфозда. — Чўл ҳавоси тушунган одамга яхши, — деди қария олисларга кўз тикиб олиб. — Ёшлар пул топиш, яхши яшаш ниятида катта шаҳарларга кетиб қолишади. Эпласа, ҳалоли бўлсин. Лекин шаҳарга бориб олиб, чўлинни, ҳавосини унутганлари билан, бу вақтингчалик ҳол. Одам табиат қўйинини кун келиб яна қўймсайди. Бизнинг саҳро ҳам табиатнинг гўзал бир манзараси. Бунағанги манзарани шаҳарда яратиб бўлмайди. Бу ҳам Худойимнинг бир қудрати... Табиийликка нима етсин. — Маъруф гап қўшмаганини кўриб яна ўзи давом этди. — Кеча анови ерга шаҳардан терговчилар келишди. Сиз портлаш овозини эшитган чиқарсиз, нимани кўрдингиз, кимни кўрдингиз деб роса сўроққа тутишди. Эшитдим, бориб кўрдимам дедим. Лекин одам зоти йўқ эди деб туриб олдим. Сени айтмадим.

— Нега айтмадингиз, айтиш керак эди-ку.

— Сени аядим, балам. Овора бўлганинг қолади.

— Қидирувдан яширинсам, машинамни ёқиб юборганлар жазодан қутулиб қолишади-ку, — деди аламзада оҳангда Маъруф.

— Ўзингни ўйласанг-чи! Тирик қолганингга шукр қил. Замонни кўриб турибсан. Ит эгасини танимайди. Ҳозир бориб терговчиларга бўлган воқеани гапириб берсанг, энг аввал ўзингни тиқиб қўйишади. Э, сен гўдак нимани кўрибсан? Буларга яқинлашсанг балога қоласан, кўрдим дединг, тутилдинг, кўрмадим дединг, қутулдинг!

Собиқ прокурор Мухтор оғанинг ҳақ әканини тан оларкан, бизда ҳам худди шундай эмасмиди, биз ҳам бир жиноят ишини ёпиш учун айблими, айбсизми, кимнидир қамаб юбормасмидик дерди ички бир изтироб билан. Қайтар дунёни қарангки, айнан шундай савдолар бошига тушиб турибди. Уни калтаклашди, бутун бошли машинасини юқ-пуки билан ёндириб юборишиди, куйдириб ташлашди. Лекин бирорвга арз қилолмайди. Арз қиласа ўзига бало ортиради.

— Терговчилар ҳайрон. Ёнғиндан қолган култепадан одамга тааллуқли ҳеч нарса йўқ. Ҳайдовчи қаерга йўқолиши мумкин? Осмондан тушиб ёниб кетмаганку дея бир-бирига савол беришмоқда эди, индамадим, — давом этди Мухтор оға. — Майли, шундай бўлгани маъқул. Ҳозир ҳақ талашадиган, қонун талашадиган замон эмас. Сен, балам, тақдирга тан бер. Уларни Эгамнинг Ўзига топшири. Сенга насиҳатим, энди омон қолган бошингни асра. Ҳали ёшсан. Хоҳласанг, шаҳарда танишларим бор, хат ёзиб бераман, улар сенга ёрдам қилишади. Ҳаётингни ўнглаб ол. Агар ёш бўлмаганингда, ўзимга ёрдамчи қилиб олардим. Истасанг қолишинг мумкин... аммо ёшларга саҳро зерикарли. Ўзим ҳам шунақа эдим.

Маъруф индамади. Нигоҳи бийдай яланглик узра кезинаркан, бўлган воқеадан кўнгли оғриб, қариянинг (аслида, ундан анча ёш) ҳақлигини эътироф этди, уйга қуруқ қўл билан боргандан кўра унинг таклифиға рози бўлишни, нотаниш шаҳарда ўз толеини яна бир марта синаб кўришни маъқул топди.

Орадан бир ҳафта ўтди. Бу орада Маъруф анча ўзига келиб қолди. Кейин Мухтор оға ўз саманида, Маъруф бошқасида йўлга тушишди.

Поезд йўли икки чақиримча масофада экан, Мухтор оға йўл бўйи насиҳат қилиб, одам боласи синов

учун яратилгани, шунинг учун сабрни қаттиқ тутиши, сабрга ажр борлиги ҳақида гапириб келди.

Маъруф эса: «Ҳамма жойда бағрикенг, яхши одамлар бор. Бўлмаса, бу дунё тўнкарилиб кетарди. Нима бўлса ҳам дунёмизда яхшилар сафи кенгайсин», – деб ўйларди. Мухтор оға яқингинада Нодирга таъкидлаган гапларини такрорларди: «Ҳали ҳаммаси эсингдан чиқиб кетади. Ўшанда қозоқ чол шундай деганди дея мени эслайсан...»

Темир йўл бекатида отдан тушишди. Мухтор оға отлар жиловини йигитта тутқазиб қўйиб, кассадан чипта олиб чиқди. Поезд кўп қуттирмади. Маъруф олисдан илонизи темир йўлдан вишиллаб келаётган поездга кўзи тушиб: «Тавба, худди болалар ўйинчоғига ўхшайди-я, бепоён саҳро бағрида ҳамма нарса кичрайиб қоларкан-да», – деб қўйди... Чол қўлтиғидан бир конверт олиб унга тутқазди-да, қаерга бориши, кимга учрашишини тушунтириди. Кейин поезд келиб тўхтаб, Маъруф вагонига чиқиб кетгунча анча-мунча йўл-йўриқлар берди.

\*\*\*

Локомотив саҳрони бошига кўтариб бир-икки гудок берди-да, эшелонга бош бўлиб йўлга тушди. Маъруф вагон ойнасига қадалганча отларнинг бирини миниб, бирининг жиловидан тутиб ортга қайтаётган Мухтор оғадан кўз узмас, алланечук оғир хаёллар юқидан танаси оғирлашиб бораётганини ҳис этарди. Бир маҳал ёқимсиз шовурдан хаёли бўлинниб, ортига ўгирилди. Рўпарасидаги ўриндиқда ўтирган ўттиз-қирқ ёшлар атрофидаги эркак билан аёл очиқсан бўрилардек бир-бирини ялаб-юлқашта киришиб кетибди. Маъруфнинг ёнида омонатгина ўтирган бошқа бир йўловчи

эса кўзини қаерга яширишни билмай хижолат тортиб боряпти. Ановилар эр-хотин эмаслиги аниқ, акс ҳолда, андиша қилишар, бунақа ютоқишимаган бўлишарди. Маъруф томоқ қириб ўқрайди. Ҳалигилар уни ёш йигит билиб эътибор ҳам қилишмади. Кейин аёли нимадир деди, шекилли, эркаги уни қўйиб юбориб, орқасига таянди. Бир Маъруфга, бир шеригига синовчан кўз қадади. Кейин Маъруфдан бошлишни маъқул кўрди, шекилли, ўринни алмаштиришни таклиф қилди.

– Сиз ёш экансиз, юқорида кетсангиз, – деди беписандлик билан.

Маъшуқасининг ҳам кўзи пирпираб шуни тасдиқлаб туради.

– Йўқ, иложи йўқ, – деди Маъруф тўнглик билан.

– Вей, нега иложи бўлмас экан, ёш бола бўлсанг, – деди энди сенлашга ўтиб. – Нима фарқи бор?

– Фарқи бор! Мен атрофни кузатиб кетишим керак!

– Вой-баёв, кузатиб кетармишлар!.. – Аёл қиқирлаб кулди.

Эркак масхаралашга ўтди:

– Тепада бўлмас эканми кузатиб? Уни қаранглар!

– Бўлмайди! Чиптамда кўрсатилган жойда ўтираман, – деди Маъруф қаҳрли нигоҳларини унга қадаб.

– Бўлмайди!

Аёл нимадир деб шивирлаган эди, эркак бирдан ўзгарди.

– Бўпти, қонунчи. Бўлмаса бўлмас. Сенга ўхшаганлардан қишида қор сўраб бўлмайди. Одамгарчиликдан зифирча йўқ экан сенда...

Маъруфнинг шериги унинг гапини эшитмаёқ кескин бош иргади. Эркак-аёл миқ этмай иккинчи қаватга, лекин буларга ўчакишгандек битта жойга чиқиб кетишиди... Маъруф шунча ёшта кириб бунақа очиқча бешармликка дуч келмаган эди... Дарвоҷе, уйидан

чиқмай қўйған кейинги ўн-ўн беш йил ичидаги одамлар шунчалар ўзгариб кетганидан ҳайратга, ҳатто ваҳимага туша бошлаганди. Юраги ториқиб купедан чиқди...

– Кечирасиз, яхши йигит... Йигитча!..

Маъруф ялт этиб ўтирилди-да, қўлида сигарета тутган аёлга кўзи тушди.

– Вой, ёнгинангизда туриб чақирсамам эшитмай-сиз-а.

– Йўғ-э, эшитдим, фақат мени чақирипсиз деб ўйламабман.

– Вой-вой, гапингизни... Сизни чақираман-да. Сизга ўхшаган бошқа йигитча бормикин яна, қаранг-чи! Сиздақаси йўқ... – аёл сузук кўзларини унга қадади.

– Келинг, опа, – деди Маъруф гаши келганини яшириб ичидан кўтарилиб келаётган заҳрини ютишга уриниб.

– Нима хизмат демоқчисиз, агар тушунган бўлсам... Хизмат йўқ! Фақат ёндириб олмоқчи эдим, – қўлида-гига ишора қилди. – Шунга...

– Кечирасиз, чекмайман.

– Умуман-а?

Маъруф бош иргади.

Аёл нарироқда уймалашиб чекиб турган эркаклардан тамакисини ёндириб қайтди.

– Биринчи марта кўришим чекмайдиган кишини, – деди аёл Маъруфгамас, ойнадан ташқарига кўз тикканча. – Ҳозир мактаб болалари ҳам чекиб ётибди. – Маъруф муносабат билдиримагач, жиддийлашиб давом этди. – Пул ишлагани кетяпсиз, тўғри топдимми?

– Э, бошимни қотирма, топмадинг! – деди Маъруф ўзи ҳам кутмаганда қарилиги ва зардаси қайнаб, фақат унинг ўзигина эшитадиган паст овозда. Бундай чўрткесарликни кутмаган аёл ялт этиб қаради-да, ин-

дамай жўнаб қолди. «Ҳали кўзи очилмаган фўр бола»-ни илинтирмақчи бўлган бу аёл қилни қирқ ёрадиган прокурорга учраганини қаёқданам билсин?..

Маъруф тишини тишига қўйиб бир кунни ўтказди. Кейин шериклар янгиланди. Қўлларида гитара, елкаларида алламбало сафар халталар кўтариб кириб келган уч йигит купе ҳавосини бутунлай ўзгартириб юборди. Пиво ичишди. Гитара чалиб қўшиқ айтишди, чекишли, қарта ўйнашди, латифа айтиб купени бошларига кўтаришди. Гарчи Маъруфга деярли эътибор қилишмаган бўлишса-да, унда яхши таассурот қолдиришди. Маъруфнинг уларга ҳаваси келди. Уларга қўшилиб куйлагиси, чеккиси, ҳатто пивохўрлик қилгиси келди. Зора, шунда елкасини босиб турган юқдан халос бўлса...

Хуллас, йўлнинг қолган қисми хийла енгил босиб ўтилди.

Маъруф гарчи гавжум шаҳарда туғилиб-ўсан бўлса-да, хизмати юзасидан умрининг кўп қисми вилоятларда, нисбатан осойишта муҳитда ўтганди. Шу сабаб ҳам қариб пойтахтга қайтганида ҳовли-жойни шаҳарнинг чеккароқ мавзесидан танлади. Ҳозир, мана, тақдир тақозоси билан қўшни давлат пойтахтига келиб тушди. Мегаполис шаҳар. Кўп қаватли уйлар, машиналару йўловчилар тифиз, гужфон ва тирбанд йўллару йўлаклар. Лекин бирорнинг бирор билан иши йўқ, ҳамма ўз ташвишу муаммоси билан елиб-югуради. Ҳамма ўзи билан ўзи овора. Бирор бирорни кўрмайди.

Маъруф вокзалдан узоқлашиб, автобуслар бекатида турганча атрофни бирпас кузатаркан, ҳаво хийлагина салқин эканини пайқади. Кейин ҳалитдан бери такси керакмасми дегандай унга умидвор кўз тикиб турган киракаш томон юрганди, унинг ўзи илдамлик билан ёнига етиб келди:

— Мәҳмон, қаерга әлтиб қўяй?

Маъруф унга манзил ёзилган қоғозни тутқазди. Ҳайдовчи қоғозга кўз ташлади-да: «Бўпти, кетдик», — деди...

Йўллар кенг қурилганига қарамай, машина қўплигидан тифиз, тирбандлиги боис уларнинг машинаси тўхтаб-тўхтаб, олис бўлмаса-да, бироқ бир соатдан ортиқроқ юриб катта бир бино ёнига келиб тўхтади. Бинога кираверишда — эшик ёнидаги лавҳада Мухтор оға айтган идора номи катта-катта қилиб ёзиб қўйилган экан. Маъруф хотиржам тортиб эшикдан кирди-да, посбон йигит столи устидаги телефондан қўнғироқ қилди. Ўзини таништирди, Мухтор оға юборганини айтди. Бирпасда ичкарига киришга рухсат берилди. Посбон йигит рухсатнома ёзib бериб, лифтда қайси қаватга кўтарилиши, неchanчи хонага киришини тушунтириди...

Узундан-узун шинам йўлак. Икки томонда учтадан эшик. Рўпарадаги эшик олдида дид билан кийинган, жуда ҳам чиройли котиба қиз компьютерда ёзib ўтирибди.

Қиз Маъруфни кўриб одоб юзасидан унга қулиб қаради, унинг бу қарашида сен бу ёққа қандай кириб қолдинг деган ҳайратни ҳам сезиш мумкин эди. Бир умр катта даргоҳларда хизмат қилган Маъруф қизнинг ҳайрати сабаби унинг одмигина кийим-боши сабабли эканини дарҳол фаҳмлади. Бироқ бу қарашибга эътибор бермай кимнинг олдига келганини айтди. Котибанинг юзидаги ҳайрат яна кучайиб, ўтиришга ҳам таклиф қилмай ҳозир дея ичкарига кириб кетди. Бироз фурсат ўтиб бошлиқ хонасидан қайтиб чиқиб, уни қатор тизиб қўйилган ўриндиқлардан бирига ўтириб кутиб туришга таклиф қилди. Бу ерда ичкарига кириш мақсадида иккита кўринишидан европалик

кишилар ўтиради. Маъруф уларнинг қаршисидаги юмшоқ креслога чўқди. Котиба нима ичишини сўра-ди. «Чойми, кофеми?» – деди. Маъруф: «Сув», – деди оддийгина қилиб. Котиба бежирим идишда унга сув узатиб, яна ичкарига кириб кетди.

Икки европалик уни қизиқсиниб, айни чоғда, бе-писандлик билан қузатиб туришарди. Бундан ғаши келган Маъруф ҳам бунга жавобан менсимаган бир қиёфада уларга кўз қадади. Айни чоғда, бир ҳангома-ни эслаб кулимсиради: Афанди бир куни тўйга борибди. Унга ҳеч ким эътибор бермабди. Ичкарига таклиф ҳам қилишмабди. Зийрак Афанди дарҳол уйига қай-тиб, яп-янги кийим-бошларини эгнига илиб чиқибди. Тўйхона эшигига турганлар энди уни бутунлай бошқача қарши олиб, ичкарига таклиф қилишибди. Афандининг қитмирлиги тутибди. Олдига ош қўйиши-са, ўзи емасмиш-да, «Е, тўним, е, тўним», – деб янги чопонининг енгини товоққа узатармиш... Хонадагилар бу холатни тушунтириб беришларини сўраса, Афанди: «Қўриқчининг одамдан фарқи нимада?» – дебди. Кишиларнинг бири ундей дебди, бири эса бундай. Хуллас, Афанди: «Тополмадиларинг, иккисининг ора-сида биргина фарқ бор: бирида мия бор, бирида эса йўқ», – дебди қисқагина...

Ичкаридан котиба қўлида бир даста қофоз кўта-риб чиқаркан, ҳалиги европанусхаларни ичкарига таклиф қилди. Қабулхонада ёлғиз қолган Маъруф де-вордаги суратга эътибор қаратди. Унда бир аёл узун сочи билан яланғоч танасини яширганча ишончсиз ва оғир қайғуга ботган нигоҳ билан термилиб турарди. Маъруф: «Имконияти кенг одамларга изтиробли аёл суратининг нима қизифи бор экан?» – деди. Аёлдаги сирли нигоҳ уни ҳам ўзига ром этаётганини ҳис қи-либ, рассомнинг бу ишига қойил қолиб: «Санъатнинг

таъсир кучига ҳеч нарса тенг эмас», — деди хаёлан. Кўп ўтмай ҳалиги хорижликлар чиқиб келишди. Иккиси ҳам кайфиятсиз. Маъруфга қараб ҳам қўймай, котибага ҳам совуққина бош ирғаб қўйиб чиқиб кетишиди. Котиба яна ичкарига мўраладио ўша заҳоти ўша оҳангда, кулиб, лекин бу сафар менсимаганини ортиқ яшиrolмай Маъруфни ичкарига таклиф қилди.

Қабинет кенг-мўл, жуда ёргуғ, катта-катта ойнالаридан шаҳар яққол кўриниб турарди. Ўртада ёзув столи, атрофига чарм қопламали креслолар жойлаштирилган, тўрда эса, спорт билан шуғулланса кепрак, мушаклари бўртиб чиққан, қалин қошлари чимирилган эллик-олтмиш ёш ўртасидаги киши қаҳва ҳўплаб ўтиради. Маъруф эшикдан кирган ерида таклиф кутиб тўхтади. Салом берди. Бошлиқ бургутдек нигоҳи билан унга тикилди. Сўнг қаршисидаги креслога ишора қилди. Маъруф кўрсатилган жойга омонатгина чўқди-да, Мухтор оғанинг хатини узаттиди. Хатни ўқиб чиққач, бошлиқнинг нигоҳи юмшади. Тоза қиртишланган иягини силаб, ўзича ниманидир ўйлади, сўнг: «Мухтор қозоқ яшашни билади», — дея кулимсиради.

Жимлик. Бошлиқ креслога яхшилаб ўрнашиб, қаҳва ҳўплаганча ўйга чўмган. Жимлик боиси аниқ: бошлиқ уни зимдан кузатяпти, кўзига қараб қўнглидагини билиб олмоқчи. Маъруф бошлиқнинг синчков нигоҳи билан тўқнашмаслиги учун кўзларини қаёққа олиб қочишни билмай, охири бошини эгиб олди.

Айни чоғда, бир нарса уни ҳайрон қолдира бошлади: олисдан-олис бир чўлда йилқи боқиб юрган оддий йилқибоқарнинг катта бир шаҳар марказида танда қурган манови одам билан қандай алоқаси бўлиши мумкин?! Мабодо бирор жиноий гуруҳнинг у ёқдаги

вакили бўлмасин Мухтор оғамиз... Йўғ-э, ўхшамайди.  
Ҳа, майли, тақдирда борини кўраверамиз.

– Қўлингдан нима иш келади?

Ҳаёлга чўмиб кетган Маъруф ҳушёр тортди.

– А?.. Ҳа, кечирасиз. Ҳайдовчиман...

– Яна? Бирон-бир ҳунаринг борми? Вазиятни кўриб турибсан, – деди амалдор бу жавобдан қаноатланмай.

– Ҳуқуқшунослик институтида ўқиганман. Лекин нима юмушингиз бўлса ҳам қилавераман, – деди Маъруф тилига келган сўздан журъатланиб.

Маъруфнинг жавоби ўрнига тушди, чамаси, бошлиқ столи устидаги телефонлардан бирининг гўшагини кўтарди. Ким биландир қисқагина гаплашди. Сўнг гўшакни қўйиб:

– Эски қонунлар тўхтатилиб, янгилари ишлаб чиқиляётган бир вақтда ҳуқуқшунос кимга керак? – деди гўё ўзига ўзи гапираётгандек.

Яна жимлик. Энди Маъруф қаердадир соатнинг чиқиллаб тургани, компьютер моторининг шифиллашини эшита бошлади. Бошлиқ бўлса уни унугандек тамаки тутатиб, ора-орада қаҳва ҳўплаб қўйиб, дera-задан кўриниб турган шаҳар манзарасига кўз тикиб ўтираверди. Бу шаҳарда дунё янгилиги бир сонияда пайдо бўлар, тез тарқалар, бир муддат ҳукмронлик қилар, кўп ўтмай янгиси пайдо бўлиб, унинг ўрнини босиб кетаверарди. Янгиликлар ортида шаҳар янада ривожланар, янги бойлар эски бойлар билан рақобатга киришар, бирори синар, бирори кучайиб кетар, бунинг орқасида минглаб одамлар бир кунда ишсиз қолар, минглаб одам иш топиб, омади юришиб кетар, кечаги йўқсил бугун миллиардерга айланар, пишқириб, босар-тусарини билмай юрган бойвачча бир қарзга ботиб, гадо бўлиб қолар, хуллас, инсон ҳаёти шу қонуният измида давом этаверди.

Маъруф отанинг бир хоббиси бор эди, у соат йифарди. «Тома-тома кўл бўлур» деганларидек, эллик йилда унинг хонаси минг хил русумдаги соатларга тўлиб кетди. Антиқа девор соатлари, думалоқ, тўртбурчак, учбурчак будильниклар, одам бўйи келадиган шкафсимон, капгири соат. Занг чаладиган соат, мусиқа чаладиган, какку, бедана бўлиб сайрайдигани, гарчи умрида манглайи жойнамозга тегмаган бўлса-да, аzon айтадигани ҳам, сас чиқармай, файласуфона сукут билан вақт ўтишини англатиб турадиган қумсоатлардан ҳам неча хили бор. Хона тўридаги маҳсус ойнаванд витринада қўл соатлари, улар ҳам минг турли, лекин иккита бир хилини учратмайсиз. Юз йил аввалги механик соатдан японнинг кунда бир янгиланадиган электрон соатларигача бор. Агар қарилиги панд бермаганида, узуксимон, сирғасимон, тутмасимон соатларни ҳам топтириб келиши ҳеч гап эмасди. Маъруф Заирович четда кўп бўлган, дам олишда, сайру саёҳатда, хизмат юзасидан. Қаерда бўлмасин, кўзига оловдек кўринган соатни харид қиласверарди. Бундан ташқари, унинг ишқибозлигидан хабардор ёру дўстлари туғилган кунидами, бошқа бир «ювиш, нишонлаш» тадбирлари бўладими, ҳазилу чин аралаш энг яхши совға сифатида антиқа-антиқа соат кўтариб келишаверарди...

Нодир Маъруф чолнинг лошига кириб олиб, хонанишин бўлиб қолганидан бери эрмаги ана шу соатлар коллекцияси бўлиб қолди. Илгари ижара пули тўлаш учун бир-икки марта хонасига кирганида деворни тўлдирган соатларни кўриб ҳайратга тушганди. «Тавба, шунча соат нимага керак?» – деб ажабланганди. Кейин тушуниб кетди: ҳа, ҳар кимнинг ўз қизиқиши

бор. Раҳматли отаси бөг жинниси эди. Бирон жойда ўз боғида йўқ дарахтни кўриб қолса бас, албатта, шу дарахтдан олиб келиб ўтқазарди. Бўш вақти атрофида парвона бўлиб, ёш болани парваришлагандек қарап, бу дарахт ҳақидаги барча адабиётларни титкилар, мабодо дарахт боғида унмаса, ўжарлиги тутиб, яна ва яна экар, кўчкатини олисдан олиб келган бўлса, ўша томонга кетадиган бирон кишининг дарагини эшитса, дарахтдан кўчат олиб келишни илтимос қилас, бу ишдан чарчамас, аксинча, қалби ҳузур топарди.

Нодир бир сафар чолнинг олдига кирганида бир нечта соат бараварига тилга кирди: бири черков қўнгиригидек занг чалди, бири аzon айтди. Бири какку, бири бедана бўлиб сайради. Шунда Нодир бунаقا антиқа «соатлар дўкони»да Маъруф чол қандай қилиб ухларкин деган хаёлга борди. Аммо кун келиб ўзи шу «дўкон» эгасига айланиб қолиши етти ухлаб тушига кирмаганди. Мана, энди кўнишиб ҳам қолди. Нодир аввалига ўзининг омонатлигини билгани учун хонадаги жиҳозларга, жумладан, соатларга қўл теккизмай юрди. Кейин-кейин эса айримларига қўл урмаса, масалан, мурватини бурамаса, қувватини тиклаб турмаса, тўхтаб қолиши ёдига тушиб, эътибор берадиган бўлди. Маъруф ота бедарак кетгач, ўзини ўзи чалғитиши мақсадида китоб жавонида турган ўнтача қумсоат орасидан энг каттаси ва энг кичигини олиб, ўзига яқинроқ дераза токчасига қўйиб, бошқа соат миллари билан бир хилда тўкиладиган қум зарраларига узоқ термилиб ўтиришни одат қиласди. Гўё қанчалик аниқ ишлишини ўзича текширадиган бўлди. Бора-бора каккули, бедана овозли, мусиқали, занги соатлар ҳам унинг қадрдонига айланди. Нодир баъзида, айниқса, кечалари дераза ёнидаги курсида мудраб ўтирганида биттаси кукулаб, бири занг чалиб уни уйғотар, шунда

у ўзининг ёлғиз әмаслигини ҳис қиласар, улар билан гаплашар, сирлашар ва чолнинг айёрлик билан унинг қиёфасини ўғирлаб кетганидан нолиб: «Барибир, кун келиб танам ҳам ўлади-ку, аҳмоқ чол. Ҳеч ким бу дунёда абадий әмас», – дея хотиржамлик билан кўзларини юмарди. Набирасими, Мажидми ё келинларидан бирори кам деганда кунига бир-икки хабар олгани бош суқар, таом киритишар, чой дамлаб беришар, шунда Нодир ўзини фирибгар, алдоқчи бир киши сифатида ҳис қилиб, уларнинг тезроқ чиқиб кетишини истаб қоларди. Ёлғиз қолгач тинчланар, яна қадрдон соатлари билан машгул бўларди.

Маъруф отанинг тебранма курсиси ҳам Нодирга ёқди. Қари танасига мос, кўзи илиниб мудраб қолса ҳам, ноқулайлик туғдирмас, ўтириб ухлаганда пайдо бўладиган оғирлик, лоҳаслик унчалик сезилмасди. Қолаверса, курсида ўтириб ҳовлини кузатиш, Маъруф ота асос солган хонадон ҳаётини жимгина кузатиш ҳам мумкин, шунда болалиги кечган ҳовлиси, ундаги ҳаёт тарзи майда-чуйдаларигача хаёлида тикланар ва... нафаси қайтгудек бўлиб соғинч ўтида ўртаниб кетарди. Қишлоқда, нафақат қишлоқ, бутун колхозда ҳамманинг эътиборидаги обрўли (ҳа, бадавлат әмас, обрўли!) хонадон эди. Энди бўлса... Онаизорининг аҳволи нима кечди экан?.. Ўша туби йўқ бочкани тўлдириш билан овора бўлса керак-да...

Нодир қиласар иши бўлмаганидан чолнинг курсисида оила аъзоларини тинимсиз кузатгани боис ҳаммасининг юз-кўзларидаги ҳар бир хатти-ҳаракатини ўқийдиган ва ўзича ҳулоса қиладиган одат чиқарганди. Назарида, кейинги пайлар Маъруф отанинг катта келини – нари борса ўттиз беш-қирқ ёшлардаги жувоннинг нигоҳида қотиб қолган мунгли ифодага эътибор қила бошлади. Ёлғизлик ёмон. Эри нима сабабдан

вақтли ўтиб кетди экан? Унинг икки боласи – қизи ва ўғли ҳам синик, қараашларидан бекаму қўст улғаяётган бўлса-да, нимадир етишмаётгани кўриниб турар, амакисининг болалариdek шўх-шаддод эмас. Э, дунёниг бир ёфи ҳамиша шундоқ экан-да. Қизиқ, Маъруф ота қаерга йўқолди? Нега жимиб кетди? Икки киши бир ўққа қурбон бўлишини, наҳотки, ўйламаётган бўлса? Камига, телевизорда ҳам автоҳалокатлар сабаб ёшларнинг қанчаси ўлаётганини кўриб турибди. Мабодо бирон фалокатта учраб, ўлиб-нетиб кетса ҳам, ҳеч ким унинг машҳур прокурор Маъруф Заирович эканини билмайди. Нодир деган киракаш ўлди деб қариндош-уругларини излаган бўлишади. Унда қариндош-уруг борми, онасидан бўлак кими бор?.. У ҳам телба... Кейин ўзини бу ваҳимали ўйлардан қутқариш учун ўрнидан туриб, хона бўйлаб кезинар, шкафларни титиб кўтар, соатлардан хабар олар, китобларни титкилар, баъзида яқингинада ўзининг ижарачи бўлиб юрган кунларига хаёли кетар, чолга кўринмаслик учун елкасини қисиб кириб-чиқиб юрганларини эслаб қултиси қистарди. Чол унинг ҳамма хатти-ҳаракатини мана шу ерда ўтириб, бемалол кузатиб ўтирган экан-у, у содда бўлса...

Мажидга ҳурмати тобора ортиб бораарди Нодирнинг. Қамгар, босиқ йигит. Қиличдек тўғрисўз. Оила муҳитини тўғрисўзлиги ва адолатлилиги, шу билан бирга, самимийлиги билан шубҳа-тумонларсиз бошқарар, натижада овсинлар жуда аҳил, опа-сингилдек, лекин ҳамма ўз ишини билиб-билиб қилар, бирор бирорвнинг ишига аралашмас, хуллас, чолнинг ўғли яхши тарбияга кўрганди. Мажид етим жиянларини айирмас, ўз фарзандларидек кўтар, кўчадан нима оп келса, жиянларига ҳам баравар улашар, жиянлар ҳам, худди ўз оталари кириб келгандек, машина овози эшитили-

ши билан югуриб чиқишиди. Нодирнинг фаҳмлашича, иккала рўзгор таъминоти ҳам Мажиднинг зиммасида эди. Нодирнинг ҳозирги ҳолатида гарчи унга ўғил ҳисобланса-да, аслан йигирма беш ёшлар катта, ҳаётни кўрган, оқ-қорани таниб улгурган Мажиднинг олдида ўзини ёш боладек ҳис қиласди. «Ўғил», мабодо «отаси» дераза ёнида кўринмаса, тўғри хонага кириб келар, Нодир билан салом-алик қиласар, аҳволи, соғлиғини суриштирас, Нодир бош иргашдан, «Яхши-яхши, хавотир олма», – дейишдан нарига ўтмасди. Чунки битта ножӯя гап билан сирни очиб қўядигандек юраги пўқиллаб турарди. Масалан, айтайлик, «Ота, фалончи оғайнингиз ўтиб қолибди», – деса, «Қайси фалончи?» – деб юборса нима бўлади? Юзига ниқоб тортилгани, отасининг жасадига кириб олгани фош бўлиб қолмайдими? Хайрият, ҳозирча бунақа нохушлик рўй бермаяпти. Аксига олиб, чолдан ҳам дарак йўқ... Шу боис ҳам Нодир эрта саҳардан дераза қаршисига ўтириб олар, Мажидни ичкарига киритмаслик учун ўзини нима биландир машғул кишидек тутар, қандайдир китобни бош кўтармай ўқиб ўтирас ва шу йўл билан «ўғли»ни ичкарига киритмасликка, дераза орқали саломлашиб ё хайрлашиб қўя қолишга интиларди. Мажид ишга отлангач, эрини кузатгани чиққан келин Нодирга нонушта тайёрлиги хабарини берар, у ошхонага чиқиб кетгач, хона ҳавосини алмаштириб, супуриб-сидириб қўярди. Бундай ҳаётнинг битта яхши томони бор эдики, еб-ичишдан зориқмас, тирикчилик ташвишини чекмас, ой сайин каттагина нафақа олиб турар, аммо харжлаш имкони бўлмаганидан тортмага ташлааб қўярди. Бошқа тарафдан, хавотиру ҳадикнинг зўридан егани ичига тушмас, тобора бор-йўқ қувватидан ҳам ажralиб бораётгандек эди. Наҳотки, йигирма уч ёшида саксон олтига кирган чолга айланиб,

дами ичида ўлиб кетаверса? Дунёдаги ягона суюнчиғи – онаизорини эгасиз ташлаб-а?!

Шундай кунларнинг бирида миясига бир фикр уриб қолди. «Барибир, онам мени танимайды, қайси қиёфада бўлсам ҳам, бир кўриб қайтсан бўлади-ку», – деди. Кун пешиндан оғиб қолган эди. «Нима бўпти, таксида бориб келаман, пул бўлса бор». Ростданам, ярим соатлар нари-берисида у ўзини касалхонада кўрди. Дарвозадан ичкарига кириши билан ҳовуз ёнида тўдалашиб турган беморларга кўзи тушиб улар томонга юрди. Онаси кўринмади. Аланглаб атрофни кузатди. Йўқ. Чиқиб қолар деган умидда ҳовуз бўйидаги ўриндиққа ўтирди. Бутун танасида ҳоргинлик туйди. Бирпас ўтириб, кейин онасининг палатаси томон бормоқчи эди.

Атрофни кузатди. Даражатлар барги сарғайиб қопти. Бирпасда-я! Наҳотки, орадан шунча вақт ўтиб кетибди. Ахир кечагина эмасмиди мана шу ўриндиқда ўтириб онасини кузатгани? Ўшанда бир тўда беморлар манови ҳовуздан навбат билан сув олиб ёғоч бочкага қуишишар, сув ўша заҳоти идиш ёриқларидан шариллаб оқиб яна ҳовузга қайтиб тушар, ҳовуз суви камаймас, ёғоч идиш тўлмас, аммо беморлар бунга парво қилишмас, ажабланишмас, тартиб билан ўз ишларида давом этишар, бир неча талаба бўлса ҳафсалла билан уларнинг ҳаракатини дафтарларига қайд қилиб боришар, бирон беморнинг: «Бу ишимиздан нима наф?» – дейишини кутишарди. Ана ўша талабалардан биттаси ўшанда: «Эртага Наврӯз, биз бўлсак жинниларга ўхшаб байрамниям билмаймиз», – деганди. Бундан чиқди, ўртада баҳору ёз ўтиб кетиб, куз ҳам кирибди-да!. Ишқилиб, тирикмикан? Юраги ториқиб ўриидан туриб онасини шифокорлардан суриштириш мақсадида юрмоққа шайланди. Бироқ қадам босишта келганида... дармонсиз оёқлари бўйсунмади. Алам билан:

«Эй Худо», – деб юборди. У шу тобда ўзининг қандай аҳволдалиги, мункиллаган чол эканлигини унуттанини пайқади. Бирпас нафасини ростлади-да, имиллаганча қабулхона томон кетди. Ўн қадамча юриб, яна нафаси тиқилди. Йўлак чеккасидаги ўриндиққа чўкди. Ўтган-қайтганни кузата бошлади.

– Отахон, тузукмисиз?

Нодир ўзи томон келаётган йигитни кўриб, бемажол бош иргади. Гапиришга ҳам чофи келмади.

– Ассалому алайкум. Кимнинг олдига келдингиз?

Нодир олдиндан тайёрлаб қўйган жавобини айтди.

– Бир танишимни, – деди. – Олтиной Ҳайдаровани...

– Озгина шу ерда ўтириб туриング. Ҳозир кейинги бўлимдагилар чиқишади, – деди йигит. – Ҳа, ана, келишяпти.

Эшикдан иккита оқ ҳалатли йигит ҳамроҳлигидаги бир гуруҳ беморлар чиқишиди.

– Қаранг-чи, танишингиз ўшалар орасида бўлиши керак. – Йигит шундай деди-да, шошилганча кўл бўйидаги беморлар томонга кетди. У ердаги беморларни касалхона орқасига олиб ўтишиб, ичкаридан янги чиққанларни кўл бўйига бошлиашди. Нодир онасини дарҳол таниди. Тик қоматли, жиддий қиёфали онаси ҳаммадан ажралиб турарди. У шу ерда ўтирганча онасини кузатишни маъқул кўрди. Йўл-йўл пижамали беморлар боғча болалари сингари тизилишиб келиб кўл бўйида тўхташди. Бир маҳал кутилмаганда онаси ортига қайрилиб, Нодирга тикилиб қолди. Кейин сафдан ажралиб, у томонга кела бошлади. Нодир беихтиёр ўрнидан турди.

– Бемор Ҳайдарова, орқага!

Онаси шифокорнинг гапига эътиборсиз, тўғри ўғли томонга келаверди. Нодирнинг оёғига титроқ турди. Наҳотки, мени таниган бўлсалар?..

— Ўғлим билан гаплашиб олай, халақит берманг, — деди онаси уни таъқиб қилиб келган йигитга гулдираган овозда. Йигит: «Хўп, хўп», — деди-да, лекин уларнинг ёнида соқчилик туралади. У беморнинг мункиллаб қолган чонни ўғлим деганига ажабланмади ҳам. Фақат Нодирга қараб: «Қўрқманг, мен шу ердаман», — дегандай кўз қисиб қўйди.

— Нега бу лошга кириб олдинг?!

Нодир бу гапдан чўчиб тушди. Ранги бўздай оқарди. Шифокор йигит уни тинчлантирмоқчи бўлиб яна кўзини қисди.

— Ахир бу жуда қари-ку, нима, айёр чоннинг нофрасига ўйнадингми!? Ўзингни ўзинг тириклай гўрга тиқибсан-ку, болам, — деди онаси нолакор овозда. — Шунчаям гўл бўласанми?! Сени алдаб кетса, нима қиласан, а, нима қиласан?! Э, бечора болам, сенам ўшанинг макрига илиндингми, у иблис-ку, ахир! Наҳотки, одам билан шайтоннинг фарқига бормасанг?!

Онаси бир зум унга қараб қолди-да, бирдан хохолаб кулиб юборди.

— Маъруф Заирович, хароб бўпсан-ку! Аҳволингни қара! Бир оёғинг гўр лабига бориб қопти. Тамом бўпсан. Лекин сенга ўхшаганлар узоқ яшайди... Яшашнинг сирини биласан.. Аблаҳ, Бир нарса деса, бурчими ни адо этдим дейсанлар... Биз ҳам бурчимиизни адо этдик, холос...

Онаси бир зумда уни унуганини Нодир фаҳмлаб етди. «Тавба, онам аниқ-таниқ қилиб Маъруф Заирович дедими, наҳотки, уни таниган бўлса?.. Демак...

— Нодир ниманидир англагандек онасининг оғзига тикилди. — Ҳа, ҳозир кимнинг кимлиги маълум бўлади. Ҳозир ҳаммасини онам айтиб беради...»

— Сен, аблаҳ, кўра-била туриб мени қамоққа тиқдинг, а?! Гуноҳимиз сабаби беш қўлдай маълум эди-ку.

Адвокатимни оғиз очирмадинг. Ватан ҳақида, адолат ҳақида сайраб, мени халқ душманига, пахта ўғрисига чиқардинг. Бу гапимни яна қайтараман, суд залида ҳам айтган эдим: Бу қопқонни бизга ким қўйди? Ўшалар сенинг қонунингни бузди. Қонун ҳаммага баробар бўлиши керак. Буйруқни берганга ҳам, бажарганга ҳам. Биз бажарувчилар эдик, холос. Қандай қилиб буюрганга қарши чиқишимиз мумкин эди? Наҳотки, оддий ҳақиқатни, қопқонни қўйғанни ҳеч ким кўрмади? Оқибатда қабиҳ ва тубан одамлар четда қолди. Ўзбек халқи ёппасига турмага тиқилди. Анови терговни олиб бораётганларга шон-шуҳрат керак эди. Улар инсон тақдирини заррача ўйламадилар. Фақат вақтдан фойдаланиб шон-шуҳрат чўққисига кўтарилиш ниятида бўлдилар. Мана, қилған қилмиши нима билан тугади? Сен бўлсанг ўшаларнинг лайчасисан, ўлаксахўрсан!.. Ҳой жиннилар, қаранглар, таниб қўйинглар, манови қари кўпрак – прокурор! Мени хароб қилган, жинни қилған ифлос мана шу! Энди мени томоша қилгани келибди! Ҳозир мен сени ерга чалпак қиласман!..

Онаси шундай деганча унга томон юрди. Бироқ унинг ортида турган ҳалиги шифокор йигит эпчилик билан тўхтатиб қолиб, қўлинни орқасига қайирди. Иккинчи оқ халатли ҳам ёрдамга етиб келди. Қаерданdir огоҳлантирувчи сигнал янграб, ичкаридан хизматчилар югуриб чиқишиди. Кўплашиб онаси бечорани сурдраб кетишаркан, у овози хириллаб, тинимсиз: «Қани сени лошинг, айёр чол қиёғангни ўғирладими? Кутма. Изла. У ўз-ўзидан ортга қайтмайди», – дея бақирди.

Бу учрашув Нодирга оғир ботди, ҳолсизланниб ўриндиққа ўтириб, ичи тутдек тўкилиб: «Мен ўзи бир касофатман», – деди ўзига ўзи...

Маъруфни шаҳар марказида қад кўтараётган қурилишга жўнатишди. Уни бир дунё қоғозларни қўлтиғига қистириб олган, қирқ ёшлардаги, пўрим кийинган киши кутиб олиб, ўзини Александр, Саша деб танишитирди.

Айни чоғда, Маъруфнинг ташрифи янги танишига ёқмагани, қандайдир ўшбҳа билан қараётганини седи. Саша ҳам ҳушёр экан, вазиятга ойдинлик киритди:

– Гап бундай, оғайни. Қаердансан, кимсан, бунинг аҳамияти йўқ, фақат айтилган ишни сидқидилдан бажарсанг бўлгани, ҳеч ким сенга финг демайди. Тушундингми?!

Маъруф бош иргади.

– Унда кетдик. Вазифани йўл-йўлакай тушунтираман. Русчани билганинг, тоза гапиришингнинг ўзи бир ютуқ. Хўжайнининг айтишича, ҳайдовчилик қўлингдан келар экан. Аммо бу кам. Сендан қандай фойдалансам экан? – деди Саша юришдан тўхтаб, Маъруфнинг кўзларига тикилганча.

– Билмадим, – дея елка қисди Маъруф унга тик қараб.

– Бирон нарса ўйлаб топармиз, – деди Саша негадир ҳафсаласиз. Унга Маъруфнинг нимасидир ёқмаётганди, ўзини бемалол тутишими ёки айнан хўжайнин томонидан кириб келишими ...

– Шаҳарга чиқиб туришинг учун ҳужжат тўғрилаб бераман. Айтиб қўяй, бу ерда ҳар жойдан келганлар кўп, уларни мусоғир кўриб пулинни шилишга ҳаракат қилишади. Айниқса, ментлар. Озгина гўлроқни кўрса, ҳатто ҳужжатлари тўғри бўлса ҳам, тан олишмайди. Қалбаки деб туриб олишади. Қисқаси, ҳамманинг нијати қандай бўлмасин пул ишлаш. Кучи етган ожиз-

нинг устига чиқиб тепкилайди. Ҳақиқий темир-бетондан қурилган ўрмон. Нима бўлганда ҳам бу ўрмонда адашмаслик керак. Қулдорлик даври. Қонун одам савдосини тақиқлайди; бу тўғри, одам савдоси йўқ. Лекин имконсиз одамлар жуда кўп, улар ўз-ўзидан қулга айланиб қолишган. Давлат раҳбарлари мамлакат ривожи ҳақида оғиз кўпиртиришади, аммо ночор, тирикчилик фамида боши қотган ҳалқни ҳисобга олишмайди. Энди бошқа юртлардан келиб қолганлар-нинг тақдири ундан ҳам беш баттар. Жиноят ва ёлғон болалаб кетган. Гапнинг қисқаси, келгиндига ҳам, туб аҳолига ҳам, ҳеч кимга ишонма, ҳар қандай шароитда ҳам биринчи бўлиб менга қўнгироқ қил, фақат мени алдама! – деди қатъий қилиб.

– Алдашнинг нима кераги бор? – деди Маъруф ажабланиб. – Нима деб алдайман?

Саша унга яна шубҳали назар билан қараб:

– Шунчаки айтдим-қўйдим-да. Бошида ҳамма шунача дейди. Кейин қўлига бир-икки сўм пул тушгач, фикри ўзгаради, – деди.

Саша Маъруфни эргаштириб қурилиш кетаётган баъзи бир жойларни танишитирди. Маъруф эса олти қаватли қилиб кўтарилаётган бинони, атрофда фимирлаб юрган турли миллатга мансуб кир-чир одамларни, оёқ остида бетартиб сочилиб ётган қурилиш ашёларини кўздан кечирапкан, умрида оғир меҳнат қилиб ўрганмаган, боз устига, манови жаги тинмай гапираётган одамнинг сўзлари жонига тегиб, «Эплаб кета оларми-канман?» – деб ўйлади.

– Яна бир нарсани айтиб қўяй: бу ердагиларнинг кўпчилиги ҳужжатсиз одамлар, – дея жаврашда давом этди Саша. – Бориники ҳам қалбаки. Қўриб турибсан: қурилиш атрофи ўралган, кириш эшиги битта. Мабодо текширувчилар келадиган бўлса, қурилиш

эгалари бизни олдиндан бохабар қип қўйишади. Куттилмаганда келадиганлари ҳам бўлади. Бунақа вазият кўпроқ раҳбарлар алмашаётганда ё бирон-бир тушунмовчиликми, келишмовчиликми юзага келса содир бўлиши мумкин. Бошқа вақтларда хавотирланмаса ҳам бўлади. Лекин, барибир, ҳушёр бўлганинг яхши. Яна бир нозик томонимиз: тунда тўда-тўда бўлиб арzon фоҳишалар келишади. Уларни қайтаришнинг сира иложи йўқ, сабаби: ишчиларнинг ҳаммаси эркаклар, қолаверса, улар ҳужжатсиз, шаҳарга чиқишолмайди. Биласан, эркак зотини аёлсиз ушлаб туриб бўлмайди. Лекин ишчиларнинг ҳужжатини қонунийлаштиrsак яна ёмон. Уларга эркинлик бериб қўямиз. Ҳужжати қалбаки бўлса, бирон жойга кириб ишлаб кетолмаслигини билишади. Оқибатда ўз-ўзидан бизга қарам бўлишади. Шу йўл билан уларни бошқариш осон. Бирортаси чизган чизигимиздан чиқса, думини тугамиз... Ҳақиқий ҳужжат қилишга харажат қилиш керак. Ҳаражатнинг эса ҳеч кимга кераги йўқ.

Ниҳоят, ишчилар дам оладиган ёғоч уйларнинг ёнига келиб тўхташди. Ҳалиги киши Маъруфга юзланди.

– Тўғрисини айтсам, сени бошлиқнинг ўзи жўнатгани учун ҳам мижғовланиб, шунча нарсани гапириб бердим. Бошқаларга айтилмайди бунақа гаплар. Эсингдан чиқарма, кўп одамларни ишсизлик, йўқчилик бу ерларга бошлаб келган. Ҳаммасининг нияти пул. Майли, ишлайверсак бир-биrimизни тушунадиган бўп кетамиз. Ҳужжатингни бер...

Маъруф ён чўнтағидан Нодирнинг паспортини олиб унга узатди.

– Қечгача керакли қофозларни тўғрилаб бераман, манови машинани бошқара оласанми? – деди у нарироқда турган кичкинагина юк машинасини кўрсатиб.

Маъруф индамай бориб, машинага ўтирди-да, жой торлигига қарамай, олдинга-орқага юргизиб кўрди. Кейин Сашанинг олдига қайтиб келиб:

— Яхши машина экан, — деди...

Маъруфнинг бу ерда узок қолиш нияти йўқ эди. «Бироз пул тўпласам бўлгани, кейин қайтиб кетаман», — деб ўйлаганди. Аммо кутилмаганда ишлари енгил кўчганидан хотиржам тортиб қарорини ўзгартириди: «Нодирнинг олдига озгина сармоя билан борганимга нима етсин», — дея ишга киришиб кетди...

Қурилиш ўзи бир дунё. Ҳар ким ўз ишини қиласди. Бирор фишт ташийди, бошқаси уни теради, бирорни темир-терсак, бошқаси ёғоч ишларини бажаради. Электрчи, кавшарловчи, сувоқчи, бўёқчи, кранчи... хуллас, ҳар ким ўз ҳунарини ишга солиб тикланётган бинога ҳисса қўшади. Бутун умри прокурорлик қилиб, одамлар тақдирини гоҳ у томонда, гоҳ бу томонда туриб ҳал қилиб келган бизнинг Маъруфбой эса ҳайдовчи бўлди. У ишчиларга нима кераклигини дафтарчага ёзиб олиб, дўйконлардан харид қилиб келади, баъзан ҳисобчини ёнига олиб банкка боради, баъзида маош ҳам тарқатади, кечга яқин ошпазга масаллиқ, ўзлари учун алоҳида егулик олиб келиш ҳам унинг бўйнида, кун охирида Сашага бир кунлик савдо-сотик ҳисоботини беради-да, тинчиди.

Тунда, Саша айтганидек, юзларига бўёқ чаплаб, арzon атирлар ҳидини анқитиб, ҳиринг-ҳиринг қилиб фоҳишалар ташриф буюради. Майдон бўйлаб хоналарда, умуман, эркак-аёл яқинлашишга қулай бўлган кавакларда жуфт-жуфт бўлиб ниятларига етишгач ҳаёсизларча шундай ошкора суҳбатлар қуришадики, уларнинг суҳбатидан шайтон ҳам уялиб кетади.

Ўз ҳунари ҳадисини олган аёллар бу ерга кириб келиши билан кимнинг чўнтагида пули бору кимда

йўқлигини дарҳол билишади. Пулдорларнинг чўнтакларини қоқлагунча бор-йўқ маҳоратларини ишга солишади. Пулинни туттагач эса аччиқ кесатиқ, заҳарли ҳазиллари билан уларни назар-писанд қилмай жўнаб қолишади.

... Маъруф ҳар туни такрорланадиган бу нохуш манзарадан сиқилиб, айрим лақма йигитларнинг аҳволидан юраги сиқилиб Сашанинг хонасига кирди. Қараса, Саша ҳисобчи йигит билан ўн кунлик ҳисоб-китобларини қилиб ўтирибди. Телевизор қўйилган, унда дунё янгиликлари бериляпти. Маъруф бир чеккага ўтириб, экранга тикилди. Журналист қиз қочоқлар лагеридан репортаж олиб боряпти. Лагерь қай бир денгиз ўртасидаги оролчада жойлашган экан. Уруш бораётган юртлардан қўшни давлатларга қочиб ўтганларнинг ҳаммасини шу гадойтопмас оролчага олиб келиб ташлашган. Журналист қочоқлардан интервьюю оляпти. Биттаси: «Бу ерда вақтингча яшаб турасизлар дейишганди. Ўн икки йилдан бери бизни қайтариш ҳеч кимнинг эсига келмаяпти. Аҳволимиз ёмон, ёввойи қавмга айланиб боряпмиз», – деса, бошқа бири: «Энг ёмони, бу ердаги бетартиб жинсий ҳаёт сабабли ватансиз, фуқароликсиз, ноқонуний болалар туғиляпти. Аҳвол шу тарзда давом этадиган бўлса, бу болалар ушбу тушунчаларни вақти-соати келса онгига ҳам сингдира олмай қолишади. Эрта бир кун қонунсиз жамиятимиз инсоният учун катта хатар түғдирадиган авлод бўлиб етишади, – деб куюниб гапиради. – Бу гапларимни дунё аҳлига етқазинг. Оролчамизни улар кўришсин. Инсон ҳуқуқларини ҳимоя қиласиганлар бошларини яхшироқ қотиришсин».

Суҳбатлар орасида омонат палаткалардан иборат қочоқлар лагери манзараси бериб бориляпти. Одамлар тўғри келган жойда олов ёқиб, овқат пиширишар, ён

атрофда чиқиндиilar тoғ-toғ бўлиб уюлиб ётар, қип-ялангоч, қилтириқ болакайлар ахлат титиб юришарди.

Журналист қиз кекса бир одамга микрофон тутди. «Мен бу ерга келганимда йигирма беш ёшлий йигит эдим, – деди у. – Ёшим элликдан ошди. Бу ваҳший ҳаётдан кўра юртимдаги урушда ўлиб кетсам яхши эди. Ишонсангиз, мана шу лаънати оролдан ташқарида ҳам ҳаёт борлигини аллақачон унутиб юборганиман...»

Ёшгина бир йигит, афтидан, қочоқлар сафига яқинда қўшилганлардан бўлса керак: «Бизга бутун дунёдан гуманитар ёрдамлар келиб турибди, – деди. – Уруш тугаса, уйларингга қайтасанлар дейишяпти. Аммо бу ерда йиллаб яшаётганларни кўриб қандай қилиб бундай «олижаноб ваъдалар»га ишониб бўлади? Олдимиизда бир йўл қолмоқда: атрофимизни ўраб олган денгизда сузиб, агарда балиқларга ем бўлмасак, қирғоққа етиш. Оролчанинг бир чеккасида қабристон пайдо бўлган. Ўша ёлғон ваъдаларга ишонган қочоқларнинг кўпчилиги қабрда ётибди. Қунимиз битиб, уларга қўшилсак керак. Лекин бу ердаги тирик мурдалар оролида яшащдан кўра улкан денгизда ўлиб кетиши минг марта афзал... Денгиздан умид бор...»

– Э, жонимга тегиб кетди шу қочоқларинг ҳам!..  
– Ҳисобчи қўлидаги қаламни шарақ этказиб столга урди. – Қачон қарасам, қочоқлар, очлар, дарбадарлар. Энди, одам бор ерда уруш бўлади. Уруш бўлгач, қочоқ, дарбадар кўпаяди. Бу табиий ҳол, ҳаёт қонуни. Нима дединг, Саша? Пультни олиб бер.

– Сен ҳақсан, файласуф, лекин дунё янгиликларидан хабардор бўлиб туриш керак. Информация ҳал қиласди ҳамма нарсани, – деди Саша калкульятордан бош кўтармай.

– Информация сенга керак. Сенинг хизмат вазифанг. Мен рақамлар билан ишлайман, одамлар билан эмас.

«Файласуф» шундай деди-да, экранга пультни тўғрилаб тугмачани босди. Бошқа каналда концерт берилётган экан.

– Ҳа, бу бошқа гап. Билмасанг билиб қўй, Саша: калласи бор бошлиқлар қулларини урмайди, сўкмайди, мусиқа қўйиб беради. Мусиқа билан бошқаради.

– Сен билан тортишган одамнинг ўзи аҳмоқ, – деди Саша уф тортганча. – Энди қурилиш тепасидаги кранга карнай ўрнатиб қўйиб, куни бўйи концерт эшиттиришим қолувди.

– Худди шундай қилишинг керак. Балли! Зўр иш бўлади. Бир тажриба қилиб кўр, бир ҳафтада натижаси кўринади, – деб ҳиринглай бошлади ҳисобчи.  
– Нима қилдинг, мана, Маъруфга айтсанг, эртагаёқ топиб келади, а, нима дединг?

Маъруф индамади. У бу иккисининг доимий адидасига эътибор бермас, гапга аралашмас, муносабат билдирамасди. Лекин ҳисобчининг файласуфлигига баъзи-баъзида ўзича тан бериб қўярди. Яна шуниси ҳам бор эдики, у атрофдагилардан икки баравар кўп яшаб қўйган эмасми, уларнинг донишмандлигидан баъзан кулгиси қистарди. Чунки Маъруф эллик йил муқаддам англаб етган ҳаёт мантифи устида улар ёш болалардай тортишиб ётишарди. Маъруф гоҳ ажабланар, гоҳида: «Ҳар авлод ўзича бир дунё яратади», – дерди. Лекин унга бир нарса тинчлик бермайди, бугунги авлод негадир зиёга, илмга эмас, кўпроқ бойлика, енгил-елпи, ҳой-ҳавасга интилаётгани, бойлик ҳамма нарсадан устун келиб, ҳаттоқи қонунни ҳам ўзгартириш кучига эга бўлаёттани, мияси ишламайдиганлар ҳокимият тепасига ўз-ўзидан чиқиб қолиб, мияси ишлайдиганларни бошқараётганини кузатаркан, «Ҳеч бу араванинг юриши ўзгармади-ўзгармади. Ҳаммага аён, пулни, бойликни бир сонияда қўлга ки-

ритса бўлади, аммо одамзод миясини тўлдириш учун йиллар сарфлаш лозим. Ана шунинг учун олдинга интилган жамият тўла мияларнинг қадрига етиши керак, шунда ўз-ўзидан мамлакат бойийди ва бу мамлакатда қонун устувор бўлади», – дея куюнар, шу аснода кайфияти бузиларди.

Куз охирлаб қолди. Ҳадемай бу ерларга қор тушади. Кетмайсанми, Маъруф, Нодирнинг аҳволи не кечди?.. Баъзида бир хаёли телефон қилиб, ундан ҳол-аҳвол сўрашни ҳам ўйларди-ю, яна қўришиб гаплашган маъқул дея фикридан қайтарди.

Қуёшнинг тафти кетган, ҳаво илиқ, вақти-вақти билан майдалаб ёмғир ёғади, онда-сонда қор учқунлайди. Қурилишда иш жадал, қиши киргунча бинони тиклаб олиш керак. Бинонинг ички ишларини қишида ҳам қиласверса бўлади. Қечки сменалар ҳам ташкил этилди. Саша ишчилар сонини кўпайтириш учун Маъруф билан шаҳар четидаги «қоралар» (мардикорлар) бозорига қатнай бошлади. Бозор унча юришмас, Сашани таниб қолишган, шекилли, унча-мунчаси унга эргашмас, мабодо ишга ўта муҳтожлар унга розилик билдиришса ҳам, кимлардир қулоқларига қўйиб қўядими, Сашага ҳужжатларини беришмайди. Икки-уч кун ишлаб вазиятни билгач аксари кетиб қолади. Лекин шундайлари ҳам учрайдики, на иш, на тураржойи бор. Ҳужжатларини йўқотиб, боши берк кўчага кириб қолишган. Улар ўз ихтиёрлари билан Саша томонидан яратилган «очиқ турма»га кириб келишади.

Қурилишда минг одам бўлса, бир-бирига ўхшамаган минг хил тақдир. Илгари улар ўз юртларида тинчгина ишлаб юришган, заводда, фабрикада, колхозларда... Тузумнинг ўзгариши билан аввалги изчил ҳаёт тарзи издан чиқди. Ишсизлар кўпайди. Одамлар кун ўтказиш учун дунё бўйлаб тарқаб, мана шундай

қурилиш майдонларида тирик мурдага айланишди. Бу ердагилар Сашадан шу даражада қўрқишидали, Маъруф аввалига бу ҳолатдан газаби қайнарди. Ишчиларни тушунмасди. Айниқса, Саша қаҳр отига минганида Азроилга учрагандек титраб қолишади. Улар шунга мажбур. Чунки улар таянадиган заминнинг ўзи йўқ, на тириклар, на ўтганлар рўйхатида бор улар. Шу сабабдан Саша уларни одам ўрнида кўрмасди. Фақат, ҳа, фақат Маъруфга бошқача кўз билан қарап, бунга сабаб айнан қурилиш эгаси қўнғироғи орқали келгани. Шунинг учун ёнидан узоқлаштирмас, ҳисобчи бўлса файирлик қилас, қандай бўлмасин ораларини бузишга интиларди. Олдинига Саша Маъруфдан хавотирда юрди. Сабаби, у катта бошлиқнинг айгоқчиси бўлиши мумкин эди-да. Ҳисобчи ҳам шундай хаёлда эди. Юқорининг «қулоғи» деб ўйлаганди. Ким шубҳа қиласди, албатта, қинғир одамнинг кўнгли ҳам қинғир бўлади-да. Ҳисобчи пиҳини ёрган одам, қурилиш харжатларини шундай ошириб, кўпиртириб ёзардики, ой охрида ўз-ўзидан каттагина маблағ чўнтағига тушар ва уни Бижо билан баҳам кўради. Ҳамкорлар бир-бирларини кўярарга кўзлари бўлмаса-да, манфаат деган бир юҳо кўринмас иплар билан уларни бир-бираiga боялаб ташлаганди. Маъруф, албатта, буни сезмаслиги мумкин эмасди. Лекин у иккисига ҳам аҳамият бермас, аралашмас, ўзига юқлатилган вазифани индамай садоқат билан бажаар, ортиқча гапларга чалғимас, ҳеч ким билан тортишмас, ўзи билан ўзи машғул эди. Буни Саша ҳам, ҳисобчи ҳам кўп ўтмай тушуниб етишди. Лекин бир нарса улар учун қоронгилитича қолаверди. Ахийри «Бу бола ўз юртида катта бир жиноятта аралашиб қолган-у, бошлиқдан кимдир уни мана шу темир-бетон ўрмонида вақтинча яширишни илтимос қилган» деган тўхтамга келишди.

Йигитнинг ўтмиши Саша учун ҳам қизиқ эмасди. Аммо ўзининг тажрибасидан келиб чиқиб Маъруфни виждонли, яхши оилада тарбия кўрган йигит деб ҳисоблар ва уни ўзига янада яқин олишга ҳаракат қилиарди. У бир нарсани биларди: Маъруф уни ишорасиз, сўзсиз ички бир сезги билан тушуниб турарди. Маъруф эса ўта жizzаки, уддабурро, баъзида инсофсиз, қаллоб, баъзида яхши одамга айланиб қоладиган Сашани шунча ботқоққа ботгани билан, одамгарчилигини йўқотмаган дея ҳурмат қиласарди. Масалан, айрим йигитларнинг алдов орқасидан келиб қолгани, ночорлигидан юлгич одамлар қурбонига айланганини билгач ҳеч бир тамасиз ҳужжатларини тўғрилаб бериб, юртларига қайтариб юборганини ўз кўзи билан бир неча кўрди. Хуллас, Саша қизиқ одам әди.

Маъруф англаган яна бир аччиқ ҳақиқат шу бўлдики, мусофириликда ҳужжатсиз қолган одам Бермуд учбурчагига тушиб қолганлар ҳолига тушиши аниқ әди. Илгари одамлар уммонда сирли равишда фойиб бўлса, эндиликда мегаполис шаҳарлар уларни шундай ютиб юбораётганди.

Бир куни тушга яқин ёмғир майдалаб ёғиб ўтди. Маъруф дўконлардан харид қилиб келган нарсаларини омборга тушириб, ҳисоб-китоб қилиш мақсадида Сашанинг хонасига шошилиб бораарди. Сашанинг эшигига етдим деганида бироннинг жон ҳолатда бақириб юборганини эшитиб таққа тўхтади. Қараса, бир неча одам темир-терсаклар уюми томон чопиб боряпти. Уюм устида нимадир қимирлагандек бўлди. Маъруф ҳам ноҳуш бир воқеа юз берганини билиб ўша томонга югорди. Ишчилар орасини ёриб ўтиб, бундай қарадиую ўзини орқага олди. Қирқ ўшлардаги бир ишчи оғзидан қон келиб, инграб ётарди. Икки киши темир-терсак уюми устига чиқиб, уни олиб тушмоқчи бўлишди.

Маъруф қараса, ҳалиги одам кўйкраги билан темир қозикқа санчилиб қолган, агар ҳозир уни сууриб олиши-са, тамом, ўлиб қолиши ҳеч гап эмас. «Тўхтанглар, тўхтанглар», – деб уларга фикрини тушунтиргунича ишчилар ҳовлиқиб ишчини қозикдан сууриб олишиди. Маъруф бошини чангллаганча ўтириб қолди. Тепадан қулаб тушган ишчи қонига бўялиб, боши устида тўпланган ҳамроҳларига, ёмғир томчилаётган осмонга илтижоли кўз тикканча бирпас инграб ётди-да, жимиб қолди.

Саша етиб келиб нима бўлганини суриштира бошлиди. Ҳеч ким ҳеч нарса билмасди. Ҳаммага бир ерга тўпланишни буюрди. Ўзи эса марҳумнинг ёшини, қаерданлигини, охирги вақтда кимлар билан шерик бўлганини суриштира бошлиди. Шу пайт ишчилар орасидан кимдир: «Битта нонхўр камайди, биронта хандақ топиб, сасимай кўмиб ташлаш керак», – деб қолди. Бижо бошини кўтариб, бу гап кимдан чиққанини аниқламоқчи бўлди. Ҳамма жим эди. Ранглари ўчган... Фақат Сашагина қошларини чимириб у ёқдан-бу ёққа юриб, воқеани ўзича таҳлил қиласарди. Бу орада тепа қаватларда юрган ишчилар ҳам тушиб келишиди. Сашадан садо чиқмасди. Ҳамма жим. Ёмғир майдалаб ёғарди.

Саша ишчиларни бирма-бир кўздан кечириб чиқди-да:

– Охирги марта ким у билан ишлаган бўлса, бир қадам олдинга чиқсин, – деди.

Ишчилар орасидан ўрта бўйли, бақалоқ биттаси ҳамманинг ғазабини қайнатиб иршайиб чиқиб келди. Саша унга дикқат билан тикилиб:

– Нима бўлди? – деди.

– Нима ҳам дердим, – деди бақалоқ яна нимагадир иршайиб. – Иккимиз олтинчи қаватда фишт тераёт-

ган эдик. Бир вақт жойида кўринмай қолди. Бирон иш билан кетгандир деб ўйладим. Кейин мана булар бориб бўлган воқеани айтишди. Шеригинг тепадан қулааб тушди-ку дейишди. Билганим шу.

Саша унинг гапларини индамай ерга қараб эшитди-да:

- Нега куласан? – деди унга ўткир кўзларини қадаб.
- Бақалоқ яна иршайди.
- Қулганим йўқ, ўзим шунчаки, – деди.
- Ҳм, ўзим шунчаки дегин. – Саша унга яқинлашди.
- Шеригим жойида кўринмай қолди дегин-а... Бошқа баҳона тополмадингми?

Шу маҳал бақалоқ жон аччиғида сакраб тушиб бақириб юборди. Саша унинг сонига ўткир бигиз санчиб олган эди.

Саша унинг устига бостириб борар, у ортига тисарилар, «Мен эмас, мен эмас», – деб ғўлдиради.

– Сен бўлмасанг, ким? Ким деяпман?!

Бақалоқ яна додлаб юборди. Иккинчи сонига ҳам бигиз санчилган эди. Бигиз қайта-қайта санчилавергач:

– Худо шоҳид, мен буни истамаган эдим, – дея ёлворишга ўтди.

Саша энди уни эштиши истамас, гапирмас, хотиржам бир алфозда бақалоқнинг дуч келган ерига бигиз санчар, бигиз ҳар сафар бақалоқнинг семиз этидан юлиб чиқар, Саша совуқ қатъият билан бигиз учини тозалар, навбатдаги санчувга тайёрланарди.

– Сен ҳали Худони ҳам биласанми? – деди Саша яна тилга кириб. – Балки, мана бу бечорани тепадан итариб юбораётганингда ҳам Худодан ёрдам сўрагандирсан?

Бу сафар бигиз бақалоқнинг бикинига санчилди. Бақалоқ: «Вой, ўлдим!» – деб бақириб юборди. «Бақа-

лоқ шундай жазога лойиқ, Саша эса жазо беришга ҳақли», – деб билишарди, шекилли, атрофни ўраганлар жим әди. Бундан руҳланган Саша авжлана бошлади. Охир бўлмади, Маъруфнинг бардоши тугаб, ишчилар орасини ёриб ўтди-да, кўзига қон тўлган Сашанинг қўлига ёпишди.

– Ўлдириб қўясан!

Саша ялт этиб унга қаради-да, кейин бор кучи билан ирғитиб юборди. Маъруф икки қадамча нарига сурилиб бориб йиқилди, лекин ўрнидан тура солиб яна Сашага ташланди. Гарданига икки мушт туширган әди, кутилмаганда Саша ағдарилиб кетди. Маъруф бигиз санчилавериб қонга беланганд бақалоқни одамлар орасидан судраб олиб чиқа бошлади. Икки киши дарҳол ёрдамга келди. Сашанинг атрофини ўраган бир-иккитаси уни Маъруфга гижгижлай бошлади. Қолганлар Сашага ошкора қарши чиққан Маъруфга ҳайратланиб қараб туришарди.

– Нима қилаётганингни тушуняпсанми? – деди Саша жуда совуқ оҳангда унинг рўпарасига келиб.

– Сиз-чи? Бири нима сабаб бўлиб ўлди? Исботсиз, шубҳа билан иккинчисини ўлдириш – ваҳшийлик! Ёманови бечора аросатда юрган одамларга сабоқ бўлсин, қўрқсин демоқчимисиз? Шундоғам бу бечораларни ҳаёт эзиб ташлаган-ку!..

– Сен шуларни одам ҳисоблаяпсанми ҳали?! – бақирди Саша атрофдагиларга қўлини бигиз қилиб. – Бир чақага арзимайдиган тирик мурдаларни-я?! Сен шуларни деб мен билан тортишяпсанми?!

Шундай деди-да, Маъруфнинг ҳақ кўзлари олдиа ожизлигини сезиб, нима қиласини билмай қўйл силтаб одамлар орасидан чиқиб кетди...

Шундан сўнг бир ҳафтача бир-биридан аразлаган бўлиб, очилиб гаплашмай юришди. Бир куни ишчилар

ҳовлида тушлик қилишар, эндиғина шаҳардан қайтган Маъруф иштаҳаси бўлмай машинаси эшигини очганча дам олиб ўтиради. Ундан нарироқда ўтирган Саша қандайдир шарбат ҳўплаб, дам-бадам соатига қараб қўяр, афтидан, кимнидир кутаётган эди. Бир маҳал ишчилар орасидан миқти гавдали, доим мулоийм кулимсириб турадиган, етмиш ёшлардаги оппоқ соқолли бир чол ажралиб чиқди. Қўлтиғидан бир метрча бўзни олиб, ерга тўшади-да, пешин намозини ўқий бошлади.

Маъруф у билан кўп гаплашган, унинг бу ерларга кеп қолиши тарихини яхши биларди: қария қўшни мамлакатдан, ўғли келини билан ажрашиб кетгач, ногирон набирасини ўзи билан олиб қолган. Набирасини даволатиш учун маблағ керак бўлган. Эр-хотин умр бўйи жамғарган пулини эл қатори банкда сақлашган. Иттифоқ тарқалгач, пуллар алмашиб, эски жамғармалар қийматини йўқотади. Қария набирасини даволатиш учун қилмаган иши қолмайди. Қаерда яхши ҳақ тўлашса, уйидан олислигига, ёши бир жойга бориб қолганига қарамай, бориб ишлайверади. Қўли гул уста бўлгани учун ёшлар ўзлари билан бу шаҳарга олиб келишади. Олдинига уларга яхшигина ҳақ тўлашади. Кейинчалик эса: «Пулларингнинг қолганини бинони битказгандарингдан кейин оласизлар», – дейишади. Ишонишади. Чунки шу пайтгача яхшигина тўлаб келишган эди-да. Олти ойлар ўтса ҳамки, маошдан дарак бўлмайди. Бу орада қурилиш янги хўжайин қўлига ўтади. Олдингилари қаергадир фойиб бўлишади. Шундай қилиб, чол катта шаҳарда пулсиз, бошпанасиз қолади. Хотини билан ўғлига: «Пул жўнатинглар», – деб айтишга тили бормайди. Чунки уларнинг ўзи пулга муҳтож эди. Қария ҳужжатларини йўқотиб, чорасизликдан мардикор бозорга чиқиб турганида Бижонинг назарига тушади-да, бу ерга келиб қолади (Ваҳолон-

ки, қурилишга қирқ ёшдан ошганларни олишмасди. Чол эса етмишда эди). Қария фиштни яхши теради. Дам олмай ишлайди. Беш маҳал намозини ҳам ҳеч кимга малол келтирмай адо қилади. Атрофдагилар унинг меҳнатсеварлигига тан беришади, лекин нима учундир «аҳмоқ чол» деб орқасидан кулиб қўйишиади. «Одам ўзини оқлашга чиранавермай, ҳалолликни қаттиқ ушлаб, ишлайверса бўларкан-ку», – деб ўйлади Маъруф у ҳақда.

Дарвозадан катта юк машинаси кириб, ҳовлининг бўш жойига фишт тўкиб қайтиб кетди. Саша айнан шуни кутиб ўтирган экан, машина қайтиб кетиши билан ўрнидан туриб керишиб олди. Маъруфга: «Менда ишинг йўқми?» – дегандек қараб қўйди-да, яна жойига бориб ўтирди.

Ҳалиги намозхон қария ишлайдиган бригада бу фиштларни тепага ташиши керак эди. Овқатдан ке-йинги эринчоқлик билан секин-аста қўзғалишган ишчилар фишт уюми томон юришди. Қария намозини ҳали тугатмаган эди. Шунда ишчилардан битта барзангиси ортига қайтиб, унинг олдига келди. Ҳамроҳлари илжайиб кузатиб туришди. Қария энди рукуга борган эдики, орқасига тепиб қолди. Қария мункиб кетди.

– Айёр чол, ҳар доим иш кўпайганда намоз ўқишига тушиб кетади, – деб бақирди.

Маъруф машинасидан сакраб тушиб Сашага қаради. У: «Мана сен ҳимоя қилган одамлар», – дегандек кинояли кулиб қўйди. Қария қаддини ростлаб, унга бир қаради-да, қайтадан рукуга борди. Барзанги шуни кутиб турган экан, яна тепди. Кичкинагина қария бу сафар коптоқдек думалаб бориб наридаги трубага боши билан урилди, пешонасидан қон оқа бошлади. Тушлик қилиб ўтирган ишчиларнинг аксарияти, эътиқоди турлича бўлишига қарамай, йигитдан норози бўлиб,

бир Сашага, бир чолга қарап, аммо Сашадан бир ҳаракат бўлмади. Маъруф ўзи намозхон бўлмаса-да, инсоннинг бу қадар тубанлигидан ўзини тутиб туролмай, машинаси эшигини қарсиллатиб ёпиб, чолга ёрдамга шошилди. Бироқ етиб келган заҳоти барзангининг гурзидай муштидан учиб тушди. Буям анойимас, ўрнидан сапчиб туриб, унинг тумшугига калла қўйди. Барзанги нихоятда бақувват экан, Маъруфни копток қилиб тепкилади. Бунга чидаб туролмаган ҳар хил динга эътиқод қилувчи ишчилар барзангига ёпишди. Биргина қалбларида ардоқлаган нарсаси – Худога элтадиган дини қолган; уни ҳам бир аҳмоқ топтамоқда эди. Қутилмаганда барзангининг ҳам шериклари пайдо бўлиб қолди. Кимдир Маъруф билан намозхон қариянинг ҳимоясига оёққа туришди, кимдир барзангининг. Бир зумда қурилиш ҳовлиси тўс-тўполон бўлиб кетди. Маъруф билан намозхон қария тарфдорлари кўплиги боис барзанги билан шерикларини роса копток қилиб тепишди. Гўёки ҳамма бир хумордан чиқишга, тўлиб кетган ичларини шу йўл билан бўшатиб олишга киришгандай эди.

\*\*\*

Онасининг олдидан дили хуфтон бўлиб қайтган Ноидир куни бўйи хонасидан чиқмади, кечаси эса хонасида ўтиrolмай, хонадондагилар уйқуга кетгач, ҳовлида бемақсад айланиб юрди. Миясини чирмовуқ сингари ўраб, сиқиб ташлаган фикрлар унга тинчлик бермасди. Бир нарсага сира тушунмасди: онаси уни қандай таниб қолди? Чолнинг шундай зийрак ўғли ҳеч нарсани пайқамади. Қолганлар ҳам ҳеч нарсадан шубҳа қилмади. Оталарининг ўрнида ўтирибди. Лекин онаси таниди. Қандай!? Унигина эмас, ҳа, Маъруф чол-

ни ҳам таниди. Демак, онасининг судида чол прокурорлик қилган. Айбдорнинг айбини бўйнига қўйиш ва суд ҳакамларини қонунни бузган айнан шу эканлиги-га ишонтириш учун прокурор қанча уринади... Тақдирнинг ўйинини қарангки, Нодир ҳам келиб-келиб шу одамнинг тузогига илиниб ўтирибди. «Энди нима бўлмасин, уни излаб топишим керак» деган қарорга келди Нодир. Лекин қандай қилиб? Кимга ва қайси ташкилотта бориб дардини айтади? Ким ҳам ишонади? Бугунги қунда унинг бу эртагига бирон киши ишонадими? Кейин ўзининг фикридан ўзи кулди. Хўш, нима деб боради? «Менинг танамни ўзлаштириб олди. Ижара қарзим эвазига рози бўлдим», – дейдими? «Алдаб, асл ҳолига қайтишни истамай қочиб юрибди», – дейдими? Қайси тентак ишонади бу гапга? ...Ҳа, бўлди, ҳаммасини Мажидга ётиғи билан тушуниради. «Мен сенинг отанг эмасман, мен Нодирман, отанг мени алдаб, танамга кириб олди. Уни топишимиз керак. Киракашлик қилиб, бир фалокатга учраб юрмасин», – дейди. Барибир, бу фикр ҳам ўзига маъқул кўринмади. Ўғил ҳам: «Хойнаҳой, отамнинг мијаси айниб қолибди», – дейди. Дўхтирма-дўхтир олиб юриб овора қилади. Лекин нимадир қилиши керак. «Ҳа, майшатга ўрганган одам ёшариб олиб, бирортаси билан айш-ишрат қилиб юргандир-да, мен бўлсам бу ерда ичимдан қиринди ўтиб юрибман. Онам тўғри айтдилар, бу одам мени алдаган. Наҳотки, шунчалар виждонсиз, худбин бўлса? Ақли-ҳуши жойида одам, ҳеч бўлмаса, бир телефон қилади. «Ҳавотир олма, тирикман», – дейди. Шу кетишимизда менинг қабримга у, унинг қабрига мен кираман... Ўзимам айборман. Оқибатини ўйламадим. Хоҳламаганимда мўъжиза рўй бермасди. Чол мени мажбур қилмади, таклиф қилди, холос. Нима қилай, қизиққанимдан эмас, йўқчиликдан

рози бўлдим». Нодир бугун Маъруф отанинг онаси-нинг тақдири билан ҳам боғлиқлигини билса-да, унга нисбатан нафрат сезмас, омон бўлса бир куни албатта кириб келади деб ишонарди-ю, унинг энг қўрққан нарсаси ўлим эди.

Маъруф чолнинг танаси яшаб бўлган, бузуқ машина га ўхшаб қолган. Таппа тушиб ўлиб қолса нима бўлади? Кейин ўзини тинчлантиришга уринади. Ўлим ёш танламайди-ку, қарилар мункиллаб яшаб юравериши мумкин, лекин ёшлар мўрт бўлади. Айниқса, ҳозирги ёшлар машаққатга кўникмаган, бугунги асабий замон кўпларини жувонмарг қилиб кетяпти. Кейин хаёли яна чолнинг ўғли Мажидга оғади. Барибир, нажот шу кишида. Мулоҳазали одам. Шундай деди-ю, ҳамма гапни айтгандан кейин қанақа ҳолат юз беришини тасаввур қилишга уриниб кўрди. Вужудида титроқ қўзғалди. Айтайлик, у Нодирнинг гапларига ишонди. У сўрамайдими: «Хўп, сизни нима мажбур қилди?» – деб? Сўраса, жавоби тайёр: «Йўқчилик», – дейди. «Отамнинг-чи?» – деб сўраса, «Қарилик», – дейди, «Қарилик унинг жонига текканди», – дейди. Э, барибир бўлмайдиган гаплар. Мажид жиддий йигит, у бунақа ақлга сифмайдиган гапни эшитмайди. Нима қиласа экан-а?..

Кун пешинга яқинлашмоқда. Болалар мактабда. Мажид билан катта келин ишда. Кичик келиндан бошқа ҳеч ким йўқ ҳовлида. Ҳовли дарвозаси ланг очиқ. Чол бор вақтлари бу эшик ҳеч қачон бунақангি ланг очиқ турмас; эшикдан охирги кирган уни очиқ қолдирса чолдан дакки эшитарди. Ҳар сафар мана шу эшик Нодирнинг эътиборини тортар, аммо негадир бошқалар бефарқ; у эса уйдагиларни қандай койишни билмай қовун тушириб қўйишидан чўчиб индамайтина ўзи ёпиб қўя қоларди. Охирги вақтлар шунга ҳам

ҳафсала қилмай қўйди... Чолнинг катта келини ҳам бугун уйида экан, у паришонхотир чиқиб ҳовлининг бир четидаги супага омонатгина келиб ўтирди. Нодир аёлнинг ишга бормаганидан таажжубланди. Тинчликмикан, ишқилиб? Кўриниши ҳам бошқача, маҳзунроқ. Хонасидан чиқди. Келин ўрнидан туриб, салом берди. Нодир бош иргаб алик олди-да, у томон юрди.

– Ҳа, келин, тинчликми?

– Тинчлик, – деди жувон пастгина овозда. Лекин тўлиб турган эканми, пиқ этиб йиглаб юборди.

Нодир супанинг бир четига бориб чўкди-да:

– Қани, ўтиринг-чи, – деди. – Нима гап?

– Набира қизингиз, қаршилигимга қарамай, вилоятлик бир йигит билан гаплашиб юрганди. «Ёшсан, институтда ўқишинг керак», – дегандим. Ўша бола билан қочиб кетибди.

– Қочиб кетибди?

– Ҳа. Болаларимни бегона одам турткиламасин деб бошқа турмуш қилмадим. Мана оқибати... Одамлар нима дейди, биттагина қизини ҳам эплай олмапти дейишмайдими?

Кутилмаган бу янгиликдан Нодир нима дейишини билмай қолди. Анграйиб жувонга қаради. Миясига тузукроқ фикр келмай, жим бўлиб қолди. «Ҳм, ҳали жуда ёш», – дея келинини тасдиқлади, холос.

Нодир чолнинг набирасини кўз олдига келтирди. Эндинга ўн бешга кирган бўлса-да, қомати келишган, фавқулодда бир чиройли қиз эди. Бир неча марта Нодирга ҳам сузилиб қарааш қилган, аммо Нодир ҳали ёшлиги ва ғўрлигини ҳисобга олиб ўзини эътиборсиз қилиб кўрсатган, лекин зимдан кузатиб юарди. Қизнинг кутилмаганда қилган бу иши уни ҳам лол қилиб қўйганди. Нодир чолнинг кичик келинининг ошхонада фимирлаб нимадир қилаётганини кузатиб туриб, мияси

тиниқлашди. «Ёшлар орасида учраши мумкин бўлган оддий ҳолат» деган хуносага келди ўзича. «Келини»ни юпаттган бўлди-да, аммо ичида: «Қочса ҳам ўз қиёфа-сида қочибди. Бувасига ўхшаб биронинг қиёфасини айёрлик билан қўлга киритиб, ўрнига бир лақмани ўтқазиб қочиб кетмаган-ку», – деб қўйди.

Кейин кексаларга хос салмоқ билан насиҳат қилишга уринди:

– Қизим, кўп қуюнманг, болалар ёшлик қилган. Ҳадемай кеп қолади. Одамларга келсак, нималар демайди. Бекорчи кўп жойда майда гап ҳам кўп бўлади. Парво қилманг. Қочса ўзимизнинг йигит билан қочибди... Ҳозир қизлар интернет деган бир бало орқали дунёning бир бурчагидаги йигитлар билан танишиб, кетиб қолишяпти. Биронинг бирор устидан қуладиган ёки ифво қиладиган ҳоли йўқ. Қуни келиб келади. Тентираб-тентираб қилган ишига минг-минг пушаймон бўлиб кириб келади.

Келин «қайнотаси»дан бунақа бағрикенгликни кутмаган экан, шекилли, тезда ўзига келди. Қўз ёшлари ни артиб, ўзини тартибга келтирди. Енгил нафас олди. Қизининг тақдирига қуяётганига қарамай, «Тўғри айтдилар, бир куни ўз оёғи билан кириб келади», – дея тинчланди. Нодир яна аллақанча ажабтовур юпатадиган сўзлар айтди-да, «Бисмилло», – деганча ўрнидан турди. Бу хабарни қайнотамга қандай етказаман деган хавотирда кечаси билан ухламай чиққан келин бечора Нодирнинг гапларидан хотиржам тортиб, юзи ёришиб, ортидан миннатдор қараб қолди. Унинг бу қарашидан «Қайнотам яхши қаридилар» деган маънони англаш қийин эмас эди.

\*\*\*

Саша билан муносабатлар ўнгланиб кетди. Бу эса «файласуф»га ёқмасди. Нима қилиб бўлса-да уларни айришга, ўртасига адоват солишга интилар, Сашадан қутулиш йўлларини изларди. Ҳисобчининг назарида, Саша хавфли одам, унинг кирим-чиқимдаги барча кирдикорларини яхши билади. Гарчи ҳар сафар қўли мўмай пул кўрганида Сашани ҳам қуруқ қўймаса-да, барибир, буюртмачи қурилишдаги сохта ишларидан хабар топиб қолади дея хавотирда. Камига, йўқ жойдан айнан ўша буюртмачи томонидан Маъруф қурилиш майдонига кириб келган; Саша эса эртадан-кечгача у билан бирга, ўз-ўзидан ҳисобчи безовта бўлар, зимдан иккисини кузатар ва ўзича: «Бомба иккимизнинг оёғимизга бир хилда ўрнатилган. Биримиз портлайдиган бўлсак, иккинчимиз соғ қолмаслигимиз аниқ», – дея тинчлантиради. Яна «Озроқ вақт ўтиб икковлашиб мени бир нарса қилишса-я» деган ўйга борарди.

Саша Маъруфнинг кимлигини бир кўргандаёқ сезган, «Бу йигитни йўлдан уриш мумкинмас, ҳар кимнинг йўриғига юриб кетавермайди» деган хуросага келганди. Ўшанда ҳисобчини ҳам: «Бунақа одамлар кўринишидан содда бўлса-да, сенга ўхшаганларни сувга олиб бориб сурормай олиб келади, тилингга эҳтиёт бўл», – деб огоҳлантирганди. Аммо кутилмаганда ўзи Маъруф билан яқинлашиб қолди.

Маъруф ҳаммасини сезарди, албатта. Лекин парво қилмасди. «Иккиси бир-бирини тажиб адо қилмайдими менга деса», – деб парво қилмасди. Лекин, барибир, Сашани кўнглида аяр, унда «файласуф»га нисбатан одамийлик кўпроқ деб эътироф этарди.

Кунлар совигани сари қурилиш ишлари жадаллашиб борарди. Ишчилар бинонинг томини ёпиб, энди ичкарида ишлаётган эдилар.

Соат эрталабки ўндан ошган.

Қурилиш ҳовлисида одам сийрак. Аксари ичкарида.

Қутылмаганда икки қора енгил машина ва деразалари сим тўр билан тўсилган учта усти ёпиқ машина келиб тўхтади. Енгил машиналардан солиқчилар, милиция ва хорижлик ишчилар билан шуғулланувчи ходимлар тушишди. Аксига олиб, ҳисобчи билан Саша банкка кетишган эди. Маъруф дарҳол қўнфироқ қилиб қутылмаган меҳмонлардан уларни хабардор қилиб, ўзи эса тафтишчиларга пешвуз чиқди. Келганлар унга эътибор бермай, бино ичига кириб, юқори қаватга кўтарила бошлишди. Маъруф нима қилишини билмай, боши қотганча уларга эргашиб юраверди. Хайрият, кўп ўтмай ҳовлиққан, қора терга тушган қурилиш мутасаддилари – Саша билан ҳисобчи етиб келишди. Маъруф тепа қаватдан кузатиб турди. Саша улар билан учрашишдан олдин машинадан тушибоқ қоровулхонага кириб кетди. Қимгадир қўнфироқ қилди. У томондан рад жавоби бўлди, шекилли, олдингидан ҳам безовталаниб ҳовлига чиқиб келди.

Маъруф уларнинг юқорига чиқмаганидан ажабланиб, пастга тушиб келди.

– Нима дейишди? – деди Саша ҳеч нарсага тушунмай. Маъруф елка қисди:

– Ҳеч нарса!

Саша гудраниб нари кетди. Ҳисобчи унга эргашди. Маъруф бир чеккада нима қиларини билмай тураркан, бошлиқлар иккови бир-бирини нимададир айблаб, сўкинишаёттанини билиб қолди. Айниқса, ҳисобчининг дами баланд: илондек вишиллаб Сашанинг авра-астарини чиқариб ташляяпти.

Текширишга келганлар эса юқорида ҳеч кимга парво қилмай ўз ишларини қилишяпти. Биринчи бў-либ ҳисобчи ўзини қўлга олди. Худди шундай бў-лишини олдиндан кутиб юргандек сумкачасини хотиржам қучоқлаганча иккинчи қаватга кўтарилди. Бироқ текширувчиларга яқинлашмай, ҳали битмаган айвончада туриб олганча сирли бир қиёфада уларни кузата бошлади. Саша бўлса меҳмонларнинг олдига борди, кўришди, кейин аввал бошлиқларнинг бири билан, кейин бошқалари билан холи гаплашишга ури-ниб кўрди. Аммо имкон бўлмади: учала гуруҳ раҳбари ҳам худди келишиб олгандек унга эътибор беришмас, худди эшитмаётгандек ўзаро кулиб гаплашишар, бо-сиб-босиб тамаки тутатишарди. Ходимлари эса қават-лар бўйлаб тарқалиб, қурувчилардан ҳужжат талаб қилишарди. Маъруф биладики, ҳамманинг ҳужжа-ти сохталаштирилган. Ишчилар албатта қандай жа-воб беришни билмай чайналишмоқда. Сабаби, уларга: «Ҳеч қачон бу ерни текширишмайди», – дея Саша ту-шунтирган.

Ходимлар бунақа одатий жавобларга кўнишиб ке-тишган, шекилли, уларни тинглаб ҳам ўтиrmай, орти-дан эргашиб юрган милиция ходимларига «олиб кет» ишорасини қила бошлади. Ишчилар бирин-кетин қўл-лари ортига қайрилган ҳолда ойнаси сим тўрли маҳ-сус машинага олиб келиб тиқила бошланди. Маши-на эшиги олдида қуролланган икки милиция ходими уларни қўриқлаб турарди.

Маъруф энди нима бўлар экан деган алфозда бир четда ҳайкалдек қотиб турарди. Ҳисобчи сумкачасини қучоқлаганча Маъруфнинг олдига келиб, энди у энг катта бошлиққа телефон қилиши кераклигини, агарда иш кечикса, вазият оғирлашишини хотиржам оҳангда тушунтира бошлади. Уларнинг ёнига Саша келди.

Унинг боши қотган, оғир нафас олар, асабийликдан кўзлари қизарган эди.

Ҳисобчи кимнингдир номини айтиб:

– Нима, унга тегишли соққани бермаганмидинг? – деди жаҳл билан.

Саша икки сафардан буён уни уйидан тополмаётгани, қўл телефонини кўттармаётгани боис кечаги гал борганида хотини: «Менга ташлаб кетаверинг, ўзим етказиб қўяман», – дегани учун икки ойлик маблагни қолдириб келганини айтдию балога қолди. Ҳисобчи жазавага тушиб бақирди: «Тентак, тентак бўлмасанг, бунақанг пул эгасига берилади. Бу ахир пора, жиноят!»

Саша тамаки тутунини ичига ютиб бурнидан чиқаркан, ҳисобчини қўлтиғидан олиб, хиёл чеккага чиқарди.

– Гап бундай. Нима қилаётганимга ақлим етади. Кўпам бақиравермай, мени эшит. Бугун эрталаб ҳалиги одам телефон қилди.

– Хўш?

– Унинг айтишича, хотини уни ўйнаши билан тутиб олибди. Хотини шундан аламзада эмиш. Эрини қаматмоқчи эмиш. Эрининг порахўрлигини исботлаш учун мен ташлаб келган ўша пулни судга бермоқчи бўлиб турганмиш. Шунинг учун биз энди у одамни умуман танимаслигимизни айтиб, пулни бошқа одам билан адаштириб ташлаб келганимизни таъкидлаб, қандай йўл билан бўлса ҳам қайтариб олишимиз кераклигини айтди. Мабодо суд бўладиган бўлса, иккимиз бир ёқадан бош чиқариб аёлни аламзада, туҳматчига чиқаришнимиз лозим. Хуллас, биз боши берк кўчага кириб қолганмиз. Бу масалани фақат катта бошлиққина еча олиши мумкин...

Саша тамакисини охиригача чекиб, улоқтириб юборкан, Маъруфга дикқат билан қаради.

– Бузоқнинг юргани сомонхонагача. Мана по-рахёрликнинг оқибати, – деди ҳисобчи вазиятдан фойдаланиб Сашага нафратини сочаркан.

Саша унга эътибор бермади. Ҳисобчи ҳам тамаки тутатди. Вазият қалтис. Маъруф хўжайинга телефон қилиши лозим. Булар шунга умид қилишяпти. Маъруф бўлса ўша «катта бошлиқ»ни умрида бир марта кўрган, қолаверса, у одамга Маъруфдан кўра Саша билан ҳисобчи яқинроқ, ишончлироқ. Маъруфни эшитармиди у?.. Аммо ҳозир бу нарсани уларга қандай тушунтиурсин? Бироқ дабдурустдан қўнғироқ қилиши ҳам тўғримикан? У боши берк қўчага кириб қолган шерикларига бирпас қараб турди-да, бундай вазиятда ишни пайсалга солишни ноўрин билиб рақамни терди. Аввал ўзини танитди. Кейин бор гапни айтди. У ёқда жимлик. Кейин бошлиқ тилга кирди. «Гўшакни Сашага бер», – деди. Саша ҳам бўлган воқеани шоша-пиша айтиб берди. Яна жимлик. Кейин гўшакдан қисқа сигнал эшитилди: тут, тут, тут...

Учаласи ҳам бир-бирларига тикилганча қолишиди.

– Емоқнинг құсмоги бор. Мана энди қонун олдида ҳамма тент жавоб беради. Ноқонуний ишчи кучи билан кундан-кунга бойиб шаҳарнинг ярмини сотиб олган ана шу бойвачча ҳам, қайсиdir қолоқ мамлакатдан келган мана бу йигитча ва ҳаммасидан ҳам жаноби олийларининг ўзлари дунё банкларида яширинча сақлаётган миллион-миллион бойликлари эвазига ҳам вазиятни енгиллаштира олмайди, – деди ҳисобчи заҳарли киноялар билан Сашага қараб тамаки тутунини пуфлаганча.

– Бунча жирканч одамсан? Сен ҳам қуруқ қолганинг йўқ-ку! Ўғирланган бойликларни сақлайдиган банкларда сенинг пулинг меникидан кўпроқ эмасми?! – деди Саша ортиқ ўзини ушлай олмай.

Нарида ўзаро гурунглашиб турган учала бошлиқ уларга ҳайратланиб қарашди. Маъруф бу икки адватлашиб юрган одамлар бир-бири билан муштлашиб кетиши масин деган хавотирда уларнинг ўртасига кириб Сашани четга тортиб, пастки қаватга йўл бошлади. Саша ҳам шуни кутиб тургандек ҳисобчини бўралаб сўкканча Маъруфнинг ортидан эргашди. Текширувчиilar бир қаватда ишлаётган чилангарларни ҳам чумчуқларни тутгандек тутиб олиб кетишиди.

Шаҳарнинг тинчини бузиб, кундан-кунга шовқин-сурон билан тикланаётган баҳайбат қурилиш майдони икки соатда ҳувиллаб қолди.

Ишини «қойиллатиб» бажаришган учала гуруҳ раҳбарлари ўзаро гурунглашиб тепадан ҳовлига тушшиб келишди-да, Маъруф билан Сашадан нарироқда тўхтаб, суҳбатни давом эттиришди. Улардан бири зимдан бу иккисини кузата бошлади. Гарчи буларнинг ҳужжатлари жойида бўлса-да, шунча ноқонуний ишчининг яширинча ишлатиб келганлар шулар эдиди. Шу боис бу учаласига ҳам тапир-тупур бошланиши билан: «Ортиқча муаммо керак бўлмаса, бинони биз ўзимиз рухсат бермагунча тарқ этманглар», – дея огоҳлантиришганди.

– Анави олифта нега бизга ўқрайиб қарайапти? – деди Саша яна тамаки тутатиб. Кейин ўзи алам билан давом этди. – Бурнининг остида бир йилдан буён иш олиб боряпмиз. Улар тўё ҳеч нарсадан бехабар. Ҳақпарвар порахўрлар. Сохта ватанпарварлар. Фақат улар эмас, бу давлатнинг энг катта раҳбариға ҳам қора ишларда кимлар ишлаётгани маълум. Улар қайси мамлакатлар одамлари эканини ҳаммаси билади. Лекин билмаганга олишади. Чунки уларнинг ҳам ҳар ой чўнтакларига мўмай пул ўз-ўзидан оқиб келади, улар ҳам бундан манфаатдор. Бордию бир марта улуш

ололмай қолишиңса, бечора келгиндиларнинг аҳволи бу-  
гунгидай бўлади...

Саша қаттиқ ранжиган алфозда бир чеккага бориб ўтириди. У нон топаман, оила боқаман деб мусофири юртларда абгор бўлиб юрган ишчилари учун қаттиқ қуюнаётган эди. Қуюнмасинми?! Ишчиларнинг акса-  
ри унга садоқат билан хизмат қиласарди. Ана шундай ишончли одамлари борлиги учун ҳам жамоани бошқа-  
риш енгил эди...

Ҳаво илиб, қор майдалаб ёғарди. Қатор қилиб тизиб қўйилган маҳсус машиналарнинг сим тўрли панжара ойналаридан ишчилар умид билан буларга тикиларди. Улар оддий ҳалқ сингари раҳнамоларига ҳамон ишо-  
нишарди. Бу одамларнинг назарида, Саша ҳар қан-  
дай мушқул вазиятда ҳам уларни ташлаб қўймайди.  
Маъруф бу одамларга қараб: «Ҳа, булар қонунни бу-  
зишди. Жиноят содир этишди, лекин бу муҳитни ким яратди? Айнан ўшаларни ушлаш лозим. Бу бечора қора меҳнаткашларга тегмаслик керак. Сабаби, жами-  
ятда қонунга бўйсунниб яшайдиганлар сони кўп бўлиб,  
онда-сонда бўйсунмайдиганлар учраб қолса, у бошқа гап. Аксинча бўлса, ана шу жамиятнинг устунларидан бири айбдор. Бундай вақтда ҳалққа тегмаслик, ўша устунни қирқиб ташлаш керак. Ўз-ўзидан жамият то-  
заланади», – дея Маъруф ўзича хулоса қилди. Соа-  
тига қараб энг катта бошлиқ билан гаплашганига бир соатдан ошганини айтиб, «Нимани кутяпмиз?» – деди.

– Нимани кутаётганимиз ўзимизга маълум, аммо анавилар нимани кутишяпти? – деди Саша текширув-  
чиларга ишора қилиб.

– Менимча, катталар савдолашишмоқда, – деди ҳи-  
собчи вазиятни аллақачон англаб етган кишидек до-  
на-дона қилиб. – Бизнинг хўжайин катта постда ўтири-  
ган аллакимга дардини ёрган, у эса нархни баландроқ

айтган. Сабаби, уч ташкилотни тинчтииш лозим. Пул бориб эгасига тушиши билан вазият ўзгаради, акс ҳолда, машиналар олдинга силжийди. Биз эса шунча арzon ишчидан айриламиз...

Саша унга нохуш қараб қўйди-да, гап қўшмади.

— Баъзида дунёни ҳам худди шундай бошқаришади, — давом этди ҳисобчи. Унинг «файлласуф»лиги тутганди. — Фақат унда бой давлатлар, қолоқ давлатлар ва уларнинг ўртасидаги ўртаҳол давлатлар рол ўйнайди. Энг даҳшатлиси шундаки, Сашага ўхшаган калтафаҳмлар ҳам катта бир ҳалққа раҳбар бўлиб қолади-да, ҳалқини мана шунақа қилиб боши берк кўчага олиб кириб қўяди. Ҳалқ эса ўшандада ҳам чапагини чалиб ўтираверади. У хоҳ авом бўлсин, хоҳ аллома. Бунинг давлат раҳбариға ҳеч қандай аҳамияти йўқ. Чунки унинг ортида ўз ҳалқига қарши қуролланган армия турибди. Баъзида Сашага ўхшаган раҳбарлар қайсиdir давлат раҳбари билан гап талашиб қолишса, тамом, бутун ҳалқ бир-бирига қарши чиқиб гуруҳларга бўлинниб кетади. Яъни матбуотда ойлаб улар орасидаги араз тарқалгунча ўша ҳалқнинг нуқсонлари журналистлар томонидан гапирилаверади, фактлар билан кўрсатилаверади... Қарабсанки, ўз-ўзидан икки ҳалқ бир-бирини кўпярга кўзи йўқ. Баъзида раҳбарлар орасида сенга ўхшаган лапашанглари ҳам учраб қолади, — дея ҳисобчи энди Маъруфга ҳужумини бошлади. — Бундайлар: «Бой давлатлар билан алоқани мустаҳкамласам, ҳалқимнинг иқтисоди кўтарилаади, ўзим эса тарихда қоламан», — деб ўйлайди. Натижажа нима бўлади: унинг давлати иккита бир-бирини кўролмайдиган томон учун жанг майдонига айланиб қолади. Бечора ҳалқни эса ҳеч ким ўйламайди. Оқибатда дунёда мана шунақа ватансиз одамлар, ҳалиги журналист қиз гапириб бергандек, қочоқлар учун

мўлжалланган расмий ороллар кўпайиб кетади. Бу асrimизнинг энг катта фожиаси.

– Сен бу ақлинг билан бировларнинг пулини ҳисоблаб нима қиласан? Бор, ундан кўра бирон-бир сиёсий ташкилотга кириб ишла! Китоб ёз, катта-катта майдонларга чиқиб воизлик қил. Балки, фикрларингни кимдир қадрлаб қолар, – деди Саша ҳисобчини ортиқ эшитишга тоқати етмай.

– Афсуски, бунинг иложи йўқ. Чунки у ташкилотларда мендан ҳам савияси паст, яъни бир кунлик ҳисоб-китобини ўзи қила олмайдиганлар ўтиришибди. Китоб дўконларида эса менинг фикрларимдан ўткирроқ асарлар сотилмай тахлам-тахлам ётибди. Ҳозир одамлар китоб ўқиш ўрнига интернет ифволаридан бош кўтармайдиган бўйлиб қолган. Қолаверса, пул, бойлик учун сафсатабозликнинг менга нима кераги бор? Ундан кўра жимгина бир лўттибознинг жамғармасини ҳисоблаб юрганим маъқулроқ, – дея ҳисобчи Сашага шундай ўқинч билан қарадики, ҳамиша ҳисобчини аҳмоқ деб юрган Сашанинг кўнглидан «унчалик аҳмоққа ўҳшамайдиёв» деган фикр ўтди.

Шу пайт улардан нарироқда турганлардан бирининг телефоны жиринглади. У шошилиб чўнтағидан олди, ким биландир илтифотли тарзда суҳбатлашаркан, гап орасида «яхши-яхши» деганча бирданига юмшаб қолди. Телефондаги суҳбат тугагач, у шерикларига ниманидир қисқагина қилиб тушунтирди. Шерикларининг кўзлари катта-катта очилиб, уни эшитиб, гўё ҳозир шу ерда турсалар, ер ютиб юборадигандек саросима ва ваҳимага тушиб қолишиди. Айни шу онда ишчилар илинжи – мўъжиза юз бериб, қонун тескарисига ишлай бошлади. Текширув ташкилотчилари чекиб улгурмаган тамакиларини улоқтиришиб, қўл остидаги ходимларига машина-

лардан ишчиларни туширишни буюришиди. Ўзлари эса худди бирор тутиб олишдан қўрққандек юргургилаб бориб машиналарига ўтиришиди-да, бир зумда кўздан гойиб бўлишиди.

Саша ва шериклари эса гап нимада эканини тушуниб турган бўлишса-да, ярим кун давом этган текшир-текширлар жуда қисқа вақтда бошқача якун топганлигидан ҳайратда әдилар. Шер бўлиб қурилиш майдонига кириб келган азза-базза уч ташкилот раҳбари мушукчаларга айланиб, хайр-маъзурни ҳам унубтиб жўнаб қолишгани ростданам ажабланарли әди.

\*\*\*

Қор ёғиб, кун бирдан совиди.

Қурилиш ишлари, кун совуқлигига қарамай, ташқарида ҳам давом этарди. Ишчилар орасида ҳавонинг кескин совиши боис ичкилик олдингидан ҳам авж олган, кимга яқинлашсанг, гуп этиб ароқ ҳиди келарди. Айниқса, элликдан ортиқ қуруувчига мўлжалланган дам олиш хонасига ароқ ва арzon винонинг ҳидидан бош тиқиб бўлмас, тамакининг дудидан эса ичкарини кўриб бўлмас әди. Қамига, кеч бўлиши билан соvuқдан жунжиккан ярим ялангоч фоҳишалар ҳам шу ерга тиқилиб олишган. Энг қизифи, эллик-олтмиш кишига мўлжаллаб тахтадан ясалган бу хоналарда мусулмон бир бурчакда намозини ўқир, насроний иконасига чўқинар, бутпараст эса ўзининг ҳайкалчасига сифинар, айни вақтда, фоҳишалар ҳам айш-ишратини шу ерда амалга ошиарди.

Текширишдан кейин Сашанинг ишчилар орасидаги обрўйи яна кўтарилиди. Ишчилар уни қурилиш майдонида кўришлари билан ҳушёр тортишар, ароқларини яширишга ҳаракат қилишарди. Бироқ Сашанинг ўзи

ҳам олдингидан кўра кўпроқ ичар, нимагадир таъби хира, ҳафсаласиз, ҳисобчи эса бўш қолди дегунча хонасига уч-тўртта енгилтак аёлни чақириб оладиган бўлди. Маъруф шерикларидағи бундай ўзгаришлардан ажабланиб, ҳеч нарсага тушунмай қолди. Сиқилиб, қурилишнинг тезроқ тугашини, тезроқ бу ерларни тарқ этишни ўйлай бошлади. Аммо охирги вақтларда унда бош оғрифи пайдо бўлганидан ташвишга тушиб қолганди. Бир хаёли: «Бўлди энди, сафаринг тугади, юртингга қайтавер», – деса, бир хаёли: «Озгина сабр қилил, жамғарманг озроқ кўпайсан», – дерди. Тобора бошидаги оғриқ кучайиб борарди. Оғриққа чидаёлмай чекишига ўтди. Бошоғриқ дориларни иккиталаб, учталаб ичадиган бўлди...

Саша кузатиб юрган экан, бир куни сўраб қолди. Маъруф сигаретасини лабига қистирганча оғир хўрсинди. Кейин дардини айтди. Сал нарида компьютерда ниманидир ёзиб ўтирган ҳисобчи гапга аралашиб, кучли шифокор таниши борлигини, хоҳласа, олиб боришини таклиф қилди. Саша унга бу ерда таниш-билиш кетмайди, яхшироқ шифохона топиб, бошини текширтириш керак деди. Маъруф аҳволининг танглигини ҳис қилиб, ҳозир булар одатдагидек тортишиб кетишиади дегандай норози қараб қўйди.

Аммо кутилмаганда бир битимга келишиб, кийина бошлашди...

Қабулхонада бир-бираидан чиройли оқ халатли икки қиз уларни кулиб қарши олди. Саша ҳисобчининг эргашиб келганидан ижирғаниб ҳамширалар билан ўзи гаплашмоқчи эди, ундан олдинроқ ҳисобчи ўта назоқат билан улардан ортда турган Маъруфни кўрсатиб бир неча кундан буён бош оғригидан қийналаётгани, мумкин бўлса, нархидан қатъи назар, энг кучли мутахассисга ёзишларини сўради.

Қизлар ҳисобчини диққат билан әшитиб қоғозга «16-хонага» дея ёзиб беришди. Ҳисобчи касса томонга жўнади. Қизлар эса Маъруфни сўроққа тутишиб, қоғоз тўлдира бошлашди.

Маъруф шифокор олдига, юқори қаватга чиқиб кетди.

— Йигитча дардга чидамли экан, — деди Саша ёнида ўтирган ҳисобчига қарамай, Маъруф кетган томонга кўз тикканча. — Неча кундан бери сўрайман дейман-у, бошқа нарсага чалғиб кетавераман...

Саша рўпарасидаги деворга илингандан катта соатдан кўзини узмас, ҳисобчи деразадан қор аралаш ёмғирни томоша қиласарди. Шу дамда улардан наридаги лифт очилиб, бир неча одамлар билан бирга Маъруф ҳам тушиб келди. Шериклари баравар ўринларидан туришди.

— Нима гап?

— Йигирма дақиқада натижаси чиқаркан...

Яна кўзлар соат милларига қадалди...

Ярим соатлар ўтиб қабулхонанинг ён томондаги эшигидан ҳалиги қизлардан бири чиқиб, тўғри булар томонга юрди. Ҳисобчи ташқарига тамаки чеккани чиқиб кетган эди. Саша ўрнидан турди. Маъруф эса ҳаяжоннинг зўридан туриш ҳам эсига келмай, қиз томонга анграйиб тураверди. Қиз негадир унга эмас, Сашага қаради. «16-хонага киаркансиз», — деди. Саша ялт этиб Маъруфга қаради. Тинчликмикан дегандек, иккисининг ҳам ранги учди. Саша шошилганча юқорига чиқиб кетди.

Хонада ёзув столига энгашиб ниманидир диққат билан кузатаетган, ёши қирқлардан ошган, сочига оқ оралаб, қалин кўзойннак таққан шифокор ўтиради. У Сашани кўриши билан зўрга әшитиладиган оҳангда рўпарасидаги стулга ўтиришни таклиф қилди. Саша

у кўрсатган жойга секин ўтиаркан, ҳозир шифокор шундай бир янгиликни айтиши, бундан кўнгли вайрон бўлишини ҳис қила бошлади.

Шифокор Сашага диққат билан қаради-да, гапни нимадан бошлишини билмагандай, унинг Маъруф билан қандай яқинлиги борлигини сўради. Саша хавотирланиб бемор яқин ўртоғи, кўп йиллик қадрдони эканини айтди ва шу лаҳзада уни нимагадир ўз ўғли сингари яхши кўришини ҳис қилди.

– Мен сизга бор ҳақиқатни айтишим керак, – деди врач Сашага кўзини тикиб.

Бу қарашдан Сашанинг юрагига сим-сим оғриқ кирди.

– Очигини айтадиган бўлсак, ўртоғингизнинг бошида ўсимта пайдо бўлган, афсуски, анча кеч келгансизлар. Бош оғриги ана шундан. Балки, бир ойлар илгари мурожаат қилганингизда, олдини олса бўлармиди. Ҳеч йўқ, умрини имконият даражасида узайтиардик. Минг афсуски, энди кеч... ўсимта ривожланиб бўлган. Йигитчанинг уч ё тўрт ойлик умри қолган... Ортиқча харажат қилишнинг кераги йўқ...

Орага ниҳоятда совуқ жимлик чўкди. Иккиси ҳам бир-бирларига сўзсиз тикилди.

– Ана шулар эди, – деди врач гапга нуқта қўйгандай.

Сўнgra у рўпарасида ўтирган одамни унутгандай ўрнидан туриб, қоғоз-қаламга мўлжалланган жавонидан ниманидир қидиришга тушди.

Саша кутилмаган бу янгиликдан ўзини йўқотиб, шифокорга: «Ундей дема, бу аҳволда мени бу ердан ҳайдама», – дегандек илтижоли тикилди, ўрнидан қимирламади. Гарчи китоб жавонидан ниманидир қидираётган бўлса-да, шифокор Сашадаги хафаликни сезиб қайтадан ўрнига ўтирди. Сухбатдошига ҳамдардона кўз тикди:

– Мени кечирасиз, касбимиз талаби билан баъзида ҳақиқатни гапиришга мажбурмиз. Медицина ожиз, балки, пул ундириш мақсадида кимлардир ваъда бериши мумкин, аммо бу беҳуда гап. – Бир қоғозчага ниманидир ёзди-да, Сашага узатди. – Мана бу дори оғриқни камайтиради, бироқ вақтингчаликка...

Саша врач қабулидан чиқиб, узун йўлак бўйлаб қарахт бир алфозда кета бошлади. Йўлакнинг икки тарафи бўйлаб қирқдан ортиқ хоналар жойлашган. Биринчи қаватга тушиш бурумида эса ташқари кўриниб турган катта ойна. Ойна олдида бир неча йиллик кактус ва майда балиқлар солинган аквариум жойлашган. Саша шу ерга келганда тўхтади. Ташқаридаги ёмғир аралаш қорга бироз тикилиб: «Табиат ҳамиша голиб, ўз ҳукмига ҳамма нарсани кўнинтиради», – деб хаёл қилди. Уларга нима дейиш ҳақида ўйга ботди. Нималардир деб ўзича фўлдиради. Ўйларичувалашиб бир қарорга келолмай, паришон ҳолда ҳисобчи билан Маъруфнинг олдига тушиб келди.

Улар Сашанинг ушланиб қолганидан безовталаниб, эшик олдига чиқиб тамаки тутатишарди. Иккиси ҳам Сашани кўришлари билан чекиб улгурмаган тамакиларини қутига улоқтиришиб, у томонга юришди. Сашанинг юзига сўзсиз тикилишди. Саша эса гапни нимадан бошлашни билмай, қўлига тамакисини олиб, ўзи ҳам нима деяётганига тушунмай: «Шифокор кимдан-дир юқумли бош оғригини орттириб олибди деб мана бу дорини тавсия қилди, холос», – деди...

Маъруф ёлғонни тез сезадиган одам эмасми, Сашанинг гапларига ишонмади. Айни чоғда: «Бу одамни ёлғон гапиришга нима мажбур қиляпти, ўзи?» – деб ҳайрон бўлди.

Ҳисобчи эса Сашага қўшилиб яна тамаки тутата бошлади. У Сашага ортиқча савол беришнинг фойдаси

Йўқлигини билгани учун қачондир унинг ўзи ёрилишини кутишни лозим топди ва ҳавонинг инжиқлигидан гап бошлади. Саша эса уни эшитиб ўтирмай, Маъруфга қараб: «Кетдик, – деди, – қурилишда гаплашамиз». Унинг кутилмаган бу ҳаракатидан Маъруф дарҳол тушундики, Саша ниманидир сир тутмоқда.

Машина томон боришаркан, Маъруф атайлаб юришни секинлатди-да, шерикларининг гаплашиб олишига имкон яратди. Қутганидек, мақсади амалга ошди. Саша ҳисобчига ҳақиқатни айтишга улгурди. Машинада кетиб боришаркан, Маъруф ҳисобчининг ранг-рўйидан ўз аҳволи қанақа эканини билиб олди.

Ҳамон ёмғир аралаш қор ёғар, машина шаҳарнинг марказий кўчаларидан борар экан, ташқарида ўн қадам нарини кўриб бўлмасди.

– Балки, бирон жойда тўхтаб тамадди қилармиз?  
– деди Маъруф шу баҳонада ҳаммасини очиқ-оидин билиб оларман деган мақсадда. У бир нарсадан қаттиқ ваҳимада эди: бироннинг танасида ўлиб кетиш, бу уни ҳам гўрга етаклаб кетиш дегани, «Мен энди Но-дирни ҳам жувонмарг қиласанми?» – дерди ич-ичидан талвасага тушиб. Ҳисобчи бирданига тилга кирди: «Ростдан ҳам, тамадди қилиб олайлик». Саша ойнадан орқа ўриндиқда ўтирган икки шеригига маъносиз кўз ташлаб, машинани йўл четига буриб, хитой тилида нимадир деб ёзилган, кўринишидан ошхонага ўхшаган икки қаватли бино ёнида тўхтатди.

Улар гап-сўзсиз ошхонага киришли.

Катта зал. Тўрт кишига мўлжалланган бир неча столлар қўйилган. Баъзи столларда шам ёниб турар, унда йигит-қизлар пичирлаб гаплашиб ўтиришарди.

Хитойча кийинган, бир-биридан хушбичим учта қиз хитойликларга хос таъзим билан меҳмонларга пешвоз чиқиб, илтифот билан ўтиришга жой кўрсатиши. Ич-

карига биринчи кирган Саша қизларнинг нозик илти-фотларига қиё ҳам боқмай, тўғри бориб ойна ёнидаги столга жойлашиб ўтирди, бармоқлари билан столни черта бошлади.

Ҳисобчи билан Маъруф унинг қўрслиги учун қизлардан кечирим сўрагандай кулиб қўйишида, Сашанинг ёнидан жой олишди. Қизлардан бири дарҳол меню келтирди.

Саша ичимликлар рўйхатидан ўткир алкогол номини ўқиши билан яна қўполроқ қилиб официант қизга тезда олиб келиши, бу орада шериклари билан нима тамадди қилишга келишиб олишини айтди.

Қиз кутилганидан ҳам тез ҳаракатланиб столга ичимликларни дид билан териб қўйди. Саша ичимликни очиб, худди сувсизликдан қуриб кетаётгандек Маъруф билан ҳисобчига таклиф ҳам қилмай икки марта кетма-кет ўзига қўйиб ичди. Бироз енгил тортиди, шекилли, уни миқ этмай кузатиб ўтирган шерикларига:

— Ичасанларми? — деди.

Ҳисобчи рюмкаларга тенг қилиб қўйиб, Маъруфга қаради.

— Қанчалик қийинчиликлар бўлмасин, ўз инсоний қиёфангни сақлай олганингга тан бераман. Қелинглар, ана шунағанги одамлар учун ичайлик, — деди. Кейин уларни кутмаёқ ичиб юборди.

Саша ичмади. Столни бармоқлари билан чеरтганича ойнадан ташқарига тикилиб ўтираверди. Ҳисобчи ҳам унга қўшилиб столни бармоқлари билан чертиб, болалигига онаси унга пианино чалишни қандай ўргатганини ҳикоя қила бошлади.

Официант қиз келиб нима тамадди қилишларини сўради. Саша билан ҳисобчи Маъруфга қаради. У эса охирги вақтларда иштаҳасизлиги боис индамай елка-

сини қисди. Улар иккиси қизга нима таклиф қиласан дегандек кўз ташлаган эди, қиз бузоқ гўштидан тай-ёрланган қандайдир таомнинг номини айтди. Дарҳол рози бўлишди. Ҳозир уларга овқатнинг фарқи йўқ эди. Қиз ортига қайтиб кетди. Ресторан жуда тинч ва қандайдир хитойча сокин мусиқа худди олисдан кела-ётгандек эшитилиб турарди. Саша билан ҳисобчи ломмим демай ичишни давом эттирас, Маъруф эса машинаси кимдир бошқариш кераклиги, энг муҳими, Саша масти бўлгач, «Балки, шифокор нима деганини айтиб қолар» деган умидда уларга қўшилолмай ўтиради.

Ҳисобчи деярли масти бўлиб қолган, ҳар замонда ота-онасини хотирлар, уларнинг олдинига яхши яшашгани, яккаю ягона ўғилларининг машҳур мусиқачи бўлиб етишишини орзу қилишгани, кутилмаганда мамлакат парчаланиб, бу икки эр-хотин мусиқачи ишсиз қолишиб, санъатни қадрини билмайдиган хўрандалар қаршисида, ресторан, кафеларда, одамлар гавжум йўлакларда ўзлари яратган куйларни чалиб юришлари, уларнинг телбavor ҳаёти туфайли ҳисобчининг болалиқдан қалби жароҳатлангани, эвазига мусиқа эшитишга тоби-тоқати йўқлигини, яъни пулсизлик сабабли жамият уни улоқтириб юборгани, шунинг учун бойларнинг мол-дунёсини ҳисоблаш ва уларнинг ичига кириш мақсадида мана шу касбни танлаганини сўзлаб, сўнgra кутилмаганда ўрнидан турди-да, эшик ёнига қўйилган пианинони чала бошлади. У шунақанги мунгли мусиқа чалардики, бу мусиқа садосида одамлардан ҳамиша беркитиб юрадиган қалбининг қат-қатлари очила борди. Ресторан ичкарисидан кимдир янграётган бошқа мусиқани ўчирди. Энди ресторанда фақат у чалаётган куй янграй бошлади. Ҳисобчи куйларни бир-бирига улаб, ўзининг қаерда ўтирганини ҳам унутиб ярим соатча пианино ёнидан

кетмади. Бу вақтда ресторанда гүё ҳамма нарса ҳаралатдан тұхтагандек әди. У чалишдан тұхтаб үрнидан турганида хұрандалар бараварига оёққа қалқыб, қарасак чалиб юборищди.

У эса гүё катта саҳнада турғандек олқишлиғанларға таъзим қилди. Шу вақт башшанг кийинган бир киши, кўринишидан ресторан хўжайини, шекилли, ҳисобчингёнига келиб, шу ерда мусиқачи бўлиб ишлашини сўради, истаган нархига розилигини билдириди. Ҳисобчи унга ташаккур айтиб, ҳақиқий санаткорларга хос илтифот билан бу таклифни инкор қилди.

Ҳисобчи ўрнига қайтиб ўтириши билан Саша:

— Шунача истеъодинг билан миллионер бўп кетишинг мумкин-ку, нега қурилишда тентираб юрибсан, ҳайронман, — деди.

— Сенингча, қурилишда тентираб юрганлар ҳаммаси қолоқ, жиноятчи, саводсиз одамларми? — деди олдида турган ичимликдан бир қултум ютиб, Сашага тик қараганича. — Агар билсанг, мана шу ресторанда ҳам фақат биз ўтирган жойгина сокин, аммо ичкарига бош тиқсанг, аҳвол бизнинг қурилиш майдонидан ҳам чатоқ. Бугун ҳаммага қийин. Ўтиш давридаги тўфон ичидамиз ҳаммамиз. Бир куни шу тўфон тинади. Аммо, афсуски, ҳаёт ортга қайтмайди... Нима бўлганда ҳам, ҳақиқатни гапириш керак, тўғрисини айтсам, эгасиз ўликларни ёмон кўраман, — деди Сашага ниманидир шама қилиб.

Официант қиз олиб келган таомга ҳеч ким қўйл текклизмади. Бир пайт Саша Маъруфни сўроқ қила бошлиди. Ота-онаси, ақа-укаларини, бу ерга қандай келиб қолганини... Нодир исми нимани англатишини...

Маъруф бу терговдан бироз ажабланиб, очиқ-ойдин ва қисқа қилиб Нодирнинг ҳаётини ҳикоя қилди. Сўнг шифокор Сашага нима дегани билан қизиқ-

ди. Сашанинг кўз остидаги салқилари янада осилиб, қоп-қора кўзларида қандайdir туби кўринмайдиган оғир ўй пайдо бўлди.

Ҳисобчи унинг иккиланиб турганига далда бўлиш мақсадида:

– Ёлғоннинг умри қисқа, вақти келиб барибир ҳақиқат ошкор бўлади, ҳаммамизнинг борадиган жоийимиз бир, – деди.

Орага жимлик чўқди. Маъруф ўша савол билан Сашдан кўзини олмади. Бироз вақт ўтиб Саша:

– Рак касаллиги ҳақида эшитганмисан? – деди. Маъруф дарҳол ҳамма нарсага тушунди ва:

– Бошимдами? – деди, холос.

Саша «ҳа» ишорасини қилди.

– Қанча вақтим қолган? – деди Маъруф бироз жимликдан кейин.

– Айтишича, икки ё уч ой.

Яна жимиб қолишиди. Ҳалиги сокин мусиқа яна янграй бошлади. Саша билан ҳисобчи ичишда давом этди.

Даҳшатли ҳақиқатдан Маъруфнинг юзи бир оқарди-да, яна ўзига келди. Ўзини йўқотмади. Шунча ийл яшаб қўйдим. Бунинг устига, Нодирнинг танасида олти ойдан зиёдроқ яшадим. Ўлимдан қочиб бўлмайди, у танадаманми, бу танадаманми, барибир, куним яқин эди. Лекин ҳамма нарсани ўз ўрнига қўйиш вақти келди. Ҳақ, барибир, ҳақлигича қолади. Мана, ниҳоят, ҳаммаси тугамоқда...

У рўпарасидаги деразага тикилиб қолди. Энди ёмғир тинган, қор эса кучайиб, паға-паға бўлиб ерга тушаётган эди.

Тонг гира-ширасида самолётдан тушган Маъруф таксида уйига қараб жўнади. Ҳовли тинч, ҳамма уйқуда. Дарвоза очиқ қолган экан, ҳеч кимни уйғотмай ичкарига кирди. Тўғри хонасига қараб борар экан, беихтиёр Нодирнинг хонасига кўз ташлади. Бу хонанинг эшик-деразалари ёпиқ, ўзининг хонаси деразасидан эса ҳовлига маъюстгина нур ёғилиб турар, Нодир эса тебранма креслога ястанганча ташқарига кўз тикиб ўтиради. «Наҳотки, ҳалигача қарилликка кўнишиб ултурмаган бўлса бу бола?» – деб ўйлади Маъруф ота. Нодир охирги вақтларда кўзлари янада хиралашгани сабаб оstonада пайдо бўлган одамни дарҳол таниёлмади. Дераза токчасида турган кўзойнагини тақдию бир қалқиб тушди.

– Ўзингизмисиз? – деди титроқ овозда бошқа сўз тополмай.

Маъруф ота унга томон юраркан, ўзининг қанчалар қариб, мункиллаб кетганини кўнглидан ўтказди. Нодир эса кўзойнагини ечиб, яна дераза токчасига қўйди-да, юзини икки қўли билан тўғсанча ҳўнграб, елкаси силкиниб, ўпкаси тўлиб йифлаб юборди. Маъруф ота ўз айбини билгани учун Нодирнинг олдига келди, елкасидан қучиб:

– Секинроқ, Нодиржон, болаларимни уйғотиб юборасан, – деди шивирлаб. У Нодирдан аччиқ кесатиқлар, аламли гиналар, сўкишлар кутган эди, шунга ўзини йўл бўйи ҳозирлаб келган эди. Аммо негадир бунақасини кутмаганди. Нодирни қучоқлаб, борган сари хўрлиги келиб, дув-дув тўкилаётган нам юзидан ва юзини беркитиб турган бармоқларидан ўпар, умри давомида ҳеч қачон бироннинг дилини бунчалик оғритганини ҳис қилмаган ва қандай кечирим сўраш-

ни билмай караҳт бўлмаганди. Ҳозир эса қайта-қайта узр сўрар, ёш боладек ўқсиб йиглаётган ўз қиёфа-сидаги Нодирни юпатишга уринаркан, ўзининг ҳамма нарсага тайёрлигини тан оларди. «Майли, Худо-йим унинг жонини олсин. Жаҳаннам ўтида куйдириб кул қилсан. Фақатгина миясидаги дард нима бўлса ҳам ўзида қолсан. Нодирга ўтиб уни хароб қилмасин». У илтижо қилиб Худодан фақат шу нарсани сўрай бошлиған эди... Нодир эса охирги вақтларда чолнинг қайтишидан умидини узган, дунёда ёлғиздан-ёлғиз, ҳеч ким тушмайдиган, олимлар ҳам тагига ета олмайдиган жумбоқ одамга айланганди. Кутимагандан унинг остононада пайдо бўлиши натижасида қалбидаги ана шу ёлғизлик ҳисси кўз ёшлари билан секин-аста чиқиб кетди.

– Қанақанги беўй, аblaҳ одамсиз? Наҳотки, бир қўнгироқ қилиш, ўзингиз ҳақида биргина хабар бе-риш шунчалар қийин бўлган бўлса? – деди Нодир иккиси ҳам хотиржам тортиб юзма-юз ўтиришар экан.  
– Ўзимга ўзим тузоқ қўйдим. Ўшандан бери ўтирасам-турсам ўзимга ҳам, сизга ҳам Худодан илтижо қилиб умр сўрадим. Яна бир мӯъжиза юз бериб мендан қочиб кеттан тентак чолни ортига қайтаришни, яна бир учрашишимизни илтижо қилдим. Қўлимдан бошқа иш келмади-да. Дардимни бировга айттолмасам, нимаям қила олардим?.. Мана шу эшиқдан соғ-омон кириб келишингизни ўтиндим. Қандай бўлмасин, ўз майлым билан барбод қилган ёшлигимни қайта тиклаш учун ялиниб-ёлвордим. Ҳеч қачон ҳеч ким менинг аҳволимга тушмасин. Чунки бировнинг танасида эртаю кеч яшаш, ўз эркингни йўқотиш чексиз-чегарасиз азоб экан. Ёшликнинг қарилик билан ўрин алмашиши азоб... Бошимга тушган қорни ўзим курайман. Ишсизлик, пулсизлик, онамнинг касали – ҳаммаси

жамиятнинг ўтиш даврига тўғри келди. Менинг ҳаётим – менинг тақдирим. Майли, бу ташвиш бизнинг авлодни истаган кўйига солсин. Ҳамма-ҳаммасини енгаман, фақат мана шу бирорнинг танасидан қутулсам бўлгани.

Нодир бир гапириб, бир йифлаган кўйи чўнтағида ҳамиша ҳеч қаерга қўймай авайлаб олиб юрган шишачани чолга узатди. Чол столда турган бир неча пиёладан иккитасини олиб, шишачадаги суюқликни илгаригидек тенг иккига бўлди. Бирини Нодирга узатиб, иккинчисини «Бисмилло» дея ўзи ичди.

Маъруф столга Нодирнинг ҳужжатлари билан бирга чўнтағидаги бор сармоясини қўйиб:

– Келишганимиздек, буларнинг барчаси сеники, – деди.

Нодир пулга қарамади ҳам. Аксинча, пенсия пулларининг ҳаммасини тортмадан олиб, унинг пуллари ёнига қўйиб:

– Буларнинг менга кераги йўқ. Фақат менга бир ҳақиқатни айтинг, – деди, кейин деворда ишлаб турган қайсиdir бир соатга қараб давом этди. – Адашмасам, сиз онамни танийсиз. Сиз унинг судида прокурор бўлиб қатнашган экансиз.

Маъруф ота кутилмаган бу гапдан хиёл эсанкиради. Кейин секин деди:

– Нима, сен бу билан онамнинг қамалишида сизнинг айбингиз бор демоқчимисан?

– Билмадим... билмадим, – деди Нодир ундан нима истаётганини ўзи ҳам тушунмай.

– Биласанми, ўрта асрларда жаллодлар бўлган. Уларнинг кимлигини сенга тушуниришим шарт эмас. Улар жуда кўпчиликнинг бошини танасидан жудо қилишган. Баъзида жаллод боши танасидан жудо бўлаётган кишининг мутлақо айбизлигини, бунда асосан

жамият айбдорлигини англаб турган. Лекин у ўз вазифасини бажарган. Чунки, биринчидан, унинг касби. Иккинчидан, жамиятдаги барча айбдорларни у тутиб келмайди. Унга тутиб келишиб, бошини танасидан жудо қилишни буюришган. У ўз бурчини адо этган, холос. Унинг асоси йўқ рад этишга, унинг қурби етмаган ҳам. Худди шундай, пахта ишида айбланганлар айбдорлигини, лекин улардан ҳам кўпроқ буйруқ берганлар ва амалта ошириб бўлмас режани кўрсатганлар айбдорлигини билганимнинг кимга кераги бор? Қолаверса, терговда аниқланган фактлар билан уларнинг айбдор эканлиги кўрсатилган. Мен эса худди жаллод сингари ўз ишимни бажарганман, қонунни ҳимоя қилиб айбдорнинг айбини бўйнига қўйганман. Жамият билан олишишга ожиз бир фигура бўлганман...

Нодир Маъруф отанинг ҳақ эканини англади ва онаси туфайли уни айблашни бас қилди. Чол эса Нодирнинг столдан ўз ҳужжатларини олиб, пулга қўйл теккизмаганидан ранжиди. Камтарлик, олижаноблик, самимилик бу инсоннинг тарбия кўрганлиги белгиси эди.

— Мен сени илк кўрган кунимданоқ бу хислатларингни сезганман. Ҳозир ҳам тан олиб турибман. Аммо ҳозир сенга мана шу пуллар жуда зарур, менга эса кераги йўқ, — деди баҳсга ўрин қолдирмай.

— Ҳаётда пул унчалик катта рол ўйнамаслигини, ундан ҳам юксакроқ нарсалар борлитгини мана шу лаънати креслонгизда ўтиравериб англаб етдим. Қойилман, ўтган йигирма тўрт йиллик умримни энг майда тафсилотларигача, бир сониясини ҳам қолдирмай, худди ипга тизгандек ўйладим, ўша сиз айтган жаллоднинг кундасига бошимни қиёфангизга кирган куним қўйган бўлсам, шу кунгача ойболта тифини бўйнимда сезиб яшадим. Бирорвга айтсанг, ишонмай-

ди: пул, бойлик ўз-ўзидан келиб-кетаверадиган бир тушунча экан...

Ўртага яна жимлик чўқди. Нодир столдаги бир талай пулга қўз ташлаб олди-да:

— Афсуски, инсоннинг камчилиги ва ожизлиги ҳам яшашинг асл моҳиятини тушунмаслигига экан, — деди пичирлаган алфозда. — Менга унутилмас сабоқ бердингиз.

Чол эса:

— Шу нарсага фаросатинг жойидалиги учун тушуниб етдинг, акс ҳолда, бундай демасдинг. Қолаверса, эслашга арзийдиган воқеа содир бўлди, — дея кулди.

Жимлик. Деворда ёлғиз ишлаб турган соатнинг чиқиллашибигина эшитилиб туарди, миллари илгарилагани сари вақт ўз кучини кўрсатди. Уларнинг қиёфалари секинлик билан ўз асл әгаларига қайта бошлади. Ҳаммаси тугатач, Маъруф ота бошида оғриқ сезиб, ялт этиб Нодирга қаради.

— Бошингда оғриқ йўқми?

— Йўқ, нимайди? — деди Нодир тушунмай.

— Ҳа, унда яхши, — деди чол енгил тортиб. — Худога шукр. Нега барча соатларимни тўхтатиб қўйдинг?

— Тирик жон нимадир қилиши керак. Ўзингиз ўйлаб кўринг, бироннинг танасида, бироннинг ўрнида яна энг яқин одамлари даврасида омонат нима қила олишингиз мумкин? Шундай вақтда ўлганнинг устига чиқиб тепгандек атрофингда шунча соат чиқчиқлаб умринг ўтаётганини таъкидлайверишининг менга кераги йўқ эди. Агар керак бўлса, соатларингизни юргизиб бераман.

— Ҳм, қўй шу ҳолда қола қолсин, — деди чол. — Энди, Нодир ўғлим, гап бундай, мана шу пулни олгин. Ортиқча камтарлик ҳам манманлик аломати. Ортиқча ўжарлик ҳам илмсизлик оқибати. Кел, шу пулга

ўзингга бошқа уй сотиб ол. Мен ҳам бундан енгил тор-таман. Фақат битта шартим бор, гоҳ-гоҳида мендан хабар олиб тургин. Ўрнимга ўтириб кўрдинг, биз, қа-риялар, ёшларнинг бир оғиз илиқ сўзи ва оддийгина эътиборига муҳтожмиз. Уйни олиб, кўнгил хотиржам-лигидаги бир келсанг, бир-бири мизга саргузаштлари-мизни гапириб берамиз. Бўптими?! Ҳозир, мана, тонг ёришиб қолди. Бу ердан чиққин-да, тўғри онангнинг олдига бор. Ҳа, яна бир насиҳатим, дунёning ҳамма жойи бир гўр, бегона юртларда юрагингни хўрлай-вериб, ҳаётингни ҳам адойи тамом қилмай, шу ерда, ўз томирингдан узоқлашмай, ўтиш даври тўфонининг тинишини кут, миграция қушларгагина хос. Мен сал-кам тўқсонга кириб англаб етган ҳикматим шу бўлди: ер юзида одамзод мусофиридир. У сайд-саёҳат қилиб дунёқарашини кенгайтириши ва бошқа халқлар тур-муш тарзини кузатиши оқибатида бу дунёning телба дунё эканини англаркан, холос!..

Маъруф ота чуқур бир хўрсинди-да, тебранма курсисига жойлашиб, ўзининг қадрдан ҳовлисини кузата бошлади, ўғли Мажиддан кўнгли тўқ, у ўзидан кейин бу ҳовлинни худди отасидек асрраб-авайлай олади...

## Кутилмаган учрашув

*Хикоя*

Кутилмаганда лавозимим кўтарилди.

Собиқ бошлиғим ташаббус кўрсатди. Юқоридаги таниш-билишларини ишга солиб нуфузли бир давлат банкига бош ҳисобчи қилиб жойлаштириб қўйди. Унинг таъқидлашича, ҳисоб-китобнинг кифтини келтириб уддалаб қўйишимдан ташқари ҳар қандай инжиқ раҳбарнинг ҳам тилини топа оладиган, сабрқаноатли ходим эканман. Бунаقا ходимлар ҳозир роса танқис экан. Шу сабабли ҳам мен у ерда бемалол ишлаб кета олишим, ҳатто вақти-вақти билан унга ҳам ёрдамим тегишига (гарчи буни очиқ айтмаган бўлсада, асл мақсади шу эди) қаттиқ ишонар экан.

Тан олай, бошлиғимнинг бу ташабbusи менга ёқди. Миямга чирмовуқдай ёпишиб олган мантиқсиз ўй-хаёлларимдан хийла қутулдим. Кейинги вақтларда ўзимдан-ўзим қониқмай, ҳаётимдан ранг-баранглик йўқолиб, қандайдир бир қобиққа тушиб қолган эдим. Қизиги шундаки, бу қобиқни ўзим яратгандим. Ўзим яратиб қўйиб, энди ундан чиқиб кетолмай, жиғибийрон эдим. Боз устига, бошлиқнинг бўлар-бўлмас шубҳа-гумонлари, хотинимнинг қайсарликлари жонимдан ўтиб кетган эди. Аммо, бошлиғим айтганидек, сабрқаноатли эмасманми, бу тахлит умргузаронликдан зерикиб, безиб кетган бўлсам-да, миқ этмай, бир китобдан ўқиганимга амал қилиб ҳар тонгни кулиб қарши олардим. «Бугундан бошлаб ҳаммаси яхши бўлади,

яхшиликка ўзгаради», – дердим овоз чиқариб. Овоз чиқариб айтилса таъсири қучлироқ бўлар экан-да. Тонгда олган қувватим кечгача аранг етарди-да, тунда тўшакка чўзилишим билан яна бошланарди, «Мана, яна бир куним арзимас майда-чуйдалар билан ўтди, эртам ҳам, кейинги куним ҳам – бутун умрим энди шу тарзда кечадими?» деган умидсиз хаёллар билан хўрсина-хўрсина уйқуга кетардим.

Ичимда бир одам бор, вақти-вақти ҳар бир ташлаган қадамим, хатти-ҳаракатимдан норози бўлиб, тинчимни бузиб туради. Унинг тинимсиз уқтиришича, мен жуда қудратли, кўп нарсаларга қодир эмишман, фақат ўзимни ўзим чеклаб қўйиган эмишман. Мен бу гапларга ишонмайман. У айтган одам мен эмасман... мен ҳамма нарсага тез кўникувчи, мослашувчи, писмиқ, дилидагини тилига чиқармайдиган дамдўз одамман.

Хуллас, ишимдаги янгиликдан хиёл кўнглим кўтарилиди: ҳар тугул, ишхонам ўзгаради, ҳамкасларим ўзгаради, улардан зериккандим...

Илгарилари гўр эканманми, нуқул қовун тушириб, ўринли-ўринсиз бир нарсаларни гапириб қўярдимми-ей, ўзимга алоқаси бўлмаган ишларга аралашиб, бироннинг ёнини олиб, олижаноблик қилмоқчи бўлардимми-ей, хуллас, йўқ ердан ўзимга ташвиш орттириб, кейин бунинг азиятини чекиб юрардим. Дақки эшитардим. Сиқувга олинардим ва... ишимни ўзгартиришга мажбур бўлардим. Уйда бўлса, хотиним билан кунда жиққамушт эдим. Бора-бора ҳаммаси жонимга тегди. Ўзимни қайта тарбиялашга аҳд қилдим. Тинчгина ҳаётни таъминлайдиган энг муҳим нарса нима экани ҳақида бош қотирдим ва топдим: ҳар қандай муаммонинг ечими пул. Пулинг бўлса, биронга қарам бўлмайсан. Ишхонангда ҳеч кимга ялтоқланмайсан. Хотининг олдида тилинг узун бўлади. Хархасасидан

қутуласан. Демак, пул топиш керак. Бунинг учун эски одатларимдан воз кечишим зарур. Сукут сақлашни, кўриб кўрмаслик, билиб билмасликни ўрганишим ке-рак деган қарорга келдим. Ўзим бу қарорга келдимми ё ҳаётнинг ўзи турткилаб-турткилаб, тарашлаб, сил-лиқлаб ташладими, ишқилиб, ўзгардим.

Ҳисобчиман. Атрофимда одамлар ишлайди, ижод қиласди, янгилик яратади, жамиятни ривожлантира-ди... Мен эса... уларнинг ҳаракатини пулга чақишим ке-рак. Бошқа иш қўйлимдан келмаса керак деб ўйлайман. Майли-да, ҳар ким ўз ишини қилгани маъқул. Касбим ҳисобчиликми, демак, кўнишишм керак. Шундай дея ичимга ўрнашиб олган ҳалиги фаламисга ҳам касбим-нинг аҳамиятини, ҳисоб-китобсиз ҳаёт ҳаёт эмаслиги-ни, демак, мен ўзим ҳам жамият учун керакли одам эканлигимни тушунтиришга уринаман. У бир оёқда туриб ўзиникини маъқуллайди. «Шу кунгача қанча-қанча қофозларни рақамга тўлғаздинг. Чўнталинг ҳам тўлдими? Кўз нурингни бериб тўлдирган қофозларинг бир кун, бир ҳафта, бор ана, бир ойдан кейин қим-матини йўқотади, гижимланиб ахлат қутига тушади. Бундан чиқадики, ўзинг ҳам ўша қофозлар каби ги-жимлаб ташланасан...» – деб дилимни хуфтон қилга-ни-қилган.

Баъзида: «Бир танада икки киши бўлиб яшашни ижод аҳлига чиқарган», – дердим. Чунки улар икков-лашиб, талашиб, тортишиб нимадир яратиши, ижод қилиши мумкин, бироқ ҳисобчи эмас... Ҳисобчи кирим-чиқимни ҳамда кимга бўйсуниш кераклигини тушу-ниб етса бўлгани. Аста-секин дўстларим даврасидан сирғалиб чиқиб, ҳамкасблар, онда-сонда у-бу шиша-дошлиларим ўтиришларига бориб қолишимни айтмасам, бошқа ҳаммасига қўл силтагандим. Хотиним ва бош-лиғимта қарши чиқмасам, уларнинг мантиқсиз зугум-ларига ортиқча эътибор бермай, ҳаммага сокин, сами-

мий, бир сўз билан айтганда, гўзал табассум қилолсам бўлгани.

Оилам ва ишхонам янада худбинлашиб, ўз қобиғимга ўзим ўралиб қолишимдан асрайди. Хуллас, ўзлигимни четта суриб қўйиб, жамият билан муроса қилишни ўргандим. Атрофимдаги катта-кичик ҳақсизликларга кўзимни кўр, қулоғимни кар қилдим, оилам ва ўз тинчлигимни деб куйди-пищдилик, жонкуярликлардан аста-секин воз кечдим. Бу осонлик билан бўлмади, бироқ натижаси ҳам ёмон эмас. Баъзида хотиним инжиқликларини ҳаддидан ошириб юбориб, аразлашиб қолсак, тунда кўзимга уйқу келмай тўшакда тўлғониб ётарканман, пиш-пиш уйқуни ураётган хотинимга қараб ажабланаман, «Бунча бегам бўлмаса, шунча гап-сўзни айтиб қўйиб, озгина бўлсин хижолат чекмаса-я», – дейман... Бир вақтлар мени ақл-ҳушимдан айириб девона қилган гўзал, наҳотки, шу аёл бўлса!?

Тўғри, у болаларимнинг онаси, ниҳоятда менга ва-фодор, бироқ ўта инжиқ ва худбинлиги билан (ким билсин, балки, яхши кўрганиданми) мени ўзининг шахсий мулкига айлантириб олган. Гоҳида ўзимдан-ӯзим ижирғаниб кетаман. Ҳаммасига ўзим айборман, серандишаман, ҳамма нарсанинг оқибатини ўйлаб муроса йўлини танлайман. Атрофимдагилар эса бу феълимни бошқа нарсага йўйиб, бундан фойдаланишади. Жаҳлга минган шунаقا пайтларимда отамнинг «Қўйлингдан ҳеч нарса келмаган тақдирда ҳам, ҳаётда эркак бўлиб қолганинг яхшироқ» деган гапи ёдимга тушади. Шунда хотиним ва бошлиғимга қарши миямда бир талай жавоблар тўпланади, ёлғиз қолдимми, ўзим билан ўзим гаплашиб, ҳақ талашиб, тортишман-да, аммо уларга рўпара бўлишим билан яна ҳаммасини ичимга ютаман. «Кел, шу сафар ҳам индамай қўя қолай, ҳали фурсати кеп қолар», – дейман. «Ле-

кин, қачон бўлмасин, бир портлашим, иккаласи ҳам бир чақага арзимайдиган одамлар эканлигини исботдалиллар билан ўрнига ўтқазиб қўйишим бор!..» – деб аҳд қиласман-у, бироз ўтиб ҳовурим босилгач, «Аммо кейин-чи?» – дея исёндан кейинги жараённи кўз олдимга келтираман. Хўп, бошлифим, масалан, мени итоатсизликда айблаб (гарчи шунча йил қулоқ қоқмай хизматини қилган бўлсам-да) ишдан бўшатади. Хотиним эса: «Феълимиз тўгри келмагани боис ажрашмоқчимиз», – дея ариза кўтариб чиқса-чи?.. Ё барчасини бошқатдан бошлаш лозим, ё мутеликдан воз кечиб, отам сингари аёл зотига бефарқ бўлишим керак. Йўқ, бунга тоқатим етмайди... Мен кимман!? Яратганинг ожиз бир бандаси, табиатнинг бир парчаси, холос. Бир кун келиб дунёни тарқ этишим, руҳимнинг арши аълога кўтарилиши... заминий ҳаёт, фоний дунё... Аслида, ҳаммаси жуда содда... Бироқ чуқурроқ ўйласанг, инсон ақли идрок қилолмайдиган даражада мураккаб, чалкаш...

Ана шундай маза-матрасиз ўй-хаёллардан чарчаб кетганимда ўзимни оддийгина гиёҳга ўхшатаман. Айниқса, бугунги ҳаёт тарзим ушбу ўхшатишинг жуда мос келади. Менинг Худо, севги, руҳ ҳақидаги тасаввурларимда аниқ бир қўним йўқ, бироқ олдимда бир масала кўндаланг: ўзим, хотиним ва икки фарзандимнинг ҳаёти. Бунинг учун фақат тинимсиз ишлашим, атрофимдаги лўттибоз ва сафсатабозларга эътибор қаратмай, тонгдан-шомгача рақамларни талаб даражасида тартибга келтиришим лозим. Ҳаётимнинг бирхиллиги, рангсизлиги, диққинафаслиги... ҳеч бири мени чалфитмаслиги керак, тамом-вассалом! Ичимдаги галаённи ана шундай хулоса ва аҳдим билан босишим керак. Бироқ қачонгача? Гўё қумдан кўтарган қўргонимни тўфондан асрамоқчи бўлгандек ботинимдаги қўзалишлардан қўрқиб қолганман...

Шундай кунларнинг бирида, ўлганнинг устига теп-  
гандек, уч ойлик ҳисоботни топшириб, иш столимни  
тартибга солаётсам, кутилмаганда почтамда бир хат  
пайдо бўлди. Охирги вақтларда ҳеч ким билан интер-  
нетда ёзишмаганим учун бироз ҳайратланиб хатни  
очдим.

«Сен ҳали тирикмисан? Индамай, тишингни ти-  
шингга қўйиб, мўмингина бўлиб ишлаб юргандирсан?  
Худойимнинг бағрикенглигига ҳам ҳайрон қоламан  
баъзидга: сендеқ одамларнинг ҳам бемалол яшаб юри-  
шига қўйиб берса-я! Бу ноҳақли... Тунлари мижжа  
қоқмай, йиллар давомида қалбимни оғритган сендеқ  
малъуннинг асл бащарасини мен биламан ва менгина  
сени тоабад лаънатлайман...»

Хатни ўқиб, уйга қайтишим ҳам ёдимдан кўтари-  
либ, интернет тармоғига кириб «ковлай» бошладим.  
Бироқ хатнинг эгаси почтасини бошқа одам кирмай-  
диган қилиб «кодлаб» ташлаган экан. Уринишларим  
бейфойда кетди, унинг кимлигини билолмадим.

Ўша кечаси мижжа қоқмай бутун қирқ йиллик та-  
ниш-билишларимни кўз олдимга келтирдим. Бу бир  
ҳазил ё кимдир адашиб тушган деб ўйлашни истар-  
дим-у, лекин хат самимий, қалб оғриғи билан ёзилган  
ва айнан менга тегишли деган ишончдан дилимда қан-  
дайдир фашлик бор эди. Гёё ҳалиги фаламис ичимдан  
чиқиб кетгану менга қаердандир хат йўллаяпти.

Эрталаб ишга кетиши олдидан тонгти ахборотни  
тинглаб, қаҳва ичарканман, нонушта тайёрлаётган  
хотинимга хат хусусида гапирдим. Аёлим: «Ўзингиз  
билиб-билмай бироннинг дилини қаттиқ ранжитган-  
дирсиз», – деб бепарвогина кулиб қўя қолди. «Балки»,  
– дея елкамни қисдим.

Орадан икки кун ўтиб Н.Б. ҳарфлари ёзилиб, ден-  
гизда сузиб бораётган дельфиннинг сурати жойлаш-  
тирилган манзилдан яна қисқагина хат келди. «Ҳали

болаларинг ҳам бордир? Ҳа, номарднинг уруғи ҳам сероб бўлади. Дунё номардларга тўлиб кетди. Ҳаммаси сенга ўхшаганларнинг уруғи...»

Хатни ўқидиму почтамни индамай ёпдим ва бошқа бу хат хусусида ўйламасликка, ортиқ аҳамият бермасликка аҳд қилдим. Бироқ «Бу ким бўлиши мумкин?» деган савол, барибир, мени тинчитмади. Хотирамнинг чуқур-чуқур бурчакларида беркиниб ётган таниш-билишларимнинг барчасини бирма-бир кўз олдимдан ўтказдим. Ишга шўнгигиб кетиб, энди унутдим деганимда почтамда янги хат пайдо бўлди. Бошим қотди: «Кимни ўнчалар ранжиттан эканман?!»

Уч ой мобайнида ўша дельфиндан, яъни Н.Б.дан ўндан ортиқ хат келди. Сўзимда қаттиқ туриб, биронтасини очиб ўқимадим, лекин хат чек-чегарасиз нафррат билан ёзилганини ич-ичимдан ҳис қилиб қийналардим. Лекин бу ҳақда хотинимга гапиришни ўзимга эп кўрмадим.

Бир куни бошлигим билан қаттиқ тортишиб қолдим. Охирги вақтларда ишхона чиқимини кўпайтириб юбораётган эмишман. Ахир, баш ҳисобчи бўлганим билан, бошлиқнинг рухсатисиз ишхонанинг банкдаги ҳисоб рақамидан бир тийин ҳам ололмайман-ку. Бу мияси айниган бошлиқ кимдандир дакки эшитиб келса аламини мендан олади. Биладики, сабабсиз ғазаб ва нафрратга фақат мен бардош бера оламан. Юзига сапчимайман. Бошлиқ хонасидан қофозларни кўтариб чиқар эканман, «Ўрганиб қолган-да», – дея зарда билан пицирладим. Гўёки менинг қулоқларим унинг шахсий мулки: хоҳлаган пайтида хоҳлаган гапини айтиб ичини бўшатиб олади. Лекин бу қулоқнинг ортида қанақа мия, қанақа юрак бор деб ўйлаб ҳам ўтирмайди. Баъзида: «Ҳозир ҳаммасини, унинг қанчалар тубанлигини башарасига сўзлар билан чизиб бераман, у эса ўз қиёфасидан ўзи қўрқиб кетиб курсисидан қулаб

тушади», – деб ҳам ўйлайман. Ана шундай кайфиятда иш столига келиб ўтиришим билан компьютерим мониторининг остки қисмидаги чироқча лип-лип ёниб-ўча бошлади: яна хат! «Дунёнинг қай бир бурчагидан мен умримда кўрмаган, билмаган одам қай бир мақсадда менга бутун нафратини тўкиб, асабимни эговлаб ётса-ю, мен унинг хатларини ўқиб ўтирсам», – дея хатларнинг барчасини компьютернинг тутмасини бир босиш билан ўчириб ташладим. Қарангки, шунча хатдан охирги бир сатр ўчмай қолибди, қизиқишим устун келиб, шуни ўқидим. «Агар Самарқандга келсанг, менга қўнфироқ қил», – дея телефон рақамини қолдирганди номаълум киши. Афсус қилдим. «Бекор шошибман, асл мақсадини тушунмай бекорга ўчириб ташлабман», – дедим. Дарҳол қўнфироқ қилмоқчи бўлдим-у, «Йўқ, у нусха билан юзма-юз гаплашай, афт-анторини, кўзларини кўрсам, унинг асл ниятини, мендан нима исташини англашим осонроқ бўлади», – дея фикримдан қайтдим. Йўқ, фикримдан қайтишимни одатдагидек нотўғри ифодаладим. Ўшанда у билан телефонда гаплашишим гўё ўзимнинг иккинчи қисмим билан бўладиган суҳбатдан бошқа нарса бўлмасди. Мен эса бунга тайёр эмасдим, ана шундан чўчишим, шекилли...

Бахтимга, ишимнинг ўзгариши худди ўша кунларга тўғри келди-да, вақтдан унумли фойдаланиш учун бир ойлик таътилга чиқдим. Ўйлаб ҳам ўтирмай таътилни Самарқандда ўтказиш ва ўша номаълум киши билан учрашишни мақсад қилдим...

Ўша куниёқ хотиним билан хайрлашиб, самолётга чипта олдим. Таътилдаги одам, шошилмай, бошқа транспортда ҳам борсам бўларди-ю, лекин кайфиятим тушкун эди. Ҳаётим қандайдир найрангбоз қўлида ўйин бўлаётганидан жиним қўзиб, бу томошага тезроқ нуқта қўйиш учун ошиқаётган эдим. Назаримда, поездда ёки автобусда йўлга тушсам, йўлнинг олис-

лигидан юрагим ториқиб кетадигандек туюлаверди. Хотиним ажабланди, «Таксида уч соатда етасиз-ку, самолётингиз нимаси?» – деди. Дейишга деди-ю, жавобини эшитишни ҳам истамай ё жавобимдан кайфиятини бузгиси келмадими, ўз ишига шўнғиди. Бу мен учун айни муддао эди. Биз йиллар шундай яшаб келмоқда эдик, шунга кўниккан эдик.

Самолётда ойна ёнида ўтириб паға-паға булутларга тикиларканман, бўлгуси бошлиғим қандай одам экан, унга кўниккунимча тагин қанча асаб толаларим чирсчирс узиларкин деган ўйда уф тортдим. «Ўзи менга шу янги ишнинг нима кераги бор эди, маошим етарли бўлса, қолаверса, анови мижғов чолни ҳар томонла-ма ўрганиб бўлган эдим. Энди жон ҳовучлаб бунисини ўрганишим керак. Бирорларнинг пулини ҳисоблайвер-ганидан мияси айниб қолган раҳбарларнинг қош-қо-воғига қараб ўтишга маҳқум этилганман, шекилли», – дея ўксиниб қўйдим.

Бир неча километр баландликда ҳавони ёриб учиб бораётган самолётимиз бир-икки титраб, силкиниб қўйди. Ёнимда ўтирган ҳамроҳим ранги ўчиб, гап қотди:

– Ҳар сафар иккинчи марта самолётга чиқмайман дейман-у, барибир, яна чиқавераман. Бўлди энди, охиргиси шу. Эсон-омон етиб олсан зинҳор-базинҳор самолётнинг отини тутмайман. Айтиб бўладими, бир кунмас-бир кун, Худо кўрсатмасин... – қолганини айтишга тили бормади. Бир нарсаларни пичирлаб юзига фотиҳа тортди.

Ҳамроҳимнинг гапидан юрагимга фулгула оралади. Ростдан ҳам, айтиб бўладими, радардан сабабсиз ғо-йиб бўлган, техник носозлиги оқибатида қулаган самолётлар озми?.. Мана, икки кунгина олдин «Вести»да беришди: германиялик йигирма саккиз ёшли учувчи дунёга машҳур бўлиш мақсадида самолётини Фран-ция тоғларига олиб бориб урди. Юз эллик нафар йў-

ловчи нобуд бўлди. Воқеа ўрганилиб, учувчининг уйи тинтув қилинганида унинг бош оғриғига қарши дори ичиб юргани, охирги вақтларда эса руҳий касаллар рўйхатида тургани аниқланган. Ҳайрон бўлдим, Германиядек ривожланган бир мамлакатда руҳий хаста учувчи шунча назорат ташкилотларидан қандай ўтиб самолёт бошқарди экан? Ичимга сифдиролмай хотинимга айтсам, «Нима бўпти, – деди менинг «саддалигим»дан лабини буриб, – у-ку самолётни бошқарибди, мамлакатни бошқарган ва бошқараётган руҳан нософломлар йўқ деб ўйлайсизми?» Унга индамаган бўлсам-да, бундан бир неча йиллар олдин мамлакатлар-аро йигилишдан қайтаётган бир мамлакат раҳбарлари самолётда ичиб маст бўлишгач, президент учувчидан, туман бўлишига қарамай, самолётни пойтахтга қўндиришни талаб қилиб туриб олгани, натижада ҳалокат юз берганини эсладим. Ўшанда катта бир халқни бошқарган президент ўзича неча ўнлаб кишилар тақдирини ҳал қилгани, ачинарлиси, бошқалар индамай ўлимга рози бўлганига ҳайрон қолгандим.

Ёнимдаги тепакал кишига разм солиб, шунча йиллардан бери самолётда учиб бунақсанги аҳволга тушмаганимга ва манови ваҳимачининг таъсирига берилаётганимга ажабландим. Ёши элликлардан ўтиб қолган, дид билан кийинган бу одам бошини ўриндиққа тираб, кўзларини маҳкам юмид олган эди. Қолганлардан кимдир газета ўқимоқда, яна кимдир уйқуда. Иккимиздан бошқа ҳеч ким ўлим ҳақида ўйлаётгани йўқ. Йўловчиларнинг тетик юзларига бир-бир кўз ташлаб, ҳамроҳимнинг қўрқувдан рангида қон қолмаганини кўриб, «Ўлимни ўйламаслик керак, вақти-соати келганини сезмай қолган маъқулроқ», – дея ўзимга ўзим далда бердим. Бу орада либоси ўзига жуда ярашган стюардесса қиз ҳамроҳимга тинчлантирувчи дори билан сув келтирди.

Аэропортда биринчи учраган таксига чиқиб, ҳай-довчига: «Энг яқин меҳмонхонага ҳайданг», – дедим.

Меҳмонхона кўп қаватли бўлиб, юқори қаватнинг хоналаридан бирига жойлашдим. Дераза олдида бу ердан кафтдагидек кўриниб турадиган қадим шаҳарни узоқ томоша қилдим.

Июнь ойи эмасми, ҳаво эрталабдан иссиқ ва дим эди. Шаҳарни айланиш мақсадида меҳмонхонадан чиқдим. Серқатнов кўчалар, тирбанд тор йўлаклардан яёв ўтиб борар эканман, ортга қайтиш йўлини унутдим. Аммо бу шаҳарни яхши билганим, қолаверса, таксига ўтириб меҳмонхонага қайтиш имкониятим борлиги учун ҳеч нарсани ўйламай бошим оққан томонга қараб кетавердим.

Бу шаҳарда талабалигим ўтган. Мен ўқиган даврларда у анча одми эди. Энди мутлақо ўзгариб кетибди. Янги бинолар, турли русумдаги автомобиллар, шаҳар манзарасини янада кўркамлаштириб турган турли дарахт ва гуллар, фавворалар, хуллас, ҳамма-ҳаммаси йигирма йил илгариги талабалик давримдаги шаҳарга мутлақо ўхшамасди. Одамларнинг кийиниш маданияти ҳам бошқача: бири европача, бири шарқона, бири алламбало урфда кийиниб олган.

Талабалигимни хотирлаб анча юрдим. Ўрта асрлардан қолган обидалар, уларнинг нилий гумбазлари, юксак минораларини завқ билан томоша қилдим. Регистон кўчасини кесиб ўтиб, бир маҳал охири кўринмайдиган, икки томони коттежлар жойлашган кўчага кириб қолдим. Мен бу кўчани жуда яхши биламан. Бу ерда бир ўртоғимнинг ҳовлиси бўлиб, талабалигимда уницида ижарада турганман. Исми Комил эди. Феъли ғалати эди. Негадир ҳеч кимга қўшилмас, индамай елкасини қисиб дарсга келиб-кетар, бирор билан очилиб гаплашмасди. Ижара уй излаб юрганимда кутилмаганда у мени уйига таклиф қилди. Гап орасида: «Ҳеч

кимга айтмасанг, бизницида яшасанг бўлади», – деб қолди. Нега уницида яшашимни сир тутишим керак-лигига ажабландим-да, уй топилганига шукр қилиб, унинг шартига рози бўлдим. Айтмасам айтмабман-да, шуям иш бўптими?

Каттагина ҳовли. Мен дарвозадан кираверишдаги биринчи хонага жойлашдим. Комилнинг отаси ҳам индамас, бироғга қўшилмайдиган, ўз оламида яшайдиган одам экан. Онаси эса нимагадир жанжалкаш асабий аёл бўлиб, эри билан кунда бир жанжаллашиб оларди. Комилнинг бу ерда ҳам дами чиқмас, назаримда, у дарсдан қайтгач хонасига қамалиб олиб нима биландир шуғулланарди. Мени уйларига қабул қилганлари билан, бор-йўқлигимга аҳамият беришмас, ўз ташвишлари билан яшашарди. Комил эса, бир ерда ўқишишимизга қарамай, нимагадир мендан ўзини олиб қочарди.

Хонамнинг ҳовлига қараган деразасига қалин ипак парда осилган, парда эскирган бўлиб, юқори қисмидаги каттагина йиртифи бор эди. Хонада зерикиб, юрагим сиқилган вақтлари оёғим тагига стул қўйиб, ўша тирқищдан ҳовлида нималар бўлаётганини томоша қиласардим. Тўғрироғи, ҳовлини бошқача йўл билан кузатсан ҳам бўларди-ю, бироқ Комилнинг отаси хонам билан қарама-қарши қилиб солинган айвонда ўтирас, деразамдан кўз узмасди. Олдинига чолнинг бу ошкора қилифидан жаҳлим чиқиб юрди. Аммо унинг бироз савдоироқ эканини сезганимдан кейин эътибор бермай қўйдим. Бу орада кимдир мен йўқ вақтимда хонамга кириб, парданинг сўқилган ўрнини ташқари кўринмайдиган қилиб чандиб қўйди. Шу билан тушундимки, хона соҳиблари менинг писмиқлигимни сезиб қолишибди. Хуллас, улар мени кўришни исташмас, мени эса бу хонадоннинг ҳамма икир-чикирлари қизиктиради.

Бир куни Комилнинг отаси йўқолиб қолди. Она-  
бала уни узоқ излашди. Милиция ходимлари уйни  
текширувдан ўтказишиб, мени ҳам сўроққа тортиш-  
ди. Натижа бўлмади, хонадон сув қўйгандек тинчиб,  
бу уйда бирор яшаётгани билинмай қолди. Орадан  
олти ойлар ўтиб чолнинг ўлигини топиб келишди.  
Йифи-сифи қилишиб, дафн этишди. Маъракаларни  
ўтказишиб, онаси анчагача мотам либосида юрди.  
Орадан яна олти ойлар ўтиб хонадонда Комилнинг  
отаси ўзи кириб келди. Унга кўзим тушиши билан  
оёқ-қўлим музлаб, анграйиб қолдим. Бошқалар бўл-  
са... Она баттар жizzакилашди, Комил эса чолларга  
ўхшаб мункиллаб қолди. Фақат ўшанда у менинг хо-  
намга кирди. Ўтиришга таклиф қилишимга қарамай,  
эшик олдида турганча менга узоқ тикилди. Кейин  
дабдурустдан:

– Биласанми, ўлган одам ҳам отам эди, – деди осо-  
йишта оҳангда.

Мен беихтиёр уни маъқуллаб бош иргадим. Алла-  
қанақа қўрқув ҳиссидан тилим гапга айланмай қолди.  
Дераза пештахасига оҳиста чўқдим. У ўша алфозда  
давом этди:

– Бу аниқ. Онам иккимиз ўликхонада кўрибоқ та-  
нингандик. Ҳақиқатдан у бизнинг отамиз эди. Кечаки  
уиймизга кириб келган одам ҳам отам. Бу ҳам аниқ.  
Балки, унга ўхшаб биз ҳам руҳий касалдирмиз, нима  
дейсан?.. Биз жиннига ўхшаймизми?..

Мен аввалига «Йўғ-эй» дегандай гўлдирадим-да,  
кейин ўзимни босиб олиб, ўрнимдан турдим. Унга  
яқинлашдим. Лекин кўзларига тикилишга кучим ет-  
май, аллақайта, эшик пештоқигами кўз тикканча:

– Мен ҳам тан оламан, – дедим.

– Нимани?

– Ҳовлида юрган анови киши ҳам сизнинг отангиз  
эканини...

Комил шундай қарааш қилдики, бу қарашидан «Тавба, буям жинни эмасмикан мабодо?» деган маънони уқиш мумкин эди.

– Ҳа, шубҳа қилмайман, у сизнинг отангиз, – дедим бу сафар қатъий қилиб.

Комил эса ўша қарашини ўзгартирмай хонадан чиқиб кетди.

Орадан бир йиллар ўтиб, ёзги таътилга чиқишимиз арафасида чол яна йўқолиб қолди. Бу сафар уни излашмади. Менга ҳам чурқ этишмади. Узоқ йиллар бу ҳақда ўйладим. Институтни тугаллаб кетганимдан кейин бир куни «Ҳол-аҳвол сўрашиб қўяй» деган ниятда уйларига қўнфироқ қилсам, гўшакни унинг ўзи кўтарса-да, «Комил уйда йўқ эди», – дея жавоб қилди. Аввалига яна қўнфироқ қилиб: «Ҳов Комил оғайни, сени таниб турибман-ку, нега алдайсан, нега ўзингни оп қочасан?» – демоқчи бўлдим. Кейин: «Э, менга нима?» – дедим. «Бу одамларнинг ҳаммаси бир гўр, бири ундиндай, бир бундай. Ўзим эса улардан ҳам бешбаттарман!» – дея қўй силтадим. Шу-шу бошқа қўнфироқ қилмадим. Гарчи бир-биримизга руҳан яқин одамлар шунча йил бир том остида яшаган бўлсак ҳам, Комил масофа сақлади, ўзига яқинлаштирмади. Мен эса уни тинч қўйдим. Йиллар ўтиб, у истаганидек, мен ҳам уларни унуддим.

Мана ўша кўча...

Ҳали айтганимдек, кўча ўша бўлгани билан, қиёфаси тамоман ўзгариб кетган. Илгариги бири шиферли, бири тунукали, бири лойсувоқ томли уйлар ўрнига замонавий-намунавий бинолар қад ростлаган. Аввалигидан анча кенгайган йўлнинг икки тарафида пиёдалар йўлакчалари, йўлакчалар икки тарафида гуллар, гуллар оралатиб ўрнатилган митти-митти фонтанчалардан сувлар худди парланган каби атрофга ёйилиб турибди.

Атроф манзарани кузатиб борарканман, бу шаҳарга нима мақсадда келганимни тамоман унутиб, Комилни бир кўриб кетиш истаги туғилганди менда. Аммо қандай топишим мумкин? Кўчанинг номини айтмаса, эскисидан бирор нишона қолмаган, бинолар янги, ундаги одамлар ҳам, шубҳасиз, нотаниш бўлиши керак.

Шаҳарсозлик бу ерда қадимдан ривож топган. Ҳозир эса ҳадди аълосига чиққани кўриниб турибди. Замонавийлик билан анъанавий шарқона услугуб уйғунлашиб кетган. «Оққан дарё оқиб, барибир, ўзанига тушаркан-да», – дея дилим ёришиб борарканман, отам раҳматлини хотирладим.

У болалигимдан менга нисбатан жуда талабчан эди. Илм олишим йўлида харажатлардан қайтмасди. Ўртоқлари даврасида мендан фахрланиб айтган гапларига ўзим гувоҳман. «Фарзанд тарбиялаш ҳам бир бизнес», – деганди. Бу гапнинг маънисига етмай бошим қотганди. Онам эса ёшлигимда сил касалидан вафот этган. Отам бошқа оила қурмаган, аммо, сезишимча, аёллар унинг атрофида ҳамиша парвона бўлган, бироқ нимагадир отам ўзини уларга нисбатан бепарво туттган. Ёшим улғайиб, у билан хийла очиқроқ гаплаша бошлаганимда сезгандимки, отам аёл зотига нисбатан ўла-ўлгунча беписанд қараган. «Аёл зоти яралишига кўра эркакка нисбатан нафақат жисмонан, ақлан ҳам ожиз, – дерди. – Ачинарлиси шундаки, бу қавм ўзини ўзи тушунмайди ва, энг ёмони, аввал бир ишни қилиб қўйиб, кейин ўйлайди. Ваҳолонки, эси бутун одам аввал ўйлаб, кейин қадам босиши керак».

Оила қурганимда отам: «Ўзингга ўзинг бош оғриғи орттирдинг», – дея кулиб қўйганди.

Тўйдан сўнг отам совфа қилган уйга хотиним билан кўчиб ўтдик. Отам ўз уйида сўнгги нафасигача ёллиз яшади. Гоҳ-гоҳида меҳмонга келганида келининга ёрдам берар, у пиширган овқатларни, гарчи бемаза

бўлса-да, мақтаб-мақтаб ерди. Қелин ҳам қайнотаси ҳақида оғиз кўпиртириб, фақат яхши гапларни гапи-пар, менга эса ярим ҳазил, ярим чин қилиб: «Отан-гизга заррача ўхшамайсиз», – дея нолирди. Отам эса иккимиз ёлғиз қолганимизда: «Бунақанги хотин билан яшагандан кўра ҳибсда ўтирган маъқулроқ», – деб ки-ноя қиласарди. Олдинига отамнинг айёр ва иккиюзлама-чилигидан сиқилиб, хотинимнинг калтафаҳм ва вайса-қилигидан жаҳлим чиқарди. Бора-бора иккисини ҳам эшитмай, уларга эътибор бермай қўйдим. Бироқ йил-дан-йилга улғайиб, ҳаётни, одамларни тушунганим сари отамга նисбатан ҳурматим ошиб, хотинимдан ҳафсалам пир бўла борди. Чол умрининг охиригача ҳисобчи бўлиб ишлади. Қизиги шундаки, унинг охирги иш жойлари диний идорада бўлди. Ҳозир ўйлаб қара-сам, отам умри адогига етиб бораётганида ўз кўнглига таскин топиш мақсадида диндорлар орасидан жой из-лаган экан. Афсуски, бу ерларда ҳам нафс ва бойлика ружу қўйиш, манманлик, ҳокимиятпастлик гиж-ғиҷ уя қурганини, энг ёмони, қалбини ҳамиша куйди-радиган саволлар бу давраларда ҳам ҳавода муаллақ эканини чол тушуниб етгани аниқ эди. Бундай дейи-шимга сабаб, бир куни у: «Тўғри, пешонам сажда кўр-мади, намоз ўқимадим, лекин одамгарчилик, виждон жиҳатидан диндорлардан анчагина юқори туришимга ишонаман», – деганди менга ўз-ўзидан. Шу-шу отам бирон марта Яратганга илтижо қилмади. Динларнинг ҳаммаси оммани бошқаришдаги сиёsatнинг бир тури деб қаради. Инсоннинг онги ва ақлини ҳамма нарсадан устун қўйди. Муқаддас китобларга эса диндорларнинг келгуси ҳаёт хусусидаги хаёллари мажмуаси деб қа-ради. Бу қайсар чолнинг ўзига хос феъл-атворидан ҳайратдаман, мутлақо унга ўхшамаслигимга ҳам иқ-рорман, аммо онамни хотирлай олмаслигимдан ўкина-ман. Бироқ онам отам билан яхши яшаганлигига амин-

ман. Чунки бугунги тажрибамдан келиб чиқсам, бундай айёр ва ақлли әркак билан яшаган аёл ўзини ҳар томонлама ҳимоя қила оладиган ва ҳар қандай мушкул вазиятда ҳам ишонса, суюнса бўладиган ҳақиқий кучли елкадоши борлигини ҳис қилади. Ўзини баҳтли ҳис қилади. Гоҳида хотиним мени отам билан қиёслаб, унга зифирча ўхшамаслигимни қайта-қайта таъкидлаганида ўзимни зўрга босиб тураман, баъзида: «Унга ўхшамаганим учун ҳам сен билан яшаб юрибман», – деб юборишимга оз қолади. Лекин ортиқча жанжалдан қочиб унга ҳақиқатни айтишдан тийилсан-да, барибир, юрагимда бир нарса узилиб тушар, аммо буни хотинимга билдириласликка ҳаракат қиласман, «Бошқа эр-хотинлар оила қуришгач, висолга етишгач нимага асосланиб оиласини сақлаб қолишади?» – деб бош қотираман. Ҳар сафар хотинимга нисбатан тош отишга киришсам биринчи бўлиб унинг қайси камчилигидан бошлиашни билмай қоласман. Аслида, у ўз ролини – хотинлик ва оналик вазифасини ўз ўрнида қўярди. Фақатгина шундай яшаши кераклиги учун, адашмасам, ўзим ҳам, фарзандларим ҳам худди шу аҳволда. Шу боис оиласиз муҳити, мен сабабми, хотиним туфайлими, ташқи дунёдан узилиб бораётгандек эди. Баъзида ҳаммани стол атрофида тўплаб, очиқча гаплашиб олмоқчи бўламан, аммо тилимга бирон-бир жўяли сўз келмай, шаштимдан тушаман, «Вақт ўзи ҳамма нарсани тўғрилайди», – деб ўзимни юпатишга уринаман. Менинг индамаслигим эса хотинимнинг жагини очади. Бўлар-бўлмас даъволари билан тинкамни қуритади.

Илгарилари севганига етишгач, эр-хотин бир-бirlарига бўлган ҳурмат, ишончни қадрлаб яшашади деб ўйлардим. Хотиним билан ўртамиизда эса ҳеч қанақа туйғу қолмаганди. Очиқча тан олмасак-да, бир-бири-миздан безган эдик. Оддий нарса ҳақида гапирганимда ҳам хотинимнинг эътиборсиз қўйл силтаб қўйиши

менга оғир ботар әди ҳатто. Ваҳолонки, бир пайтлар у менинг маза-матрасиз ҳазилларимга ҳам қотиб-қотиб кулар, ақлли гапларимни эса жон қулоғи билан тинглар, ҳайратга тушар, елкамга бошини қўйиб, кўзларимга меҳр билан тикилиб қоларди. Эҳ, у даврлар тушимда кечганмиди, нега ҳаммаси бошқача бўп кетди деб юрагим ториқади. Шунақа пайтларда олисроқ юртларга бош олиб кетиб қадримни билдиргим келиб қолар, бу ҳам қўлимдан келмагач, ҳамкасларимдан бири билан ўтириб олиб тўйгунча ичаман ва у билан арзимаган мавзуларда ижикилаб гап талашаман, бироқ дилимдаги асл оғриқ ҳақида ёрилолмайман.

Мен учун қадрдон, айни чоғда, нотаниш кўчадан ана шундай ўйлар гирдобида борар эканман, ортимдаги қайсиdir темир эшик шарақлаб очилди. Ундан аёл кишининг юракка оғир ботадиган нолакор чинқириги эшитилди. Таққа тўхтаб, ортимга қарадим. Бир эшикдан баланд бўйли, қора шим, кулранг шляпа ва шу рангдаги кўйлак кийган одам чиқди-да, бошини ҳам қилганча мен томон кела бошлади. Мен индамай йўлимни давом эттиришга мажбур бўлдим.

Танимаган-бilmagan одамнинг эшиги олдида тўхташ ноқулай, аммо нимадир бўлди шу хонадонда деганча ортимдан эргашиб келаётган ҳалиги кишига зимдан кўз ташладим. Хаёлан ундан сўрадим: «Сен ҳам менга ўхшаб аёлининг қош-қовоғига қараб яшайдиган бир бечорамисан? Ёки замонавий эркак, яъни, отам таъкидлаганидек, ҳар қандай вазиятда ҳам эркак бўлиб қолишга ҳаракат қилаётган саркашлардан биримисан?»

Ҳали соат эрталабки ўндан ошмаган бўлса-да, кун жуда исиб кетган, саратон қуёши атрофни ўз ҳукмига бўйсундириб олганди. Ичкари кўчаларни анча айланниб, бир-биридан қолишимайдиган, қўкка бўй чўзган биноларни кўздан кечирдим. Энди бир амаллаб катта

кўчага чиқиб олсам, такси тўхтатиб тўғри меҳмонхонага бораман. Тамадди қилиб, сўнг ҳалиги телефонга қўйнироқ қиласман. Бир бошга бир ўлим. Йиллар давомида шунча нафратни ичига ютиб келган одамдан зифирча яхшилик кутмаётгандим-у, бироқ ният қиласман ишимни амалга оширмасам, кўнглим тинчиласлигини ҳам биласман. Аммо бир нарса таъбимни хира қилиб туради. Ҳалиги шляпали киши худди таъқиб қилаётгандай ортимдан эргашиб келарди. Бир неча бор қадамимни секинлаштириб, ортимдаги кишини ўtkазиб юборишга ҳаракат қилиб кўрдим. У ҳам негадир қадамини секинлаштириди. Тавба, бу ерга умуман номаълум киши билан учрашишга келганим камдек, мутлақо бегона одамнинг ортимдан соядек эргашиб олгани нимаси?..

Вазиятни аниқлаш мақсадида меҳмонхонага қайтиш фикримни ўзгартириб, ўз ихтиёrimни йўл оқимида топширдим. Катта йўлни кесиб ўтиб, икки қаватли иморатлар орасидаги кичкина йўлакчага кириб олдим. Нотаниш ҳамроҳим ҳам ҳаракатимни тақрорлаб, ўша алфозда ортимдан эргашиб кела бошлади. «Бу ёғи қизиқ бўлди-ю, ўзга шаҳарга виждонинг тозалигини исботлаш учун сендан нафратланадиган одам билан учрашаман деб келсанг-у, дард устига чипқондек, мутлақо бегона одам орtingдан соядек эргашса. Қизиқ, ўз-ўзингни англамаган бир вақтда яна бир жумбоқ». Содир бўлаётган воқеалардан таажжубимни яширолмаётган эдим.

Йўқ, буни ҳамроҳ деб ҳам бўлмайди. У менинг ортимдан кузатиб келмоқда. Аммо нима учун бу тарзда ошкора? Ахир, кўр ҳам сезади-ку унинг бу тарздаги киши ортидан очиқ-ошкора эргашиб юрганини. «Ҳозир тўхтаб, мендан нима исташини сўрайман», – дея кескин тўхтаб ортимга қайрилдим. Қутилмагандан ҳалиги кимса ҳам икки қадамча нарида беорларча

тўхтаб ортига қайрилди. Унга томон бир-икки қадам ташлаган эдим, у ҳам нари кетаверди. Соянг шундай эмасми, юрсанг юради, турсанг туради. Жуда қизиқ...

Ортидан борар эканман, ниҳоятда новча, елкалари кенг бўлишига қарамай, ўта озғинлигидан шимининг камари икки айлангани кўриниб турарди. Иссиқда нимагадир бошига шляпа бостириб олганидан юзини яхши кўра олмасдим. Худди шундай қилиниши керакдек ҳалиги киши олдимда кетаверди. Бироз унга эргашган киши бўлдим-у, аммо ўз-ўзимдан жаҳлим чиқди. Шунчалик ночор одамманми? Кимдир нафратланса, интернетдан мактуб жўнатса, вижданан қийналиб, мардлигимни исботлаш учун шундан шунга учиб келсам, камига, манави тушуниб бўлмайдиган нусхага эргашиб вақтимни беҳудага сарфласам. Хотиним менга топиб ташхис қўйган, мен НОШУДМАН! Жаҳл билан шартта тўхтадим-да, орқамга қараб кетдим. У келяптими-йўқми, эътибор бермадим. Нима, мен фавқулодда бир одаммидимки ёки бир миллионермидимки, ўзимнинг соямдан ўзим қўрқиб яшасам! Анча ергача чидаб бордим-да, барибир, бўлмади, кўз қирим билан ортимга қарадим. Уф!.. У ҳамон таъқибда давом этаётган эди. Ҳар қанча тутоқсам-да, ўзими босдим.

Шу кўйи шаҳарнинг янги-янги кўчаларидан юриб, ниҳоят, чарчадим. Қорним ҳам очди. «Сен ҳам чарчадингми?» – дея ўзимча ичимда ҳамроҳимдан сўраб қўйдим. Нотаниш ҳамроҳ эса ҳамон бош этганча эргашиб келарди. Юра-юра болалар майдончаси устидан чиқиб қолдим.

Вақт тушга яқинлашгани сабаб майдончада ҳеч ким кўринмайди. Атроф жимжит. Қуннинг иссиғи забтига олган. Чанқадим, қорним очганидан қулдирай бошлади. Майдонча четидаги дараҳт соясида жойлашган ўриндиқлардан бирига бориб ўтирдим. Нотаниш ҳам-

роҳим ҳам бошини олдингидан ҳам эгиброк ўриндиқнинг бир чеккасига омонатгина ўрнашди.

Қизиқ, ҳеч бўлмаса, қилаётган ишидан озгина ноқулайлик ҳам сезмайди-я!.. Ҳа. Бу ҳаётда одамзод онги ҳазм қила олмайдиган жумбоқлар жуда кўп, бекордан-бекорга айтишмайди: Ҳаёт – қийин фан.

«Чанқадим. Эрталаб нонушта қилмагандим, қорним ҳам очиб кетди. Сенинг ҳам қорнинг очиб, чанқадингми? Ё менинг сабрим қай даражада эканини синаб кўрмоқчимисан? Мен жуда сабрли одамман. Ҳаётда ҳеч нарсани биринчи бўлиб бошламайман. Ҳамиша кутаман. Гоҳида юрагим тўхтаб қолишини ҳам кутаман. Тўғрисини айтсам, менда бундай ҳолат жуда кўп бўлади, баъзида ҳамма нарсадан тўйиб кетаман. Одамларни умуман кўргим келмай қолади. Чунки кўпинча уларнинг кўз қарашларидан нимани ўйлашини, нима ҳақда гапиришларини сезиб тураман. Аммо уларни ҳамиша жимтина эшитишга мажбурман. Айниқса, аҳмоқ бошлиқни сиз ақллисиз дея у билан бирга ишлаш ё унинг бир чақага арзимайдиган фалсафасини маъқуллаб ўтириш қанчалик оғирлигини билсайдинг. Бунинг устига, жуда чиройли, айни пайтда, ўта вайсақи аёл билан яшашни тасаввур қилиб кўргин. Баъзида ҳаммасини башарасига айтиб, уларнинг қанчалар савияси паст одамлар эканини исботлаб, бирини креслодан иргитиб, ишхонадан чиқиб кетгим, иккинчисини эса бетига тупуриб, худди сен сингари эшикни қарсёпиб бошим оқҳан томонга кетгим келади...»

Жавоб истаб ҳамроҳимга қараб қўйдим. У бошини кўтармади. Яна давом этдим: «Агар шундай қилган бўлсанг бекор қилибсан! Бунинг фойдаси йўқ! Ишон, мен бу хусусда тунлари мижжак қоқмай ўйлаб чиққанман. Оиласини сақлаб қололмай ёлғиз яшаётган ёки бир неча бор оила қурган эркакларни кўрдим... Оқибати бир хил. Баъзида ўта замонавийлари, яъни ўзинг

ҳам тушунгандирсан... ҳалиги әркак ва аёлнинг бирга яшаши оқламади деганлар билан ҳам сухбатлашдим... Бу дунёда ҳамма изтироб чекмоқда... Назаримда, ҳамма ниманидир сабр билан кутмоқда. Бошқача айтсам, бу дунёning асл мақсади сабр пардаси ортига бекитилган...

Балки, сен истаганингдек, нималардир ўзгарар. Аянчлиси, ҳеч ким, ҳатто дўстларинг ҳам сени тушунмайди. Ёлгизликка маҳкум бўласан. Майли, сен айтганингдек, тушунар, бунинг қандай аҳамияти бор? Бироқ, энг ёмон томони, тирикчилик учун ундан ҳам баттарроқ бошлиқ билан ишлашга мажбур бўласан...»

Институтни янги тугаллаб, ҳали ҳисоб-китобнинг икир-чикирларига унчалик ақлим етмайдиган вақтлар эди. Тўғрироғи, отам ҳисобчи бўлгани учун касб сирларини яхши тушунардим-у, аммо чолнинг иш юритиши менга ёқмасди. Буни у ҳам билгани боис ортиқча куюниб йўл-йўриқ қўрсатишга уринмаганди. Балки, ўзи кутгандек фарзанд бўлмаганим боис келгуси ҳаётимга қўл силтаб қўя қолганмиди, билмадим. Лекин кутилмаганда яхши ишга таклиф қилишди мени. Хурсанд бўлиб иш бошладим. Бир ойлар чамаси ишлага-нимдан сўнг бошлиқ хонасига чақириб: «Қўлингдаги хужжатларингни шундай қилгинки, иккини иккига қўшса, беш бўлсин», – деб қолди.

Мен унга ҳайрон бўлиб қараган эдим, «Сенга мана шу қалам осмонда учади десам, сен уни учадиган қилиб расмийлаштирасан, тушунарлими?» – деди менга қариликдан териси осилиб қолган қовоқларини зўрга кўтариб.

Олдинига анча вақт ўйланиб юрдим, ҳисоб-китоб аниқликни талаб қиласди, ахир, бу сиёsat эмас-ку, бир нарсанинг ечимини ўн хил йўл билан топсанг. Шу воқеадан бироз вақт ўтгаč, бошлиқ ўринбосари билан сухбатлашиб турганимизда унга: «Мана шу қалам ос-

монда учади», – дедим, у эса кўзларини катта-катта қилиб: «Иссифинг йўқми?» – деди... Мен ҳам бўш келмай: «Буни менга бошлиқ айтди», – дедим. У ҳеч иккиланмай: «Бошлиқ айтган бўлса, учади, фақат пастроқ учади», – деди жиддий оҳангда.

Мен ҳам қирқни қоралаб қўйдим. Бу орада ҳар тоифа бошлиқларга ҳисобчи бўлдим, иккинчи бўлиб гапиришни, кутишни ўргандим. Чунки ўзга чорала-римнинг барчаси хато ва ташвишдан иборат бўлди. Бу сафар ўз тажрибамга қарши чиқиб вижданан қадам ташладим. «Сенга айтсан, – дея яна ёнимдаги шля-пали ҳамроҳимга гойибона мурожаат қилдим, – бу ҳақда гапиришнинг ўзи кулгили, менга умуман нотаниш бўлган киши худди ўзимдек мендан нафратланади, аянчлиси шундаки, номардлигимни билади. Киши юрагининг туб-тубида ўз баҳосини ўзи яхши билади. Гарчи жамият уни фаришта сифатида ҳурмат қилсада, бироқ у Эгам билан рўпара келганида вижданни билан ҳисоблашса ўзининг фаришта эмаслигини ҳар томонлама ҳис қиласди. Биласанми, Одам ўлимидан сўнг дўзахга ёки жаннатга Худонинг буйруғи билан тушади деган тушунча мавжуд. Баъзида ўйланиб қоламан, одамзод ўз хатти-ҳаракатини мушоҳада қила оладиган даражага эришса ва ўзи дўзахи ёки жаннати эканлигини белгиласа. Худо яна бизни кузата бошлайди. Умуман, унинг бизга ишониши учун нимамиз камлик қиласди?.. Бунинг учун одамзод Ҳаққа эришиш керак. Мана шу Ҳақ нимадан иборат? Илм, оддийлик, камтарлик, хокисорлик... яна қандайдир тушунчалар...

Одатдагидек, камина ҳам атрофдагиларга ҳамиша ҳам ёқавермайман, чунки биринчи ўринда ўз тинчими-ни ўйлайман. Бу табиий, бироқ бу туйғу гўё кул босган чўғ сингари хавфли. Масалан, кўп ҳолларда учрайдиган воқеалардан бири – жамоамиз орасида ҳамма биладиган, лекин ошкора айтилмайдиган ҳақ гапни

кутилмаганда кимдир гапириб юборади. Бу бошлиқ-қа ёқмаслиги аниқ. Баъзида бу ҳақиқат унинг моддий манфаатига тўғри келса, бу аччиқ ҳақиқатни майдалаб ҳазм қиласди. У ҳазм қилиб олгунича атрофдагилар сукут сақлайди. Аксинча бўлса, ходимни қандайдир важ-сабаб билан ишдан ҳайдайди. Мен-чи? Мен бош ҳисобчиман. Тўғри, мен бошлиқнинг маънавий хатти-ҳаракатига жавоб бермайман, лекин одамгарчилик юзасидан оғзимга толқон солмай, ҳалиги кишини қўллаб-қувватласам, уни ўз ўрнида асраб қолсан бўлади. Йўқ, мен ҳам ундаи қилмайман, кўпчилик сингари воқеани кузатаман, холос. Илгарилари, гарчи индамасам-да, бунағанги воқеадан сўнг кечаси тўшагимда илондек тўлғаниб чиқардим. Энди-чи? Кўчада икки киши бир кишини ўласи қилиб дўппослаётган бўлса ҳам, кўрмасликка олиб индамай ўтиб кетаман. Лекин кета туриб қўл телефонимдан милицияни огоҳлантирсам бир одамнинг ҳаётини асраб қоламан-ку. Йўқ, менинг орган ходимларининг ортиқча савол-жавобларига тоби-тоқатим ҳам, вақтим ҳам йўқ. Қолаверса, бу менинг ташвишим эмас. Хуллас, дўстим, тўғрисини айтсам, жамиятнинг кўзида тўғри-ҳалол бўлсамда, бироқ ундеймаслигимни ёлғиз Худо ва виждоним билади. Шу ерда отамни эслашга мажбурман. У умрининг сўнгида: «Худо – инсоннинг кўнглида, виждонида. Уни тарбиялаш ва комилликка етказиш кишининг инсоний бурчи бўлиши керак», – дерди. Қизиқ, бу гапларни ундан кўп эшитганман, бироқ шу кунгача магзини чақишга уринмаганман. Мана, бугунга келиб асл башарамдан яна кимдир огоҳ!

Балки, ортиқча ҳавои ҳаёлларга берилаётгандирман. Бироқ баъзида одам ўз-ўзи билан ҳам гаплашади. Рози-ризоликни ўз-ўзидан талаб қиласди. Номаълум шахс томонидан менга жўнатилган мактуб ана шу талабни янада кучайтирди. Балки, у билан қачонлардир

учрашгандирмиз. Худбинлигим боис, йўлимда учраган бўлса, янчиб ўтиб кетгандирман. Нима бўлганда ҳам у билан учрашиб, ўзимни тинчлантириб яна худбинлик қилаётгандирман. Қайдам? У мени кўрганда фикрини ўзгартирас, бироқ ўзим ўзимдан қаноатланиб яшаёлмай қолдим. Тирик мурдага ўхшайман. Бугун бир одам ошкора менинг номардлигимни таъна қилгани учун унинг кўзига тик қараб ўзимни оқлаш мақсадида шаҳрингга келгандим. Бу ерда кутилмагандан сен чиқиб қолдинг. Мана, сенга ҳам қарши чиқолмай ортимдан эргаштириб юрибман. Энг қизифи, мана шу ерда, иссиқда бемақсад кутиб ўтирибман. Йўлда тўхтаб, кинолардаги сингари сенга бир мушт тушириб, нега ортимдан юрибсан десам бўлади. Йўқ, жисмонан кучим етса ҳам, руҳан журъатим етмайди. Худди шунингдек, бутун шаҳарни айланиб, эртанги суҳбатга ўзимни тайёрлаб, кечаси нотаниш дўстимга телефон қилиб, у билан эртага учрашмоқчи эдим.

Мана энди нега бу ерда ўтирганимни тушунгандирсан? Сен бўлсанг, бир соатдан буён ортимдан таъқиб қилиб юрибсан. Нима иш қиласан? Қаердансан? Ҳалиги ортингдан бақириб қолган аёл ким эди? Нима сабабдан менга илакишиб қолдинг?»

Ўриндиқ четида бир нуқтага тикилиб ўйланиб ўтирган шеригимга кўз қиримни ташладим. У миқ этмай, атрофида ҳеч ким йўқдек ниманидир ўйлаётган эди.

«Оддий бир идора ҳисобчисиман, – дедим ҳамроҳимнинг беозор юзига тикилганча у билан суҳбатимни давом эттириб. – Умрим бирорвларнинг пулинин санаш билан ўтмоқда. Гоҳида ўйлаб қоламан: арзимасдек кўринган мана шу ноёб қофозлар одамзодни бошқаради. Ҳаётининг асосий мазмунига айланиб қолади.

Бу касб отамдан ўтган. Тўғрироғи, ақлимни таний бошлаганимдан бери рақамлар билан биргаман. Отам,

назаримда, Яратганга ҳам шубҳа билан қарайдиган одам эди. Унинг таъкидлашича, Худонинг ўйлари ни ҳам худди унга ўхшаган ҳисобчилар кирим-чиқим билан тартибга солиб туради. Қизиги шундаки, ўзларини ҳар хил номлар билан атайдиган Эгамнинг хизматчилари ҳам оддий бандаларидан Унинг йўлидаги хизмати эвазига ҳақ талаб қиласди. Унинг шарафига беминнат, холис меҳнат қилишмайди. Аксинча, домлаларнинг нуфузига қараб уларнинг нарх-навоси белгиланган. Шундан келиб чиқадики, Яраттанинг жамолига интилишда ҳам мана шу ноёб қоғозлар рол ўйнайди. Хуллас, дунёнинг ҳаракатига ҳам шу қоғозлар сабаб. Демак, Худо тушунчаси ҳам мол-дунё, бойлик, пул эвазига тикланмаяптими? Модомики шундай экан, нега одамлар руҳий касалликка чалинади? Нима асосида уйқусида туш кўради? Энг аянчлиси, руҳан соғлом одамнинг кўзига қандай қилиб аниқ ва тиниқ тарзда шарпалар кўринади?» Шу ерга келганда чалкашиб отамни тушунолмай бошимни чанталлаб қоламан ва баъзида отам билан бу мавзуда гаплашмаганлигимга афсусланаман, шу боис илми комил донишманлар даврасида бу жумбоқли баҳсларни тинглашга интиламан. Аксига олиб, атрофимни бир-биридан қолишмайдиган ҳисобчилар қуршаган. Уларнинг ўртасида дунё бойликларини ҳисоблаш, инсоннинг еб-ичиши, кийиниши ва бир қунлик харажатлари хусусида баҳс боради. Умуман олганда, сентиментал мавзуларда ким биландир гаплашиш жуда ҳам оғир, бу мавзуларда одам ўз ҳаётий тажрибаси ва бу жараёнда тўпланган билимлари эвазига бир хулосага келади. Аммо ўша хулосани ҳам сўзлар билан ифодалаб суҳбатдошига етказиш, муҳими, ўзи чиқарган хулосанинг тўғри эканини фактлар билан асослай олиш учун ҳам катта билим ва тажриба лозим».

Шуларни ўйлаб ҳамроҳимга кўз ташладим.

«Сен нима деб ўйлайсан: Худо ҳақидаги тушунчаларни ҳам сентиментал деб бўладими? Энг тараққий этган миллатларнинг ҳам бир қисми Худога ишонади, бир қисми ишонмайди, яна баъзилар иккиланиб яшашади. Сенингча, қайси бирига қўшилиб яшаган маъқулроқ?»

Киприк қоқмай бир нуқтага тикилганча ўтирган ҳамроҳимга ошкора тикилиб: «Нима билан шуғулланасан, кимсан, кел, танишайлик», – дедим. Одатдаги-дек, овозимни чиқармай саволни ўз-ўзимга бердимда, уни яна кузата бошладим.

Бу киши қиррабурун, киприклари қалин ва қоп-қора, қирқ беш ёшларда эди. У бошини бироз кўтариб, бургутқараш билан ниманидир ўйлаб ўтиради.

«Ахир, мен бир мусофири бўлсам, бу ерда ҳеч кимни танимасам, ҳатто ҳозир қайси манзилда ўтирганимни ҳам билмасам, нега менга бунчалик ёпишиб олдинг? Мендан нима истайсан? Очиқ айтсанг-чи!..»

Атроф жимжит, қуёш тикка кўтарилиган, кун қизигандан-қизиб бораарди.

Майдончада ҳеч ким кўринмайди. Ҳамма иссиқдан уйига беркиниб олган. Бироз нарида болалар ўйнаб-ўйнаб ташлаб кетган тешик чарм тўп иссиқнинг зўридан ҳид чиқармоқда. Ўрнимдан туриб, тўпни бир тепдим. У думалаб сувсиз ариқчага тушиб кетди. Бу ҳаракатимни кузатиб ўтирган ҳамроҳимнинг юзи қилт этмади. Нигоҳларимиз бир-бирига бир сония тўқнаш келган бўлса-да, нотаниш киши ўша-ўша кўзларини пирпиратмай, менга бургутқараш қилиб ўтираверди.

«Тавба, одам ҳам шунчалик без бўладими? – деяундан кўзимни олиб қочдим. – Жуда галати киши экан. Агар ҳозир туриб кетсан, ортимдан эргашармикан? Аниқ ортимдан эргашади. Сурбетлиги кўриниб турибди, мендан айрилгиси йўқ».

Жойимга қайтиб ўтирас эканман, уни суҳбатга тортмоқчи бўлдим. «Нима деб гап бошласам экан?» – дея ўйланиб турганимда нотаниш ҳамроҳим гёё: «Сен билан гаплашадиган гапим йўқ», – дегандек юзига шляпасини бостирганча бошини ўриндиқнинг орқа суюнчиғига ташлади. Бу ҳолатдан жаҳлим чиққан бўлса-да, ўзимни қўлга олиб: «Меҳмонхонада нима ҳам қиласман, учрашувим эртага бўлса, у ерда ўтиредим нимаю бу ерда ўтиредим нима?» – деб ўйладим. Тўғри, у ер салқин, сув ичиш, бирон нарса еб олиш ҳам мумкин. Умуман олганда, бу ер ҳам унчалик ёмон жой эмас. Нима, сахронинг ўртасимидики, иссиқдан, сувсизликдан нолисам. Қолаверса, ёлғиз эмасман. Ҳамроҳим ҳам чанқаган, ана, иссиқдан юзини ҳам бекитиб олди.

«Бу ҳаётни сабр билан енгиш керак, майли, сабр юракни, умрни эговласин. Барибир, нима бўлганда ҳам, энг тўғри йўл – кутиш», – дея оғир хўрсиндим. Сўнгра ҳамроҳимга қараб: «Сенинг биринчи бўлиб кетишингни кутаман», – дея пичирладим. Қуёш тафти қайтмаган, аксинча, шаҳарда ҳамма жой бетон эмасми, қуёш нури бетонга урилиб, иссиқ икки баробар кучайиб тепага кўтарилар, кун қизигандан-қизирди.

Иссиқ элитиб, кўзим илинибди. Тушимда ҳам катта бир шаҳарга меҳмонга борган эмишман. У ерда бир қадрдоним кутиб олибди. Узоқ суҳбатлашганимиздан сўнг менинг қандайдир бир бедаво дардим хусусида маслаҳат қила бошладик. Қадрдоним шаҳардаги энг зўр руҳий касалликларни даволайдиган табиб олдига олиб боришини айтди. Биз олдинма-кетин йўлга тушдик. Йўл балчиқ эмиш, бу ҳам етмагандек, ёмғир шивалаб ёғмоқда, атрофни туман босган. Йўлнинг икки четида ҳар хил машиналар лойга ботиб ётган эмиш. Дунёдаги энг катта шаҳарнинг йўллари бунақа балчиклигидан ҳайрон бўлиб дўстимнинг ортидан бораёт-

сам, «Нима бўлса ҳам, бу ерда адашиб қолма», – дея ўртоғим қўлимдан маҳкам ушлаб олибди. Нимагадир: «Агар адашиб қолсан, нима бўлади?» – деб сўрадим ўртоғимдан. Ўртоғим менга шунақанги совуқ нигоҳ ташладики, этим увушиб кетди. «Бу ерда адашсанг тўғри қабристонга кириб қоласан. У ерда адашган тирик мурдалар сон-саноқсиз, қабрсиз санғиб юришибди. Сен ҳам тўғридан-тўғри ўшаларга бориб қўшиласан. Сўнг мен сенга ҳеч қачон ёрдам беролмайман. Шунинг учун атрофга эътибор бермай мени маҳкам ушлаб ол», – дебди. Шу пайт қаттиқ шамол туриб, атрофдаги ялангоч чинорларни илдизи билан қўпориб ташлабди.

Кутилмаган қуюндан нимадир учиб келиб кўзимга кирди. Бир қўлим билан уни олиб ташлайман деганимда олдимдаги аллақандай нарсага бориб урилдим. Ўртоғим қўлимни тутиб қололмади. Кўзимдаги оғриқ, ёмғир, атрофдаги балчиқ обдан ҳолдан тойдирди, анча вақт ерга мук тушиб ўтиришга мажбур бўлдим. Кўзларимни чирт юмганча: «Барибир, ўлар эдим-ку. Нима қилардим ўзимга шунчалик азоб бериб, бегона юртда, бегона одамлардан умримни узайтиришга умид қилиб... бу ерларда сарсон-саргардон бўлиб юришнинг менга нима кераги бор эди?» – дея борган сари кучаяётган шаҳар аҳлининг қий-чуви, ёмғирнинг шивиллаб ёғиши, шамол шовқинидан ваҳимага тушганча, ҳеч нарсани кўролмай у ёқ-бу ёққа интилдим. Бу орада кимлардир мени босиб ўтди, ниҳоят, ўзимни қўлга олиб, астойдил кўзимни тозалашга тушдим. Ҳаракатим бесамар кетмади: олдинига теварак-атрофни хирароқ, бироздан сўнг аниқ-тиниқ кўра бошладим. Нима бўлаётганига тушунмасам-да, ҳали ўзимнинг ҳаётлигимни ҳис қилиб: «Яшаш керак... фақаттина олдинга интилиш лозим», – деганча шаҳд билан ўрнимдан турдим, ўликми-тирикми, билиб бўлмайди-

ган одамларга эътибор ҳам қилмай бир-икки қадам ташлашим билан оғзи қулоғигача балчиққа ботган, икки-уч ёшлардаги йифлаётган болакайни кўриб этим жунжикиб кетди. Болани балчиқдан кўтариб олиб ифлос қўлларим билан унинг кўзлари атрофини тозаладим. Болакайнинг катта-катта, қоп-қора кўзларидан тинимсиз ёш оқарди. Уни бағримга маҳкам босганча онасини ахтара бошладим.

Шовқин-сурон авжидা, атрофда ташлаб кетилган болалар жуда кўп, баъзилари балчиққа тиқилиб, жон таслим қилган, қолганлари эса жон талвасасида. Катталар эса бир-бирларини турткилаб, йўл-йўлакай болаларни босиб-янчиб олдинга қараб суринишида. Болаларнинг аянчли йифлаётган овози, эркакларнинг сўкиниши, аёлларнинг шангиллаши, чор атрофда билқиллаб ётган балчиқ, яна қаердадир сувнинг шилдираши... Бағримдаги боланинг йифлаб мендан егулик сўраши ич-ичимни эзиб юборди. Болакайни янаям маҳкамроқ бағримга босганча балчиққа булғаниб олдинга интилар эканман, бу шаҳарга нимага келганимни ҳам унутиб, атрофдаги гўдакларнинг бирини елкамга, бирини бўйнимга, бирини бағримга босиб, турган жойимда тиз чўкканча қоп-қора балчиққа буланиб, биринчи марта ҳаётнинг нақадар аччиқ эканини ҳис қилиб уларга қўшилиб овозим борича уввос тортиб йифладим.

Ўз овозимдан уйғониб кетиб, қаерда ўтирганимни англаёлмай, бир сония рўпарамдаги майин шабададан тебранаётган чинор учига тикилиб қолдим.

Қуёш тафти олдингидан анча қайтган, майдончада болалар шовқин солиб ўйнашмоқда эди. Уларнинг ёнидаги ўриндиқларда эса шу атрофдаги кўп қаватли уйларда яшовчи аёллар ўрнашиб олиб қандайdir мавзуда суҳбатлашишарди. Майдонча четига қатор экилган кўктеракларнинг учлари шамолда ҳилпирав,

улардан бирига қўнган қандайдир бир қуш чўзиб-чўзид сайраганча қотиб қолган бўғиқ ҳавога аллақандай мунг таратмоқда эди.

Кўзимни очиб, ўзимга келишим билан икки қадам нарида сочи узун елим қўғирчоқни ўйнаб ўтирган жажжи қизалоқча кўзим тушиди. У менга шунақанги бир ҳайрат билан термилиб ўтирас әдик, бундан тушимда йиғлаганимни у ҳам сезгани билиниб турарди. Қизалоқ бироз қараб ўйланиб тургач олдимга келиб, қовоғини уйганча қўйладаги қўғирчоқни узатди. Ҳайрон бўлиб қўғирчоқни қўлимга олдим. Қизалоқ эса мамнун бир қиёфада аёллар томон югуриб кетди. Нима қиласримни билмай малласоч елим қўғирчоқча термилиб ўтиридим, сўнgra бу ерда нега ўтирганим эсимга тушиб, ҳамроҳимга қарадим. У ҳам худди қизалоқ сингари менга ҳайратланиб боқарди. Үнга норози кайфиятда назар ташладим. У эса, одатдагидек, киприк ҳам қоқмай сурбетларча тикилиб тураверди.

«Бу нима қилиқ? Нега менга бунчалик ёпишиб олди, тавба! Одам ҳам одамга шунақа ёмон қарайдими?» Кўрган тушимдан юрагим эзилгани камдек, ҳамроҳимнинг совуқ нигоҳидан ўртаниб кетдим. «Мендан нима истайсан ўзи, гапир!» – дедим биринчи марта овозимни чиқариб.

Нотаниш киши эса ҳеч нарсани эшитмагандек юзини ўтириди. Жаҳлим чиқиб шарт ўрнимдан турдим. Ҳамроҳим ҳам ўрнидан туриб, гёё менга энди нима қиласиз дегандек бақрайиб тикилиб турди. Унинг кўз қорачиқлари аллақандай изоҳлаб бўлмайдиган ўзгача бир рангда бўлиб, қарашлари жуда ҳам ювош, бу нигоҳлардан қалбан менга мутелиги сезилиб турарди. Бу қараш юрагимни юмшатиб юборди, бироз ўйланиб тургач яна жойимга ўтиридим. Нотаниш киши ҳам индамай ўриндиқча чўкди. Иккимиз индамай рўпарамиздаги майдончада икки жамоа бўлиб тўп сураёт-

ган турли ёшдаги болаларнинг ўйинини томоша қила бошладик.

Болаларнинг бири озғин, бири новча, яна бири бақалоқ әди. Уларнинг кўринишидан шу атрофда яшашлари билиниб турарди. Икки жамоа дарвозасини ҳам кўринишидан нимжон, ёши ҳам жамоадошларига нисбатан анча кичик болалар қўриқлаб турарди. Тўп дарвозадан ўтиб кетса, жамоадаги болалар уларга овозлари борича бақиришар, сўкишар, баъзида тепкилаб ҳам олишарди. Дарвозабонлар эса бу сафар ҳушёрроқ бўлишга ҳаракат қилишар, аммо фойдасиз әди. Ажабланарлиси шундаки, улар барча ҳақорат ва тазийкларга ҳам бардош бериб ўйинни давом эттиришар, муҳими, футболдан чиқариб юборишмаса бўлгани әди.

Болаларнинг ўйинини кузатиб ўтириб ўзимнинг ҳам болалигим ёдимга тушди. Бир вақтлар мен ҳам катта болалар билан футбол ўйнашни ёқтиардим. Улар мени фақат дарвозага қўйишишарди. Худди шу болалар сингари қанчалик ҳушёр бўлмай, барибир, тўпни дарвозадан ўтказиб юборар ва жамоадошларимдан сўкиш эшитардим, баъзида ўйиндан чиқариб ҳам юборишарди. Шуларни ўйлаб бироз енгиллашиб мийифимда кулиб қўйдим. Бу вақтда нотаниш ҳамроҳим тағин юзига шляпасини бостириб, бошини ўриндиқ суюнчиғига ташлаганча ухламоқда әди. Ёнимдаги одамнинг ухлаётганини сезиб, бир хаёлим ўрнимдан туриб кетиб қолсамми деб ҳам ўйладим. Нимагадир ҳамроҳимнинг ухлаб ётганидан фойдаланиб қочиб кетгим келмади.

«Бирон-бир мақсади бордирки, эрталабдан бери ортимдан эргашиб юрибди. Агар ҳозир кетиб қолсам, унинг шунча хатти-ҳаракати, мақсади жумбоқлигича қолади», – дея хотиржам уйқуга кетган ҳамроҳимга кўз ташлаганча болаларнинг ўйинини кузатишда давом этдим.

Ҳаво жуда ёқимли, майин шабада эсмоқда. Кимлардир шошилиб ишдан қайтмоқда, яна кимлардир пардоз-андоз қилиб қаергадир кетмоқда. Майдонча эса болалар билан банд. Атрофдаги ўриндиқларга эркаклар, аёллар ўрнашиб олишган, кимдир баҳслашмоқда, кимдир шахмат ўйнамоқда, яна кимдир ҳаммани кузатиб хаёл суриб ўтириби. Одамларнинг кўплигидан вақт алламаҳал бўлиб қолганини ҳам сезмай қолибман. Ёнимдаги ҳамроҳим эса ухламоқда. «Кўзингни оч. Одамларга эътибор бер, ҳамма ўз ташвиши билан банд. Фақат сен нима қилаётганингни билмай, бемақсад ўзингни ҳам, мени ҳам қийнамоқдасан. Кел, ундан кўра мана шу ҳузурбахш ҳавода самимий сухбатлашайлик, бир-биrimizни яқиндан билиб олайлик. Сен ҳам ўзингни қийнаб юрган дардларингни айт, мен ҳам ўйлаб ўтирган жавобсиз саволларимни айтай...» Шу пайт биз томонга калта бўйли, тўладан келган, кўзлари бесаранжом киши келиб, ўриндиқ торлигига қарамай, ҳамроҳим билан ўртамизга тикилди. Унинг бу қилиғидан бироз таажжубландим. Чунки бу вақтда одамлар уй-уйларига тарқалган, ўриндиқлар эса бўшаб қолган эди.

Бу одамнинг нияти ёмонлигини яқинлашгандаёқ сезгандим-у, бироқ иложсиз әдим. Ҳеч нарсадан бехабар ухлаб ётган ҳамроҳим эса бу одамнинг келиб ўтирганини ҳам сезмади. Олдинига ҳамроҳимга яқинроқ сурилиб, уни уйғотмоқчи бўлдим, нимагадир бу фикрим ўзимга маъқул келмади. Аввало, ҳамроҳимнинг ҳатто исмини ҳам билмайман, қолаверса, орамиздаги масофа бир-биrimizга мутлақо бегона эканлигимизни кўрсатиб туриби.

Нотаниш киши ҳам ниятимни дарҳол тушуниб, менга шундай ёвқарааш қилиб тикилдики, ҳамроҳимга бирон нарса деб сўз очишга ҳам журъатим етмади. Бегона киши эса ҳеч нарсадан чўчимай хотиржам

жойлашиб олгач шляпали кишининг чўнтакларини кавлаштириб нималарнидир олди. Сўнгра менга ошкора менсимай тикилди-да, ўрнидан туриб, майдончани кесиб ўтиб, кўпқаватли уйлар орасига кириб кўздан йўқолди. Бу шаҳарда ўзимнинг мусофир эканимни, мана шу мусофирлик жуда кўп нарсалардан чегара-лашини, энг ёмони, ёнгинамда содир бўлган жиноятга лом-мим дея олмаслигимни ҳис қилиб, ҳалиги киши-нинг ортидан тикилганча қолдим. Кўз очиб-юмгунча юз берган бу воқеадан карахт бўлиб, бир муддатдан сўнг ўзимга келиб, ҳамроҳимга назар ташладим. У эса дунёдан бехабар, ҳамон юзига шляпасини ёпиб, бо-шини ўриндиқнинг орқа суюнчиғига ташлаганча ухлаб ётарди.

«Тавба, шунақа ҳам фалати одам бўладими?» Бор-будини кимдир шилиб кетса-ю, ҳеч нарсани сезмаса. Бўлиши мумкин эмас. Ёки сезиб турса-да, индамади-ми? Йўқ, сезиб индамаслиги мумкин эмас. Аммо кис-савурнинг ҳаракатини билмаслиги ҳам мумкин эмас, бу фалати-ку дея ҳамроҳимдан кўз ололмай уни бироз кузатдим.

Вақт алламаҳал бўлиб, одамлар уй-уйларига тар-қалишган, кўчадаги машиналар ҳаракати ҳам олдин-гидан бироз сусайган, ҳаммаёқ жимжит. Биздан сал наридаги ўриндиқда икки ёш бир-бирига чирмашиб ўтирибди. Кутишни бас қилиб ўрнимдан турдим. Уни уйига кузатиб қўяман-да, ўзим меҳмонхонага қай-таман. Йўлда бир-биrimiz билан танишиб олармиз, ўшанда киссавур ҳақида гапириб бераман деган ўй билан: «Ҳой ўртоқ! Тур ўрнингдан, уйингга кузатиб қўймоқчиман, кўзингни оч. Вақт ҳам кеч бўлиб қолди. Атрофга бир қара, ҳеч ким қолмади. Ҳамма уйқуга кетди. Уйингдагилар ҳам кутиб қолгандир», – дедим. Ҳамроҳимнинг қилт этмай ўтиришини кўриб, ўзи ҳам ўликка ўхшаб ухлайди, шекилли, дея унинг ёнига

ўтириб секин билагидан туртмоқчи бўлганимда унинг билаги муздеклигидан чўчиб кетдим. Ҳамроҳимнинг шляпасини кўтардим. Нотаниш ҳамроҳимнинг кўзлари юмуқ, оғзи эса қийшайиб очилиб қолганди. Кундузи ҳамроҳимнинг қош-кўзлари тимқора эди, ҳозир эса бу қош-кўзлар сарғайган, ҳатто териси ҳам сарғайиб кетгандек эди. Унга термилиб туриб бу одамни қаерда кўрганман дея ўйлай бошладим. Истараси иссиқ бу одамнинг қира бурнига, сарғайган қош-кўзларига қараб уни танидим. Бу талабалик давримда сирлилигича қолган Комил эди.

Нима қиласримни билмай кутилмаган учрашувдан тошдек қотиб, шунақаси ҳам бўларкан-да деганча чуқур хўрсиндим. Сўнг унинг юзини қайтадан ёпиб, «Қачон ўлиб ултура қолдинг, қанақанги одамсан ўзи, нега ҳар сафар хотирамда жумбоқлигингча қоласан?» – дея секингина пичирладим.

Қанча вақт Комил билан ёнма-ён ўтиридим, ўзим ҳам билмайман, аммо миям бир қарорга келган эди. Мен бу одамни мутлақо танимайман! Отаси телба, онаси-чи!?

Индамай кетишни эса ўзимга эп кўрмадим, бироз паришонликдан сўнг нарида бир-бирига чирмashiб ётган ёшларнинг олдига бориб томоқ қирдим. Йигит бошини кўтариб: «Нима истайсан?» – дегандек менга бақрайиб қаради. Бўлган воқеани қисқагина тушунтиридим.

– Ҳой, ўзинг бир келгинди бўлсанг, қолаверса, уни мутлақо танимасанг, нима қиласан бошингни қотириб? Ҳозир милицияга бориб бўлган воқеани гапириб берасан, улар сенга раҳмат айтишмайди. Биринчи бўлиб ўзингни тергов қила бошлайди. Нима, сенга шу керакми? Ҳозир замон ўзгарган. Ҳамманинг ўз ташвиши бор. Бирор бирорвонинг ишига бурнини тикиши яхши одат эмас. Қолаверса, кўчадаги ўликлар билан

шуғулланадиган махсус ташкилот бор. Сенга ўхшаб учраган ўлиқдан ҳайратланиб ўтирсак, дунёда ри-вожланиш бўладими? Нима қилибди, ўлса ўлибди... Ҳов ана, нариги ўриндиқда ҳам биттаси ўлиб ётибди, билмадим, балки, мастдир. Аммо бу ер катта шаҳар. Одамлар ота-онасини ўйламайди-ю, кўчадаги ўлиқлар билан нима ишинг бор? Қўй, бошингни ачитма, бор, йўлингдан қолма, – деганча йигит юзини терс буриб, сочи тўзиб ётган «қўйирчоги»ни қучоқлаб, мени ошкора масхаралаб ҳиринглай бошлади. – Туришини қара, худди ўзга сайёрадан келганга ўхшайди. Кап-катта киши-ю, ҳалигача шаҳар ҳаётини тушуниб етмаган. Биласанми, ойимнинг қайсиdir вилоятдан дайдиб келиб бирга яшаётган эри кутилмаганда ишхонада газ портлашидан ўлди. Ойимга ишхона жабрдийда сифатида пул ажратмади. Сабаб, улар ЗАГС-дан ўтишмаган, фақат эскича никоҳдан ўтишган экан, холос. Қонуний никоҳдан ўтишга, билмадим, уларга нима тўсқинлик қилди экан? Билганим шуки, чол қурғур онамнинг қонуний меросхўр бўлишини истамаган. Мана оқибати... Қўмиш маросимига озмунча пул керакми?.. Натижада ойим жасадни кўмишдан бош тортди. Тириклигига ойим неча марта: «Қонуний никоҳдан ўтайлик», – деган. Лекин у кўнмаган. Мана, оқибати нима билан тугади... Манави сўтакнинг туришини қара. Ҳозир мендан нима истайсан деб ўрнимдан турсам, олижаноблигидан ном-нишон ҳам қолмай, шаталоқ отиб қочади.

Йигит ҳиринглаб яна қизига ёпишди. Қиз эса мени сузилган кўзлари билан кузата туриб йигитини гижижилади:

- Балки, ҳақиқатдан ўрнингдан турарсан.
- Агар шундай қилишим лозим бўлса, ҳеч иккилан-майман, – йигит шундай дея менга қайрилиб қаради. Мен эса нима қиласримни билмай тош қотиб турардим.

Фикри-хаёлим Комилни шу аҳволда ташлаб кетмасликда эди.

Йигит ўрнидан турди. У дуч келган нарсани мода билиб әгнига илиб олган, кўринишидан нимжон, бўйи ҳам менга нисбатан анча паст; қизнинг олдида ўзини намойиш қилишига қараганд, енгил тарбия кўрган, ўз хатти-ҳаракатларини мушоҳада қилмайдиган, ҳистийгуларини бошқара олмайдиган ёшларнинг қолоқ бир тоифасига мансублиги яққол кўзга ташланарди.

Қиз ҳам кўринишидан йигиттага мос, икки қўйлини ўриндиқ четига тираб, йигитни менга қарши гижгижлар, у эса худди рингта чиқаётган боксчига ўхшаб турган жойида беўхшов сакрарди. Қиз эса нуқул ҳирингларди. Атрофда ҳеч ким йўқ эди.

Ҳар қандай вазиятда ҳам охирини ўйлаб иш тутишга одатланганим сабаб бошим қотди. Воқеанинг бу тарзда кескинлашаётганидан лол эдим. Энди ўриндиқда чўзилиб ётган Комилнинг ўлиги эмас, аксинча, рўпарамда оқибатини ўйламай маймунга ўхшаб сакраётган лақма бола мени ўйлантира бошлади. Йигит турган жойида бир-икки сакради-да, қўйқисдан жагимга мушт солди. Қўзларим олдида юлдузчалар чақнаб кетди. Бу орада у кетма-кет яна икки мушт солди. Муштнинг зўридан чайқалиб, ўриндиқнинг нарига чеккасига бориб бошим билан урилдим. Бошимда қаттиқ оғриқ туйдим. Ўзимни ўнглаб олишга фурсат бўлмай йигитча мени ердан даст кўтариб яна бир мушт солди. Қиз овозининг борича хохолаб кула бошлади. Энди жавоб бермасам бўлмасди. Ўзимни шартта ўнглаб олдим-да, йигитчанинг қорнига мушт туширдим. У буқчайиб қолиши билан оёғига, елкасига тепдим. Устига бостириб бориб, чап қўлимда сочларидан чангаллаб, ўнг қўлимни ҳал қилувчи зарба учун кўтаргандимки, «Акажон, кечиринг!» – деб додлаб юборди бола. Қизи бўлса жимиб қолган, нарироқ-

қа бориб, жунжикиб турарди. Аммо сабр косам лим-мо-лим тўлиб бўлган, охирги томчи қуюшқонимдан чиқариб юборган эди. Шу боис йигитнинг оҳ-воҳига эътибор ҳам бермай, унинг башарасига туширдим. Шу билан ерпарчин бўлди. Уни ўчди. Бошимни кўтариб қарасам, қиз аллақачон фойиб бўлибди. Қизиқ, бунақа вақтда қизлар чинқирганча одамларни бошига тўпларди, буники эса ими-жимида фойиб бўпти. Оёғим тагида тўшалган йигит қимирлади. Нарироққача ўрмалаб борди-да, кейин орқасига қарай-қарай йўлга тушди. Унинг ортидан бироз тикилиб турдим-да, сўнг ўриндиқда ётган, куни бўйи ортимдан соядек эргашиб келган Комилга кўз ташладим. Бу орада қўллимда оғриқ сезилди. Қўллим лат еган эди. Бармоқларимни қимирлатиб хавотирланадиган жойи йўқ деган хулоса билан яна марҳумнинг тепасига келдим.

Атрофда ҳеч ким йўқ, шаҳар чироқлари чарақланча нур сочиб турарди.

Ўрнимдан туриб марҳумнинг юзини ёпиб турган шляпани кўтардим-да, тўсатдан чақмоқ ургандек сакраб тушдим. Шляпани ёпиб, бироз турдим-да, яна очдим. Унинг юмуқ кўзлари, бир томонга қийшайиб, очиқ қолган оғзига зеҳн билан назар ташладим. Йўқ, янглишмабман: бу менинг ўзим эди. Худди тошойнада ўзимни кўргандек, таниш чехрамдан кўз узолмай таажжуబим яна ортди. Эҳтимол, ақлдан озаётгандирман? Наҳотки?.. Жасад атрофини бемақсад айланарканман, наҳотки, ўзимман дейман қайта-қайта. Миям аниқ-тиниқ фикрламоқда, эс-ҳушим жойида-ку. Нега унда?.. Жасаднинг ёнига ўтиридим. Атрофни кузатдим. Ҳаммаси ўз ўрнида, мен туш кўрмаяпман. Ёнимда ётган жасадга, ўз лошимга қарайман. Йўқ, ҳаммаси тўғри, бу айнан ўзимман. Бошқача айтганда, менинг иккинчи қисмим, ҳа, шундай, янглишмадим. Бу ўша, мени умр бўйи безовта қилиб келган ичимдаги ўша

кимса. Демак, ундан қутулибман. Қутулдиммикан, иш-қилиб?! Охири бир тўхтамга келиб ўрнимдан турдим, жасадимга қараб аччиқ қулимсирадим: «Оғайни, ким бўйсанг ҳам, биласанми, ҳалиги йигитча тўғри айтди. Мегаполис шаҳарларда одам бир чақага арзимайди. Энг даҳшатлиси, улар бир-бирлари билан ёнма-ён яшасалар-да, ниҳоятда бегона ва ёлғиздирлар...»

Шундай дедим-да, мурданинг юзига сўнгти бор кўз ташлаб, шляпасини ёпиб қўйдим.

Одатим бўйича бу сўзларни овоз чиқариб айтишим билан нимадир юрагимда нохуш из қолдириб, илдиз-пилдизи билан гурсиллаб қулаганини сездим, гўё қулоқларим шанғиллаб кетгандек бўлди. Бирпас қоронғи бўшлиққа маънисиз тикилиб турдим-да, ҳали тирик эканлигимни қайта-қайта ўзимга таъкидлаб, бу ерда қиласидиган ишим қолмаганлигига амин бўлиб, машиналар физиллаб қатнаётган катта кўча томон одимлаб кетдим.

## Мундарижа

Қадрдонлар .....	3
Аросатдаги одамлар .....	121
Кутилмаган учрашув.....	248

*Адабий-бадиий нашр*

**Шаҳло ҲОШИМОВА**

**АРОСАТДАГИ  
ОДАМЛАР**

**Муҳаррир:** Абдулла ШАРОПОВ

**Бадиий муҳаррир:** Баҳриддин БОЗОРОВ

**Техник муҳаррир:** Дилшод НАЗАРОВ

**Саҳифаловчи:** Иномжон ЎСАРОВ

**Мусахҳих:** Отабек БОҚИЕВ

Нашриёт лицензияси: АI №134, 27.04.2009

Теришга берилди: 15.10.2018 й.

Босишга руҳсат этилди: 03.11.2018 й.

Офсет қоғози. Қоғоз бичими: 84x108  $\frac{1}{32}$ .

Journal Accent гарнитураси. Офсет босма.

Ҳисоб-нашриёт т.: 12,4. Шартли б.т.: 15,1.

Адади: 2000 нусха.

Буюртма № 111

«АКАДЕМНАШР» нашриётида тайёрланди.

100156, Тошкент шаҳри Чилонзор тумани 20<sup>А</sup>-мавзе 42-уй.

Тел.: (+99871) 217-16-77

e-mail: info@akademnashr.uz

web: www.akademnashr.uz

«PRINT LINE GROUP» XК босмахонасида чоп этилди.

100096, Тошкент шаҳри Бунёдкор шоҳқўчаси 44-уй.